


Ĕhwati Gali



Portions of the Holy Bible in the Yalë language of Papua New
Guinea

Ēhwati Gali
Portions of the Holy Bible in the Yalë language of Papua New Guinea
Buk Baibel long tokples Yalë long Niugini

copyright © 2022 Wycliffe Bible Translators, Inc.

Language: Yalë (Yale)

CC BY-SA required by use of Sweet Publishing CC BY-SA licensed illustrations in the printed edition.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-08-09

PDF generated using Haiola and XeLaTeX on 21 Feb 2024 from source files dated 13 Dec 2023
4a4fca1d-2276-53e5-95b2-a315846297c3

Contents

Jenesis	1
Mak	23
Luk	62
Aposel	128
Filipai	195
1 Tesalonaika	203
Jems	210

Jenesis Josepbë anebo gali

37; 39–50

Josepbë anebo gali

37

37; 39–50

Josep bolijahani bume tëbojiwa lamotlola

¹⁻² Jekop na bubë nëbalebë anebo gali melëgëbetëme lalële. Jekop Kenan life mëta mana tafa tle. Ètani bolijaya kë life mëta tafa tle. Na Jekopbë nëba Josep, bu falake ho, na bu 17 tlibutu këniiji watle. Na këbë hona bolijahanina bolijayabë sipsip klelina mëmë klelina li li ona mëta mëtlëwagukefëma. Na Bilha na Silpa bu Jekopbë fli one. Na kë tlemalë one bu Josep bolijahanibë botamenino. Na Josep bolijayame gali tujuwelikefle, “Afani sipsip kleli mëglëma sle hana mla.”

³ Na Jekop, bubë li weniji Israel, bu hoti tafa tëglëna, bubë mëse Josepme mana fata totle. Na bume tako tole këme tletle na kwe bubë fli bowenime tokwëfo tolewa latletëme. Na bu ëho lalëmu susu totle na Josepme tlële. ⁴ Na Josepbë bolijahani bolijayabë lowene hwi motlotla na bu melowene mëtla, “Aya Josepme fwa feilawa sle lotlefe na kwe sëmë mesle hana lëtana.” Na këme nëgëme bu Josepme tëbojiwamu këme mëtletla na bu Josepme lalë lalë gali hana motlola.

⁵⁻⁷ Na Josep nimitelë hwi tle na bolijahanime gali tlome, “Bo nimitelë gali të nëtatëyo. Sebo nuju mago wesibi kë lalei notomabë na kwe bobë witi hi wesibi leitabo lahujuwa mële na sobobë witi hi wesibi leitabo bobëme lasabuwa motome, na bobëme labubusuwa mëtletëme, eso home fene bubusu mëtletle.” Na bu kë nimitelë gali yafe aholokwane mëtla na bu Josepme tëbojiwamu mëtletla.

⁸ Na bolijahani gali motlola, “Ju melowene lalene? Sebobë eso ho tafa naegletënamene?” Na kë nimitelë gali aholokwane motlola, na bu këme enisusu mëtletla.

⁹ Na tokwafe Josep li nimitelë hwi tle. Na bolijahanime ita të tëtätëme. Bu megali tlome, “Bo li nimitelë mehwi nelë. Na bo klijiina, yemena, sigetobana we ita jwa këniiji mehwi nanolomë. Na bome bubusu mëletënë.”

¹⁰ Na bu kë nimitelë gali bolijayame mata të tëtätle. Na bolijaya tako wame metlole na gali tlole, “Kë habëtabo nimitelë gali të etolene? Ju melowene lalene? Sebo bitana blijahaninona sëkefo miti bubusu nanëgletëyomene?” ¹¹ Na Josep bolijahani bume tëbojiwa motlola na bume tëbo lowene fa mëtëtätla. Kwe bolijaya kë nimitelë gali mana lowene tokoukefëtla.

Ismael enëne Josepme Isip lifewa mëtlelula

¹² Tokwafe Josep bolijahani Sekem lifewa mititiya, bolijayabë sipsip kleli mëglëwagukefëma namëglame. ¹³ Na Jekop Josepme gali tlole, “Ju walowene eletëme. Blijahani sipsip kleli Sekem life li mëta kë mëlëma. Bo jume bu belë jine nëgelëkakëme.” Na Josep gali tafu tëtätle, “Wo, nogowimefe.” ¹⁴ Bolijaya gali tlole, “Blijahanime hwi eujuwelëmeme, lalowa tafa mulane? Na sipsip kleli na mëmë kleli mata hwi elomeme, lalowa milibene o hanane. Na bome gali elëfanëme.” Na Jekop bume Hebron life mago jine tlële. Na Josep tugujubëë na Sekem lifewa, fwa tule. ¹⁵ Na bubë bolijahaninome hohwi tëtägutëme. Na ho li bume hwi telokwacle na tuju tle na gali tlole, “Ju fëye wesibi hohwi etatlene?”

¹⁶ Na Josep bume megali tlole, “Bo bobë afaninome hohwi nëtatëmëyo. Ju bome lalowa gali eglonëmene? Bu sipsip kleli na mëmë kleli fëye life mëta mlëmane?”

¹⁷ Na kë ho gali metafu latëtätle, “Ebë life wakile mëtla. Bo bume waa-holokwane tlomë. Bu megali lamëtla,

“Te manuja. Totan lifewa.” Na Josep bume Totan lifewa esogo tlagume na hwi telokwakëme.

¹⁸ Na bu kakëwa asë tëkeke, na bolijahani bume mana hwi mëtelëkakla. Na bu blalo gëgali mëtla, bume mogo nalë tëkle namogotlame. ¹⁹ Na gali mëtla, “Nimitelë tëgeijilawaho kë lisiyo. ²⁰ Te mogo nalë tëkle nogotlabëme mana sagli manëlëtla. Mogo nalë tëkle notlame na mogo tako flujuwa tuku nëtëkakame. Na bubë nimitelë gali fata hana lëgletleme. Na tokwafe ayame sogëna nololame, ‘Waluju mago kleli watëkle totle.’”

²¹ Na kwe Ruben kë gali aholokwane tlo me na Ruben, Josepme lëgaitalebeme lowene hohwi tëtatl, na megali tlo me, “Asa tëkle manotla, matëbe. ²² Sebo bume ona mago yefi tu fuluju elë fwa tuku manëtëkaka.” Ruben bu melowene latle, “Tokwafe bo bume fuluju mago ki nokokëme na aya belë jine nelëkaklëme.” ²³ Na Josep bolijahani belë fowa tëkaki. Na bubë lale ëho bolijaya kë susu tëgëtatlebë latohwawa mëtëtatla. ²⁴ Na bume fa mototla na tu jwa yefi tu fuluju elë tuku mëtëtëkaka. Na Ruben li sloslowa tle.

²⁵ Fe mëtëkaka na tafa mëtla. Na hi wesibi hi mëtëglabëë na Ismael enëneme hwi mëtelëkakëma, Gileat life mago mitisiya. Na bubë kamel kleli, lale lale lëkaluna wesibi na fli wesibi baliti tatakona kë glo mëglabë na kahalutaha wesibi, Isip lifewa mëtëmalitama, baliti këna glo namëglame. ²⁶ Na Juda bolijamonime gali tlo me, “Sebo Josepme mogo nalë tëkle nogotlana, kwe seme kë wesibi habelë lëgaitanamene. Tëkle asa manotla. ²⁷ Sebo bume Ismael enëneme baliti sëneme yo manoloma baliti këna glo nanëglame. Sebo bume tëkle hana nogotlame. Bu sebobë keinebamu nëgeme, sebobë ilawa mago.”

Na Judame gali motlola, “Jubë gali lale gali.”

²⁸ Na Ismael enëne bu belë Midian life mago fwa mëtëkakija. Na Josepme bolijahani fuluju mago ki

motokokëya. Na Ismael enëneme yo motloma. Na 20 silva baliti këna glo namëglame. Josep bubë wege manawa fa nalëgëtatëmeme. Na Ismael enëne Josepme Isip lifewa mëtëmalitala.

²⁹ Tokwafe Ruben fulujuwa tisi, Josepme ki nalokokeme fene. Kwe Josepme hwi hana tlole. Na bu tako maninibomu metletle na ye tletle. Na bubë ëho kaka totle, bu maninibo tëgletleme nëgeme. ³⁰ Na bubë bolijamoni belë tuju. Na bume gali tlo me, “Sebobë keinëba Josep bu fuluju mëta hana lëtabe. Masiwafe. Habelë nëgletelëmene?”

³¹ Na bu mëmë kleli mogo nalë tëke motlola. Na Josepbë ëho kë ko mëta flu mëtëtatla. ³² Na bu kë ëho bolijaya belë mëtehula na gali motlola, “Sebo ebë ëho waluju mago hwi tlo la. Ju ebë ëho eselële fene. Ebë jubë nëbabë ëho nowa.”

³³ Na bu ëho hwi sle tlole na gali tlo me, “O nëgalifee. Masiwafee. Bobë nëbabë ëhofe. Waluju mago kleli wahi tlefee.” ³⁴ Na bolijaya bubë ato mago ëho kaka totome, na tëbo ëho gëgelo tle. Na boweneme itaita meye tëkoukefëtlebëë. ³⁵ Na bowenenino na bokonino bu belë mitisitla, bubë maninibo tli namëgëtatlame. Kwe bubë maninibo lowene hana tli mëtëtatla. Na bolijaya gali tlo me, “Bo gli nëgelëna, na bobë nëba belë nëgëmatulëna, alibaho lifewa, bo mana ye nëgëmalitëme.” Na bu Josepme itaita ye tlekefëtletle.

³⁶ Na Midian life mago enëne Josepme Isip lifewa mëtëmalitala, na Potifarme baliti sëneme yo motlola, baliti këna glo namëglame, Josep bubë wege manawa fa nalëgëtatleme. Na Potifar bu eso ho Ferobë wege fa tëtakefetle. Na Potifar bu eso ho Ferobë plismanëbë eso ho tafa tletëme. Na bu iniwa, eso ho Ferobë lo mëta sei mëtlëkefla, wame ho lime. Fero bu Isip life mago eso ho tafa tletëme.

39

Josep bu Potifarbë lo mëta tafa tle

1 Na Ismael enëne Josepme Isip lifewa mëtletlula, na Potifarme yo motlola, baliti sëneme. Baliti këna glo namëglame, Josep bubë wege manawa fa nalëgëtatleme. Na Potifar bu eso ho Ferobë wege fa tètakëfëtle. Na Potifar bu eso ho Ferobë plismanëbë eso ho tafa tletëme. Na bu iniwa, eso ho Ferobë lo mëta sei mëtlëkefla, wame ho lime. Fero bu Isip life mago eso ho tafa tletëme. 2 Goto Josepme lataitale, këme nëgëme Josepbë wege lalowamu, këme lëbetle. Na Josep Potifarbë lo mëta tafa tle. 3 Potifar bubë wege hwi tlotle na bu melowene tle, “Bubë iniwa wege lalemu lëbetlefe. Goto lëgaitaleme nëgëme.” 4 Na bu Josepme fleflesu tletle na gali tlole, “Bobë iniwa wesibi tafa elelëmetënë.” 5 Josep Potifarna weife tafa mëtelo na këme nëgëme Goto Potifarbë ilawa mago home ululu sle tëtagume, na bubë iniwa wesibi mata na bubë nuju mago wesibi mata ululu sle tëtagumetle. 6-7 Na Potifar gali tlole, “Bobë iniwa wesibibë eso home tafa eletënë.” Na Potifar bubë iniwa wesibi hana tutune tletëme. Bu hi wesibime fwa lowene tle.

Na Josep bu tokwëfo tafawa kofene tle na Potifarbë no mana kë memaune tlële. Bu kalëlego homu na bu lale klisomu nëgëme. Na gali tlole, “Ju mana esi, bona ni nanëgebome.”

8 Kwe Josep tole hana tletëmu na gali tolë, “Bome bihe kë wesibime nane gali tlonë. Weye. Matëbe. Bome wagali tlonë, bubë wesibibë esoho tafa nëgelëbëme. Na bubë lo mago wesibi hana tutune lëletëme. 9 Bo ebë lobë bolijaya ho ha nëtabë. Bu bome iniwa wesibime hehë hana lëletënë. Jume fwamu hehë lëletënë. Sebo melë fëyeme nëgelomene. Matëbe. Kwe bo melë nëgelëna, bo Gotome tëbo nogotlëme.”

10 Na itaita mëse awi, gali tlokwefle, buna ni namëgebome.

Kwe Josep gali tle, “Matëbe.” Na loliwa hana tujutë.

11 Tokwafe li olëna, Josep lowa tëkaklu, bubë wege fa nalogotleme. Na fli wege ho hana tafa mëtla.

Buwa tafa telule. 12 Na Potifar no bu belë tisi tle na ëho mëta fa tetokwakile na gali tlole, “Esimo. Bona ni nanëgebo.” Kwe ëho bubë toba mëta lakilewa tletë na latlëbukakuwa. 13 Na mëse melowene tletle, “Josep walëlëboukakufe, na ëho tobana mana tehwatle.” 14 Na home we tlome na mitisitëya na bu gali tlome, “Sobo aholokwane elo. Bobë ho Hibru mago home sebobë lo eli kë tëglesulebë seme tëbo lalëtana. Bome lisëme yafe tou lëtanë, kwe bo mana kë jakle nelë. 15 Bo afëflei nëgelëme nëgëme bu mana kë lëlëboukaku. Na bu ëhowa bobë toba mëta kile lële.”

16 Na Potifar no ëho mana gwa tètakëfëtle na bohe lowa mana tisi. 17 Na boheme të tëtatlë, “Hibru mago home, ju kë tëglesulebë bome lisëme yafe tou lëtanë. 18 Kwe bo feilawa jiyakle noglölëme nëgëme, këme lëlëboukaku. Na bu ëhowa bobë toba mëta ekë kile lële.”

19 Na no kë gali të tëtatlë na Josepbë eso ho enisusu tletle. 20 Na Potifarbë wege enëne Josepme fa mototla na kalabusu lowa tuku mëtla. Eso ho Ferobë kalabusu enëne këme kë tafa mëglekefëyabë lowa mëtletlula. 21 Kwe Goto Josepme lataitale. Këme nëgëme bubë wege lalemu tëbetle. Kalabusu enenebë eso ho fleflesu tletle. 22 Na Josepme këme gali tlole, “Ju iniwa kalabusu hobë eso home tafa eletëme.” Na Josep bu kalabusu hobë wege hwi tlotëme. 23 Na Goto Josepna mëtëtabo na bubë wege taitatlë. Na këme nëgëme kalabusu lo bolijaya bu wesibi tutune hana tletëme. Josepbë wege lalemu nëgëme.

40

Josep bu nimitelë wayo gali të to-tome

1 Tokwafe eso ho Ferobë bletë nage ahujume lëglekefëtlebë ho na bubë hitu su lëtakëfëtlebë ho, humëi na hi lëglelëme, bu eso ho Ferome tëbo lamototlo. Na bu welili tletëme. 2 Na eso ho Fero kë tlemalë wege home wame tlome. 3 Na bu kë tlemalë home Potifarbë kalabusu lowa sike mëtla, Josep këme kë tafa tëglebë. 4 Na kalabusu

lo bolijaya Josepme gali tlole, “Ju kë tlemalë home tafa elelëme.” Na kë tlemalë ho kalabusu lo mëta tako olë tafa mëtelo.

⁵ Tokwafe eso ho Ferobë hi wesibi ahujume lëglekefëtlebë ho na hitu su lëtakefëtlebë ho, bu kalabusu lo mëta kë tafa mëtelobë, bu nimitelëna hwi mëtelo. Na bubë tële nimitelë esobë bwa bwa.

⁶ Na olobalë Josep bu belë hwime tuju tëme na mehwi latlome, “Yeluna alëla memëtelo.” ⁷ Na takune tlome, “Sobo fëyeme tutune elone?”

⁸ Na bu metafu mëtëtatelo, “Sebo nimitelë hwi nëgelome nëgeme, kwe seme li ho nimitelë esome hana gali lolono.” Na Josep bu tlemalë home gali tlome, “Goto nimitelë wayo gali buwa lowene lëletëme. Na buwa olafa lotometëname. Te, sobobë nimitelë galibë bome të etometëna.”

⁹ Na hitu su tëtakefëtlebë ho bubë nimitelë gali të totle. Bu gali tle, “Bo nimitelë nanelë wain taba liji hwi nololë. ¹⁰ Kë taba aona tikefona. Laba okwëfo foke mele. Na tahweji kë mëta fu mele. Na liji tatakowa mowalë. Na iniwa niglijji mele. ¹¹ Kë taba liji tu, lale iji lamële. Na bo eso ho Ferobë kabo fa nëtë. Na kë taba liji tu kiki notomë. Na bo kë tu eso ho Ferome kabona nëlëlë. Bobë nimitelë gali tei.”

¹² Na Josep gali tle, “Nimitelë esobë melëgëbelalëletle. Aona taba tikefobë, aona olëme lëlekuju lële. ¹³ Aona olë yawe na eso ho Ferobë wame lowene mana tli lëbetleme. Na mana eso ho Fero bu gali loglëme, ‘Ita esimo, jubë wege ita fa naegotleme.’ Na ju tokwafe eso ho Ferobë hitu ita su egëtakefëtleme, ëbame ju fene su tëtakefëttele, humëina hi lëglelime. ¹⁴ Na tokwafe, ju eso ho Ferobë lo mëta tafa eglena bome maninibo eletenëme na bome aholokwana asa ti ele. Lowene egletenëme na eso ho Ferome gali eloleme, bome kë kalabusu lo mago tuhu nalëgëtanëme. ¹⁵ Eëbamemu, bobë toba tabana lei mototometëna na Hibru life mago mana mëtlesuna ebë lifewa. Na bo ebë life mëta bo tafa

tëgelëna, bo fëyeha hana telë. Kwe bome blawa kalabusu mëtëтана.”

¹⁶ Na hi wesibi ahujume lëglekefëtlebë ho bu hitu su tëtakefëtlebë hobë nimitelë wayo gali aholokwane tle, na lowene tle, “Lalowafe.” Na Josepme gali tlole, “Bo melë nimitelë mehwi nanelë. Bo aona basketë musu bletë nage manogwa eso mëta gogwa mana nehwei. ¹⁷ Matawa mago isekubë eso ho Ferobë lale nage ëfomemu mobe. Na kwe fole kë nage, ëfo mago hi mele. Bobë nimitelë gali tei yawe lële.”

¹⁸ Na Josep gali tle, “Nimitelë esobë melëgëbelalële. Aona isekubë, aona olëme lëlekuju lële. ¹⁹ Aona olë yawe jwa mëleme na eso ho Fero jume kalabusu lo mago tuhu lëtame na jume mou lokwati sika lëtame. Na jubë ato ti mëta tabana kesi lëtatëme. Na fole jubë afabo mana hi meletëme.”

²⁰ Aona olëbëna eso ho Fero, bubë wege home tako salë fata tëtatëme, bota bume këna fu togotlebë olëbë salë. Na bubë hitu su tëtakefëtlebë ho na hi wesibi ahujume tëglekefëtlebë ho kalabusu lo mago tutuhu mëtla. Na mëtlesuma, na eso ho Ferobë naba li mëta ola mëtla. ²¹ Na eso ho Fero bu hitu su tëtakefëtlebë home gali tlole, “Ju ejume, na jubë wege ita fa naegotleme.” ²² Kwe eso ho Ferobë hi wesibi kë ahujume tëglekefëtlebë home ti mëta tabana kesi totle na lagliwa tle. Ebë wesibi mefata këme mëtle, ëbame nimitelë eso galibëme Josep fene gali tle. ²³ Kwe eso ho Ferobë hitu su lëtakefëtlebë ho Josepme aholokwanamu ti tle.

41

Josep eso ho Ferobë nimitelë wayo gali të lëtatle

¹ Tële tlibutu wamutuju na eso ho Fero nimitelë hwi tle. Bu nimitelë mehwi latle. Bu Nail tu helefo mëta tlibe. ² Na 7 bulmakau kleli tatako, tu mago fe motokoke, lifijuwa. Na bu tu helefo mago agosaba hi mele. ³ Na tokwafe 7 ato tikatabo bulmakau kleli mata tu mago fe motokoke. Na bu tatako bulmakau kleli mëglëbo

li mēta mētlibe. ⁴ Na tokwafe ato tikatabo bulmakau kleli tatako bulmakau klelibēme hi mētle. Eso ho Fero bu kē nimitelē hwi tle na ni mago lahujuwa tēkake. ⁵ Na ita ni tētebokwake na li nimitelē hwi tle. Witi hi wesibi jowa hulu lēle na kē jowa witi mēta hi wesibi 7 kēniji mēbe. Na bu tatako mēle na lalemu mēbe. ⁶ Na tokwafe li witi hi wesibi jowa hulu lēle na kē jowa witi mēta hi wesibi 7 kēniji mēbe. Kwe bu tokwētōkwē mēbe na tēbo lamele. Na ona elē mago atēte tabo flelu ligisibē na lakokowa mēbe. ⁷ Kwe kē tokwētōkwē witibē tatako witime lahiwa mele. Na eso ho Fero huju tēkake na lowene tle, “Bo nimitelēna hwi nelēfe.” ⁸ Na olobalē bu tako tutune latle. Na bu tatako lowene home na yanowai home mata we tlome. Na bubē tēle nimitelē gali tē tētātēme. Kwe kē enēne bume nimitelē wayo galibē tē sle hana mētētātla. Bu kē tēle nimitelē wayo galibē lowene hana mētletēma.

⁹ Na hitu su lētākefētēbē ho eso ho Ferome gali tlole, “O ējewa ekē lowene nelēfe. ¹⁰ Ēbame ju bo name hi wesibi ahujume tēglekefētēbē ho name wame latlona. Na ju seme Potifarbē kalabusu lowa sike tle. ¹¹ Kē mēta tafa telo. Na nimitelē hwi telo. Na sebobē nimitelē wayo gali bwa bwa. ¹² Na Hibru mago falake ho sebona tafa tla na bu kalabusu lo bolijaya hobē wege fa lētākefētēle. Na sebo bume nimitelē gali tē tētātelo. Na bu sebobē nimitelē wayo galibē olafa sle tētātēna. ¹³ Na wesibi mefata wametle bu fene gali tlonō. Bo jubē wege ita fa totlē, kwe ju hi wesibi ahujume tlekēfetēbē home ti mēta tabana kesi totle na bu lagliwa tle.”

¹⁴ Na eso ho Fero bu kē gali yafe aholokwane tlole. Na bubē wege home jine telēkakle, Josepme no nalēglēleme. Na kē ho Josepme kalabusu lo mago hokweinawa no tujuwelēle. Na Josep bubē ēbehuba laba glo tle. Na lalē ēho gegelo tle. Na eso ho Fero belē mētletlula. ¹⁵ Na eso ho Fero Josepme gali lolole, “Bo nimitelē mehwi nanelē kwe bu nimitelē wayo galibē tē hana mētātēna. Bu lowene hana mētletēma.

Kwe ho bu bome megali lamolona, ‘Ju nimitelē gali aholokwane eglēna na ju nimitelē wayo galibē lowene sle ekoutēmeme.’” ¹⁶ Na Josep gali lolole, “Bo kwe hanane. Goto kwe fēyemene. Buwa jubē nimitelē wayo galibē olafa logotometēme. Kwe jubē tutune lowene tli lēgēbetēme.”

¹⁷ Na eso ho Fero Josepme gali lolole, “Bo nimitelē mehwi nanelē. Bo Nail tu helefo mēta nilibē. ¹⁸ Na bo 7 tatako bulmakau kleli hwi nolomē. Na bu tu mago fe moko ke lifijuwa. Na tu helefo mago agosaba hi hi mele. ¹⁹ Na tokwafe 7 bulmakau kleli tu mago mata fe moko ke na bu ato tika tanono na elebowa. Na bo kēha ato tika tanono bulmakau kleli, Isip life mēta hwi hana nolomē. Hanane mu. ²⁰ Na ato tika tanono bulmakau kleli tatako bulmakau klelime hi mele. ²¹ Bu wahi mele, kwe bubē ato sēse hana meletēme, otome fene mitlibe. Na ēje mata mētābowa mēlibe. Na bo ni mago sagli nelēkaklē. ²² Na bo ita ni nētebokwakē na ita li nimitelē hwi nelē. Witi hi wesibi jowa hulu lēle na kē jowa witi mēta hi wesibi 7 kēniji mēbe. Na bu tatako mēle na lalemu mēbe. ²³ Na tokwafe li witi hi wesibi jowa hulu lēle na kē jowa witi mēta hi wesibi 7 kēniji mēbe. Kwe bu tokwētōkwē mēbe na tēbo lamele. Na ona mago atēte tabo flelu ligisibē na lakokowa lotome. ²⁴ Na kwe kē tokwētōkwē witibē tatako witime lahiwa mele. Na bo kē nimitelē gali waiyobēme, yanowai home yafe takune nolomē kwe bu bome nimitelē wayo galibē tē sle hana mētātēna.”

²⁵ Na Josep eso ho Ferome gali tlole, “Jubē tēle nimitelē gali kē nēgebē ebē jowa wayo galiwa. Goto bu wesibi jume wafi lebotane lētātē. Na kē wesibi tokwafe fata lēgleme. ²⁶ Na 7 tatako bulmakau klelibē, 7 tlibutume lēlekuju lēle. Na 7 tatako witibē mata 7 tlibutume lēlekuju lēle. Ebē tēle nimitelē gali kē nēgebē jowa wayo galiwa. ²⁷ Na 7 ato tika tanono bulmakau klelibē na 7 tokwētōkwē witibē, atēte tabo flelu kē koko totombē, bu 7 tlibutume

lëlekuju lële. Na kë 7 tlibutu, bu hi wesibi jwamu. Na bu foneme gigli mëglame. ²⁸ Bo jume ëje wagali nolë. Goto bu wesibi jume wafi lebotane lotometë. Na kë wesibi tokwafe fata lëgleme. ²⁹ Na 7 lale tlibutu migisina, Isip life mëta lebutako hi wesibi hulu mokoumemu. ³⁰ Na tokwafe kë 7 lale tlibutu yawe mëglana, 7 tëbo tlibutu migisime. Na bu mana foneme gigli nëlame. Hi wesibi jwa nëgeme. Na iniwa enëne, lale tlibutu lowenebë aholokwana ti mëglame. Na tako fone Isip life tëbo logotlememu. ³¹ Kë 7 tlibutu kë migisibë, bu tëbo tlibutumumu. Na oneho foneme gigli mëglame. Na iniwa oneho lale tlibutu lowenebë aholokwana ti mokoujame. ³² Goto bubë lowene këbë wesibi mëta wafi gwa lotle. Këme nëgeme, ju këha tële nimitelë këme hwi elome, ju kë wesibi lowene naegletleme.”

³³ “Te, ju lale lowene home hohwi etamëme na hwi eloleme na aniji eloleme. Na kë hobë Isip life enëneme tafa nalëglelëmeme. ³⁴ Na ju fli lale lowenena home aniji elomeme. Na 7 lebutako hi wesibi tlibutu migisina, kë enëne iniwa nuju mago hi wesibi loko mëtagujayame. Na bu tobali fu motomame. Na 4 fubë hi wesibi onehome sa mëtatëmame. Na jowa fubë hi wesibi gogwa lo mëta gogwa mulame. ³⁵ Na lale lowenena ho bu lale tlibutuna kë fata mëglebë hi wesibi loko mëtagujayame. Na bu, jubë lokwalëfe mëta fwa wege melame. Na bu witi liji na fli hi wesibi, loko lo takowa loko mëtagujayame.” ³⁶ Na 7 hi wesibi jwa tlibutu Isip lifate mëta fata mëglana, kwe Isip lifate mago oneho eso enëne kë loko mëgëtayabë lo mago hi wesibi glo mëlekefëyame. Këme nëgeme oneho foneme gigli hana mëglame.

Eso ho Fero bu Josepme aniji tlole, Isip lifebë eso home fata nalëgletëmeme

³⁷ Eso ho Fero na bubë wege ho, Josepbë gali yafe aholokwane mëtla na kë galibëme tako tole memëtletla.

³⁸ Na eso ho Fero gali lolome, “Gotobë Amtëtomba, bu mëta tafa lëletle. Na sebo këha home fëye mago hohwi nëgëtayamene. Sebo këha home hohwi nëgëtayana, kwe sebo këha home hana hwi noglolame, Gotobë Amtëtomba tafa lëgletlebë home, sebo Josep mefwa aniji noglolame, Gotobë Amtëtomba tafa lëgletleme nëgeme.” ³⁹ Na eso ho Fero Josepme gali tlole, “Goto buwa jume kë wesibi waolafa lotometë. Na li ho juha lowene ho hana tafa lële. Hanane mu. ⁴⁰ Bo jume këme aniji nolë. Bobë life mago onehobë eso ho tafa naegletëmeme, jubë gali aholokwane melame na esogo meletëtëyome. Ju bobë lokwalëfe mëta fwa tafa eletenëme kwe bo tako eso homu tafa nelëme.”

⁴¹ “Bo jume Isip life tafa eglelëlebë home ekë aniji nolë.” ⁴² Na eso ho Fero bubë toba baliti tohwa lëtamë, na bu Josepbë toba ku mëta gelo lëtatle. Kë toba baliti eso home lëlekuju elamë. Na bu lale ëho Josepme gelo lëtatle na lale tliji mou mëta lehotle. ⁴³ Na eso ho Fero bu kalë loha wesibi, wesibi Josepme lëlele. Hos kleli bu kë kalë loha wesibi, wesibime ki lokou. Na Josep bu këna na asë lëgëbelëfame. Na wege ho motoutaya na megali mëtlaguma, “Josep nagi kë lisiyo. Sobo alëge mago fë ebokwako.” Na kë lakalena, Josep, iniwa Isip onehome tokwefo eso home tafa tletëme.

⁴⁴ Na eso ho Fero Josepme gali lolole, “Bo Isip lifebë tako eso ho na bo megali nelë. Isip life mago oneho bu bubë lowenenawa wesibi li hana mogotlame. Jume afina takune molëyome.” ⁴⁵ Na eso ho Fero bu Josepme tiho weniji fë tëtatile, Safenat Panea. Na bu Potifera bokome yo tlole. Bubë weniji Asenat. Potifera bu Heliopolis life magobë fëso hi wesibi ahujume ahujume lëglekëfebë ho. Na Josep bu Isip lifate mëta tafa tle. Na bu Isip lifebë tokwëtokwë life elëme asë tëbelëfa.

⁴⁶ Na Josep bu 30 tlibutu watle na eso ho Ferobë wege mana fa tëtatile. Na bu eso ho Ferobë lo kile lotle

na Isip lifebë tokwëtokwë life elëme asë tëbelëfa. ⁴⁷ Na kë 7 lale tlibutu migisina na feilawa lale hi wesibi fata mëgleme. ⁴⁸ Na Josep bu kë hi wesibi loko tētagwi na jowa jowa lifatebë nuju mago hi wesibi loko lo mëta gogwa tokou. ⁴⁹ Na Josep bu kë loko tētagwibë hi wesibi yafe tabei tle. Kwe bu feilawa wesibimu yenëba fenene na bu tabei hana tle manawa gogwa tle.

⁵⁰ Na 7 tēbo tlibutu fata jwa mētēglena, Josep no Asenat tēle iko nēbale mana fata totome. Asenat Potiferabë boko na bu Heliopolis life magobë fēso hi wesibi ahujume ahujume lēglekēfēbë ho. ⁵¹ Na Josep gali tle, “Goto bome lalaitanë. Na bobë afani kë tēbo mētētanabë na ilawa mago enēneme aholokwana ti nelë.” Na këme nēgeme bubë abwa nēba, Manase weniji këme fē totle. Manase gali wayo ebë aholokwana ti. ⁵² Na bu ita gali tle, “Goto bome nēbale tēle tlēnë, hobota kë fa togotlēbë lifate mëta.” Na këme nēgeme bubë li nēbame Efraim weniji këme fē totle. Efraim gali wayo ebë nēba walēlēnë.

⁵³ Na 7 lale tlibutu mutuju. ⁵⁴ Na 7 tēbo tlibutu fata mētle, Josep fene gali tle. Na fli life hi wesibi alujawamu. Kwe Isip life mëta hi wesibi mana metēbe. ⁵⁵ Na tokwafe Isip life enēne tako foneme gigli mētle. Na eso ho Ferome gali motlola, hi wesibi nalēglēmeme. Na eso ho Fero bume gali tlome, “Sobo Josep belë eyeume. Na bubë gali aholokwane sle elolome, some gali sle nalēglēyome, na sobo bubë gali esogo elelētēlome.” ⁵⁶ Na Isip life mago enēne foneme tako gigli mētle na Josep hi wesibi loko lo ino mana titika tokoutēme. Na këbë enēne kë hi wesibi balitina glo namēkoukefēyame. ⁵⁷ Na fli life mago oneho mata foneme tako gigli memētle, këme nēgeme bu Josep belë mitisikefēya, na hi wesibi balitina glo mētlekefēya.

42

Josepbë bolijahani Isip lifewa mitisiya, witi hi wesibi glo namēglame

¹ Na Josep bolijaya Jekop, gali aholokwane tle, “Lale hi wesibi Isip life mëta memobe.” Na bu bowenenime gali tlome, “Sobo emēta tafawa fēyeme elone? ² Bo gali waaholokwane nelë, ‘Lale hi wesibi Isip life mëta memobe.’ Te, sobo kë lifewa eimome na lale hi wesibi kë mago glo emolome. Na sebo hi nanēglame, foneme gigli nēglalime.” ³ Na Josepbë 10 bolijahani Kenan life kile mototla na Isip lifewa mitimiya, lale hi wesibi balitina glo namēgemolame. ⁴ Kwe Jekop, Josep bolijamome Benjaminme, Isip lifewa jine hana tlēle. Bu melowene latle, bu ligimena na bume alēgeme tēbo mogotlame. Josepna Benjaminna jowa bota mëta fwa fata mētelo.

⁵ Na Kenan life mago enēne mata tako foneme gigli mētle. Këme nēgeme Jekop boweneninona na fli Kenan enēnena iniwa mitimiya, hi wesibi balitina glo namēgemolame. ⁶ Josep Isip life onehome tafa tlelēme. Na bu iniwa onehome lale hi wesibi sa tētākefētēme. Na bubë bolijahani, bu belë fata mētle na sēkefo miti tafa mētle na life elë hwi mētētēkaka. Josep bu Isip life mago eso ho nēgeme, bu sēkefo miti këme tafa mētletla. ⁷ Na Josep bu bolijahanime watēselēme. Kwe bubë weniji ēho latētātēme. Na bu feilawa jiyakle tlome, “Sobo hamago esijone.”

Na bume tafu mētētātla, “Sebo Kenan life mago nisiya, hi wesibi glo nanēglame.”

⁸ Na Josep bu bolijahanime wa tēselēme kwe bume hana mētēsēlēla. ⁹ Na Josep bu bolijahanime hwi tlome, bume sēkefo miti tafa mētletla. Na bu ētani kë hwi tēglebë nimitelē gali ita lowene tletle. Na bu gali tlome, “Sobo hwelutuwa hwi enēne. Sobo Isip lifatebë flesu ho jwa life hwime esijo. Na tokwafe këbë life tēbo naegotlome.”

¹⁰ Na bu gali tafu mētētātla, “O eso ho, weye, hanane. Sebo jubë wege enēne, hi wesibi glome nisiya.

11 Sebobë aya jowa. Sebo hwelutuwa hwi enëne hanane. Sebo nëgali enënemu.”

12 Kwe Josep gali tlome, “Hanane mu. Sogë lalo. Sobo Isip lifatebë flesu ho jwa life hwime esijo. Na tokwafe këbë flesu ho jwa life tëbo naegotlome.”

13 Kwe bu gali motlola, “O eso ho. Sebo we ita tèle nëbale na sebobë aya jowa, Kenan life mago ho. Na sebobë nagifu keinëba ayana tafa lamulo, kwe li keinëba wagli tle.”

14 Kwe Josep gali tle, “Weye, hanane. Bo ëje wagali nelë, sobo hwelutuwa hwi enëne. 15 Bo sobobë lowene su nëtatëyo fene. Sobobë gali nëgali gali o sogëna gali. Sobobë nagifu keinëba ebë life elë hana ligisina na bobë naba lime hana liglibena, kwe bo melowene, sobo sogëna gali na sobo sobobë lifekuwa hana egitome, hanane mu. Bo nëgali gali hana nëgelëna kwe melëmane bobë eso ho Fero tëbo malëtanë. 16 So mago li lujume na sobobë keinebame nolujuwelëlëme. Sobo fli kalabusu lo mëta mana tafa elome. Na bo lowene nanëgelëme sobobë gali nëgali gali o sogëna gali. Sobo sogëna egelona na sobobë keinëba hana eglesulona, kwe bo melowene nëgelëme, sobo hwelutuwa hwi enëne. Bo nëgali gali hana nëgelëna kwe melëmane, bobë eso ho, Fero tëbo malëtanë.” 17 Na këme wagali tle na kalabusu lowa sike tle na bu tèle olë kalabusu lo mëta tafa mëtelula.

18 Na aona olëbëna Josep gali tlome, “Bo Gotome esogo nëglelëkeflëbë ho na bo some këme manibo nëletëyo. Sobo bobë gali esogo eglolona kwe sobo lalowa tafa egelome. 19 Sobo nëgali gali hobë kwe bo metole nanelë, somago jowa howa kë kalabusu lo mëta tafa lëleme. Na sobo fli eitome. Na sobo kë glo tëgelobë hi wesibi sobobë ilawa enëneme ehwetutemome. Bu foneme gigli mëglalime. 20 Na sobobë keinebame bo belë elesutëname. Na bo melowene nanëgelëme, sobobë

gali nëgali galimufe. Na some hana tëbo nëgëtome.”

Na bu gali mëtla, “Jubë gali lalowa.” 21 Na Josep bolijahani blalo gali mëtla, “Nëgali, ëbame sebo keinebame tëbo totla. Na bu seme lëkle tëtana na yafe gali tlonä, ‘Matëbe, tëbo asa etana.’ Kwe bubë gali aholokwane hana tlola na bume manibo hana tletla. Këme nëgeme seme ebë hobota këme lisitëna.”

22 Na Ruben gali tlome, “Bo yafe gali tlëyo, keinebame asa tëkle etlo. Kwe bobë gali boblo latëtätëna. Josep gli tëgleme nëgeme, na kë hobota ko-fayame seme këme lisitëna.”

23 Na Josepbë bolijahani Hibru galina gëgali mëtla. Na Josep bubë gali lowene latletëme kwe bolijahani melowene lamëtla, “Bu sebobë gali lowene hana lële.” Josep Isip life hobë galina gali tlome na li ho Josepbë gali bolijahanime Hibru galina obwelë tëtätëme, këme mumu mëtëbetla, “Sebobë gali lowene hana lëlefe.”

24 Na Josep bubë gali aholokwane tlome. Na bume hune totome na hwelutuwa tako ye tletëme. Na ye kaju tëbe. Na ita tisi. Na bume gëgali tleleme. Na Simeonme aniji tole. Na tèle toba tabana lei totometle, bolijahanibë naba li mëta. Na bume kalabusu lowa tuku tle.

Josepbë bolijahani Kenan lifewa ita mititiya

25 Tokwafe Josep wege home hwelutuwa gali tlome, “Sobo ebë enënebë musu mëta lale hi wesibi sisike elete-momo. Kwe bu kë mëtehweijabë baliti, bubë musu ëfo mëta sike ek-outemome. Na sobo fli hi wesibi mata elëmome, alëgeme hi namok-oujame.” Na bu melë mëtla Josep fene gali tlome. 26 Na bolijahani bubë hi wesibi musu, bubë donki kleli matawa gogwa motola, na mititiya. 27 Mititiyabëë na olë ki tëbe na alëge mëta ni namëgebëyame. Na ho li musu tuhu tole, hi wesibi donki klelime lëglële nalëgleme. Na bubë baliti, musu ëfo mago hwi tlome. 28 Hwi tlome na bolijahanime we telokwakëme, “Bu bobë hi wesibi glo

baliti bobë musu mëta wasike mëlafa. Bobë musu mëta ekë mëtemole.” Na bu klelegomu memotokouja. Na uli mëtla na bu blalo gëgali mëtla, “Iyee! Goto bu seme habelë lalëtanane.”

²⁹ Na bu Kenan lifewa fwa mutula. Na bolijaya belë mutuja. Na bume kë fata tęgletëmebë wesibibë gali bolijayame të mëtëtatla. ³⁰ Na bu gali motlola, “Isip lifebë eso ho seme feilawa gali tlonā. Na blawa meso tëtātēna, ‘Sobo hwelutuwa hwi enēnefe.’ ³¹ Na sebo megali tloā, ‘Sebo nēgali enēnemu. Sebo hwelutuwa hwi enēne hanane. ³² Sebo we ita tēle nēbale na sebobë aya jowa. Na sebobë nagifu keinēba ayana Kenan life mëta tafa melo, kwe li keinēba wagli tle.’ ³³ Na kë eso ho seme gali tlonā, ‘Bo sobobë manibo fene su nētātēyo. So mago li ho bona tafa nelome na fliye eitome sobobë ilawa enēneme hi wesibi ehwetutemome, bu foneme gigli mëglalime. ³⁴ Na sobobë nagifu keinēba bome elesutēnana, bo melowene nanēgletēyome, sobo nēgali enēnemu na sogēna enēne hanane na hwelutuwa hwi enēne hanane. Na bo sobobë afame kalabusu lo mago tuhu notokwaklëme. Na sobobë lifewa ita elelulome. Na sobo ebë life mago hi wesibi lalowa glo eglekefome.”

³⁵ Na bu hi wesibi musu tutuhu motokouja na bubë baliti musu ëfo mago mana hwi mëtlaguma. Na bu bolijayana kë baliti hwi motloma na bu tako uli memëtla. ³⁶ Na bolijaya Jekop feilawa jiyakle tlome, “Sobo bobë nēbale tlemalë watëbo totomo. Josep waflawi tliā na Simeon mata waflawi tliā. Na sobo metole lalone, Benjaminme eglelulo naegelomene. Matëbemu. Kë sobo bome hobota gwa etakefëtēna.”

³⁷ Na Ruben bolijayame gali tlole, “Bo Benjamin, Isip life mago jume nēglesutë jwa nēgena kwe ju bobë tlemalë iko nēbale lalowa tëtëkle etomeme. Bo Benjaminme manëlelulë. Na bo ju belë mana fata nēlelëkakilëme.”

³⁸ Kwe Jekop gali tlole, “Bobë nēba juna hana egimome. Bolijaha wagli tle na buwa tafa lële. Na bume

alëgeme tēbo mogotlana, kwe bo tako manibo mefwa gli nēgelëme. Bo filemi ho nēgeme.”

43

Josepbë bolijahani Benjaminme Isip lifewa mëtlemula

¹ Kenan life mëta hi wesibi alu-jawamu. Na iniwa oneho foneme giglimu memëtla. ² Na bu Isip life mago kë mëtehweijabë hi wesibi wayawe motloma. Na Jekop bowenenime gali tlome, “Sobo Isip lifewa ita eimomo na fli hi wesibi glo naegemole tēname.”

³ Kwe Juda bolijayame gali tlole, “Aya, sebo jume wagali tolëyo, Isip life mago eso ho feilawa gali tlonā, ‘Sobobë nagifu keinēba eglesutēna jwa nēgena kwe bome hana hwi egloname na hi wesibi hana glo egelome.’ ⁴ Ju seme nagifu keinēbame jine egletēnana kwe sebo nimëyame na hi wesibi glo nemole tēyome. ⁵ Kwe ju jine jwa egletēnana kwe sebo hana nigimëyame. Kë ho seme megali togloname nēgeme, ‘Sobobë nagifu keinēba eglesutēna jwa nēgena kwe bome hana hwi eglokwakiname.”

⁶ Na Jekop gali tlole, “Sobo kë home fëyeme gali tlonone, ‘Li keinēba mana lëtabetëyo.’ Kë sobo bome hobota gwa tëtātēna.”

⁷ Na bowenenino gali motlola, “Kë ho, sebobë ilawa mago enēneme tëtakune latlonā. Na bu metakune latlonā, ‘Blijaya mana tafa lëlene o wagli tle. Na li keinēba nanene.’ Na sebo bubë takune tafu tëtātla. Sebo meweniji latla, blawa takune lononawa. Sebo melowene hana tletla, seme megali nalogloname, ‘Sobobë nagifu keinēba elesutēna.”

⁸ Juda bolijayame gali tlole, “Ju Benjaminme jine elëbakëtenë na sebo iniwa nigimëya nanëglame, hi wesibi glo nanëgemolame. Na juna, sebobë nēbalena, sebo iniwa foneme hana gigli nēglame. ⁹ Na bowa ululu sle nēgëtagulëme. Kwe bo ju belë sei jwa nēglëkakilëna kwe bobë wesibiwa. Na bobë kë manibo unaunalëme mana

lëbekefëtenëme. ¹⁰ Ju seme lëkle jwa egëtanabë kwe sebo Isip lifewa tëlafe nuguja wa nëglame fene.”

¹¹ Na Jekop bowenenime gali tlome, “Masiwafe, kë eso hobë gali nëgali gali nëgena kwe sobo Benjaminme sei egujëlölome. Na sobo melë saelo. Sobo eflëbowa hi wesibi musu mëta sisike elome na ehowomujome na kë eso home manawa emowelëlölome. Na saule tuha wesibi na yemaseneha wesibi na layaha wesibi bume ehwemutelome. ¹² Na some musu mëta kë sisike mëtletëyobë baliti mata ehwemutelome na bume emowelëlölome. Bo lowene hana nelë bale bubë wege ho yaya lametlanawa na kë baliti këme sisike mëtla. Na sobo fli baliti mata ehowomujome na fli hi wesibi këna glo naegemolome. ¹³ Na nagifu keinebame elemulome na kë ho betelë eimome. ¹⁴ Bo Gotome megëgali nanëlelëlë, bu kë eso hobë manibo sle lëgëtatleme na some lëgaitome na Simeonname na Benjaminname yo lëleyome. Kwe bobë nëbale iniwa tëbo miglitayana kwe melëmane tëbo matla.”

¹⁵ Na Jekop boweneni, eso home mëglëlabë lale wesibi na hi wesibi glo baliti loko mëtëtaya. Na bu Benjaminna Isip lifewa mitimiya. Na Josep belë tuhu mëtemola. ¹⁶ Na Josep bolijahaniname Benjaminname hwi tlome na bubë lo tafa lëglëlekefëtlebë wege home gali tlole, “Ju ebë enëneme bobë lowa eelumemo. Na bulmakau kleli tëkle etleme. Na kë ahujume eleme. Na klijina bo bume hi nanëglëlemëme.” ¹⁷ Na kë wege ho bu melëtle Josep fene gali tlole. Na bu kë enëneme Josepbë lowa tlelume.

¹⁸ Na bu lowa tlelumbëë, bu tako uli memëtla, na melowene lamëtla, “Èbame sebo kë tigisiyabë na bu hi wesibi glo baliti sebobë musu mëta sisike mëtla. Na bu kë balitime lowene mëtla na seme tëbo nalëgëtanamefe, bubë lowa këme lëleluna. Na bu seme fa fa mëglame nawa na kalabusu lowa sisike melame na kë eso hobë wege mana fa nëtatleme. Na sebobë donki kleli tukli melame.” ¹⁹ Na Josepbë wege

ho ino li mëta tlibe na bolijahani bu belë mutuja. Na gali motlola, ²⁰ “Masiwafe, sebo tokwëfo takune. Èbame sebo ebelë balitina hi wesibi glome tisiya. ²¹ Glo tla. Na titiya. Na alëgeme ni tebëya. Na hi wesibi musu tutuhu tokouja. Na hi wesibi këna glo baliti, musu ëfo mëta hwi tlaguma. Na sebo kë baliti ekë nehweija. ²² Kë baliti sebobë musu mëta ya sike tlene. Sebo lowene hana nëla. Na sebo fli baliti mata nehweija hi wesibi glo nanëglabëme.”

²³ Na kë wege ho gali tlome, “Sobo tutune asa elo na uli asa elo. Sobobë na blijayabë Goto bu kë baliti sobobë musu mëta wasike tletëyo. Bo hi wesibi këna glo tëgelëbë baliti waglo telë.” Na bu Simeonme kalabusu lo mago tuhu totle na bolijahani belë tlelule.

²⁴ Na bu iniwa Josepbë lowa tlelëkakume. Na bume tu tlëme, elebo flëke swa namogotomame. Na hi wesibi mata bubë donki klelime tlëme. ²⁵ Na bu meaholokwane mëtla, “Josep klijina ligisimefe. Hi nalëglëlemëme.” Na bu Josepme mëglëlabë lale wesibi sle mototoma. ²⁶ Na Josep tisi na bu kë lale wesibi metlëla na sëkefo miti bubusu mototoma. ²⁷ Na Josep takune tlome, “Sobo lalowa tafa eulone o hanane? Na sobo èbame bome këgali toglonabë filemi mana tafa lëlene o wagli tle?”

²⁸ Na bu gali tafu mëtëtatla, “Ei, sebobë aya bu mana lëtabe na lalowa tafa lule. Na jubë wege hoha tafa lule.” Na ita sëkefo miti bubusu mëtletla.

²⁹ Na Josep, bolijamo Benjaminme hwi tlole, weife aliji magobë. Na bolijahanime takune tlome, “Èbë sobobë keinëbane, sobo kë gali toglonabë.” Na bu Benjaminme gali tlole, “O hëyai, Goto jume manibo lëgletëme na laitame.” ³⁰ Na Josep bubë keinëbame manibo latletle na ëjeha ye lëletleme. Na këme nëgeme hokweinawa hune totome. Na kwe molowa tëkaklu na kë mëta hwelutuwa ye teluletle. ³¹ Na bu ye kuju tëbe. Na nolo tuna swa totle. Na tëkakli. Na bu manibo tafuwa latotle. Na bubë wege home gali tlome,

“Te, hi wesibi glo elome na masei mēta gogwa ekoujome.”³² Na Josep li masei mēta hi tle. Na bolijahani li masei mēta hi mētla. Na Isip life mago ho, Josepbē lo mēta kē tafa metlabē, li masei mēta blalo hi mētla. Isip life mago ho, bu Hibru life mago home tole hana mētlekefētēma, bu yonane hana mētla. Kēme nēgēme bu blalo kēme hi mētla.³³ Na bu Josepbē naba lime metafana tafa mētla, botamenino fene fufu mototoma. Bu oto mago ho mēta okli mētla na kēme keibē, kēme keibē na nagifu nēba yaweme tafa tule. Na bu kē tafabē hwi motlola na klelego memētletla na blalo gēgali mētla, “Bu seme habēna lowene lēgletēnamene. Beēnino kē fufu mētētanabēme.”³⁴ Na wege ho bu bolijahanibē hi wesibi Josepbē masei mago glo mētletēma. Na kē hi wesibi bume sa mētētātēma. Kwe bu Benjaminme feilawa hi wesibimu tlēle, tobalimalē hi mēglabē hi wesibi fene tlēle. Na bu Josepna hi mētla. Na bu tako fleflesu lamētla.

44

Josepbē titono kabo flawi tlatle

¹ Na bu wafi hi mētla na Josepbē lo tafa lēglelēkefētlebē wege home gali tole, “Ju ebē enēnebē musu mēta hi wesibi sike eletēme. Houme fwa asa sike eletēme, ēfomume etometemome. Na ju bubē hi wesibi glome kē mohweijabē baliti, musu ēfo mēta sike ekoutēmeme.”² Na ju bobē lale titono silva kabo nagifu nēbabē musu ēfo mēta tuku eletleme. Na bubē hi wesibi kēna glo tēglebē baliti mata sike egletleme.” Na bu melatle Josep fene gali tole.³ Na olē feti tēbe na wege ho bolijahanime sei tlagume. Na buna donki klelina iniwa mutuja.⁴ Na bu kē tako lifate kile mētla. Na kakē hana mutuja na Josep bubē wege home gali tole, “Ju kē enēneme hokweinawa esogo elagume. Na ju esune egujuwelēmena metakune eglomeme, ‘Sebo sobona yonane nanēla kwe sobo fēyeme gēglē eletēnane.’⁵ Sobo bobē eso hobē lale titono silva kabo fēyeme tokli

eletelone. Bobē eso ho tu kēna hi lēlekēfe. Kē kabo, lowene hwi mago kabo. Bu kē kabo hwi lolokwefē na bu melowene lalēlekēfe, wesibi tokwafe fata mēglemefe. Sobo fēyeme tēbo enitonē.”

⁶ Na Josepbē wege ho bume esune tlēme na Josepbē gali kēme gali tlome.⁷ Bu gali tafu mētētātla, “Masiwafe, ju seme blawa fēyeme so etatēnane. Sebo kēha melē hana nēglame.”⁸ Ju seme walowene eletēna. Sebo Kenan life mago kē tigisiyabē na musu ēfome kēhwi toglomabē baliti watehweitēyo. Ju walowene eletēme sebo nēgali gali ho. Ju habelē lowene lalene, jubē eso hobē silva na gol tokli nēgletlameha. Weye. Hanane mu.⁹ O eso ho, ju sebobē musu hohwi etagwi. Na ju kē kabo li hobē musu mēta hwi eoglēna kwe kē home mogo nalē satēkle etle. Na ju seme fli kalabusu etaname na sebo jume manawa wege nēgletēyobē ho fata nēletēyome.”

¹⁰ Na bu gali tafu tētātēme, “Sobobē gali lalemu. Bo kē kabo li hobē musu mēta hwi noglotelēna kwe bume fwa kalabusu noglotlēme na bobē wege manawa fa lotleme. Na kwe fliye, egitome.”¹¹ Na hokweinawa bubē musu life mēta gogwa motokouja na musu ēfo totohwa mētētaguma.¹² Na Josepbē wege ho kabo hohwi tētagutē. Bu abwa nēbabē musu afina hohwi tētatlē na kēme keibē nēbabē musu, kēme keibē nēbabē musu hohwi tētagutē. Na nagifu nēbabē Benjaminbē musu yaweme hohwi tētatlē. Na kē kabo Benjaminbē musu mēta hwi tolē.¹³ Na bolijahani kē wesibi hwi motlēya na klelego memetla. Na bubē ēho kēme kaka mototoma, bu tako manibo mētletlame nēgēme. Na bubē musu, donki kleli matawa gogwa mētla. Na ita lifatewa mutuja.

¹⁴ Judana bolijahanina, Josepbē lowa tutuhu motula, Josep lo mēta mana tafa tle. Na bu tako uli memētletla na Josepbē elebo lime lamētītīgōtlawā.¹⁵ Na Josep gali tlome, “Sobo bobē lale titono silva kabo fēyeme tokli elone. Sobo lowene hana elone, bo kwe melē ho nētabē, wesibi

ëho mëglebë, eli bo kë wesibi hwi noglomëme.”

¹⁶ Na Juda gali tafu têtatle, “O eso ho, sebo jume habë gali noglëyomene. Sebo kë tëbo wesibi habëna sle nogotlamene. Goto bu sebobë tëbo wesibi waolafa lotome. O eso ho, kë ho bu jubë kabo toklime kë fa lëgëtabë, kalabusu egotleme. Kwe bume fwa nane, seme iniwa kalabusu egëtaname. Na sebo jume manawa wege nêgletëyobë ho fata nêletëyome.”

¹⁷ Na Josep gali tlome, “Hanane mu, bo melë hana nêgelëme. Kë ho, bubë musu mëta kabo kë hwi loglëbë, bume fwa kalabusu nogotlëme na buwa manawa wege lëgletenë ho fata lëleme. Sobo fli kwe blijaya belë lalowa egitome.”

Juda Benjaminbë afloko fa logotlëbëme gali tlole

¹⁸ Na Juda Josep belë tuju na gali tlole, “Aiyoo, eso ho ju bobë gali aholokwane enonë. Bo jume lalowa gali noglëmene. Bo walowene nelë, ju tako eso homu, eso ho Fero fenene. Ju bome wame asa enonë. ¹⁹ O eso ho, ëtani ju seme metakune latlona, ‘Sobobë blijayana, blijahanina mana tafa mëlane o hanane?’ ²⁰ Na sebo gali tolëyo, ‘Negalife. Sebobë aya mana tafa lële na bu filemimu. Na sebobë nagifu keinëba mana tafa lële. Boli-jaya filemimu têtabe na bota mana fu totle. Na kë nëbabë bolijaha wagli tle, buwa tafa lële. Na këme nêgëme bolijaya bume tako tole lalëletle.’ ²¹ Na eso ho, ju seme megali latlona, ‘Sobobë nagifu keinëba bome elesutënamo, bo bume hwi nanoglolëme.’ ²² Na sebo jume gali metafu têtatëyo, ‘Kë nëba bolijayame asa kile malotle. Bu bolijayame kile logotlona kwe bolijaya tako manibo fwa gli lëgleme.’ ²³ Kwe ju seme gali tlon, ‘Sobobë nagifu keinëba eglesulo jwa nêgena kwe sobo bome ita hana hwi egloname, hanane mu.’

²⁴ Na sebo aya belë titia na ju seme kë gali toglonabë gali bume tëtätla. ²⁵ Na tokwafe aya gali tlon,

‘Sobo eimome na fli hi wesibi, balitina glo emoletëname.’ ²⁶ Na sebo gali tlole, ‘Sebo hana nigimëyame. Sebobë nagifu keinëba bume nêgglëlula jwa nêglana kwe sebo kë home hana hwi noglolame. Anë, sebobë keinëbame nêgglëlulana kwe sebo kë eso home hwi noglolame.’ ²⁷ Na sebobë aya megali tlon, ‘Sobo walowene elo, bobë mëse Resel iko nëbale tèle wafata totometenë. ²⁸ Na jowa nëba bome wakile tëtanë na bo melowene nanelë, waluju mago kleli bume watëkle totle. Bo ita hwi hana nololë. ²⁹ Na sobo li nëba bo mago eglemulona na bume alëgëme tëbo mogotlona kwe bo tako manibo fwa gli negelëme, bo filemi ho nêgëme.’

³⁰⁻³¹ O eso ho, sebo nagifu keinëba ebë life mëta kile nêglana, na sebowa nigitiyana, na sebobë aya kë nëbame hwi jwa loglolona kwe bu gli lëgleme. Bu kë nëbame tako tolemu lalëletle. Sebobë aya filemimu na sebo kë nëba nêgglëlula jwa nêglana kwe sebo bume tëboha nogotlame. Na bu tako manibome fwa gli lëgleme. ³² Na bo ayame wagali sle tlole. Na bo megali latlolë, ‘Bo ululu sle nugujuwetlëme na bo ju belë hana nêglesulëna kwe bobë wesibiwa. Na bobë kë manibo unau-nalëme mana lëbekefëtenëme.’ ³³ Na bo metole nanelë, kë nëba manawa wege lëgletëbë ho fata hana lëgleme, bowa fata nêgletëme. Bu kwe bolijahanina matitiya. ³⁴ Kë nëba bona hana nêgëyeuna kwe bo aya belë ita hana nuguwime. Bo bubë manibo hwime tole hana nêlëyo.”

45

Josep bolijahanime gali tlome, bo fëye hone

¹ Na Josep bolijahanime tako manibo tletëme kwe bubë wege hobë li mëta yeme tole hana tle. Këme nêgëme bubë wege home gali tlome, “Sobo iniwa lo mago totoho ekako.” Na totoho mëtëkaka na buwa bolijahanime tafa tlelëme. Na bu Hibru galina gali tlome, “Bo Josep, sobobë keinëba.” ² Na Josep feilawa ye tle. Na Isip life mago oneho kë ye

lego aholokwane mutula. Na kë ye tēglebē gali Isip lifate mago eso home gali mutujuwelēla. ³ Josep gali tlome bolijahanime, “Bo Josep. Bobē aya wagli tlene o mana tafa lēle.” Na bolijahani bubē gali yafe aholokwane motlola kwe bu tako uli memētletla na bu gali tafu hana mētētatla. ⁴ Na kwe Josep bolijahanime gali tlome, “Sobo loliwa esijo.” Na bu loliwa mutuja. Na bu gali tlome, “Bo Josep, sobobē keinēba. Ētani sobo bome Isip life mago home yo tlomo, bubē wege manawa fa nanēgētatemēme, na baliti glo telo. ⁵ Kwe sobo ētani bome kë tēbo tēgētanabē wesibime tutune asa elo na welili asa elo. Bo some kofayame hana tēbo nogotome. Goto buwa jine tlēnē. Some ebē life elē nogoutatēyobēme, onehome nēgaitamē nanēgelēme. Foneme gigli jwa namēglame. ⁶ Na kë life mēta hi wesibi jwa tlibutu tēle wamutuju. Kwe hi wesibi jwa tlibutu tobali mana mebokwe, na bu nuju mago hi wesibi hana wawa mēglame. ⁷ Na Goto bu bome, nogoutatēyobēme jine telēbakēnē, some nēgaito nanēgelēme, sobo foneme gigli jwa naegelome. Na sobobē nēbaletono unaunalēme natafa mokoutēyome. ⁸ Kwe ebē lifewa sobowa jine tlēna nane. Wēye. Goto buna jine tlēnē. Na bome aniji tlonē, eso ho Ferome lale lale lowene nēglēlēbēme. Oneho, eso ho Ferobē lo mēta kë tafa mēglabē, na bu, bome eso home tafa nēgletemēbēme anijimotlona. Na bo Isip lifebē iniwa onehobē eso home tafa nēletemē.

⁹ Na sobo aya belē hokweinawa eitome na megali eglolome, ‘Jubē nēba Josep mana lētabe na bu megali lalēle, Goto bome Isip lifebē eso home aniji tlonē. Na ju bo belē hokweinawa esi. ¹⁰ Na jubē nēbalename na blija-fujuniname iniwa elesumeme. Na ju mēmē kleli na sipsip kleli na bulmakau kleli name na sobobē iniwa wesibi fli etobaklome. Na bomēta esijome. Na Gosen lifeku mēta tafa elome, bobē li mēta. ¹¹ Na ju Gosen life mēta tafa eglena, bo jume tafa

nanēglelēme. Hi wesibi jwa tlibutu tobali mana mēbe. Na bo metole nanelē, ju na jubē nēbale foneme gigli hana mēglame na sobobē kleli mata foneme gigli hana mēgleme, bo some tafa nēglelēyome nēgēme.” ¹² Na Josep bolijahanime gali tlome, “Sobo, seme Benjaminna, hwi sle elona na lowene sle eletēname, bo Josep, bo some ekē gēgali nēlelēyo. ¹³ Na sobo ayame megali eglolome, ‘Josep Isip life mēta eso home tafa lēle.’ Na lebutako wesibi sobo kë hwi eglomobē ayame mata gali etujuwelolome. Na sobo hokweinawa eitome na bume elesutēname.”

¹⁴ Josep gēgali wayawe tole, na bolijamo Benjaminme yena hwē tlēle. Na Benjamin mata hwē tlēle na ye mētletlēgo. ¹⁵ Na Josep fli bolijahanime yena hohwē tokou na bubē ahinome mēmētletēkoutēme. Bu melē wafi tle na bolijahani bume gēgali mētletlēla.

¹⁶ Na Josep bolijahani kë mitigisiyabē gali eso ho Fero belē fe tuletletle. Bu na bubē wege hona, tako fleflesu memētletēma. ¹⁷ Na eso ho Fero Josepme megali tole, “Ju blijahanime megali eglomeme, ‘Sobobē wesibi donki kleli matawa gogwa eolome na Kenan lifewa ita eitome. ¹⁸ Na sobobē aya na ilawa mago ho bo belē elesumome, na bo some Isip lifebē lale lifemu yo nanēglēyome, na sobo lebutako lale hi wesibi hi naegelome.’ ¹⁹ Na ju blijahanime mata megali eglomeme, ‘Sobo Isip life mago kalē loha wesibi, wesibi hos kleli kë asē mēglelēmebē, glo elome na sobobē lifewa ehujome. Na sobobē one na nēbale na blijaya kë mēta tafa melame na këna elesumome. ²⁰ Na sobo lebutako wesibi asa ehweiyo. Na sobo kë hune egelobē wesibi asa lowene eletemo. Matēbemu. Bo some Isip life mago lale wesibi nēglēyome.”

²¹ Na Jekobē bowenenino, melē mētla eso ho Fero fene gali tlome. Na Josep kalē loha wesibi, wesibi tlēme eso ho Fero fene gali tle. Na alēgēme hi mēglabē hi wesibi mata tlēme. ²² Na bu bolijahanime tiho ēho tlēwagume.

Kwe Benjaminme tobali tiho ëho na silva baliti 300 tlële. ²³ Na Josep Isip life magobë lale wesibi, 10 iko donki kleli matawa gogwa toletëme na kë donki kleli bolijayame telëkakle. Na bu witi liji, na bletë nage, na fli lale hi wesibi, na fli 10 tamo donki kleli matawa gogwa tole, na bolijayame mata telëkakle. Bu migisiyana, alëge mëta hi namëkekëyame. ²⁴ Na Josep bolijahanime jine telëkakëmena na gali tlome, “Sobo sobolalo alëgeme momata asa ekoujo.”

²⁵ Na bu Isip life kile mototla. Na mititiya. Na bu bolijaya Jekop belë Kenan lifewa fwa mutula. ²⁶ Na bu megali motlola, “Josep gli hana tle, hanane mu, mana tafa lële. Na ëje Isip life onehome eso home tafa lëletëme.” Na Jekop klelego metle. Na boblo totome. Na gali tlome, “Sogë lalo.” ²⁷ Kwe bu iniwa wesibi Josep kë gali toglomebë bolijayame gali motlola. Na Jekop kalë loha wesibi, wesibi Josep kë jine tëglëmebë hwi tlome. Na manibona sle tle. ²⁸ Na Jekop gali tle, “Negalimu. Bobë nëba Josep mana tafa lëlefe! Bo Josep belëme hokweinawa nuwime. Na hwi nujuwelëleme na mana gli nelëme.”

46

Jekop bu kë tafa tëglëmebë enëneme Isip lifewa tlemume

¹ Jekop bubë iniwa wesibi sle totome na bu nonino name nëbale name Isip life elë tlemume. Bu Berseba lifewa fwa tulelëme na Jekop bubë bolijayabë Aisakbë Gotome, sipsip kleli ahujume temu totometle, Goto sinikibo hëhë nalëgleme. ² Na kwe klabë, Goto Jekopme nimitelë mëta fata tletle. Na wë tlole, “Jekop, Jekop.”

Na Jekop tafu tëtatlë, “Wa, bo mana ekë tafa nelë.”

³ Na Goto gali tle, “Bo Goto. Bo jubë blijayabë Goto. Ju Isip lifewa egujume uli asa ele. Tokwafe bo melë nogotomëme, bo jume nëgaitëme na bo jubë bisemlenime feilawa onehome fata nogotomëme. ⁴ Isip

lifewa bona weife nëgiyume. Na jubë bisemlenime ebë lifewa bo ita sei nëgelëfamëme. Tokwafe ju gli eglena, Josep jume bu gwa lëgëtamëme matëmatë mëta.”

⁵ Na Jekopbë iko nëbale, Jekopme kalë loha wesibi mëta gwa mototkwakla. Na bubë one na nëbale name mata gogwa motokwaka. Isip life mago eso ho Fero, bu kë kalë loha wesibi tlëme, bu këna muguja namëglame. Na kwe Jekop bu Berseba life kile tole. ⁶ Na bu bulmakau kleli mëtleluma. Na Kenan life mago kë glo mëtlabë wesibi na iniwa mëtehouja. Na Jekop bubë nëbalena bolijafujunina, Isip lifewa iniwa mutuja. ⁷ Bu memutuja lamëtla. Bubë bowenenino na bokonino na bolijafujunino buna iniwa mutuja.

⁸ Ebë Jekopbë nëbalebë weniji buna Isip lifewa kë mutujabë. Bubë iko nëbabë weniji, abwa nëbabë weniji, Ruben. ⁹ Na Ruben boweneninobë weniji melë, Hanok na Palu na Hesron na Karmi. ¹⁰ Na Simeon boweneninobë weniji melë, Jemuel na Jamin na Ohat na Jakin na Sohar na Saul. Saulbë bota bu Kenan life mago mëse. ¹¹ Na Livaï boweneninobë weniji melë, Gerson na Kohat na Melali. ¹² Na Juda boweneninobë weniji melë, Er na Onan na Sela na Peres na Sera. Kwe Er na Onan bu ëtani Kenan life mëta wagigli mëtelo. Na Peres boweneninobë weniji melë, Hesron na Hamul. ¹³ Na Isakar boweneninobë weniji melë, Tola na Puva na Iop na Simron. ¹⁴ Na Sebulan boweneninobë weniji melë, Seret na Elon na Jalel. ¹⁵ Ruben na Simeon na Livaï na Juda na Isakar na Sebulun, na bu Leabë nëbale Jekopbë mëse. Lea bu nemosana nëba mata fata tëta, bubë weniji Daina. Na Leabë nëbale na bolijawani bu kënji fata mëtla 33.

¹⁶ Na Gat boweneninobë weniji melë, Sifion na Hagi na Suni na Esbon na Eri na Arodi na Areli. ¹⁷ Na Aser boweneninobë weniji melë, Imna na Isva na Isvi na Beria. Na bubë mësenëbabë weniji ebë Sera. Na Beria boweneninobë weniji melë,

Heber na Malkiel. ¹⁸ Jekop Silpana kë nēbaneni mētēgelobē nēbale na bolijafujuni kënji fata mēta 16. Silpa ebē Leame wegeme egaitamēbē mēse. Bume manawa wege eletē. Ētani Laban bu Silpa Leame tlē. Laban ebē Leabē bolijaya.

¹⁹ Na Jekopbē mēse Resel, bu iko nēbale tlemalē, bubē weniji Josep na Benjamin. ²⁰ Na Josep, Isip life mēta tafa tēglena, Asenatme mana sei tle. Asenat bu Potiferabē boko. Potifera bu Heliopolis life magobē fēso hi wesibi ahujume ahujume lēglekēfebē ho. Asenat bu iko nēbale tlemalē fata totometle. Bubē weniji, Manase na Efraim. ²¹ Na Benjamin boweneninobē weniji melē, Bela na Beker na Asbel na Gera na Naman na Ehi na Ros na Mupim na Hupim na Art. ²² Jekop Reselna kë nēbaneni mētēgelobē nēbale na bolijafujuni kënji fata mēta 14.

²³ Danbē bowene jowa. Bubē weniji, Husim. ²⁴ Na Naptali boweneninobē weniji melē, Jasel na Guni na Jeser na Silem. ²⁵ Jekop Bilhana kë nēbaneni mētēgelobē nēbale na bolijafujuni kënji fata mēta 7. Bilha ebē Leame wegeme egaitamēbē mēse. Bume manawa wege eletē. Ēbame Laban bu Bilhame Reselme tlē. Laban ebē Reselbē bolijaya.

²⁶ Na Jekopbē nēbale na bolijafujuni buna Isip lifewa kë mutujabē, bu kënji 66. Kwe bu Jekopbē boweneninobē oneme tabēi hana mēta. ²⁷ Na Josep no bu tlemalē iko nēbale fata totome, Isip life mēta. Na kë tlemalē nēbale na Jekopbē nēbale na bolijafujuni Isip life mēta kënji mētabēya 70.

Jekop na bubē nēbalena bolijafujunina Isip life mēta tafa mēta

²⁸⁻²⁹ Jekop Judame afina jine tlēle, bu Josepme no lēlēleme Isip lifate mago na buna misijome bolijayame Gosen life mēta esune nalēglēleme. Na Jekop na nēbale na bu Gosen lifewa fwa mutulana, Josep bubē wege home gali tlome, “Sobo bobē kalē loha wesibi sagli elētēname.” Bo

ayame këna hwi nanujuwelēlēme. Bu këna Gosen lifewa tuju, bolijayame hwi naloglōleme. Na Josep bolijayame yafe hwi tlole na bume hwē tlēle na ye tlelēle. Meye tēglēlēlēbēē, na tokwafemu kaju tēbe. ³⁰ Na kwe Jekop Josepme gali tlole, “Jume wafi hwi noglēme nēgema na bo melowene nanelē, ju mana tafa ele. Bo lalowa gli nēgelēme.”

³¹ Na kwe Josep bolijahanime na bolijayabē ilawa mago onehome gali tlome, “Bo Isip life magobē eso home, megali nugujuwelēlēme, ‘Bobē afani na ayabē ilawa mago oneho, bu Kenan life kile mutula na bu bo belē fata mēkakija. ³² Kē ho bu sip-sip kleli mēlēkefēma. Na bubē sip-sip kleli na bulmakau kleli mata melesuma. Na bubē iniwa wesibi mata mehweiija.’ ³³ Na tokwafe eso ho some we loglēyona na takune loglēyona, ‘Sobo fēye wege fa etokweflone.’ ³⁴ Sobo megali eglōlome, ‘O eso ho, sebo sipsip kleli na bulmakau kleli nēglēmabē enēne. Sebo tokwetokwēmume nēgena, kë wege mana fa tētagila. Sebōbē afunino mata sip-sip kleli memētlēwagima.’ Sobo eso home kë galime gali eglōlona kwe bu some hana hehē lēglētēyome na megali lēglētēyome, ‘Sobo Gosen life mēta lalowa tafa ekekome.’ Isip life mago ho bu sipsip kleli mēglēmabē home tole hana mēletēma. Kēme gali tlome, ‘Sobo Gosen life mēta fwa lalowa tafa ekekome.’”

47

¹ Na kwe Josep eso ho Ferome megali latujuwelēle, “Aya afanime Kenan life mago wafata lēlēlēkakime. Bu sipsip kleli na bulmakau kleli na iniwa mēlesuma na bubē iniwa wesibi mata mohweiija. Na bu Gosen lifate mēta kë tafa mēla.” ² Na Josep tobalimalē bolijahanime gali telēkakēme. Na bu mitisiya. Na eso hobē li mēta mitlija.

³ Na kwe, eso ho takune tlome, “Sobo fēye wege fa etokweflone?”

Na bu gali tafu mētētatlā, “Sebo sip-sip kleli nēlēkefēma, sebōbē ayanino

fene mētlēkefēma. ⁴ Sebo metole nanēla, sebo ebē lifate mēta esokwaneme tafa nēglame. Hi jwa olē Kenan life mēta fata tēgletēname nēgeme na sebobē sipsip kleli agosaba jwa nēgeme. Na fēye wesibi hi mēglemene? Kēme nēgeme, sebo metole nanēla, ju seme megali lalowa eglonamene, ‘Sobo Gosen life mēta lalowa tafa egelome.’”

⁵ Na kwe eso ho, Fero, Josepme gali tlole, “Blijaya na blijahanina wamisiya, juna tafa egelobēme. ⁶ Ju Isip lifatebē iniwa afloko lowene sle eletēmeme, na jowa lale aflokomu hwi elotēmeme na yo elomeme kē mēta tafa namēglame. Na ju metole egletēmena bu Gosen life mēta tafa matla, kwe ebē lalowa. Na jubē ilawa mago ho flime eselēmeme, bu bulmakau kleli mēglēmabē alēge kē lowene sle mēgletlabē, na ju bume aniji elomeme, bobē bulmakau kleli mēglēma namēglame.”

⁷ Na kwe Josep bolijayame eso ho Fero belē sei tlēle. Na Jekop Gosome takune tlole, eso ho Ferome ululu sle nalēgētaguleme na lēgaitawagule nalēgleme. ⁸ Na eso ho gali tlole, “O aya, jubē tlibutu ebēnujune?”

⁹ Na Jekop tafu tētatlē, “Bo ebē life mēta kē tafa nokweibē tlibutu kēniji, 130. Ebē tako olē nane tafa nokwei kwe bome lebutako hobota mitisi tenē. Bobē afunino bu ebē life mēta tako tafa motokweijamu. Na bubē tlibutu ebē lebutakomu kwe bobē tlibutu tēlewa.” ¹⁰ Na kwe Jekop eso home kaiye tlole na tuju. ¹¹ Na Josep bolijayaname, bolijahaniname taitame, lale life yo naloglomeme, eso ho fene gali tlole. Na bu Rameses life yo tlome, kē life mēta tafa namēglame. Kē life afloko lalemu kwe Isip lifatebē fli life afloko bu sogē lalowaha. ¹² Josep bu hi wesibi bolijayaname, bolijahaniname, bolijayabē ilawa mago oneho name, lēlekefēme.

Isip life mago oneho tako fone memēta

¹³ Tako fone fata tletēme na iniwa life hi wesibi jwamu. Isip life mago

oneho na Kenan life mago oneho bu foneme tako gigli lamēlekefēyamu. ¹⁴ Na Isip life mago oneho na Kenan life mago oneho bu hi wesibi Josep mago balitina glo mētlekefēya. Na bubē baliti yawe motloma. Na Josep kē glo lēglekēfebē baliti, eso hobē lo mēta gogwa tlekēfe. ¹⁵ Na Isip life mago onehobē baliti na Kenan life mago onehobē baliti yawe motloma na iniwa oneho Josepme gali mutujuwelēla, na bu gali motlola, “Hi wesibi enēna. Hana enēnaye kwe sebo jubē naba li mēta gigliwa nēglame. Ju seme aitana. Sebobē baliti wafi yawe mēgleme nēgeme.”

¹⁶ Na kwe Josep gali tlome, “Sobobē baliti wayawe egglomona, kwe sobobē bulmakau kleli na sipsip kleli bome elesume kefētēname. Na bo some hi wesibi kofayame nanēglēkefēyome.” ¹⁷ Na bubē hos kleli na bulmakau kleli na sipsip kleli na mēmē kleli na donki kleli Josepme mētlelumēkefētla. Na Josep hi wesibi kofayame tlēkefēme. Na bu melē kē mētlekefēyabē jowa tlibutu. Bu melēwa motokoujabē na kē tlibutu mana yawe motlola.

¹⁸ Kē tlibutu yawe motlola na ita Josepme mutujutla na gali motlola, “O eso ho, sebobē hobota jume hana ēho nēgētātēyome. Sebobē baliti alujawamu. Na sebobē iniwa sipsip kleli na bulmakau kleli jume watlēkefēyo. Sebo jume nēglēkefēyobē wesibi hanane mu. Kwe sebowa nētabēya na sebobē lifewa mēbagu. ¹⁹ Ju seme foneme gigli nēglabēme asa elēsēna na ju sebobē flēke feilawa tēbo lēglebēme asa elēsētēna. Na sebo metole nanēla, eso ho Fero, bu seme laitakefēname na seme hi wesibi lēlēkefēname. Kwe sebo bubē wege manawa fa nēgētatlēbē oneho fata nēgletlame. Na sebobē life mata bume yo nololame. Kwe ju seme hi wesibi na olo wesibi eglēnana kwe sebo foneme hana gigli nēglame. Na sebo tafa sle nēlame na sebobē flēke tēbo jwa nalēgleme.”

²⁰ Na kwe ebame kē fata tēglebē fone

mana lëbe na bu tako fatamu lalële. Na Isip life mago oneho Josepme hi wesibi sëneme bubë flëke yo mëtlagula. Na Josep bu kë iniwa flëke eso ho Ferome yo tlole. Këme nêgeme Isip lifatebë iniwa flëke, eso ho Ferobë flëkemu fata tletle. ²¹ Na Josep melë latle, Isip lifebë iniwa onehome gali tlole, “Sobo eso ho Ferobë wege manawa fa etakefëtélome.” Këme nêgeme iniwa oneho bubë wege manawa fa mëtakefëtla. ²² Kwe, Josep bu fëso hi wesibi ahujume ahujume mëglekefëyabë, hobë flëke hi wesibi kofayame hana fa têtatëme. Melëme nêgeme eso ho Fero bu kë enëneme baliti tlëkefëmeme nêgeme. Na bu kë balitina hi wesibi glo mëtlekefëya. Këme nêgeme bubë flëke hi wesibina kofayame yo jwa këme motlola. ²³ Na Josep bu onehome gali tlole, “Sobo aholokwane ekoujo. Bo sobo na sobobë flëke hi wesibina wahihijika telë. Na sobo eso ho Ferobë wege manawa fa egëtatelobë oneho tafa waelo. Na eli, bo olo wesibi some nêglëyome, sobobë nuju mëta tobalo naekoujome. ²⁴ Tokwafe nuju mago hi wesibi wawa egelona kwe sobo fu 5 mëta sa gwa etlo. Jowa lokotabobë eso ho Ferome elëlome, na 4 lokotabobë some egelome. Na somagobë fli unina tobalo egelobëme gogwa elome. Na fli sobo na sobobë nëbalena hi elome.”

²⁵ Na kwe oneho Josepme gali motlola, “Eso ho, ju seme hi wesibi watlëna, na seme wataitana, na sebo iniwa tafa sle nanëla, sebo gigli hana nêglame. Na sebo tako fleflesumu nanëla, eso ho Ferobë wege manawa fa nêgëtakefëtla.”

²⁶ Na kwe Josep Isip life onehome gali tlole, “Sobo aholokwane ekoujome na kë gali esogo elelëlome. Tokwafe nuju mago hi wesibi wawa egelona kwe sobo fu 5 mëta sa gwa etlo. Jowa lokotabobë eso ho Ferome elëlome.” Kë gali unalëme mana lëbagutëmeme na mana ekë lëbetëme. Kwe eso ho Fero bu fëso hi wesibi ahujume ahujume mëglekefëyabë hobë flëke hana fa têtatëme.

Josep bolijayame gali sësle têtatle, “Bo jume Kenan life mëta matëmatë nugutëme”

²⁷ Israel enëne bu Isip lifatebë provins Gosen mëta tafa mëtla. Na bu kë flëke bume yo tlole. Na bu lebutako nëbale fata mototoma. Na feilawa oneho fata mëtla. ²⁸ Na Jekop bu Isip life mëta 17 tlibutu tafa tle na bubë iniwa tlibutu kënjiji 147. ²⁹ Na bu melowene latle, “Bo gli nêgelëme teife.” Këme nêgeme bu bowene Josepme këme gali telëkakle, ligisitle nalëgleme. Na bu tisitle. Na Jekop bume gali tlole, “Ju bome tolemu laletenë, kwe ju toba bobë yelukwafe sei elulukwakëmeme na bome megali sle enonëme, ‘Bo jume Isip life mëta hana matëmatë nêgëtëme.’ ³⁰ Bo gli nêgelëna, ju bome ebë life mëta asa matëmatë etanë. Weye. Matëbe. Bo mogome ebë life mago egehunëme na bobë afuninobë titono matëmatë mëta gwa eutanëme.”

Na Josep gali metafu têtatle, “Bo jume melë nêgëtëme ju fene gali ele.”

³¹ Kwe Jekop gali tlole, “Ju bome iniyafememu fwa gali sle eglonëmemu, ju kë wesibi melë egotleme.” Na Josep bolijayame iniyafememu gali sle tlole. Na kwe, Jekop bubë ni labuku mëta eso life tuku totle na Gotome mana fleflesu tletle, Josep bume gali sle togloleme nêgeme.

48

Jekop bu Gotome takune tlole, Efrain na Manasename ululu sle nalëgëtagumeme na lëgaitawagume nalëgleme

¹ Tokwafe bu Josepme gali motlola, “Blijaya tëbo lalëlo.” Këme nêgeme bu nëbale tlemalë, Manase na Efrainname bolijaya belëme këme tlelume.

² Na ho Jekopme gali motlola, “Jubë nëba Josep walisi, jume hwi naloglëme.” Na kwe Jekop ni mago alabujuwa huju tle na ni labuku mëta mana tafa tle.

³ Na Jekop Josepme gali tlole, “Goto bu iniwa afutukuna. Na bo bume

Kenan lifatebë tokwëfo lifeku Lus mēta nimitelēna hwi tlolē. Bu bome lale gali tlēnē, lēgaitanē nalēgleme. ⁴ Na bome gali tlonē, ‘Bo jume feilawa nēbale nēglēme, na lebutako blijafujuni tafa namēgletēyome. Na ebē life nēlēme, na bubē lifemu unaunalēme lēgēbetēme nalēgleme.’” ⁵ Na Jekop ita gali tlole, “Bo ju belēme Isip lifatewa tigisi jwa nēgena, jubē mēse tēle nēbale mana fata totome. Bubē weniji Efraim na Manase. Na kē nēbale kēnegebē, bobē nēbaleha tafa namēgletenome. Bobē nēbalemuha natafa mēgelome, Rubenna Simeonna fene tafa melo. ⁶ Kwe ju nēbale Efraimnabē, Manasenabē nagi fata egotomena, kwe jubē nēbalemu tafa mēgletēyome. Na tokwafe flēke afloko bwa bwa lēglēwagumena, kē nagifu nēbale bolijahanibē ku mēta tafa mokoujame. ⁷ Bo kē gali jume fēyeme nane gali nolē. Bo jubē bita Reselme tako manibo nēgletēme nēgeme. Bo Mesopotemia lifate kile tulē na Kenan lifewa tigusibēē na Resel mana gli tletenē. Sebo Efrata lifate kakēha mana asē tēkekēya na bu mana gli tle. Na bo Efrata lifate alēge li mēta gwa tētē.” Efrata ebē Betlehem lifatebē ētanifu weniji.

⁸ Jekop tēle nēbale hwi tlome na takune tlole, “Ebē yalēbē nēbalene?” ⁹ Na Josep gali tlole, “Aya, ebē bobē nēbalefe. Bo ebē lifate mēta bowa tafa tēgelēna, Goto bu kē tēle nēbale mana tlēnē.”

Na kwe Jekop gali tlole, “Ju kē nēbale bo belē elesume. Bo Goto takune nanoglolēme bume ululu sle nalēgētagumeme na bume lēgaitawagume nalēgleme.” ¹⁰ Jekop bu filemimu nēgeme na naba olobaha kēme lamu mototometle. Kēme nēgeme, bu hwi sle hana tlome. Na Josep bu tlemalē nēbaleme loliwa tlesumetle, hwi naloglomeme. Na bu nēbale hohwē tle na ahinome sēsle totome. ¹¹ Na Jekop Josepme gali tlole, “Ētani bo meweniji latelē, bo jume hana hwi noglēmewa, kwe melowene latletē wagli tlewa. Kwe Goto bome taitanēme nēgeme na bo

jume fwa nane hwi nolē. Wēye. Bo jume na jubē nēbalename mehwi nanolometē.” ¹² Na Josep bubē tlemalē nēbale Jekopbē elebo li mago nono tule. Na Jekopbē yako li mēta bubusu tletle na eso life mēta tēbetle. Jekop bu letitabo homu nēgeme.

¹³ Na Josep bubē tlemalē nēbaleme Jekop belē tlelume. Na bubē abwa nēbame, Manaseme, Jekopbē tobamu tobali elē gwa totle, na nagifu nēbame, Efraimme, yemane tobali elē gwa totle. ¹⁴ Kwe Jekop toba hihijika tle na li afalēba matawa gwa towetle, na bubē tobamu tobabē nagifu nēba, Efraimbē eso mēta gwa totatle na yemane tobabē abwa nēba, Manasēbē eso mēta gwa totatle. ¹⁵ Na Jekop bu Gotome takune tlole, Josepbē afenēbome lēgaitawagume nalēgleme. Na bu megali tlole, “Goto, bobē afu, Abraham, na bobē aya, Aisak, bu jubē lowenewa esogo mētletētēyo, na boblo hana mētēto. Beē bome nafu tētanēna tafa tēglaginibē, na ebē olē elē mana ekē fe nēkaki. ¹⁶ Na ju bome enselha fata tletenē. Na tēbo wesibi mitisikefētenēna, ju bome taitakefēnē. Na ju kē tlemalē nēbaleme ululu sle etokwefēmeme na aitakefēmeme. Ju bume aitameme, na bubē bosemnenibē nēbale lebutako enēnemu fata namokoujame. Na kē enēne, bobē weniji na Abrahambē weniji na Aisakbē weniji aholokwana ti mēgletēmalime.”

¹⁷ Bolijaya tobamu toba, nagifu nēba Efraimbē eso mēta kē gwa totatlebēme Josep hwi tlole na bu kēme fleflesu hana tletle. ¹⁸ Na bu bolijayame gali tlole, “Wēye. Aya melē asa ele. Ebē nēba kēnegebē, bolijaha. Ju tobamu toba bubē eso mēta gwa egotatleme.”

¹⁹ Kwe bolijaya tole hana tle, na Josepme gali tlole, “Hēyai, bo lowene nanelē, bo lowene nanelē. Kwe abwa nēba, Manasēbē bosemnenibē nēbale bu mata feilawa enēneha fata mēglame, kwe bolijamo Efraimbē bosemnenibē nēbale feilawa enēnemu fata mēglame, lebutako lifate mago onehoha fata mēgletlame.”

20 Na kwe ebë olëna, Jekop bu lale gali tlëme, Goto bu kë tlemalë nëbaleme ululu sle nalëgëtagumeme na lëgaitawagume nalëgleme. Na bu Josepme gali tole, “Israel life mago oneho bu Gotome takune moglolana, fli onehome ululu sle lëgëtagumebëme, kwe bu jubë tlemalë nëbalebë weniji fëfë mogotomame, na fli enëneme gali molomame, ‘Goto bu some ululu sle malëto, Efraimna Manasename fene ululu sle tëtagime.’” Jekop melë kë totomebë Josepbë nagifu nëba, Efraim abwa nëbaha tètabe, na abwa nëba, Manase, nagifu nëbaha tètabe. Na Efraim abwa nëbaha fata tle.

21 Tokwafe, Jekop Josepme gali tole, “Ju aholokwane ele! Bo gli nëgelëme nounou ekë nelë! Kwe Goto sobona egëtabome na bu some sobobë semlenibë lifewa lëglelujome. 22 Ètani bo Amorbë ilawa mago onehome kosina nemona momogli tletomë. Na bubë life, Sekem wahijika totomë. Sekem life ebë lale lifemu. Na bo kë life jume fwa nëglëme. Bo jubë blijahanime hana nëglëmëme.”

49

Jekop boweneninome yawe galime gëgali tlelëme

1 Jekop bubë nëbaleme gali telokwakeme, “Sobo esijome na bome lolime tafa eletëname. Fli wesibi some tokwafe fata mëgletëyobëme gëgali nanëglelëyome. 2 O bobë nëbale, sobo bobë li mëta loko elelëyo, bobë gali aholokwane naegloname. Bo sobobë blijaya, Israel.

3 Ruben, ju bobë abwa nëba. Bo falakeme nëgena, sebo bitana jume mana fu tëto. Ju flesu ho fata tle na ju tako afutukuna homu. Jubë afutuku jubë iniwa blijamonibë afutukume boblo lalotome. 4 Jubë lowene haliji tuha sësëbo lëletë. Ho lëkle hana lëgëtatëme. Kwe, ju auto mago ho tafa hana egleme. Ju bobë mëseme atome fa tëgëtamëme nëgëme. Na bo tako tiniji latletë. Ju tëbo lowenemu esogo tlelële.

5 Simeon bolijamo Livaina bu wame wesibi glo mëtlegefo na fli home wame motlokwefëmo. 6 Bu wame lowene fa mogotokweflona, bu ho flime mogo nalë memëlagekefo. Na bu wame jwa tafa mëgelona, bu tuja ato bulmakau klelibë elebo salëme fwa hihli mototokwefëtemo. Këme nëgëme, bo bume ehe hana nolomë. Blalo kë sle motokweflobë galibëme, bo kë aholokwanebëme tole hana nëlekefëtemë. 7 Bubë wame lowene bume fwa tëbo nalogotomeme. Bubë wame lowene takomu nëgëme, na wame lowene tëbowa tëtetëme. Bo bume hehë nanëletemë. Na bo bu tlemalë name na bubë nëbale name fufu nëbetokwakëmëme. Na bu Israel life mago onehona bwa bwa tafa namëglelëmame. Bo bume flëke hana yo noglomëme.

8 Juda, jubë blijamonni na blijahani jume bibita mëgëtagujome. Jume fli oneho wame moglëyona, ju mou mëta fwa fafa egleme. Na jubë blijamonni na blijahani jume sëkefo bubusu motometëyome. 9 Juda, bu afeku laion kleliha. Bu kleli fa fa lëlekëfe, na hihi lëlekëfe. Na bu kalëlegona këme tafa lëgleme. Bu elili elili lële na alabujuwa tafa lële, laion kleli fenene. Na ho li bume hana lëlelu logotleme. 10 Bu eso home kë lëlekuju eglatlebë atobeila lehwamë. Na bu eso home unau-nalëme natafa lëkoume. Bu kë atobeila mana lehwaguime na bu Silo lifewa mana fwa lulëme. Na bu iniwa onehome tafa lugulelëmëme. 11 Bubë wain taba feilawamu hulu lokoutle na bu lalemu. Na bubë donki kleli takuliji logotlena, bu wain taba mëta fwa takuliji lotokwefële. Bu feilawa wain taba liji tu kiki lotokwefëme. Këme nëgëme bubë ëho kë wain taba liji tuna këme swa lotokwefëme bu feilawa wain taba liji tuna nëgëme. 12 Bubë naba kowa këme fata mele-tle, wain taba liji tu hi lëglekëfëme nëgëme. Na bubë enino tatiwamu mëbetle, bulmakau kleli maba fo hi lëglekefëme nëgëme.

13 Sebulun bu nutu li mëta tafa lëgleme. Na bubë tu ku takomu lëgëbetleme. Këme nëgëme sibu lo tëbo

hana mëgleme. Na bubë flêke meluguju tleme, Saidon life li mëta tou lokoutleme.

¹⁴ Isakar bu kalëlego donki kleliha. Bu tële wesibi ku mëta fwa manawa meniniwa lëbekëfe. ¹⁵ Bubë lale life lëselëwagule na melowene fa lotle, 'O lale lifefe, bo këme tafa nanegelë.' Na kë mëta bubë iniwa afutukuna wege lële. Kwe tokwafe, bu fli hobë manawa wege fa lëgëtatëmeme.

¹⁶ Tokwafe, Dan bubë ilawa mago onehome eso home tafa lëgletëmeme, na bu Israel life mago fli oneho fene tafa mëla. ¹⁷ Dan bu mefata lëgleme, taiju tëbo, alëge mëglëbo mëta fene sei lëlële. Hos kleli bu alëge elë fëka lokweina, kwe taiju hokweinawa okli lëkakettlebë na sëgetuju mëta latëtouwa lëlëleme. Na ho kë hos kleli matawa tafa logoletlena, kwe lalugujuwetigowa.

¹⁸ Tako Ho, bo jume ekë hwi nëletë, ju bome egaitanë naegleme na jubë lale lifewa no enënëme.

¹⁹ Gat, tokli ho jume wame mëglelëkakëjome. Kwe, ju kofayame yafe wame elomeme kwe bu mëglëboujame.

²⁰ Aser, jubë nuju mëta lale lale hi wesibi feilawa hulu mokoutëme. Eso ho kë hi hi mëglabë hi wesibi ahujume ahujume eglekëfeme.

²¹ Naptali, bu waluju mago dia kleli ha. Bubë tolenawa fëka fëka lëbelëfa. Na bu lale lale nëbalemu nëbaneni lëlekëfe.

²² Josep bu lale wain taba. Bu yefi tu li mëta hulu lële na bu feilawa liji lowalë. Bubë tikefo hele heletanëno nëgeme, na lëglesilamu mototle. ²³ Wame ho bume nemonawame motlola, na sëfana mëtemila na tëbo mototla. ²⁴ Josep bu nemo hana tlëkële na bubë toba elili hana mëtletle. Jekopbë kalëlegona Goto, bume tégaitaleme nëgeme na bume afutuku tëglëleme nëgeme. Kë Goto, Israel life mago onehome tafa lëlëlememe na bubë kalëlego wame jiboha tite lëletëmeme. ²⁵ Bu blijayabë Goto na bu tako kalëlego Gotomu. Buwa jume ululu sle lëgëtakefëme

na laitakefëme. Na bu jume feilawa lale wesibimu lëglëkefëme. Bu jume tako tlibutu lëglëme, na jume life lokwalëfelë mago tu mata lëglëme. Na jubë ilawa mago oneho feilawa nëbaneni mëglame. ²⁶ Bo jubë blijaya. Bo jume lale gali nëlë, Goto jume ululu sle nalëtaguime na lëgaitawagume nalëgleme. Bo metole nanelë, ju lale wesibi kë glo eglebë, tako fatini lamu namëgëtatëme. Na kë wesibi, jubë afunino kë glo mëtëglabë wesibime boblo mogotomememu. Iniwa kë wesibi Josep ju mëta fata mëgleme. Ebë ho ju kënegebë ètani ju blijahani na blijamonibë naba li mëta eso ho fata tletëme.

²⁷ Benjamin, bu waluju ama ha. Bu kleli mogo nalë tëtëkle lëtakefë. Na iniwa olobalë bu kë tëtëkle lëtakefëbë kleli hihi lëlekëfe. Na taboklë ye, bu kë tëtëkle lëtakefëbë hi wesibi sa lëtakefëtëme."

²⁸ Ta ebë kënegebë, Israelbë we ita tële enënebë. Na bubë bolijaya bu gli lëgleme kwene bubë nëbaleme kë lëgaitawagumeme anebo gali tlelëme. Na bume lale gali tlome, Goto bume fwa ululu sle nalëgëtagumeme na laitawagumeme.

Jekop gli tle na bume matëmatë mëta gwa mototla

²⁹ Na Jekop bu boweneninome lale gali wagali tlome, Goto bume ululu sle nalëgëtagumeme na lëgaitawagume nalëgleme. Na bubë nëbaleme megali latlome, "Bo gli nëgelëme nounou ekë nelë na bobë ilawa mago lebo hona tafa nanugulame, alibaho life mëta. Sobo bome bobë afuninobë aniji fuluju mëta gwa egëtaname, Efronbë life mëta kë lo eglabë. Efron Hitbë bolijafuju. ³⁰ Kë aniji fuluju bu Makpela life mëta lo elamë. Makpela life bu Kenan lifatebë tokwëfo life, Mamre life li mëta lo elamë. Ètani Abraham bu aniji fuluju Efronna balitina hihi-jika mëtelo. Bubë matëmatë lëgëbetle na lëgleme. ³¹ Bu Abrahamna bubë mëse Saraname, kë aniji fuluju mëta gogwa mëtla. Na Aisakna bubë mëse Rebekaname mata kë mëta gogwa

mëtla. Na bobë mëşe Leame mata kë mëta gwa tètë. ³² Ètani Abraham bu kë aniji fuluju Hitbë ilawa mago hona balitina hihijika mëtelo.”

³³ Jekop bu yaweme gëgali tlelëmee na ni labuku mëta ni tēbe na lagliwa tle. Na bubë ilawa mago lebo enēnena tafa mëtla, alibaho life mëta.

50

¹ Na Josep mehwi tlole, aya wagli lēlefe, na bu matawa laniwa tobe tle na tako ye tletle, na bubë nolo momotlë tletle. ² Na tokwafe Josep u mogo kë ululu sle mogotomabë home, gali tlome, “Sobo ayame lëkalu malasini atome gogwa eletelome, bu ato lëkalu feilawa kë jwa nalëgletleme na ato fla jwa lëletleme.” Na kwe u mogo kë ululu sle mogotomabë ho, bu melë mëtla, Josep fene gali tlome. ³ Na iniwa u mogo kë ululu sle mogotomabë ho bu kë lëkalu malasini bubë ato mëta gogwa motokoutlabë olë këniji 40. Na bubë ato fla jwa tletle na kokowa tēbetle. Na Isip life mago oneho bu Jekopme 70 olë ye mëtletla.

⁴ Manibo mëtlabë olë yawe motlola na Josep eso hobë wege enēneme gali tlome, “Masiwafe, sobo lalowa bobë gali eso home gali egujuwelëlomene. Sobo bume megali egujuwelëlome, ⁵ eso ho, bobë aya glime nounou tēglena, bu bome megali latlonë, ‘Ju bome gali sle enonë, ju bome mogo ehunëme, na bo Kenan life mëta bo tobana kë go tēglelëbë aniji fuluju mëta gwa eutanëme.’ Na bo bume wagali sle tlole. Këme nēgeme, bo metole nanelë, ju bome lalawa gali eglonëmene bo aya mogome gwa nanuguwetlëme. Na bo ita nisime.”

⁶ Na eso ho Josepbë gali aholokwane tlole na gali metafu tētate, “Ju lalawa egujume, na blijaya mogome gwa ejuwetleme, ju blijayame fene gali sle tlole.”

⁷ Na kwe, Josep bu bolijaya mogome gwame tuju. Na eso hobë wege enēnena bubë letitabo ho na Isip life magobë letitabo ho bu iniwa Josepme nagi mëtlëla. ⁸ Na Josepbë

ilawa mago hona bolijahanina bolijayabë ilawa mago hona iniwa aniji fulujuwa mutuja. Kwe tokwëtokwë nēbale hana mutuja. Nēbale na bulmakau kleli, sipsip kleli, mēmë kleli, Gosen lifate mëta lulu mëtla. ⁹ Na kalë loha wesibi na hoş kleli matawa kë tafa mogolekefëyabë hona iniwa Josepna mutuja. Lebutako enēnemu mutuja.

¹⁰ Na bu Atat life elime fwa mutula, Jodan tu nogowelëme. Kë Atat life kënegebë bu witi lijibë jibo fokwefokwe mototokwefëma na bubë afabo glo mëtla, hi namëglame. Na bu kë life mëta tako manibomu lamëtletla na feilawa ye mëtla. Na Josep bu 7 olëna bolijayame manibomu latletle na ye tletle. ¹¹ Na Kenan life mago oneho, ye kë mëtletlabë onehome hwi motloma na bu megali mëtla, “Isip life mago oneho bu tako manibomu lamëtletla, na tako ye mëletla.” Këme nēgeme, bu kë life weniji mefë mototla, “Abel Misraim.” Abel Misraim gali ebë Hibru gali na ebë kë gali fenene, “Isip life mago oneho ye mëletla.” Ebë life Jodan tubë nogowelë lëbe.

¹² Na Jekop bowenenino bu melë mëtla, bolijaya fene gali tlome. ¹³ Na bume Kenan lifewa mëtehula, na bume aniji fuluju mëta gwa mototla. Kë aniji fuluju bu Makpela life mëta lo elamë, Mamre life li mëta. Ètani Abraham bu kë aniji fuluju Efronna balitina hihijika mëtelo. Bubë matëmatëmu fata nalëgletleme. Efron Hitbë bolijafuju. ¹⁴ Na Josep bu bolijayame wagwa tlole. Na kwe Josepna, bolijahanina, na fli enēne buna kë mutujabë, iniwa Isip lifewa ita mitimiya.

Josep bolijahani bume kë tēbo mototlabë lowene hana lehole, aholokwana wati tle

¹⁵ Bubë bolijaya wagli tletëme, na kwe Josepbë bolijahani blalo megëgali mëtla, “Josep bu seme mana wame logloname nawa. Na sebo bume kë tēbo togotlabë bu seme kofaya tēbo lëgëtaname nawa.” ¹⁶ Na

këme nêgeme, bu Josepme këme gali mêtelokwakla. Ebë gali melë, “Ëtani sebobë aya mana tafa téglena bu seme megali latlona, ¹⁷ sobo bobë gali Josepme sagali elolo. Bobë gali melë, ‘Josep bo jume tokwëfo takune. Masiwafe. Jume blijahani kë tëbo mêtëtobë lowene asa ehwagule, aholokwana ti egleme.’ Na kwe sebo, sebobë ayabë Gotobë wege enëne, jume takune nolëyo, ‘Masiwafe, sebo jume kë tëbo tégëtobë lowene asa ehole, aholokwana ti ele.” Na Josep kë gali yafe aholokwane tle na bolijahanime manibo tletëme na feilawa ye tle.

¹⁸ Tokwafe, Josepbë bolijahani, bume hwime mutuja. Na bubë elebo li mëta bubusu mêtletla. Na bume gali motlola, “Sebo, jubë manawa wege ho, ju belë nisiya.”

¹⁹ Kwe Josep gali tlome, “Sobo tutune asa elo. Bo Goto nane, some kë tëbo nogotome. Weyewa. ²⁰ Sobo ëtani iniwa melowene latelo, bome tëbo naegëtaname. Kwe Goto bu kë tëbo lowene, bubë lale lowenena wahihijika tle, bu metole tégleme nêgeme, bome Isip life onehobë eso ho aniji naloglonëme. Na lebutako onehome nêgaitamë nanëgelëme, bu foneme gigli jwa namëglame. Na ëje sobo kë wesibi wafi hwi elolo. ²¹ Këme nêgeme sobo tutune asa elo. Bo some na sobobë nëbale name iniwa tafa nêglelëyome na nêgaitome.” Na Josep bolijahanime flalego gëgalina lowene sle tëtätëme.

Josepbë gli

²² Na Josep bolijayabë ilawa mago ho, Isip life mëta nibowai mëtla. Na Josep bu 110 tlibutu kënji tafa tle. ²³ Josep mana tafa tle, Efraimbë nëbaleme hwi tlome na kë nëbale kë nëbaneni mêtëglabë nëbaleme mata hwi tlome. Na Makir mata nëbaneni tle na këbë nëbale mata Josep belë mêtletluma. Na bu sësle totome na ameijume gogwa tle. Makir ebë Manasebë bowene. ²⁴ Na tokwafe Josep bubë ilawa mago home gali tlome, “Bo gli nêgelëme nounou ekë nelë.

Kwe Goto bu some tafa lëglagujome na bu some ebë life mago nëno lëleme na lale lifewa sei lujuwelëyome. Ëtani Goto bu Abrahamna Aisakna Jekopname iniyafe galime megali sle tlome, ‘Sobo ebë lale life hwi ejuwelëlome, na bo tokwafe some ebë lale life yo nolëyome. Na tokwafe Goto bu some kë lale lifewa sei lugujuwelëyome.’”

²⁵ Tokwafe Josep bubë ilawa mago home gali tlome, “Sobo bome iniyafeme megali sle egloname. Tokwafe Goto some lëgaitome ligisi tëyona na some li lifewa sei lugujelëyona, sobo bo mogome ebë life mago saehulo.” Na Josep bubë ilawa mago home gali tlome, “Sobo bome sogëna asa enona. Sobo Gotobë naba lime iniyafeme fwa gali sle egloname.” Na bu gali motlola, “Sebo jume iniyafememu gali nolëyo.” ²⁶ Na Josep bu 110 tlibutu kënji tafa tle, na bu Isip life mëta mana gli tle. Na bu lëkalu malasini ato mëta gogwa mêtletla, ato lëkalu kë jwa na lëgletleme na ato fla jwa nalëgletleme. Na bu mogome bokis mëta gwa mototla.

Mak Ebë Lale Anebo Gali Kënëgebëye Jisame Gali nene, Mak Yahî tle

Jon, tu mëta baptais logotomebë ho, gali të têtatëme

¹ Ebë lale gali, bu Gotobë nëba Jisas Klaisme gali nene.

² Ètani anebomu ebë lale gali fata tle. Bu mefata latle, Gotobë lowene mago gali të totokweflebë ho, Aisaia, fene yahi tle, “Goto boweneme megali latletle, ‘Aholokwane elo, kwe tokwafe bo ho lime jine nëglëlëme, bobë gali të nalëtagulebëme. Na bu jume loutatëme. Na bu alëge jume fu nalëtagutëme.’ ³ Tokwafe, li ho, ho jwa lifeku mëta mewe lëgleme, ‘Sobo tako hobë alëge fu etatelo, alëge sle etatelo.’”

⁴ Jon ebë kë nëgebëye, tu mëta baptais logotomebë ho. Bu ho jwa lifekuwa tuhu tule, Aisaia fene yahi tle. Na onehome gali të têtatëme, “Sobo tëbo lowene aholokwana ti elome na lale lowenewa esogo elelëlome na baptais elome. Na Goto tëbo lowene sle nalëgetatëyome.” ⁵ Na feilawa oneho, Juda lifate mago na feilawa oneho mata Jerusalem lifate mago, Jon belë mutuja. Na bubë tëbo lowene këme olafa mototometla. Na Jon bume Jordan tu mëta baptais totome.

⁶ Jon bu lale ëho hana gelo totle. Bu kamel kleli hobona kë susu mototlabë ëho gelo totle. Na bu bulmakau jibo alitaba mata tehvamë. Na bu mëgou na saule tu mehîhi latlekefe. ⁷ Na këme Jon bu gali metë têtakefëtëme, “Ho li bobë nagi ligisime. Na kë ho kë ligisibë bubë afutuku takomu kwe bobë afutuku tokwëfomu. Bo lale ho nane kë ligisibë home kë nëgaitalëme, manawa wege ho fene laitale. Weye. Bo bubë jiteho hana titika nëgletelëme. Bu letitabo homu nëgeme na bo atwati homu. ⁸ Bowe, some tu mëta fwa

baptais nëlelëyo, kwe buwe Gotobë Amtëtombana baptais lëglelëyome.”

Jon Jisame baptais totle

⁹ Na kë olëna, Jisas Galili provinsbë tokwëfo lifate Nasaret mago tisi. Na Jon bume Jordan tu mëta baptais totle. ¹⁰ Na Jisas tu kile tle na helefowa fe tokwafe. Na bu hwi tokwafe, matafa inoha latikawa tle na Gotobë Amtëtomba seuneni foleha Jisame ji têtëketle. ¹¹ Na Goto matafa mago gali tle, “Ju bobë lale nëba. Bo jume tako maninibo nanëletë, na tako fleflesu nanëletë.”

Satan bu Jisame tëbo loweneme fene susu totle

¹² Na kë nalëwamu, Gotobë Amtëtomba, Jisame ho jwa tabo elë tlelule. ¹³ Na bu ho jwa tabo mëta niliafewe olë tafa tle. Na Satan bu tëbo loweneme fene mana susu totle. Bu waluju mago klelina tafa mëtla, kwe ensel bume lamëtaitale.

Jisas bu Gotobë lale gali, Galili provinsme afina të têtatëme

¹⁴ Bu Jonme kalabusu lowa watuku mëtla, na Jisas Galili provins elë tisi. Na bu Gotobë lale gali të têtatëme. ¹⁵ Bu megali tle, “Goto kë aniji toglolebë olë wafata lële. Na Goto iniwa onehobë eso home natafa lëletëmebë olë nounou lalëletle. Sobo tëbo lowene aholokwana ti elome na lale lowenewa esogo elelëlome. Na sobo Gotobë lale gali lowene sle eletelome.”

Jisas bu nilimalë home we tlome na bume nagi mëtlëla

¹⁶ Na Jisas bu Galili lake tu hele helefowa tuju. Na bu Saimon name bolijamo Andru name hwi tlome. Bu solo, tu mëta tuku mëtelo, mo fa fa namëgelome, bu kë mona baliti glo namëgelome. ¹⁷ Na këme Jisas bume megali tlome, “Sobo esijomo, bona asë nanëglame. Sobo mo fa fa lowenebë walowene eletelo. Na bo some ho fa fa lowenebëme okokwe nanëglëyome, bu Gotome esogo namëglelëleme.” ¹⁸ Na bubë solo lakilewa mëtelo na mana nagi mëtelëkaklo.

19 Na Jisas sogë tuju watle, na bu Jems, bolijamo Jon name hwi tlome. Bu Sebedibë nëbale. Bubë solo holëye tégletëmeme nëgeme na bu ihe mëta këme tafa mëtelo na mana tibwa mëtelo. 20 Na këme Jisas tlemalëme we tlome. Na bu bolijayaname, bume kë wege mëgletëmabë ho name, ihe mëta hune mëtëkako. Na bu Jisasmë nagi mëtelëkaklo.

Jisas bu ahwane, hobë ato mago, hehë tletle

21 Jisas bu fli hona Kaperneam lifewa mutuja. Na Juda enënebë tafawa olëna, bubë lotu lowa tēkaklu. Na mana onehome gali tē tētātēme. 22 Bubë gali yafe aholokwane motlola, bu klelego memëtla. Bubë gali gena lëbetleme nëgeme kwe Gotobë tafa sle gali lowene sle mëgletlabë hobë galiye ge jwa lëbetëmemu.

23 Na kë nalë, li ho bu kë life hobë lotu lo mëta tafa tle. Na ahwane kë ho mëta tētabe. Na kë ho meafëflei latle, 24 “Nasaret life mago Jisas, ju seme habelë egëtaname esine? Ju seme tēbo naegëtaname esine? Bo jume lowene nanëletë, Ju Gotobë lale homu. Ju Goto mago kë egisibë ho.” 25 Kwe Jisas ahwaneme anisasana megali latlole, “Ju kuju ebe na ebë ho mago eiju.” 26 Na ahwane kë home anisasana luluju totle na feilawa juju tēkake na kë home lakilewa totle. 27 Na kwe iniwa oneho klelego memëtla na blalo gëgali mëtla, “Euowe! Ebë fëye wesibine? Kë ho bu tiho gali tē lotle. Na bubë galiye, flesu hobë gali fenene. Bu ahwaneme gali loglomena, aholokwanewa lamolole.” 28 Na hokweinawa, Jisas këtëglebë galibë, Galili provinsbë li life li life fifiji mëtelëlä.

Jisas Saimon bokokabë ato sle tētātē

29 Jisas bu fli hona, lotu lo mago metëkaklija. Na bu Saimonna, Andrunabë lowa mutuja. Jems na Jon buna iniwa mutuja. 30 Na Saimon bokoka ni labuku mëta ni tēbe, bu tēbo tēgleme nëgeme na bu ahoyutena sago metle. Na hokweinawa Jisasmë gali

motlola, “Bu tēbo lale.” 31 Na Jisas bu betelë tujutë na bume tobame fa tētāmë na huju tētāmë. Na tēbo latliwa tēbe. Na kë mësebë, bume hi wesibi ahoyume tletëme.

Jisas lebutako onehobë ato sle totometëme

32 Atome hwi olëna, bu tēbo atona onehome Jisas belë mëtlesuma. Na bu mata ahwane kë tēbo mototomebë onehome sei mëtelëfamëtla. 33 Na feilawa oneho kë life mago, bu Jisas këme kë tafa tēglebë lo ino mëta loko mëtleläya. 34 Na tako ato elili mëta kë tafa mëtlabë onehome Jisas sle totome. Na bu ahwane tēbome hobë ato mago hehë tletëme. Na kë ahwane bu melowene lamëtla, “Jisas bu Gotobë nēba.” Këme nëgeme Jisas bume lëkle totome, “Sobo asa gëgali elo, matëbe.”

Jisas bu Galili provins mëta asë tēbelëfa

35 Na Jisas fole olëmu huju tle na tēkakli. Na ho jwa tabo elë tuju. Na Gotome gëgali tleläle. 36 Na tokwafe Saimon bu huju tle na Jisasmë hana hwi tlole. Na këme buna, bubë yabena, Jisasmë hohwi mëtëtatla. 37 Na bu hwi motlola na megali motlola, “Feilawa oneho jume hohwi mëtatëyo.” 38 Kwe Jisas bume megali latlome, “Matëbe. Bo kë lifewa ita hana nuguwime. Sebo fli life elë lolime kë mëgebebë telë manuja. Bo Gotobë gali tē nanogoutatemëme. Bo këme tisi.” 39 Na bu Galili provinsbë tokwëtokwë life elë asë tēbelëfa. Na bubë jowa jowa lotu lowa tēkaklutëme na Gotobë gali mana tē tētagutëme. Na bu ahwane tēbo onehobë ato mago hehë tlagutëme.

Jisas bu ato juba jubawa kë tēgehlebë home sle totle

40 Na ato juba jubawa kë tēgehlebë ho Jisas belë tisitle. Na bu sëkefo miti tafa tletle na anisasana gali tlole, “Jisas, ju tole laleye, ju bobë ato lalowa sle etatenëme.” 41 Na Jisas bume maninibomu metletle na tobana lu totle na gali tlole, “Bo tole nanelë, ju lalowa tafa egleme.” 42 Na

kë tëbo bume lakilewa tetokwakle. Na bu lalowa tafa tle. ⁴³ Na Jisas bume jine tlële na anisasana megali tole, ⁴⁴ “Ju aholokwane ele. Jubë ato lalowa kë lëgëbetëbë, ho lime asa gali elole. Matëbe. Jubë lowene mëta fwa eholeme. Na jubë ato, lotu home leb-otane eoutatleme. Na ju bume sipsip kleli afabo ejuwelëleme, Moses fene gali tle. Na bu kë afabo Gotome ahojume nalëgletleme, bu sinikibo hëhë nalogoleme. Na iniwa oneho bu melowene namëgletëyome, ‘Jubë ato lalowa lëbetëfe.’” ⁴⁵ Kwe kë ho, bubë ato kësle tëgletlebë gali, iniwa onehome të tëtatëme. Na iniwa oneho Jisas kësle logotlebë gali walowene mëtletla. Këme nëgeme Jisas lifeku mëta hana tafa tle, oneho bume sos-alë mogotlalime nëgeme. Na bu ho jwa tabo mëta këme tafa tle. Na iniwa oneho li life li life mago, bu betelë mutujukefëtla.

2

Jisas ato mogowa home sle totle

¹ Na tokwafe, li olëna, Jisas Kaperneam lifewa ita tuju. Na iniwa oneho Jisas ita kë tigusibë gali aholokwane mëtla. ² Na lebutako oneho Jisasme lowa loko motokweitla. Lo lakewa tle, afloko hana tëbe tle. Na ino ëfo mata afloko hana tëbe. Na Jisas Gotobë gali onehome të tëtatëme. ³ Bu gali mana të tëttagulebëë, na nilimalë ho, ato mogowa këtëgëbetlebë home Jisas belë ni labukuna mëtlesula. ⁴ Bu Jisas belë loliwa yafe mëtlesula kwe lebutako oneho tafa mëtlame nëgeme na lo wake tle, na bu loliwa hana mëtlesula. Na bu lo leli elë mëtehilikola na anabali sësakëfa mëtla, na ni labuku mëta kë ni tëgëbebë ato mogowa home mana tuku mëtëmalitaya Jisasbë elebo li elë. ⁵ Na kë ho melowene lamëtla, “Jisas ebë ato mogowa home lalowa sle logotlemefe.” Na këme tuku mëtëmalitaya. Na Jisas bubë lowene wahwi tlotëme na kë ato mogowa home gali tole, “O nëba iko. Bo jubë tëbo aholokwana wafi ti nëletë.”

⁶ Na Gotobë tafa sle gali lowene sle mëgletlabë ho fli, kë lo mëta tafa mëtelula, na bubë lowene nawa melowene lamëtla, ⁷ “Bu këha gali fëyeme gali lëlene? Bu tëbo homu. Bu Gotome fëyeme boblo lotlene? Bu Gotoha natafa lëglemene? Hee! Ho kwe tëbo lowene aholokwana hana ti lëgleme. Hanane mu. Goto kwe fëyemene, tëbo lowene aholokwana ti lëgleme.” ⁸ Na Jisas bubë lowenena hokweinawa lalowenewa tletëme. Na bume takune tole, “Sobo këha lowenena fëyeme lowene elone?” ⁹ Bo bume megali noglolëna, ‘Bo jubë tëbo aholokwana wafi ti nëletë,’ sobo habelë lowene lalone, bo bubë tëbo lowene aholokwana ti nëletelë. Sobo kë wesibi hwi hana elolo. Kwe bo bume megali noglolëna, ‘Ju huju ele, na jubë lowa ejume.’ Na bu huju lëleme, kwe sobo melowene naegelome, ‘Bo Gotobë kalëlegona ho, na bo ato tëbona home lalowa sle nogotlëme. Na bo mata hobë tëbo lowene aholokwana lalowa ti nëgletelëme.’ ¹⁰ Bo metole nanelë, sobo melowene egelome, ‘Bo kë nëgebë kwe, Gotobë life mago ho, bo ebë life mëta, kalëlegona homu nëtabë. Na bo tëbo lowene aholokwana lalowa ti nëgletemëme.’” Na Jisas ato mogowa këtëgëbetlebë home hwi tole na gali tole, ¹¹ “Bo jume gali nolë, ju huju ele, na jubë ni labuku glo elëme na jubë lowa ejume.” ¹² Na kë ho lahujuwa tle na bubë ni labuku glo tle na hokweinawa latugujuwa. Na iniwa oneho klelego memëtla na bu Gotome fleflesu mëtletla na megaliwa mëtla, “Goto lale mu.” Na bu gali mëtla, “Ëtani sebo ebëha wesibi hwi hana tola. Hanane mu.”

Jisas Livaimë gali tole, “Ju bome nagi enënë”

¹³ Jisas bu Galili lake tu helefowa ita tuju. Na feilawa oneho bu belë mitisitla na bume Gotobë gali të tëtatëme. ¹⁴ Bu tugujubëë na bu Alfiusbë nëba, Livaimë, hwi tole, bu takis lo tokwëfo mëta tafa tle. *Livai bu takis baliti glo tëglekëfëbë ho.* Na Jisas bume gali tole, “Ju bome nagi

enënë.” Na Livai fotokoke na bume nagi telëkakle.

¹⁵ Tokwafe Jisas Livaibë lo mëta hi tle. Na feilawa takis baliti kë glo mëglekefëyabë ho na fli tëbo enëne, bu tëbo lowene mëta kë tafa mëglabë, bu Jisasna bubë lowene esogo mëglelëtlabë hona hi mëtla. Feilawa këha tëbo lowene esogo mëglelëtlabë ho bu Jisasme nagi mëtelëkakla. ¹⁶ Na Gotobë tafa sle gali lowene sle mëgletlabë ho fli, bu lolime tafa mëtla. Bubë weniji melë lëgëbetëmelalële, Farisi. Na bu Jisasme mehwi motlola, takis baliti kë glo mëglekefëyabë ho name na fli tëbo lowene kë esogo mëglelëtlabë ho name hihi tlelëme. Na bu Jisasbë lowene esogo mëglelëtlabë home takune motloma, “Bu takis baliti kë glo mëglekefëyabë ho name na fli tëbo lowene kë esogo mëglelëtlabë enënename fëyeme hi lëlelëmene? Bu tëbo enëne mu.” ¹⁷ Jisas bu kë gali aholokwane tle na kë Farisi home gali tlome, “Dokta bu tëbo jwa mëglabë home hana sle logotomeme, hanane mu. Ho tëbo mëglabë kwe fëyemene, dokta bume fwa sle logotomeme. Na bo kë fenene, bo lale lowene kë esogo mëglelëtlabë hobë lowene sleme nane tisi. Weye. Bo tëbo lowene kë esogo mëglelëtlabë hobë lowene sleme tisi.”

Jisas bu hi wesibi kë yo mëtlabë loweneme gali tle

¹⁸ Kë olëna, Jonbë lowene esogo mëglelëtlabë ho, na Gotobë tafa sle gali lowene sle mëgletlabë ho, Farisi ho, bu hi wesibi yo mëtla, bu Gotome lowene sle namëgletlame. Na fli enëne bu Jisasme takune motlola, “Jonbë lowene esogo mëglelëtlabë ho na Farisibë lowene esogo mëglelëtëmabë ho, bu hi wesibi fëyeme yo melekefëyane kwe jubë lowene esogo mëlelëtëyobë ho, bu hi wesibi yo jwa fëyeme melekefëyane? Hi wesibi yo lowene, ebë lale lowene mu.” ¹⁹ Na Jisas bume gali tlome, “Ho mëse sei lëglena, bubë yabenino hi wesibi yo mëglamene? Weye. Hanane

yo mëglame. Kë ho bubë yabenina mana tafa mëglana, kwe bu hi wesibi hana yo mëglame. Hanane mu. Bu fleflesuna feilawa hi wesibi hi mëglame. ²⁰ Kwe tokwafe, bu kë home bu mago mëglelulana, kwe mana bubë hi wesibi hana hi mëglame. Bu iniwa yo mëglame.”

²¹ Jisas megali latlome, “Ëtanifu lowenena, tiho lowenena iniwa hana sago mëgleme.” Na bu ebëme mewafle gali tle, “Ho li bu hëno ëho, tiho ëho katabona hana susu logotleme. Bu melë lëglena na kë ëho swa logotlena kwe kë tiho ëho katabobë fofogo lëgleme na hëno ëhome laholëyewa lotleme na fuluju takowa lëbeme. ²² Na ho li bu tiho wain taba liji tu, ëtanifu mëmë kleli jibona kë blëge blëge mototlabë botolo mëta hana wë logotleme. Bu melë lëglena, na kë tiho wain taba liji tu sëse lëglena, kwe ëtanifu mëmë kleli jibo botolome bule logotleme na wain taba liji tu na mëmë kleli jibo botolona iniwa tëbo mëgleme. Ho li bu këha melë hana logotleme. Weye. Bu tiho wain taba liji tu, tiho mëmë kleli jibo botolo mëta wë logotleme. Na bu hana bule lëgleme.”

Jisas bu tafawa olëna wege jwa namëglame loweneme gali tlome

²³ Jisasna bubë lowene esogo mëglelëtlabë hona tafawa olëna nuju kukuwa tlelume. Na bubë lowene esogo mëglelëtlabë ho, witi liji hi wesibi alëge alëge tëtälëwa motokouja. ²⁴ Na Gotobë tafa sle gali lowene sle mëgletlabë ho, Farisi ho, bu Jisasme takune motlola, “Ëje, ebë tafawa olë. Jubë lowene esogo mëlelëtëyobë ho, bu tafawa olëna nuju mago hi wesibi fëyeme tëtälë mëlane, bu tafawa olëna fëyeme wege mëlane? Moses bu ëtani kë lowenebëme tako hehë latle.”

²⁵⁻²⁶ Na kwe Jisas bume gali tafu tëtätëme. “Sobo, sebobë ëtanifu eso ho, Devitbë anebo gali, Gotobë bogo mago, hwi sle hana elotelone? Gotobë bogo megali lala, ëtanimu, Abiatar bu lotu lo mëta wege mëglabë

enënebë eso ho tafa tle. Na Devit, buna kë tafa tëglelëmebë ho, bu hi wesibi hanane na foneme gigli memëtla. Na Devit bu Gotobë lowa tëkaklu na bu Gotobë naba li mëta kë gogwa mëtlabë bletë nage hi tle. Kë bletë nage, Gotome kë gogwa mëtletlabë, atwati oneho hana hi mëglame. Lotu lo mëta kë wege mëglabë howa hi mëglame. Kwe Devit kë bletë nage fa tole na bume kë tafa tëglelëmebë home sa tētātēme na bu iniwa hi tlelëme. Kwe bu tēbo lowene nane mëtla. Na bobë lowene esogo mëglelëtenabë ho mata, bu tēbo lowene nane mëtla.”

²⁷ Na Jisas bu li gali megali tlome, “Goto onehome afina blëge blëge to-tome na tafawa olë mana blëge to-tle, onehome lëgaitame nalëgleme, kë olëna tafawa namëglame.” ²⁸ Kwe bo kë nëgebë kwe, Gotobë life mago ho, bo tafawa olëbë eso ho nētabë.”

3

Jisas, tafawa olëna, toba tēbona home sle tole

¹ Jisas bu lotu lowa ita tëkaklu. Na toba tēbona ho kë mëta tafa telule. ² Na Gotobë tafa sle gali lowene sle mëgletlabë enëne, Farisi enëne, bu Jisame mana hwiwa motlola. Bu melëme hwi motlola, Jisas bu kë toba tēbona home, tafawa olëna sle logotlemene o hanane. Bu melowene namëglame, “Jisas bu tafawa olëna kë toba tēbona home sle logotlena, kwe bu Jisame eso hobë toba elë gwa mogotlame.” ³ Na kwe Jisas bu kë toba tēbona home gali tole, “Ju ebelë esi.” ⁴ Na Jisas bume takune tlome, “Gotobë gali ebelë lëgëbelalëlene? Sobo habelë lowene lalone? Sebo tafawa olëna lalë lowene lalowa esogo nëglelëlamene o tēbo lowene esogo nëglelëlamene. Sebo tafawa olëna onehome lalowa nëgaitamamene, bu lalë tafa namëglame o sebo onehome lalowa hehë nëgletëmamene, bu gigli namëglame.” Kwe bu gali tafu hana mētētātla, bu hilego memëtla. ⁵ Na Jisas bume hwi tlagume na lowene nawa wame tlome. Kë enënebë

lowene kalëlego lëgletëmeme nëgeme na bu kë toba tēbona home hana maninibo mētletla. Na Jisas bu këme wabelë tletëme. Na bu kë home gali tole, “Jubë toba elili etokwakle.” Na kwe bu toba elili tetokwakle na bu lalowa tēbetle. ⁶ Na hokweinawa Gotobë tafa sle gali lowene sle mëgletlabë ho, Farisi ho, bu lotu lo mago totoho mētëkaka. Na bu eso ho Herotna ilawa kë wege mëglabë enënena loko mutulelëya. Na bu blalo, Jisame gali mana fafa mētētātla. Jisame mogo nalë, tēkle namogotlame.

Feilawa oneho lake tu helefome loko mētletlëya

⁷⁻⁸ Jisasna bubë lowene esogo mëglelëtlabë hona, kë life kile mëtla na Galili lake tuwa mutuja. Na feilawa oneho Jisas belë mitisitla. Fli Galili provins mago na fli Judia lifate mago na fli Idumea lifate mago memitisitla lamëtla. Na fli Jerusalem lifate mago na fli Tair na Saidon lifate mago mata memitisitla lamëtla. Na fli Jordan tu jelëfo elë kë tafa mutulabë, bu mata mitisitla. Kë feilawa oneho bu Jisas kë sle tētagumbë gali aholokwane mëtla na bu belë mitisitla. ⁹ Na Jisas bubë lowene esogo mëglelëtlabë home gali tlome, “Feilawa onehomu bome ekë sosalë mētana. Te, sobo ihe loliwa ehijo. Na oneho bome feilawa sosalë mëgëtanana kwe bo kë ihe mëta fe nanëkakëme.” ¹⁰ Ètani Jisas bu feilawa tēbo atona home sle tētagume. Këme nëgeme feilawa tēbo atona oneho, bu kofekofe sigli memëtletlogwaya, Jisame atome lu namogotlame, bubë tēbo sle nalëgëtatëmeme. ¹¹ Na ahwane Jisame hwi moglolena kwe bu kë tēbo mogotombë enëneme buna iniwa lifeme mitigwëyame na anisasana gali motlola, “Ju Gotobë nēba.” ¹² Kwe Jisas bu ahwaneme itaita lëkle totokwefëme na anisasana gali tlokwefëme, “Sobo onehome megali asa elokwefomo, bo Gotobë nēba, matëbe.”

Jisas we ita tēle home aniji tlome

¹³ Jisas fatiniwa tokwale. Bu metole latle, home aniji naloglomeme, buna tafa namëglame. Na bu kë home gali telokwakëme. Na bu belë mitisiya. ¹⁴⁻¹⁵ Na bu we ita tële home aniji tloime, buna tafa namëglame. Bu metole latle, bu Gotobë gali tëme jine nalëgëbelëkwakëmeme na Gotobë afutukuna, iniwa lëlëmeme, ahwane tëbo hehë namëgletëmame. Na bume Aposel weniji fëfë totome. Aposel weniji ebë melë Gotobë gali mëgehila ho. ¹⁶ Bu we ita tële home aniji tloime. Bu Saimonme aniji tloime. Na Jisas bume li tiho weniji fë totle, Pita. ¹⁷ Na bu Jems, Sebedibë bowene name, na bolijamo Jon name aniji tloime. Na Jisas bu kë tlemalëme li weniji fë totome, “Boanerges.” Ebë wenijiye bu kë gali fenene, “Matafaha kale.” ¹⁸ Na bu Andru, Filip, Bartolomyu, Matyu, Tomas, Jems, Alfusbë bowene, Tadius na Saimon name aniji tloime. (Saimon bu Selot ho, na bu metole latle, “Li life mago ho bu seme eso home asa tafa malëletëna.”) ¹⁹ Na bu Judas Iskariotme mata aniji tloime. Judas bu tokwafe Jisame wame home kë yo loglomebë ho.

Bu meweniji lamëtla, “Jisas bu Belsebulna wege melowa”

²⁰ Jisasna bubë lowene esogo mëglelëtlabë hona lowa mutuja. Na lebutako oneho mana ita loko metlelëtëmame nëgеме, na Jisas na bubë lowene esogo mëglelëtlabë hona bu kë nalë hi hana mëtla. ²¹ Na Jisasbë weife mago enëne bu Jisas hi jwa këtëglebë gali aholokwane mutula na bu nome mitisitla. Oneho bu gali mëtla, “Bu wafi yaya lële.”

²² Na Gotobë tafa sle gali lowene sle mëgletlabë ho, Jerusalem lifate mago kë mëtetujulabë, gali mëtla, “Tëbo alibahobë eso ho, Belsebul, (bubë li weniji Satan), bu Jisasbë lowene mëta lelutabetle. Na bubë kalëlego Jisame lëlëkefle. Na bu kë kalëlego nawa ahwane hehë lëlekefëtëme.” ²³ Na Jisas gali telokwakëme na bu betelë mutuja. Na

bume wafle gali të tëtätëme. Bu gali tle, “Satan bubë wege enëneme habëna kë lëglëmeme? Weye. Hana kë lëglëmeme. ²⁴ Na jowa lifate mago enëne, bu bwa bwa lowene mëta tafa mëglana na momogli mëgëtayana kwe bu tafa sle hana mëglame. ²⁵ Na jowa lo mëta kë tafa mëglabë enëne, bu bwa bwa lowene mëta tafa mëglana na momogli mëgëtayana kwe bu tafa sle hana mëglame. ²⁶ Na Satanbë ilawa mago alibaho mata, bu blalo wame mëglana na bwa bwa lowene mëta tafa mëglana kwe bu tafa sle hana mëglame. Hanane mu. Bu tëbomu mëglame.”

²⁷ Na bu wafle gali mana të tëtätëme. Bu megali tle, “Tokli ho bu kalëlego hobë lowa hana felokwakeme na wesibi mana tokli lolëme. Weye. Hanane. Anë bu kë kalëlego home tabana afina lalei lotleme, kwe bubë lo mago wesibi mana toklime glo lëgletleme.”

²⁸ Bo some nëgali gali nanëlëyo, Goto, bu iniwa tëbo lowene, na iniwa gali, oneho Gotome kë tëbo gali moglolabë, aholokwana ti lëgletëmeme. ²⁹ Kwe oneho, bu Gotobë Amtëtombame tëbo gali moglolana, kwe Goto kë tëbo lowene aholokwana hana ti lëgletëmeme. Kë tëbo lowene bu mëta unaunalëme tei lëbetëmemu. ³⁰ Jisas bu kë gali këme gali tloime. Bu megali motlolame nëgеме, “Tëbo alibaho bubë lowene mëta lelutabetle.”

Jisasbë bota na bolijamonina yalëne

³¹ Na kë nalëwa, Jisasbë bota na bolijamonina kë lo elë fwa mëtla. Bu lo li mëta mitlija na bu Jisame mana gali mëtelulukwakla, bu belë ligisitëme nalëgleme. ³² Lebutako oneho bume iniwa tafana hwagënë mototla. Na bume gali motlola, “Aholokwane elë! Jubë bita, bli-jamoni, bimilunina, mana kë tafa melukokwëya na jume kë gali melulubakëyo.” ³³ Na Jisas bu gali metafutëtätëme, “Bobë beë na keinëbalenino bu habëha enënene?” ³⁴ Na bume kë hwagënë mototlabë onehome hwi

tlagume na gali tlo me, “Sobo hwi elo! Bobë beënino na keinëbalenino ekë tafa mla. ³⁵ Oneho bu Gotobë lowene esogo mlelëkefëtlabë, bu bobë beënino na keinëbalenino na one glëni.”

4

Jisas mewafle gali latlome, “Ho aoba liji nujume sike lele”

¹ Jisas Galili lake tu helefo mëta onehome gali ita të tëtatëme. Na feilawa oneho bume loko mëtleletla na bume goglo mëtëtagulame nëgëme. Na Jisas ihe mëta këme fe tëtëkake na tafa tle. Jisas ihena lake tu mëta temule na oneho tu helefo mëta tafa motokouja. ² Na Jisas onehome feilawa wafle gali të tëtatëme.

Na bu këme megali tlo me. ³ “Sobo aholokwane elo. Ho li nujuwa luj, aoba liji sike nalëgleme. ⁴ Bu aoba liji sike lëkou, na fliye alëgëme mitigotle na fole misibë lahiwa mele. ⁵ Na fli aoba lijiye anijina flëke mëta mitigo. Kë flëke feilawa hanane. Këme nëgëme bu hokweinawa këme hulu mëtle. ⁶ Kwe tokwafe kliji bu fëfalewa u tle na kë aoba olo maklëfa mëtle. Bubë tayafo su sle hana mototome, këme nëgëme lakokowa metëbe. ⁷ Na fli aoba lijiye, ikiji taba wayo mëta mititigo. Na kë ikiji taba bubule mëtle na tatako mëtle na kë aoba olome lamu mototome. Na bu liji hana fu mëtle. ⁸ Na fli aoba lijiye bu lale flëkememu mititigo. Na bu lale hulu sle lamëtle na liji fu mëtle. Fli 30 liji fu mëtle na fli 60 liji fu mëtle na fli we lujafe we liji fu mëtle.” ⁹ Na Jisas megali latlome, “Sobo ebë gali aholokwane egelona, lowene sle saeletelo.”

Jisas bu fëye lowene nane, wafle gali kë të tëtatëmebëye

¹⁰ Iniwa oneho wafi mutuja. Na Jisasbë lowene esogo mëgleletlabë ho we ita tële, na kë enëne Jisasna kë tafa mëtlabë, bume takune motlola, “Ju seme kë wafle galibë të sle etatëna.”

¹¹ Na Jisas bume gali tlo me, “Ëtani Goto, bu onehome kë tafa lëglelëmebë gali olafa hana tletëme. Kwe ebë olëna bu kë gali some waolafa lëtatëyo. Kwe

oneho bu Goto kë tafa lëglelëmebë lifate mëta tafa hana mëglame, bu Gotobë wafle gali aholokwanewa lamla kwe lowene sle hana mëgletlame. ¹² Këme nëgëme, ‘Bu mana itaita hwi mëglekefëyana kwe wesibi lowene sle hana mëgletlame. Na bu gali itaita meaholokwane mëglekefëyana kwe gali wayobë lowene sle hana mëgletlame. Bu wafle gali lowene sle mëgletlana kwe tëbo lowenebë kile mëglame na Gotobë lale lowene mëta tafa mëglame, na Goto bubë tëbo lowene aholokwana ti lëletëme.”

Jisas bu aoba liji wafle gali wayobë të sle tëtatëme

¹³ Na Jisas bubë lowene esogo mëgleletlabë home gali tlo me, “Sobo ebë wafle gali mumu egëbetelona kwe sobo fli wafle gali habëna lowene egletemomene? ¹⁴ Bo some aoba liji wafle gali wayobë të sle nëgetatëyome. Kë ho, bu aoba liji kë sike lëkoubëye, bu Gotobë gali të logotlebë home lëlekujawa lële. ¹⁵ Na aoba liji alëgëme kë mitigobëye, bu Gotobë gali aholokwane mëglabë enëneme lëlekujawa mëletëme, kwe Satan ligisibë na kë gali bubë lowene mago lafawa letokwakëte. ¹⁶ Na fli oneho, bu kë aoba liji anijina flëkeme mitigobë fenene. Bu Gotobë gali aholokwane mla na hokweinawa lowene mletla na fleflesu mletla. ¹⁷ Kwe Gotobë gali bubë lowene mëta lëgëbetëme sle hana lëletëme, olo wesibi tayafoha su sle hana motometëme. Na kë gali bubë lowene mëta tako lëbetëme hana lële. Kwe bu Gotobë gali lowene mëgletlame nëgëme, fli enëne bume këme tëbo mogotomame. Na bu Gotobë gali hokweinawa lamëglëkëlawawa. ¹⁸ Na fli enëne, bu kë aoba liji, ikiji taba wayome kë mitigobë fenene. Kë enëne bu Gotobë gali aholokwane mla, ¹⁹ kwe bu ebë life mago wesibime fwa tako lowene lamëletëma, na feilawa baliti gogwame fwa tole mla, na bu feilawa lale wesibi mëmaune lamëlëma. Na kë wesibiwa Gotobë gali lëlamu mëtatëme. Na bubë

lowene eflëbowa hana lëbetëme na lale lowene lëbetëme hana lële. ²⁰ Kwe fli enëne, bu kë aoba liji lale flëke mëta kë mitigobë fenene. Bu Gotobë gali aholokwane mla, na bu kë gali bubë lowenena kiki motla na bubë lowene mëta eflëbowa lëbetëme. Fli oneho bu lale lowene sogë takoha lëbetëme na fliye lale lowene takoha lëbetëme na fliye lale lowene takomu lëbetëme.”

Oneho bu lamo fiji tabo, iseku lokwalëfe hana gwa mëgëtayame

²¹ Na kwe, Jisas bubë lowene esogo mëglelëtlabë home gali tlome, “Oneho bu lamo fiji tabo, iseku o ni labuku lokwalëfe hana gwa mëgëtayame. Hanane mu. Bu masei mëta gogwa melekefëya. ²² Iniwa wesibi ëho kë mëglebë, kwe tokwafe olafa mëgleme. Na iniwa wesibi oneho ëho kë motomabë, kë mata, tokwafe olafa mëgleme. ²³ Sobo ebë gali aholokwane egelona, lowene sle eletelome.”

²⁴ Na bume ita megali latlome, “Gali sobo kë aholokwane egelobë, lowene sle egletelome. Sobo ebë gali aholokwane sle egelona na tako lowene slemu eletelona, kwe Goto some tako lowene lëglëyome na mata ita fli lowene lëglëyome. ²⁵ Ho bu Gotobë gali lowene sle lëletlona kwe ita Goto bume fli lowene lëglëleme. Kwe ho bu Gotobë gali lowene sle hana lëletlona kwe Goto kë hobë tokwëfo lowene kë lëgelëkakëtleme.”

Olo wesibi kë hulu mëglebë waflë gali

²⁶ Goto kë tafa lëglëlëmebë oneho, bu kë fenene, Ho bu olo wesibi nuju mëta sike lële. ²⁷ Na bu klabë nini tëbagu na klijina huju tlekëfe na asë tle, bubë wege fa nalogotleme. Na kë olo wesibi hulu mëtle na tatakome. Kwe kë ho bu olo wesibi hulumë lowene hana tletëme. ²⁸ Ebë flëkebë wesibiwa. Flëke bu lalemu nëgëme, olo wesibi këme hulu sle mële na liji këme fufu mële. Laba afina foke mële na tokwafe tahweji fata mële na liji mana fu mële. ²⁹ Na liji niglijë mëglëna, kë ho bu kosina tëtlië lotome, bu niglijë mëglebëme

nëgëme. (Ebë waflë galibë wayo gali bu melë lëgëbetlëlalële. Goto kë tafa lëglëlëmebë oneho, bu feilawa fata mëglame kwe sebo ëje hana hwi noloma na lowene hana nëletëma.)

Mastet inilu lijibë waflë gali

³⁰ Na Jisas ita gali tlome, “Sebo habelë gali nëglame Goto onehome eso home ke tafa lëgletëmebë. Fëye wesibi hane? Bo some ebë, waflë gali të nëtatëyo. ³¹ Goto onehome eso ho kë tafa lëglëlëmebë, bu mastet inilu liji fenene. Fli inilu liji bu tokwëtokwë ha, kwe mastet inilu liji bu tokwëtokwëmu. Ho bu kë tokwëtokwë mastet liji life mëta sike lëleme. ³² Bu sike lëleme, na bu hulu mlëme, na takowa mlemëmu. Fli inilubë ato bu tokwëtokwëha kwe mastet inilubë ato bu tatakomu. Na kë inilubë tikefo tatakomu so mëbelëkakëmemë. Na fole, kë tatakome tikefo tlelëgo tabo mëta, lo lalowa megiglijë mogoleme.” (Goto onehome eso ho kë tafa lëglëlëmebë, bu kë mastet liji fenene. Ebë olëna Goto tëlëwa onehome tafa lëlelëme, kwe tokwafe bu feilawa onehome tafa lëglëlëmemë.)

Jisas bu waflë galiwa të tëtatëme

³³ Jisas bu onehome feilawa waflë gali të tëtatëme, bubë lowene ni-jiwa. ³⁴ Bu onehome gali të sle hana tëtatëme. Bu waflë gali nawa të tëtatëme. Kwe bubë lowene esogo mëglelëtlabë home fwa tafa tlelëkefëme, bu waflë gali mana të sle tëtakefëtëme.

Jisas bu flelume kale tlole na latliwa tëbe

³⁵ Na kë olënawa, taboklë, Jisas bubë lowene esogo mëglelëtlabë home gali tlome, “Te manuja. Sebo lake jelëfo elë su manëkaka.” ³⁶ Na Jisasbë lowene esogo mëglelëtlabë ho, onehome hune mototoma, na Jisas kë tafa lëglebë ihe mëta fëfe mëtla. Na bume mëtlelula. Na fli oneho mata buna fli ihena mutuja. ³⁷ Na tako flelu tisi, na lake tu ihe elë okokli tokoke, na tu ihe mëta tëtafu lëgleme kofene. ³⁸ Na Jisas eso hwesutane

mëta gwa totle na ihe elo mëta mana ni tëbe. Na bume ni mago huju mototla, na gali motlola, “Tisa, ju seme maninibo hana eletënane? Sebo tume susuglu nëglame ekëne.”³⁹ Na Jisas huju tle na flelume kale tlole, “Teiyo, kuju ebe.” Na tume mata, kale tlole, “Teiyo.” Na kwe flelu latliwa tëbë na tu sosogli mata lakujuwa tëbe.⁴⁰ Na bubë lowene esogo mëglelëtlabë home takune tlole, “Sobo fëyeme uli elone, bome lowene sle hana eletënane, hee?”⁴¹ Na bu tako uli memëtla na blalo gëgali mëtla, “Euowe! Ebë habëtabo hone? Fleluna tuna bubë gali aholokwanewa lamlolefe.”

5

Jisas bu gëgëme këtëglebë hobë ato mago ahwaneme hehë tletëme

¹ Jisas na bubë lowene esogo mëglelëtlabë hona Galili lake tu su mëtëkaka na Gerasabë walujuwa fwa mutula.² Na Jisas ihe mago fe təkake na ahwane kë tetëbo mogotlebë ho matëmatë life mago bu belë tisi tle.³ Kë ho matëmatë life mëta fwa nini tëbekëfe. Ho liha bume senë tabana lei hana totle.⁴ Olëli olëli bu toba kaba yafe gëgelo mototokwefëmetla, kwe bubluju latotokwefëme. Na senë tabana yafe lei mototokwefla, kwe eluluwa latotokwefëme. Na ho liha bume hana fa logotleme. Bu afutuku feilawa tëgleme nëgëme.⁵ Klijiina klabëna bu matëmatë life mëta na fatini mëta measasëwa latlekëfe. Na bu afëflei tlekëfe na bubë ato anijina tëtletëbetëfale.

⁶ Bu Jisasme hwi telëkakle na fëka tokweitle na sëkefo miti latafawa tletle.⁷⁻⁸ Na Jisas gali tlole, “Ahwane ju ebë ho mago eiju.” Na bu kë gali aholokwane tlole na bu Jisasme feilawa galina këme gali tlole, “Jisas ju tako kalëlegona Gotobë nëba. Ju bome habelë egëtanëmene? Bo jume Gotobë wenijina gali nolë. Ju bome asa tëbo etanë.”⁹ Na Jisas bume takune tlole, “Jubë weniji fë etle.” Na bu gali metafu tëtattle, “Bobë weniji feilawa ho. Sebo lebutako nëgëme.”¹⁰ Na bu

Jisasme anisasana itaita gali tlokwefle, “Ju ahwane kakë life elë asa jine elëkakëme.”

¹¹ Na kwe lebutako kleli bu fatini mëta lolime memonei mëtletle.¹² Na ahwane Jisasme gali motlole, “Ju seme kë kleli belë jine elëkakëna, nëkaklutëma nanëglame.”¹³ Na Jisas gali tlole, “Sobo lalewa eyeu.” Na ahwane kë home kile mototle na kleli belë mëtëkaklutëme. Kë kleli këniiji mitlibe 2,000. Na bu fatini mago lake tu elë fëka mëtëmalita na tu mëta lasusugluwa mëtletle.

¹⁴ Na kleli mëtlëma ho bu mëtlëbouja. Na kë gali li life li life asë mëtletlëla. Na lebutako oneho mutuja kë wesibi hwi namoglomame.¹⁵ Na bu Jisas belë fwa mutula na ahwane ëbame kë tetëbo mototlebë home mana hwi motlola. Bu lale ëho wateho na këna tafa tle. Na bubë eso hanane yaya tletle. Na bu uli memëtla.¹⁶ Na ho bubë nabana kë hwi motlomabë wesibime, ho flime gali të mëtëtatëma. Ahwane kë tetëbo mototlebë hobë gali na klelibë gali mata të mëtëtatëma.¹⁷ Na oneho Jisasme hehë mëtletla. Bubë life mago luguju nalëgleme, li lifewa.

¹⁸ Jisas bu ihe mëta fe tle. Na ahwane ëbame kë tetëbo mototlebë ho anisasa gali tlole, “Bona manëyeuwo.”¹⁹ Na kwe Jisas këme tole hana tletle. Na bu kë home gali tlole, “Jubë lifewa ejumo na feilawa wesibi Goto jume kë sle tëgetabë gali na jume kë maninibo tęgletëbë wesibi jubë ilawa mago home të eoutatëmeme.”²⁰ Na fe təkake, kë ho tuju na Dekapolis magobë life elëme, Jisas bume kë sle togotlebë gali të tëttagutëme. Na iniwa oneho bu aholokwane motlola na kle memëtletla.

Jisas bu gli këtëglebë nëbame huju tëtamë na ko kë tęgkëfëbë mëse sle tle

²¹ Na kwe Jisas ihena lake tu jelëfowa ita su təkake. Na tu helefo mëta lebutako oneho loko mëtletlëla.²² Na lotu lobë eso ho tisi. Kë hobë weniji Jairus. Jisasme hwi tlole, na elebolime latitigotlewa.²³ Na bume anisasana takune tlole, “Bobë tamo nëba tako tëbo lale, gli egleme ekëyo.

Ju bobë lowa lalowa egisimene na toba gwa etatëme, ato titika naegleme na mana lalowa tafa naegleme.”
²⁴ Na Jisas buna ilawa mëtëyeu.

Na feilawa oneho mata esogo mëtlagula. Na Jisasna gëgeniwa mutuja. ²⁵ Na jowa mëse kë onehona mutuja. Kë mëse bu we ita tële tlibutu ko tle. ²⁶ Na kë mëse lili dokta belë yafe asë tëbelëfa, kwe bubë ato titika sle hana tletë. Na bubë baliti doktame yawe latlometëme. Na kwe bubë tëbo mana tëbetë. Titika hana tle. ²⁷ Na kë mëse bu Jisasbë kë ato sle gali aholokwane tletëme. Na bu onehonabë Jisasnabë nagi këme tuju. Na bu Jisasbë leluju elëme tujutle. Na bubë ëho tobana lu tëtatlë. ²⁸ Na bu melowene tëgleme nëgëme, “Bo tobana ëho mëta lu nogotlëna, bobë ato titika nalëgleme.” ²⁹ Bu ëho lu tëtatlë na ko latewa tle. Na bubë ato melowene tletle, “Tëbo hana nelëfe, watitika nelëfe.” ³⁰ Na Jisas bu melowene latle, “Bobë kalëlego bome wali wafi kile lëtanëfe.” Këme nëgëme, bu swaya tle, na takune tle, “Bobë ëho ya lu lëtanëne?” ³¹ Na bubë lowene esogo mëglelëtlabë ho bume gali motlola, “Ju hwi hana elomene, lebutako oneho juna gëgeniwa kë egiyeubëye. Na ju fëyeme gali elene, ‘Bobë ëho ya lu lëtanëne?’” ³² Kwe Jisas hwi tëbebokwake. ³³ Na kë mëse lowene tle, “Bubë kalëlego bobë ato mago tëbo wasle lëtanëfe.” Na bu uli tëglebë, lili namëtë. Na Jisame loliwa tisi tle. Na elebolime sëkefo miti tafa tletle. Na bu Jisame iniwa gali ble tëtatlë. ³⁴ Na Jisas gali tolë, “Mola, ju bome lowene sle egletenëme nëgëme, jubë ato këme titika lëletë. Na ju eiju. Tutune asa ele, lalowa tafa eoule. Na jubë tëbo tei sle lëletë.”

³⁵ Na Jisas mana gëgali tlelëbëë, na ho, Jairusbë lo mago wofu mana fata tlelëkakile. Na Jairusme gali motlola, “Jubë nëba wagli elo. Ju tisame ita welili asa eletle. Matëbe.” ³⁶ Kwe Jisas bubë gali boblo tëtatëme. Na lotu lobë eso ho, Jairusme gali tlole, “Ju tutune asa ele, bome fwa lowene

sle egletenëme.” ³⁷ Na bu feilawa home hehë tletëme, bume esogo jwa namëglagulame. Pita, Jems, na bolijamo Jonname fwa tlelume. ³⁸ Na bu Jairusbë lowa fwa mutula. Na Jisas, bu se lego aholokwane tlome na ye lego mata aholokwane tlome. ³⁹ Jisas lowa tëkaklu na gali tlome, “Sobo fëyeme ye elone? Sobo fëyeme se etlone? Kë nëba gli hana elo. Ni tekwe egëbe.” ⁴⁰ Kwe bu Jisame tako soso memotlola. Na Jisas bume lo mago hehë tletëme, “Sobo kë mago këkle ekako na eyeumo.” Na Jisas kë nëba bolijayaname botaname na bubë lowene esogo mëglelëtlabë ho aomalë, këme fwa tlelëkakume, nëba mogo këme egëbebë lowa. ⁴¹ Na Jisas toba mëta fa tëta na bubë galina megali tolë, “Talita kumi.” Ebë galibë wayo melëgëbelalële, “Mësenëba tokwëfo, bo jume gali nolë, ju huju ele!” ⁴² Na bu lahujuwa tle na kë lo mëta asë tëbelëfa. Kë nëba bu we ita tële tlibutu kënjiji tafa tle. Na bu këme hwi mëtla, na klelego memëtla. ⁴³ Na Jisas bume gali tlome, “Sobo ebë wesibi ho lime asa gali elolo. Na sobo bume hi wesibi elëyome.”

6

Nasaret life mago oneho Jisame tëboijiwa motlola

¹ Jisas kë lifate kile tle na bubë lifatewa Nasaretwa tuju. Na bubë lowene esogo mëglelëtlabë ho nagi mëtlëla. ² Tafawa olëna bu lotu lowa tuju na bu Gotobë gali onehome mana të tëtatëme. Na lebutako oneho, bu kë gali aholokwane motlola, na bu klelego memëtletla na gali mëtla, “Kë ho bu kë gali na kë lowene hamago fa lotlene? Na bu kë tiho wesibi na kë klelegowa wesibi bu melë kë logotomebë, habelë lalotomene? ³ Sebo melowene nanëletla, ‘Kë ho bu lo gliji howa. Bu Mariabë nëba. Na bu Jems, Josep, Judas, Saimon nabë bolijahafe. Na bubë bomolunino bu sebona tafa nëlafe. Bu sebobë life mago hofe na bu kë lowene hamago fa lotlene?’” Bu megali mëtla, na bume tëboijiwa

memëtletla. ⁴ Kwe Jisas bume gali tloime, “Iniwa fli life mago oneho bu Gotobë lowene mago gali të lotkweflebë home tole mletla na gali mëtla, ‘Kë ho bu lale homu.’ Kwe bubë life mago oneho, na bubë ilawa mago oneho, na bubë weife mago oneho bume tole hana mletla na bu melowene hana mletla, ‘Bu lale ho.’ Hanane mu.” ⁵ Na Jisas bu kë life mëta feilawa klelegowa wesibi blëge hana totometëme. Hanane. Bu jowa, jowa tëbo atona onehome fwa, toba gwa tëttagutëme na sle totome. ^{6a} Na bume kë lowene sle jwa mëgletlabë onehome tako tutune latletëmemu.

Jisas bubë lowene esogo mëglelëtlabë ho, Gotobë gali tëname na hobë tëbo ato slename jine tëbelëkakëme

^{6b} Na kwe Jisas bu kë lifate mëta gali të tēbetokwakle. ⁷ Na Jisas bubë lowene esogo mëglelëtlabë ho we ita tële kënijime gali telokwakëme na bu mitisitla. Na bu tlemalë tlemalë home jine tëbelëkakëme. Na bu wesibi fenene blëge lotome, këha afutuku bume gwa tëtatëme. Bu ahwane onehobë ato mago kë afutukuna hehë namëgletëmame. ⁸ Na bu këme mana tafa mëtla, na gali tloime, “Sobo egëyeuna, sobo feilawa wesibi asa ehoujo, asë lijiwa egehousome. Sobo hi wesibi, musu, baliti musuna asa ehoujo. Matëbe. ⁹ Na sobo juba jibowa ehwëyome, kwe sobo hihijika ëho asa ehoujo. Ato mago ëhowa egehousome.” ¹⁰ Na bume ita gali tloime, “Sobo li lifatewa tuhu egulona na ho some no lëglëyona, sobo kë lo mëta fwa tafa elome. Sobo kë lo mëta tafa egelobëë, na ita mana eyeume. ¹¹ Na sobo li lifewa tuhu egulona na ho some nëno hana mëglana na sobobë gali aholokwaneme tole hana mëglana, kwe sobo kë life lakilewa elome. Sobo kë life kile egelona, kwe sobobë juba mago flëke bubë naba li mëta bu elome. Bu some këme hwi mëlëyome na melowene namëglame, ‘Fëyeme tëbo nilitayane? Goto seme tëbo lëgëtanamefe.’” ¹² Na kwe bubë lowene esogo mëglelëtlabë

ho mana mutuja. Na bu iniwa onehome megali mëtlaguma, “Sobo tëbo lowene aholokwana ti elome na lale lowenewa esogo eledëlome.” ¹³ Na bu feilawa ahwane, onehobë ato mago hehë mëtlagumetëma. Na bu lëkaluwa welë tu tëbo atona onehome tefo mëtëtagumetëma na bume sle mototoma na bu lalowa tafa mëtla.

Eso ho Herot bu Jisasme meweniji latle, “Home kë baptais togotomebë, Jonfe”

¹⁴ Iniwa lifatebë oneho, bu Jisas onehome kë sle togotomebë gali waaholokwane motokouja. Na eso ho Herot bu kë gali mata aholokwane tle. Fli oneho bu megali motokouja, “Jisas ebë kwe, onehome kë baptais togotomebë Jon, tekwe nëge, matëmatë mago huju tle. Këme nëgëme, kë klelegowa wesibi melë blëge këme lotome.” ¹⁵ Na fli oneho megali lamëtla, “Ebë kwe, Elaija tekwe nëge, matëmatë mago huju tle.” Na fliye kwe megali lamëtla, “Ebë kwe, Gotobë lowene mago gali të lotkweflebë ho, tekwe nëge, matëmatë mago huju tle. Bu ëtanifu Gotobë lowene mago gali të motokweflabë ho fenene.” ¹⁶ Na eso ho Herot bu kë gali aholokwane tle na gali tle, “Bu home kë baptais togotomebë Jonfe. Èbame bu wame home boblo logotomebë home gali tlole, na bu tuju na Jonme mou lokwati tlë tujetle. Na bu matëmatë mago wahuju tle.”

¹⁷⁻¹⁹ Ètani eso ho Herot bu bolijamobë, Filipbë, mëseme hijika totle. Kë mësebë weniji Herodias. Jon Herotme itaita megali latlokwefle, “Blijamobë mëseme kë hijika egotlebë, kë lale lowene nane. Weye.” Këme nëgëme, Herodias bu Jonme tako enisusu latletlemu na bume mogo nalë tëkleme tole tletle. Herodias bu Jonme wame togloleme nëgëme na eso ho Herot bu home këme jine tlële, Jonme senë tabana lei lotleme na kalabusu lowa tuku lëleme, Herodias bume tëkle egotlelime. ²⁰ Eso ho Herot bu Jonme melowene latletle. “Bu

lale homu na Gotobë lale lowene esogo lëglelëtlebë ho.” Na bu Jonme uli këme tletle na bume ululu sle këme tole, bubë mëse Herodias tëkle egotlelime. Bu Jonbë gali yafe aholokwane tole, maninibona tëbo metletle na tako tutune metle. Kwe bu Jonme aholokwaneme tako tole latletlemu.

²¹ Na kë nalëwa, eso ho Herot bu feilawa hi wesibi loko tëtamë, bota bume këna fu totlebë olëna fleflesu hi nalëglelëmeme. Na Herodias bu melowene sle latle, “Bo metole nanelë, kë fleflesu hi nalë, Jonme mana tëkle nogotlëme, mogo nalë.” Na Herotbë gavmanbë eso ho, na wame home boblo mogotomabë eso enëne na Galili provins magobë letitabo ho bu kë fleflesu wesibi hime mitisiya. ²² Kë enëne bu mana hi motokouja na Herodias boko mana tisi tëme, elefi naegleme. Na kë layo mëse bu elefi tle. Na eso ho Herot na buna kë hi mëtlabë ho bu kë elefi hwi motlotëya, mëmaune lamëtlëtëyamu na bubë elefime tako fleflesu memëtletëya. Na eso ho bu kë layo mëseme këme gali tolë, “Ju fëye wesibi tole eletlene? Ju wesibi tole laletlëye, bo jume kë wesibi nëglëme.” ²³ Na eso ho Herot bume iniyafememu gali tolë, “Bo jume nëgali galimemu gali nolë. Ju wesibi tole laletlëye, bo jume kë wesibi nëglëme. Na ju metole eglena, bobë iniwa wesibi fu notometëme na jume nëlëme, na bobë lifate mata tlë nëtatëme na jebelëfu jume yo nolëme, ebë lalowa, bo tako tolemu nanelë.”

²⁴ Na kë layo mëse bu tuju na botame takune tolë, “Bo bume fëye wesibime gali noglolëmene?” Na bota këme gali tolë, “Ju bume, home kë baptais togotomebë, Jonbë esome gali eglonëme, kë eso nalëglëme.” ²⁵ Na këme kë layo mëse bu eso ho belë ita hokweinawa tuju na gali tole, “Bo metole nanelë, ju eli, home kë baptais togotomebë, Jonbë eso mou lokwati tlë etatle, na kë eso bletë ëhou mëta tuku elëme na kë manogwa bome enënëme, hwi nanoglolëme.” ²⁶ Eso ho bu kë gali aholokwane tolë na

bu tako maninibo metle. Kwe bu kë hi tëglelëmëbë oneho, bubë iniyafe gali aholokwane motlolame nëgëme na bu këme tiniji tletëme. Këme nëgëme bu kë mësebë gali hana boblo lëtatëme. ²⁷ Na këme, bu wame home boblo logotomebë home, gali tole, “Ju ejume, na Jonbë eso mou lokwati tlë etatleme na bome ehitenëme.” Na kë wame home boblo logotomebë ho, bu kalabusu lowa tuju na Jonbë eso mou lokwati tlë tëtatle. ²⁸ Na bu Jonbë eso bletë ëhou mëta gwa tëtatle na tehile na layo mëseme tlëkakiji. Na layo mëse kë eso tehule na botame tujuwelë.

²⁹ Na Jonbë lowene esogo mëglelëtlabë ho bu Jonme kë tëke toglolebë gali aholokwane mëtla na bu mutuja na Jon mogome fa mototla na aniji fuluju matëmatë mëta gwa mutujetla.

Jisas bu hi wesibi 5,000 home sa tëtatëme

³⁰ Jisas, Gotobë gali tëme kë jine tëgelëkakëmebë ho, ita mitisiya na Jisas mëta loko mëtlelëkakëjaya. Na bu iniwa wesibi kë mëtlabë na onehome kë të mëtëtagutëmabë gali Jisame të mëtëtatla. ³¹ Kwe feilawa oneho mitisikefëtëmame nëgëme na Jisana bubë lowene esogo mëglelëtlabë hona bu kë nalë këme haha tafu hana mototla na hi hana mëtla. Na Jisas bubë lowene esogo mëglelëtlabë home këme gali tlome, “Te, mana manuja, hojwa tabo elë. Tafa sle nanëglame.” ³² Na bu ihe mëta fëfe mëtla na buwa hojwa tabo elë mutuja.

³³ Na feilawa oneho bu hwi mëttaguma na lowene mëtla, “Jisas lalëlelumefe, bubë lowene esogo mëglelëtlabë home.” Na këme nëgëme lilife lilife mago oneho bu Jisana kë mutujabë life elë këme fëka motokouja na kë lifewa bu afina fwa mutula. Na Jisas bubë lowene esogo mëglelëtlabë home nagi fwa tulelëme. ³⁴ Këme nëgëme, Jisas bu jelëfowa fwa tule na bu kë feilawa onehome hwi tlome. Bume mëhwi latlome. Bu sipsip kleli, ho lëglëme jwabë fenene. Ho bume hana taitame. Na bu

bume tako maninibo kēme tletēme. Na bume feilawa gali tē tētātēme. ³⁵ Tokwafe, taboklē mu, Jisasbē lowene esogo mēglelētlabē ho bu belē mitisiya na bume gali motlola, “Ebē taboklēmu na ebē hojwa life. Sebo hi wesibi hamago fa nogotlamene? Hanane mu. ³⁶ Te, ju onehome mana jine ebelēkakēme. Loli life elē fwa matliwaya, hi wesibi balitina glo namēglame.” ³⁷ Kwe Jisas bubē lowene esogo mēglelētlabē home gali tafu tētātēme, “Hi wesibi bume sobo eglēmome.” Na bu Jisame takune motlola, “Ēēē, ju melowene lalene, ‘Sebo bletē nage 200 balitina glo nēlamene na bume nēlēmame?’ Sebo kēha baliti hananefe.” ³⁸ Na bume takune tlome, “Habenuju bletē nage mēbetēyone? Sobo hwi ejuwelēmo.” Na bu hwi mutujuwelēma na ita mitisiya na Jisame gali motlola, “Sebo tobali bletē nage mēbe na mo tēle mēbe.”

³⁹ Na Jisas bume gali tlome, “Sobo lale agosaba mēta loko elagujome na tafa ekoujome.” ⁴⁰ Na bu iniwa tafa motokouja. Fli tafa mētlabē we lujuafe we oneho na fli tafa mētlabē 50 oneho. ⁴¹ Na Jisas kē tobali bletē nage na tēle mo glo tle na hwi tokwake na Gotome lale gali tlole, “Ebē bletē nagenā mona yaha fēyeme enēnane?” Na bu klelegowa wesibi blēge totle na kē bletē nage fufu totome na bubē lowene esogo mēglelētlabē home tlēme, onehome sa namēgētātēmame. Na bu kē tēle mo mata fufu totome na sa mētētagutēma. ⁴² Na bu iniwa hi mētla na imo sosolo mototoma. ⁴³ Na bu bletē nage lēnena, mo lēnena we ita tēle basketē musu mēta mētēselokwaya. Na kē basketē musu ēfowa lakalewa mētle. ⁴⁴ Feilawa oneho bu kē bletē nage hi mētla na hobē tabēi kē niji 5,000 bu onename nēbalename hana tabei mētla.

Jisas bu lake tu matawa asē tole

⁴⁵ Na kē nalēwamu, Jisas bubē lowene esogo mēglelētlabē home, gali tlome, “Sobo ihe elē fēfe elome

na jelēfo elē Betsaida lifatewa su ekakome.” Na bu iniwa onehome jine tēbelēkakēme. Buwa lētabe nalēgleme. ⁴⁶ Onehome afina jine tēbelēkakēme, na bu fatiniwa tokwale, Gotome gēgali nalogolelēme. ⁴⁷ Na atome hwi olēna, bubē lowene esogo mēglelētlabē ho lake tu ku mēta ihena kakēha mētemula na Jisas lake tu helefo mēta tlibe. ⁴⁸ Na Jisas bu hwi telokwakēme, bu ihena yafe yegu motokouja, kwe flelu ihe yelu boblo tēgētātēmeme nēgeme, na ihe alabuju kēme tiwatēme. Tokwafe, fole olēna Jisas lake tu matawa wa bu belē tisi tēme. Bu sigli lēgetokwakēmeme kofene. ⁴⁹ Kwe bubē lowene esogo mēglelētlabē ho bume hwi motlola, tu matawa wa asē tole. Na bu meweniji lamētla, “Alibahowa.” Na bu afēfleina memētla. ⁵⁰ Na iniwa bume hwi motlola na uli memētla. Kwe Jisas bume hokweinawa gali tlome, “Sobo uli asa elo. Bo tekwe nēge. Sobo lalowa tafa elo.” ⁵¹ Na bu ihewa fe tokwake na buna mētētabēya. Na flelu latliwa tēkake. Na bu klelego memētla. ⁵² Jisas tobali bletē nage feilawa onehome sa tētātēmene, bubē kalēlego olafa tētātēme. Kwe bubē lowene esogo mēglelētlabē ho kē lowenebēme lowene sle hana mētletla, aholokwana timu mētla. Kēme nēgeme tu matawa wa kē asē tēglebē na flelu kē tli tēgēbebēme klelego kēme mētletla. Bubē lowene mana yaya tletēmeme. Bu bubē kalēlego, lowene sle jwa mēgletlame nēgeme.

Jisas bu feilawa tēbo atona onehome Genesaret lifate mēta sle totome

⁵³ Jisas, bubē lowene esogo mēglelētlabē hona, lake tu su mētēkaka na Genesaret lifatewa fwa mētētekekēya na ihe kesi mētētaya. ⁵⁴ Bu ihe mago, helefo elē fēfe motokwaka, na hokweinawa oneho bu Jisame hwi motlola na weniya mana mētēselēla sle mētla. ⁵⁵ Na ho bu kē lifate li mēta kē lēgēbagubē lifatewa fēka fēka mētēbelēfaya na onehome gali mētlaguma. Na oneho, bu Jisas

kë tafa tuglebë gali, aholokwane mëtla na bu tēbo atona onehome sanēneme gogwa mëtla na bu belë mëtlesuma. ⁵⁶ Na iniwa tatako lifate elë na tokwëtokwë lifate elë Jisas bu kë tuhu tokoubë, oneho kë mēta loko mëglelëkefëyabë lifeku elëme, tēbo atona onehome kë belëme mëtletluma. Na bu Jisame anisasana gali motlola, “O masiwafe, kë tēbo atona oneho, jubë èho mēta fwa lalowa lu mëtomene, sle namëglame.” Na iniwa oneho melë kë mëtlabë, bu laslewa mëtla.

7

Gotobë tafa sle gali homubë tafa sle galime boblo lalotle

¹ Farisi enëne na Gotobë tafa sle gali lowene sle mëgletlabë enëne fli, Jerusalem lifate mago kë mitisiyabë, bu Jisame loko mëtletlëta. ² Na bu mehwi motloma, Jisabë lowene esogo mëgletlabë ho fli, bu hi wesibi hi mëtla kwe bu toba afina swa swa hana motoma, bosemnenibë tafa sle gali fene lëbetëme. ³ Farisi enëne na fli Juda life mago enëne bu bubë bolijafujunibë lowenewa esogo mëtletlëta. Bu melowene mēta tafa mëtla. “Toba afina swa hana motomana, bosemnenibë tafa sle gali fene tēbetëme, kwe bu hana hi mëglame.” ⁴ Na bu maketwa mugujana na migisiyana na tu tetefo jwa mëglana, bosemnenibë tafa sle gali fene tēbetëme, kwe bu hana hi mëglame. Na bu lili lowene mēta tafa mla, bosemneni fenene tafa mëtla. Bu mëlamelekefëya, bu blete, kabo, sospenë, na ni labuku mata swa motokwefëma. Bu bosemnenibë lowenewa esogo mëtletlëtameme nēgeme. ⁵ Na Farisi enëne na Gotobë tafa sle gali lowene sle mëgletlabë enëne, bu Jisame takune motlola, “Jubë lowene esogo mëgletlabë ho bu sebobë semnenibë lowene esogo jwa fëyeme mëlelëlane? Bu hi wesibi manawa fëyeme hi mëtletkefëyane? Bu toba afina swa hana motomana, bosemnenibë tafa sle gali fene lëbetëme.” ⁶ Na Jisas bume gali tlome,

“Ètani anebo, Gotobë lowene mago gali tē tokweflebë ho, Aisaia, bu some nēgali galime gali tolëyo. Sobo sosogëna hofe bu fene yahi tle. Bu Gotobë gali meyahi latle, ‘Kë oneho bu bome bubë èfalëbo nawa mēfë mëgëtanana, “Goto lale homu.” Kwe bu bome bubë lowenena iniwa tole hana mëtletëna, na lowenena, lowene sle hana mëtletënamu. ⁷ Bu melë lamëtla, bu onehobë tafa sle galiwa tē motokwefla kwe mesosogëna lamotloma, “Kë tafa sle gali ebë Gotobë gali.” Bu bome megali kë moglonabë, “Goto ju lale ho, sebo jume tako tole nanëletëyo,” kwe bome lowene sle hana mëletëna bubë lowene mēta. Këme nēgeme bu kë galina bome blawa gali molona.” ⁸ Jisas ita megali tle, “Sobo Gotobë tafa sle gali aholokwana wati telo. Eholo hana elo. Na sobobë bisemnenibë lowenewa eholo. Sobo Gotobë gali, bisemnenibë lowenena lëlamu latatelo.”

⁹ Na Jisas bume fli gali megali latlome, “Sobo Gotobë tafa sle gali kaiselo boblo etokweflo na sobobë lowene mēta fwa etabo. Sobo kë lowene tako lëbetëyo. ¹⁰ Ètanifu ho Moses gali tle, ‘Sobo bitaname, blijayaname boblo asa etomo na bubë galiwa esogo elëletëmome.’ Na bu li gali megali tle, ‘Ho botaname o bolijayaname tēbo gali loglomena kwe ho bume mogo nalë tëkle mogotlame.’ ¹¹ Moses kë gali megali latlëyo kwe sobo megali latlekefo, ‘Ho bolijayaname botaname megali loglomena kwe ebë lalowa, “Ayana beëna masiwafe, ebë wesibi some nēgaitome fene kwe bo ebë wesibi Gotome wafi aniji tlometelëfe.”’ ¹² Ho bu kë gali, bolijayaname, botaname gali loglomena, na bu botaname, bolijayaname, lëgaitame jwa nēgena sobo megali egelome, ‘Ebë lalowa. Bu Gotome wafi aniji tlometle.’ ¹³ Sobo kë gali megali egelona, sobo bisemnenibë lowene mago galiwa tē etatemo na Gotobë gali këna lëlamu latlo. Na sobo feilawa tēbo wesibi këha memelë latokwefëmofe.”

Jisas, bu Gotobë naba lime, home kë tëbo mogotomebë wesibime, gëgali tle

¹⁴ Na Jisas onehome gali telokwakëme na bu mitisitla na bume ita gali të têtatëme, “Sobo iniwa aholokwane elome na lowene sle eletelome. ¹⁵ Iniwa wesibi, ho bu kë hi mëglekefëyabë, kë wesibi Gotobë naba lime home tëbo hana mogotomeme. Hanane. Kwe wesibi hobë lowene mëta kë lëgelubebë na lëkaklibë, kë wesibiwa Gotobë naba lime home bu tëbo motomeme. ¹⁶ Ho bu aholona, bu ebë gali sa aholokwane sle lële.”

¹⁷ Jisas kë onehome hune totome na bubë lowene esogo mëglelëtlabë hona lowa mëtekakluja. Na bubë lowene esogo mëglelëtlabë ho bume kë wafle gali wayome takune motola. ¹⁸ Na bume gali tlome, “Sobo mata wayo gali yaya laletelone? Sobo kë wafle gali lowene hana elone? Sobo aholokwane elo. Iniwa wesibi, ho bu kë hi mëglekefëyabë, kë wesibi Gotobë naba lime home tëbo hana mogotomeme. ¹⁹ Këha wesibi hobë lowene elë nane muju. Weye. Bu aliji elë fwa muju na gu namela. Këme nêgeme bu home tëbo hana mogotomeme.” Jisas bu kë galina seme melë lëlekuju latletëna, sebo lalowa iniwa hi wesibi hi nêglame. Hi wesibi bu seme Gotobë naba li mëta hana tëbo mëgëtaname. ²⁰ Na Jisas bu ita gali tle, “Wesibi hobë lowene mëta lëgelubebë na lëkaklibë, kë wesibi Gotobë naba lime home buwa tëbo mogotomeme. ²¹ Bo këme gali nelë, hobë lowene mëta kë lelubebë wesibi bu melë: Tetëbo lowene, lisë lowene, tokli lowene, home mogo nalë tëkle lowene, ²² hona mëseme lisë eglelëbë lowene, mëmaune lowene, sosogëna lowene, aholabu lowene, gëglë lowene, li home gali fa lowene, home agalëklebë lowene na yayaha lowene. ²³ Kë iniwa tëbo lowene, hobë lowene mëta melubetëme na mëkakli na Gotobë naba lime home bu tëbo motomeme.”

Fonisia lifate mago mëse bu Jisame lowene sle latletle

²⁴ Jisas, bubë lowene esogo mëglelëtlabë hona, kë lifate kile mëtla na Tair lifatebë tokwëfo lifekuwa mutuja. Bu fwa mutula na Jisas bu li lowa hwelutuwa tëkaklu, oneho bume sosalë mogotlalime. Kwe bu mogweliha hana tafa lëgleme, oneho bume wahwi motlola. ²⁵⁻²⁶ Na mëse li bu megali aholokwane tlome, “Jisas bu lo mëta kë tafa lële.” Na bu hokweinawa bu belë tuju tle. Ahwane tëbo kë mësebë nëbabë ato mëta lëtabetëme nêgeme na bota Jisas belë hokweinawa këme tisi tle na elebo lime bubusu tletle. Na bu Jisame anisasana gali tlole, “Jisas, ju ahwane tëbo bobë nëbabë ato mago kë elëkakëtë.” Kë mëse bu li lifate mago mëse. Bu Siria lifate mago na bubë lifekumu Fonisia. Bu Juda lifate mago mëse hanane. ²⁷ Na Jisas bu melowene latle, “Juda life mago oneho bu nëbaleha na fli life mago oneho bu amale ha. Na bo Juda lifate mago onehome afina naitamëme.” Na bu kë mëseme wafle gali latolë, “Bo nëbalebë hi wesibi amaleme afina hana nêglëmëme. Weye. Bo nëbaleme afina nêlëmëme.”

²⁸ Kwe kë mëse bume gali tafu têtatle, “O tako ho, jubë gali nêgali gali. Kwe ama mata, lo malu mëta kë tafa mëlekëfebë, bu nëbalebë lëne hi wesibi, kë mitigokëfebë mehimi mëlekëfe. Na ju bome mata lëne hi wesibiha aitane.”

²⁹ Na Jisas bume gali tolë, “Ju bobë gali lalë lowenena tafu etatenëfe. Këme nêgeme, kë ahwane tëbo jubë nëbabë ato mago wakile lëtamë, jubë lowa ita lalowa ejume.” ³⁰ Na kë mëse bubë lowa ita tuju. Na bubë nëba ni labuku mëta hwi tolë na bu lalowa tafa tletë. Kë ahwane bume wakile tëta.

Jisas bu aholo titiji tabo na gali mumu tabo home sle totle

³¹ Kë nalëwa Jisas Tair lifatebë tokwëfo lifeku kile tle na Saidon lifate sigli têttagule na Dekapolis provins sigliwa têttagule, na Galili lake tu elë fwa tule. ³² Na bu aholo titiji tabo na gali mumu tabo home bu belë mëtlesula. Na bu Jisame anisasana

gali motlola, “O masiwafe, jubë toba kë hobë ato mëta gwa etatle, sle nalëgleme.” ³³ Na Jisas kë home no tlële na onehome hune mëtelo. Na Jisas toba ku bubë aholo fuluju elëme sei tlëmetle. Na tokwafe bubë toba ku mëta nagutaba tihele tle na kë hobë aleji mëta gogwa tletle. ³⁴ Na Jisas heven lifewa hwi tokwake, na tako maninibo lowenebë haha tafu totle. Na bu kë home, bubë galina, megali tlole, “Efata.” Kë galibë wayo melë lëgëbelalële, “Tika eletelo.” ³⁵ Na kë hobë aholo latikawa metletle na bume gëgali lëglebë lowene tisitle na bu lalowamu gëgali tle. ³⁶ Na Jisas onehome hehë latletëme na fli onehome gali moglomalime, “Bo kë nogotlëbë wesibime fli onehome asa gali elomo. Matëbemu.” Bume yafe hehë tletëme, kwe bu boblo lamototla, na Jisas togotlëbë wesibime gëgali motokoutla. ³⁷ Na oneho kë hobë sle gali, aholokwane mëtla, na klelego memëtletla. Na bu gali mëtla, “Euowe! Iniwa wesibi bu melë kë lotomebë, lalowamufe. Bu aholo titiji tabo hobë aholo titika lotometëme na gali mumu tabo enëneme mata sle lotometëme.”

8

Jisas bu 4,000 onehome hi wesibi tlëme

¹ Kë olëna, feilawa oneho Jisame ita loko mëtleletla. Na bu hi wesibi hanane. Na Jisas bubë lowene esogo mëgleletlabë home gali telokwakëme. Na bu mitisitla. Na Jisas bume gali tlole, ² “Bo ebë onehome maninibo nanëletëmë. Bu bona aona olë tafa nëla na bu hi wesibi jwa.” ³ Na bo bume fonoba jine nëgelëkakëmëna, kwe bu alëgeme foneme nabasahoba mëglame na migitigwëyame. Fli bu kakë mago mitisiyame nëgeme.” ⁴ Na bubë lowene esogo mëgleletlabë ho, bume takune motlola, “Sebo hi wesibi hamago fa nogotlamene, kë onehome kë nëglëmame? Ebë afloko mëta ho tafa jwa, mëglame nëgeme.” ⁵ Na Jisas bume takune tlole, “Sobo habenuju bletë nage mëbetëyone?” Na bu

megali motlola, “Sebo tobali ita tële këniyiwa nehweyafe.”

⁶ Na Jisas onehome gali tlole, “Sobo tafa ekoujome.” Na bu kë tobali ita tële bletë nage glo tle, na Gotome gali tlole, “Weë, ebë bletë nage, yaha fëyeme enënane.” Na bu klelegowa wesibi blëge totle na kë bletë nage fufu totome na bubë lowene esogo mëgleletlabë home tlëme. Na bu onehome sa mëtëtagutëma. ⁷ Na bu tëlewa mo mata mëtehweya. Na Jisas bu kë mo glo tle na Gotome gali tlole, “Weë, ebë mo yaha fëyeme enënane.” Na bubë lowene esogo mëgleletlabë home gali tlole, “Sobo ebë mo mata, onehome sa etatemo.” Na bu kë mo mata sa mëtëtatëma. ⁸ Na oneho bu yafe hi mëtla, kwe bubë imo sosolo mototomame nëgeme, na lëne mana sigenë metletëme. Na kë lëne hi wesibi mëteselokwaya na bu tobali ita tële basketë musu tëtafu mototoma. ⁹ Kë onehobë tabei këniyi 4,000.

Na Jisas onehome jine telëkakëme. ¹⁰ Na kwe, bubë lowene esogo mëgleletlabë home ihe mëta fe tlelëme, na Dalmanuta lifate elë mutuja.

Farisi enëne, Jisame takune motlola, klelegowa wesibi blëge lototlëbëme

¹¹ Bu Dalmanuta lifatewa fwa mutula na Farisi enëne bu Jisas belë mitisitla na mana Jisasna kofe kofe gali mëtlelogwaya. Bu Jisame sogëname su namogotlame fene na gali motlola, “Ju seme klelegowa wesibi li lebotane etatëna. Sebo jume melowene nanëgletëyome, ‘Goto jume kë jine tēgelëbakëbë hofe.’” ¹² Na Jisas wabelë tle na gali tlole, “Sobo, ebë olëna kë tafa egelobë oneho, bome klelegowa wesibi lebotane nogotlëbëme, fëyeme takune enonane? Bo some nëgalimu nanëlëyo, bo klelegowa wesibi lebotane hana nogotlëme, sobo melowene naegletëname, ‘Goto bome jine tlënëfe.’ Matëbe mu.” ¹³ Na bume hune mototoma, na ihe elë fëfe mëtla, lake tu jelëfo elë su namëkakame.

Jisas bu Farisi enënebë na Herotbë tēbo loweneme ululu sle galime gali tlome

¹⁴ Bu lake tu mēta mana mētemula na bubë lowene esogo mëglelëtlabë ho bletë nage mëtehouja hana mētla, aholokwana ti memētla. Bu jowa bletë nagewa, ihe mēta tēbe. ¹⁵ Na Jisas anisasana gali tlome, “Sobo Farisi enënebë na Herotbë bletë nage sēse wesibime ululu sle saelo.” ¹⁶ Na kwe bubë lowene esogo mëglelëtlabë ho bu blalo gëgali mētla, “Bu kē gali fëyeme gali lēlene? Sebo bletë nage nēgehweja jwa nēglame nēgeme na bu kēme gali lēlenawa.” ¹⁷ Kwe Jisas bubë gali walowene tletēme, na bume megali tlome, “Sobolalo megëgali fëyeme elone, ‘Sebo bletë nage alu-jawa.’ Sobobë lowene lëgëbetëyo hana lēlene? Hee! Sobobë lowene yaya lalëletëyone? Hee! ¹⁸ Sobo nabana, kwe sobo hwi hana elomo. Na sobo aholona, kwe sobo aholokwane hana elo. Bo bletë nage kē sa tēgëtatemëbë lowenebëme, lowene hana elone, aholokwana fëyeme ti telone? ¹⁹ Eëbame, bo tobali bletë nage 5,000 home kē fufu totometemëbë, lili kē mëglebë bletë nagenā, habenuju basketë musu tētafū totomone?” Na bu gali motlola, “Basketë musu we ita tēle këniji.” ²⁰ “Na eëbame, bo tobali ita tēle bletë nage 4,000 onehome kē fufu totometemëbë, lili kē mëtëglebë bletë nagenā, habenuju basketë musu tētafū totomone?” Na bu gali motlola, “Basketë musu tobali ita tēle këniji.” ²¹ Na bu gali tlome, “Sobo kē wesibi wahwi tlomofë kwe sobo aholokwana fëyeme ti elone, bo some kēha wesibi melë lalowa nēgetatëyome.”

Jisas bu naba titiki tabo home, Betsaida life mēta, sle totle

²² Jisas, bubë lowene esogo mëglelëtlabë hona, Betsaida lifewa tuhu mētla. Na naba titiki tabo home bu belë mëtlesula. Na Jisasme anisasana gali motlola, “Masiwafë, ju ebë home toba gwa etatle, sle nalëgleme.” ²³ Na Jisas kē naba titiki

tabo hobë tobame fa totle na bume lifeku mëglëbo elëme fe tlelëkakle. Na bubë naba mēta nagutaba tihele tletle. Na bu toba kē home gogwa tletle na takune tlole, “Ju wesibi hwi elome o hanane?” ²⁴ Na kē ho hwi tle na gali tlole, “Bo home asëna mehwi nanolomë kwe bume ti fene hwi nolomë.” ²⁵ Na Jisas toba bubë naba mēta ita gogwa tletle. Na kē ho ita hwi tēkake, na bubë naba lalowa mëtëbetle. Bu iniwa wesibi hwi sle tlagume. ²⁶ Na Jisas bume bubë lowa jine telëkakle. Na gali tlole, “Ju lifeku elë asa ekaklu.”

Pita megali latle, “Jisas, ju ebë ho kē nēgebë, Goto jume kē aniji tēglebë ho, onehome nēno naegleme”

²⁷ Jisas bubë lowene esogo mëglelëtlabë hona, Sisaria Filipai lifate li mēta kē mëgëbagubë lifatewa asë mëtëbelëfaya. Bu alëge mēta mana asë mētla, na mana takune tlome, “Oneho bome habelë lowene lamëletënanë?” ²⁸ Na bu gali metafū mëtëtatla, “Fli howe megali lamla, ‘Onehome kē baptais togotomebë Jon, tekwe nēge, matëmatë mago huju tle.’ Na fliye megali lamla, ‘Elaija, tekwe nēge, matëmatë mago huju tle.’ Na fliye megali lamla, ‘Eëtanifu Gotobë lowene mago gali tē totokweflebë ho, tekwe nēge, matëmatë mago huju tle.’” ²⁹ Na Jisas bume takune tlome, “Na sobo ee, sobo bome habelë lowene lalone?” Na Pita bubë gali tafu tētatle, “Ju ebë ho kē nēgebë, Goto jume kē aniji tēglebë ho, onehome nēno naegleme.” ³⁰ Na Jisas bume meheheë latletëme, “Sobo kē galibëme onehome asa gali elomo. Matëbe.”

Jisas gali tlome, “Bo gli nēgelëme na huju nelëme”

³¹ Jisas bubë lowene esogo mëglelëtlabë home, meokokwe sle wafi tlome, “Tokwafë bome, Gotobë life mago home, lebutako elili na hobota migisitenëme na bo kē mēta tafa nelëme. Na lotu letitabo ho na Gotobë lo mēta wege mëglabë eso enënëne, na Gotobë tafa sle gali

lowene sle mëgletlabë ho, bome hehë mëgletëname na mogo nalë tëkle mëtaname. Na bo tële olë nebëme kwe aona olëbëye huju nëgelëme.”³² Na bu kë gali të sle tētātēme. Na Pita Jisame mëglëbo elë fe tlelëkakle na bume anisasana këkale tlole, “Ju këha gali fëyeme gali elene? Kë galime asa gali ele. Matëbemu.”³³ Na Jisas swaya tokoketēme na bubë lowene esogo mëglelëtlabë ho flime hwi tlole na Pitame anisasana këkale tlole, “Ju Satanha gali elë. Ju kë mago fe ekake. Ju këha wesibi lowene egletēmena, kwe ju Gotobë lowene mëta nane tafa ele, weye, ju hobë lowene mëta fwa tafa ele!”

³⁴ Jisas bu onehome na bubë lowene esogo mëglelëtlabë ho name gali telokwakëme. Na bu mitisitla na bume gali tlole, “Ho bome na bobë loweneme esogome tole lëglena kwe bu ebë life magobë lale wesibi, bu kë tole lëgletēmebë, aholokwana timu sle sa lële na glime ulijwamu lëleme. Ho bume wame gali moglolana na bume mogo nalë tëkleme gali mëglana, bu uli jwa lëleme na bome mana esogo lëlenēme.”³⁵ Ho bu melowene lëglena, ‘Bo Jisame esogo nëglelëläna fli ho bu bome tēbo mëgëtaname.’ Na bu, bubë ato uli lëglelëläna na bome hana esogo lëglenëläna, kwe këha ho bu tēbo ligitame. Kwe ho bu bome lowene lëgletenëna na Gotobë lale anebo galiwa lowene lëgletlena na bubë ato uli hana lëglelëläna kwe kë ho bu hana tēbo ligitame. Ho bu kë home mogo nalë tëkle mogotlana, kë gli sle nane lële, weye, bu unaunalëme lale tafa lëgleme.”³⁶ Ho bu ebë life mago iniwa wesibi glo lëglena, na kë ho bu hel life mëta tēbo ligitana, kwe kë wesibi bume habëna mëgaitalemene? Weyewa. Hana mëgaitalememu. Bu blawa glo lële.”³⁷ Ho bu Gotona unaunalëme tafabë, wesibina hihijika lëglemene? Weye. Hanane mu.”³⁸ Tokwafe, bo kë nëgebë kwe, Gotobë life mago ho, bo ita nigisime. Bo bobë ayabë kljijha, kë u lëglebë elulegona na Gotobë

enselna iniwa nigisiamene. Oneho bu Gotome tēboijiwa mëgletlame na tetëbo lowene mlame. Na bu mago ho li, bo kë okokwe noglëyobëme na bome tiniji lëgletenëna kwe tokwafe bo nigisina, bo mata kë home kofayame tiniji nëgletelëme.”

9

¹ Na Jisas bume ita gali tlole, “Bo some nëgali galime gali nolëyo. So mago emëta kë eglibobë bu mana neme na Goto onehome kë tafa lëgletēmebë olë mana tako kalëlegona fata lëgleme. Na bu kë olë mana hwi mololame.”

Jisasbë ato bu li weniyanena fata tle

² Tobali ita jowa olë yawe motlola, na kwe Jisas, bu Pita, Jems, Jon name nëno tle. Na tako fatiniwa tilekome. Na buwa tafa mëtla. Bu Jisame hwi moglolabë na mana bubë ato li weniyanena hihijika tle-tle.”³ Na bubë ato mago ëho, olëha mëtëbetle, na bu tatiwamu mëtëbetle. Ebë life mago oneho bu ëho itaita swa mogotomana, kwe bu Jisasbë tatiwa ëho fenene këha hana mëtëbetëme. Bubë ëho tatiwamu nëgeme.”⁴ Na bubë lowene esogo mëglelëtlabë ho, bu ëtanifuho Elaijaname, Mosesname hwi motloma, bu Jisasna gëgali mëtla.”⁵ Pita bu këme hwi tlole, na Jisame gali tlole, “O Tisa, bo tako fleflesu nanelë, sebo ebë life mëta kë tafa nëglabë. Sebo aomalë, aona afeteni tli lo giglji nëglame. Li jubë lo, li Elaijabë lo na li Mosesbë lo.”⁶ Kë aomalë ho bu tako uli mëtlame nëgeme, na Pita gali lowene sle jwa tēgleme nëgeme, na bu kë galime blawa këme gali tle.”⁷ Na oloba tetujule na bume iniwa lamu totome. Na Goto kë oloba mago gali tle, “Ebë bobë nëba, bo tako tole nanëletelë. Sobo bubë gali aholokwane elolome.”⁸ Na bubë lowene esogo mëglelëtlabë ho yafe hwi mëtebokwaka, kwe bu Jisame kë gëgali mëtletelëlobë home hana hwi motloma. Bu Jisame fwa hwi motlola. Weniyaneme aotome fene hwi motlotla, këhawa ita hwi motlola.

⁹ Bu fatini mago kle mètëmalitaya, na Jisas bume gali tlo me, “Sobo èje kë hwi eglolobë wesibi lili onehome asa gëgali eelëmo. Awi. Kwe tokwafe bo Gotobë life mago ho, bo matëmatë mago huju nokokwëna, sobo kë hwi eglolobë wesibi li li onehome mana kwe lalowa gëgali elagumome.” ¹⁰ Na bu Jisasbë gali aholona aholokwane mëtla. Na bu kë gali lowene mëta fwa gwa mototla, na bu li li onehome hana gëgali mëtletëma. Na bu blalo gëgali mëtla, “Jisas bu matëmatë mago habëna huju lëglemene? Kë matëmatë mago huju lëglebë gali ebë fëye galine?”

¹¹ Na bu Jisame gali motlola, “Gotobë tafa sle gali lowene sle mëgletlabë ho bu fëyeme gali mëlane, ‘Elaija bu afina ligisime na Goto kë aniji toglolebë ho bu nagi ligisime?’”

¹² Na Jisas bume gali tafu tëtätëme, “Ebë gali, nëgali mu, ‘Elaija bu afina lisime na iniwa wesibi sle lotomeme.’ Kwe bu Gotobë bogo mëta bome meyahi lamëtletëna, ‘Gotobë life mago ho, bu lebutako elili fa logotleme, na oneho bume hehë mëgletlame.’ Na bo some takune nolëyo, bu kë gali Gotobë bogo mëta fëyeme yahi mëtlane? ¹³ Kwe bo some gali nëlëyo. Elaijaha ho, bu watisife, na oneho bubë tetëbo lowenewa esogo esogo mëtletëla na bume tetëbo mototla, ètani Gotobë bogo mëta fene yahi mëtletla.”

Jisas bu ahwane kë tëbo lotlebë nëbame sle totle

¹⁴ Jisas bu kë aomalë lowene esogo mëglelëtlabë home tlelume na bubë lowene esogo mëglelëtlabë ho flime esune mëtlëma. Na bu lebutako oneho hwi motloma, bume hwagënë mototoma. Na Gotobë tafa sle gali lowene sle mëgletlabë ho fli, bu Jisasbë lowene esogo mëglelëtlabë ho flina kofaya kofaya gali mëtletlogwaya.

¹⁵ Na kë oneho bu Jisame hwi motlola na klelego memëtletla. Na bu belë fëka motokouja na bume gali motlola, “Lalemu. Yahala fëyeme esine.” ¹⁶ Na Jisas bume takune

tlo me, “Sobo buna kofaya kofaya gali fëye wesibime gali eelëgone?” ¹⁷ Na ho li, bu kë onehona kë mitlijabë bu Jisame gali tafu tëtätle, “Tisa, bobë iko nëba ahwane tëbo lëtatenë. Kë ahwane bubë èfalëbo geni lëtätle. Na bo ju belë nëlesulë, sle naegotleme. ¹⁸ Kë ahwane bume itaita feilawa kiki totokwefle, na bume life mëta itaita meenogli enogli latlekëfe. Na bu nënafuna, enino këkëna melatlekëfe. Na iniwa ato toulego metlekefëtletle. Na bo jubë lowene esogo mëglelëtëyobë home metakune yafe tlomë, ‘Sobo bobë nëbabë ato mago ahwane këë elekakëtelo.’ Kwe bu yafe këë mëtletla kwe hanane mu.”

¹⁹ Jisas kë gali aholokwane tle na bume gali tlo me, “O masiwafe, sobo bome lowene sle jwa fëyeme eletëname? Bo sobona habenuju afe olë tafa nëglelëyomene na mana lowene sle eletëname? Bo sobobë hobota habenuju afe olë fa nëgetatëyomene? Kë nëba bo belë elesulo.” ²⁰ Na bu kë nëba bu belë mëtlesula. Na kë ahwane Jisame hwi tlole, na kë nëba anisasana lili tle, na bu lifeme latitigowa, na lifeme obobwelë tle, na nënafu èfalëbo elë motowelibetle.

²¹ Na Jisas bolijayame takune tlole, “Melë kë lëglekefëbë, habenuju afe olëne?” Na bolijaya gali tlole, “Tokwëfome nëgena, kë gëgëme tëglebëë, mana ekë. ²² Kë ahwane tëbo bume itaita ahoju mëta na tu mëta metuku tuku latlekëfe, bume tëkle sle nalogotleme fene, mogo nalë. Ju bobë nëba lalowa sle egëtatenëna kwe ju seme maninibo eletëname na aitaname.” ²³ Na Jisas gali tlole, “Ju megali fëyeme elene, ‘Ju bobë nëba lalowa sle egëtatenëmene?’ Ju bome lowene sle egletenëna, kwe ju iniwa wesibi melë egotomeme.”

²⁴ Na kë nëba bolijaya anisasana lagaliwa tlole, “Bo jume tokwëfo lowene nanëletë, kwe ju bobë kë lowenebë aitanenë, bo jume lowene slemu nanëgletëme.” ²⁵ Jisas bu hwi tlo me, feilawa oneho bubë li elë fëkana mitisiyame nëgeme, na bu kë

ahwane hokweinawa kēme wame gali tlole, “Ju, ēfalēbona aholona kē titiji mēgletēbē ahwane, bo jume gali nolē, ju ebē nēbame kile etole na bubē atowa ita asa ekaklutle.”²⁶ Na kē ahwane, tēbo afēfleiwa yēē tlēle, na nēba anisasana lili tle, na bume lakilewa tetokwakle, na latugujuwa. Na kēme nēba mogo fene tēbe. Na feilawa oneho bume hwi motlola na gali mētla, “Wagli lēlefe.”²⁷ Kwe Jisas bubē tobame fa totle na huju tetēbakle, na bu lalowa tlibe.

²⁸ Tokwafe, Jisas lowa tuju na bubē lowene esogo mēglelētlabē ho kēme hwelutuwa gali motlola, “Sebo kē ahwane hehē jwa fēyeme nēletlane?”²⁹ Na bume gali tlome, “Sobo kēha ahwane manawa hana hehē eglletelome. Sobo Gotome fwa gēgali eglelēkeflona, kwe fēyemene, sobo kēha ahwane lalowa hehē eglletelome.”

Jisas ita gali tle, “Bo gli nelēme na huju nelēme”

³⁰ Jisas, bubē lowene esogo mēglelētlabē hona, kē lifate kile mētla na Galili provins kukuwa mutuja. Jisas bu melēme tole tle; ho bume melowene mēgletlalime, “Bu ekē tafa lēlefe.”³¹ Bu bubē lowene esogo mēglelētlabē home fwa okokwe naloglomeme nēgeme. Na bume gali tlome, “Bo, Gotobē life mago ho, bu bome wame hobē toba elē gwa mēgētaname. Na bu bome mogo nalē tēkle mētaname. Na bo tēle olē nebēme na aona olēbēna kwe huju nēgelēme.”

³² Kwe bu bubē gali lowene sle hana mētletla. Bu Jisame uli mētletlame nēgeme, na bu kē galime takune jwa kēme motlola.

Tako letitabo ho yalēne

³³ Na kwe, Jisasna bubē lowene esogo mēglelētlabē hona Kaperneam lifatewa fwa mutula. Na bu lowa tlelēkakume. Na Jisas bume takune tlome, “Sobo alēgeme, fēye wesibime gēgali ekweijone?”³⁴ Kwe bu gali kujuna tei tafa mētla. Bu Jisame tiniji mētletlame nēgeme. Bu

alēge mutujana, na blalo kofaya kofaya megali mētlelogwayame nēgeme, “Semago, tako letitabo ho tafa, ya lēgletēnamene?”³⁵ Na Jisas tafa tle na bume gali tlome, “Ho tako letitabo home tafame tole lēglena, kwe bu iniwa onehome luglunuta asa malēletēme. Na manawa wege hoha satafa lēletēme na iniwa onehome lēgaitame nalēgleme.”³⁶ Na Jisas bu nēba no tlēle na bubē naba li mēta tlebitēme, na hwē tlēle, na bubē lowene esogo mēglelētlabē home gali tlome,³⁷ “Ho bome lowene lēgletenēna, na ebēha nēbame lēgaitalena, kwe bu bome laitanē. Na ho bu bome lēgaitanēna, bu bome fwa nane laitanē. Weye, bome kē jine tēglēnēbē ayame laitale.”

Ho seme wame hana lolonana, kē ho sebobē yabe

³⁸ Jon bu Jisame gali tlole, “Tisa, sebo mehwi latlola, ho bu jubē weniji fē tēta na ahwane tēbo hobē ato mago hehē tletēme. Kwe kē ho sebona hana tuja na kēme nēgeme sebo bume gali tlola, ‘Ju, Jisabē wenijina, ahwane tēbo asa hehē eletēme.’”³⁹ Na Jisas gali tlome, “Sobo kēha home asa lēkle etomo. Ho bu bobē weniji fē logotlena, na bu Gotobē afutuku fenene, wesibi melē logotlena, kwe bu bome hokweinawa tēbo gali hana loglonēme.⁴⁰ Ho seme wame hana lolona, kē ho sebobē yabe.⁴¹ Ho some melowene lēgletēyona, ‘Bo kē home nēgaitamēme, bu Goto kē aniji toglolebē home yonane mēglelēlame nēgeme.’ Na kē ho some hi tume lēgaitona kwe bo some nēgalimemu gali nolēyo, Goto kē tokwēfo wesibi hwi loglolena, na kē home aholokwana hana ti lēgleme. Bu tokwafe bume lale wesibi lēglēleme.”

Tēbo lowene ho, bu lale lowenena hobē lowene tēbo mētakefētēma

⁴² Jisas ita gali tle, “Ho li bome kē lowene lēgletenēbē nēbame tēbo lowene elē tēbo logotlena na kē nēba bome kē lowene lēgletenēbē lowene kile lēglena kwe ebē tēbo wesibimu. Goto kē home habelē

logotlemene? Kwe fli ho, kë home aniji mou mëta takuliji mëtatlana na bume nutu elëme tuku mëtëkakana kë kwe lalowa. Bu kë nëbame tëbo hana logotleme na Goto kë home hana tëbo logotleme. ⁴³ Jubë toba jume tëbo lowene mëta gwa lëgëtana, kwe ju kë toba tlë etokwakleme na tuku ekakeme. Ju jowa tobanawa nëgena na ju kë tëbo lowene hana egotlena kwe ju Gotobë lale lifate mëta unaunalëme tafa egleme. Kë kwe lalemu. Kwe ju tële tobana nëgena na kë tëbo lowene eglana kwe bu jume tokwafe hel lifewa tuku lëgleme. Kë kwe lale nane, kë tëbo. Kë life mago ahoju lële hana lëgleme. ⁴⁴ Kë life mëta, 'Fotë bubë ato unaunalëme hi mokoukefëtëmeme na ahoju melë bubë ato mëta unaunalëme tei lëlegokefëtëme.' ⁴⁵ Jubë kiju jume tëbo lowene mëta gwa lëgëtana, kwe ju kë kiju tlë etokwakleme na tuku ekakeme. Ju jowa kijunawa nëgena na ju kë tëbo lowene hana egotlena, kwe ju Gotobë lale lifate mëta unaunalëme tafa egleme. Kë kwe lalemu. Kwe ju tële kijuna nëgena na kë tëbo lowene eglana kwe bu jume tokwafe hel lifewa tuku lëgleme. Kë kwe lale nane, kë tëbo. Kë life mago ahoju lële hana lëgleme. ⁴⁶ Kë life mëta, 'Fotë bubë ato unaunalëme hi mokoukefëtëmeme na ahoju melë bubë ato mëta unaunalëme tei lëlegokefëtëme.' ⁴⁷ Jubë naba jume tëbo lowene mëta gwa egëtana, kwe ju kë naba lemo etamëme na tuku ekakeme. Ju jowa nabanawa nëgena na ju kë tëbo lowene hana eglana, kwe ju Goto, onehobë eso home kë tafa lëgletëmebë life mëta unaunalëme tafa egleme. Kë kwe lalemu. Kwe ju tële nabana nëgena na kë tëbo lowene eglana, kwe bu jume tokwafe hel lifewa tuku lëgleme. Kë kwe lale nane, kë tëbo. Kë life mago ahoju lële hana lëgleme. ⁴⁸ Kë life mëta, 'Fotë bubë ato unaunalëme hi mokoukefëtëmeme na ahoju melë bubë ato mëta unaunalëme tei lëlegokefëtëme.'

⁴⁹ Këji hi wesibi fene sle motome, tokwafe ahoju mata onehome mesle logotomeme.

⁵⁰ Këji lale wesibi mu. Kwe këji iji hana mëglana, habelë notomamene na ita iji namëgleme. Hanane mu. Këji bu hi wesibi sle wesibi, na feilawa hi wesibi bu ijina mle. Na sobo onehome melë sle egotomome, këji fenene iji mle na sobolalo tafa sle naegelome."

10

Jisas bu noninome heheëbëme gali tlome

¹ Jisas na bubë lowene esogo mëglelëtlabë ho, kë lifate kile mëtla na Judia lifatebë tokwëfo lifekuwa mutuja. Na bu Jordan tu su mëtëkaka. Na lebutako enëne bume ita loko mëtlelëtla. Na bu Gotobë gali ita të tëtätëme bu ëbame fene të tëtakefëtëme.

² Na Farisi enëne Jisas belë mitisitla. Bu Jisame su namogotlame fene. Bu bubë gali tëbo tafu lëtatëmenawa na bu mana tëbo namogotlame fene. Na këme takune motlola, "Sebobë, Juda life mago enënebë tafa sle gali, melë lëgëbetëmelalëlene o hanane? Ho noninome lalowa hehë mëgletëmamene o hanane?" ³ Na Jisas gali tafu tëtätëme, "Ëtanifu ho, Moses, bu fëye tafa sle gali yahi tletëyone, bimësemeninome hehë egletemobë galibëye?" ⁴ Na bu gali tafu mëtëtatla, "Moses megali latle, 'Ho nome heheëme tole lëglana, bu hehë gali laba mëta yahi lëletëme na bume lëläme. Na këna lalowa hehë lëkakëtëme.'" ⁵ Na kwe Jisas bume gali tlome, "Sobo aholabu enëne nëgeme, Moses kë tafa sle gali këme yahi tletëyo. ⁶ Kwe ëtanimu, Goto iniwa wesibi blëge totome. Gotobë bogo megali lalatle. 'Goto home blëge totle na mëse blëge tëtamë. ⁷ Këme nëgeme ho bu botaname, bolijyaname hune lële na nona weife mëtabome. ⁸ Na bu jowaha tafa melome.'

Bu tlemalëha hana tafa mëgelome. Weye. Bu jowa atoha mëtabome. ⁹ Goto, buwa, home mëse wayo tlole

na bu weife këme mëtabo. Na ho hana hehë lëgletëme.”

¹⁰ Tokwafe, Jisas na bubë lowene esogo mëglelëtlabë hona, bu lowa ita mutuja. Na bubë lowene esogo mëglelëtlabë ho bume kë nonino hehë galibëme takune motlola. ¹¹ Na bume gali tlole, “Ho, nome hehë lëgletëna na li mëseme sei lëglena, kë ho bubë auto mëseme sisile lalëta na lisë lowene mëta tafa lële. ¹² Na mëse boheme hehë eglëtlena na li home sei eglëlena, kë mëse bu lisë lowene mëta tafa ele.”

Jisas gali tle, “Sobo nëbale lëkle asa etomo, bo belë matisiya”

¹³ Oneho bu nëbale Jisas belë metlesumëtla. Bu metole lamëtla, Jisas bubë toba gogwa naloletëmeme na Gotome takune lololeme, bume lëgaitame nalëgleme. Kwe Jisasbë lowene esogo mëglelëtlabë ho bume hwi motloma na lëkle mototoma, “Teife. Sobobë nëbale bu belë asa elesumo.” ¹⁴ Jisas këme hwi tlole na bu wame tlole. Na bubë lowene esogo mëglelëtlabë home megali tlole, “Sobo nëbale lëkle asa etomo. Bo belë matisiya. Oneho kë nëbaleha nëgena, kwe bu Goto onehobë eso home kë tafa lëgletëmebë lifatewa, mugujame. ¹⁵ Bo nëgalimu nanolëyo, ebëha nëbale bu Gotome hokweinawa lowene sle lamëetla. Na oneho bu ebë nëbale ha, Gotome lowene sle mëgletlana kwe bu Goto onehobë eso home kë tafa lëgletëmebë lifatewa mugujame.” ¹⁶ Na bu nëbaleme nëno tle na hohwë tle. Na toba gogwa toletëme na Gotome takune tlole, bume lëgaitame nalëgleme.

Wesibi lebutakona ho, bu Jisasna gëgali mëtelo

¹⁷ Jisas na bubë lowene esogo mëglelëtlabë hona huju mëtla na mutuja. Na ho li bu Jisas belë fëka tokwei na bubë li mëta bubusu tēmalita na sēkefo miti tafa tletle. Na bume takune tlole, “O Tisa, ju lalë ho. Bo jume takune nolë. Bo habelë nēgelēmene, bo Gotona unaunalēme lalë tafa nanēgelome?” ¹⁸ Na Jisas bume gali tlole, “Ju bome lalë fë

fëyeme etanēne? Ebë life mago ho bu lalë nane. Goto buwa lalëmu. ¹⁹ Ju Gotobë tafa sle gali walowene eletle. Bu megali lalamë, ‘Sobo onehome mogo nalë asa tētëkle etomo. Sobo liseëliseë asa elo. Sobo tokli asa elo. Sobo li home blawa asa so etatelo. Sobo hobë wesibi sogëna galina manawa asa mëmë eletemo. Sobo bitaname blijyaname boblo asa etomo. Bubë galiwa saesogo eelëtemo.” ²⁰ Na kë ho Jisasme gali tlole, “O Tisa. Bo tokwëfome nëgena bo këbë tafa sle gali iniwa melë esogo sle nëlagilë na bo ebë olëna mana esogo nëlelële.” ²¹ Jisas bume hwi tlole na maninibo latletle na tole latletle na bume gali tlole, “Ju li lowenewa mana afolo eletle. Ju melë egleme. Jubë iniwa wesibi balitina hihijika eleme na kë baliti glo eleme na wesibi jwa onehome elēmeme. Ju melë lalëye kwe Heven lifate mëta lalë wesibimu lamëbetë. Na ju bome esogo elenënëme.” ²² Kë ho bu kë gali aholokwane tlole na lawabelëwatle na witina latugujuwa. Bu feilawa wesibimu mëtëbetleme nēgeme na fli onehome lëglēmeme tole hana tle.

²³ Jisas bubë lowene esogo mëglelëtlabë home hwi tlole na gali tlole, “Wesibi lebutakona enëne, Goto onehobë eso ho kë tafa lëgletëmebë lifatewa mugujabëme, ebë kalëlego lalëletëme.” ²⁴ Na bubë lowene esogo mëglelëtlabë ho, bu kë gali aholokwane mëtla na klelego memëtletla. Kwe Jisas bume fli gali megali tlole, “O nëbale, iniwa oneho, Goto onehobë eso ho kë tafa lëgletëmebë lifatewa mugujabëme, ebë kalëlego lalëletëme. Hafëna mugujamene? ²⁵ Kamel kleli, bu ëho susu nili fulujuwa lëkaklubëme ebë kalëlegomu lalële, kwe wesibi lebutakona enëne, Goto onehobë eso ho kë tafa lëgletëmebë lifewa mugujabëme ebë kalëlegomu lalëletëme.” ²⁶ Kwe bubë lowene esogo mëglelëtlabë ho bu klelego memëtla na blalo gëgali mëtla, “Kë melë nëgena, kwe Gotobë ëhwati

tafa yalë fa logotlemene?”²⁷ Na Jisas bume hwi tleme na gali tleme, “Oneho bu kë wesibi hana mogotlame kwe Goto kë wesibi lalowa logotleme. Goto iniwa wesibi lalowa logotomeme.”

²⁸ Na Pita Jisame li gali megali tole, “Jisas, ju seme hwi enona. Sebo iniwa wesibi wahune tla na jume waesogo tlelëyo.”²⁹ Na Jisas gali tole, “Bo nëgalimu gali nolë, oneho bome tolemu mëgletënana na Gotobë lale gali të mogotlana na bubë lo o bolijamoni o blijahani o mësenëbani o bolijaya o bota o nëbale o nuju hune mëglana, kwe Goto bume lebutako wesibimu lëglëmeme.”³⁰ Bu ebë life mëta mana tafa mëglana, Goto bume lebutako wesibimu lëglëmeme. Ètani kë hune mëtlabë wesibi bu tëlewaha kwe Goto bume kë lëglëmebë wesibi bu lebutakomu. Goto bume lebutako lo na, bolijahani, bolijamoni, mësenëbani, botani, nëbale, na nuju lëglëmeme. Kwe, masiwafe, fli enëne bume tëbo mogotomame, bu bome lowene sle mëgletënane nëgeme. Na tokwafe bu lale tafa memokoukefëyame.”³¹ Lebutako enëne bu ebë olëna letitabo hoha kë tafa mëglabë, bu tokwafe Gotobë olëna bu atwati hoha tafa mëglame. Na lebutako enëne bu ebë olëna atwati hoha kë tafa mëglabë bu tokwafe Gotobë olëna letitabo hoha tafa mëglame.”

Jisas bu ita gali tle, “Bo gli nelëme na huju nelëme”

³² Jisas na bubë lowene esogo mëglelëtlabë hona, Jerusalem lifate alëge elë motokwala. Jisas bu toutatëme. Na bubë lowene esogo mëglelëtlabë ho tutune motokouja. Na oneho bume kë nagi mëtlëmabë bu uli memëtla. Na bubë lowene esogo mëglelëtlabë home loko tëta na bume tëbo namogotlabë galime gali tleme.”³³ Bu megali tle, “Sobo aholokwane elo. Sebo Jerusalem lifatewa ekë nuja. Na bo, Gotobë life mago ho, bu bome, lotu lo mëta wege mëglabë eso enëne na Gotobë

tafa sle gali lowene sle mëgletlabë honame yo molomame. Na bu tetahë melëmame na bome mogo nalë tëkle mëgëtanabë gali sle namogotlame. Na bu bome, Israelbë afenëboni mëtabëya jwa mëglabë enëneme, yo namoglomame.”³⁴ Na kë enëne, bu bome tiniiji galina gali namogloname. Na bome sosonatlë namëgëtaname. Na bome nagutaba kokose mogloname. Na bome taba afona feilawa lëlafä mëtaname. Na bome mogo nalë tëkle mëtaname. Na bo mogo tële olë nebëme na aonabëna huju nëgelëme.”

Jemsna Jonna bu metole lamëtelo, eso home tafa namëgelome

³⁵ Na këme, Sebedibë nëbale, Jemsna Jonna, Jisas belë mitisijo. Na bume takune motlolo, “Tisa, sebo jume wesibime takune nëlëyo. Na ju seme kë wesibi lalowa egotometenomene?”³⁶ Na Jisas bume takune tleme, “Bo fëye wesibi nogotometëyomene, sobo habë tole lalone?”³⁷ Na bume gali motlolo, “Tisa, ju tokwafe tako eso home watafa eglana, sebo metole nanelo, sebo juna onehome eso ho tafa nanëgletëmame. Li jubë tobamu toba elëme tafa lëleme na li jubë yemane toba elëme tafa lëleme.”

³⁸ Kwe Jisas bume gali tleme, “Sobo bome kë takune eglonabë, kë wesibime sobo lowene sle hana eletelo. Tokwafe bo tako elili fa nogotlëme, sobo këha elili lalowa fa egotlomene? Na tokwafe bo gli nëgelëme, sobo këha megli lalowa egelomene?”³⁹ Na bu gali motlolo, “Sebo melë lalowa nëgelome.”

Na Jisas bume gali tleme, “Nëgali. Bo elili mefa notlëme, sobo mata këha elili mefa egotlome, na bo megli nëgelëme, sobo mata këha megli egelome.”⁴⁰ Kwe ho bu bona eso home kë tafa nëgletëmabë na bobë tobamu toba elë tafa lëglebë o bobë yemane toba elë tafa lëglebë, ebë bobë wesibi nane bo kë aniji noglomëme. Weye. Ebë Gotobë wesibiwa. Bu, bona eso home kë tafa nëgletëmabë home waaniji tleme.”

⁴¹ Na fli we ho, bubë lowene esogo mëglelëtlabë, bu Jemsna Jonna, Jisame kë takune motlolibë gali aholokwane mëtlana, bu wame memotloma. ⁴² Kwe Jisas bubë lowene esogo mëglelëtlabë ho iniwame gali telëkakëme. Na bu mutujutla na bume këme gali tlome, “Sobo walowene elo, Israelbë afenëboni mëtabëya jwa mëglabë enënebë eso ho, bu melamela, onehome baba të motoma, bubë wege manawa fa namëgëtatëmame. ⁴³ Kwe, kë eso ho fene mëtabëya, sobo këha lowene mëta asa tafa elo. Weye. Matëbe. So mago ho, bu sobobë eso home tafame tole lëglena, bu melë lëglëme, some wege lëgletëyobë hoha lëtabeme. ⁴⁴ Na somago ho, bu iniwa onehobë logouta home tafame tole lëglena, bu melë lëgleme, iniwa onehobë manawa wege hoha tafa lëletëmeme. ⁴⁵ Na bo, Gotobë life mago ho, bo melëme nane tisi, oneho bome mëgaitana namëglame. Weye. Bo melëme tisi, onehome nëgaitamë nanëgelëme. Na bobë gli lebutako onehome laitame nalëgleme. Bubë tëbo lowene bobë glina hihijika nanogotometemëme.”

Jisas bu naba titiki tabo hobë naba sle totometle

⁴⁶ Jisasna bubë lowene esogo mëglelëtlabë hona, Jeriko lifatewa fata mëtla. Na Jeriko lifate kile mototla. Na buna bubë lowene esogo mëglelëtlabë hona, feilawa onehona mutuja. Na Bartimeus, Timeusbë bowene, alëge mëglëbo lime tafa tlekëfe. Bu naba titiki tabo ho. Na bu onehome balitime gëgëba latlok-wefëme. ⁴⁷ Na bu kë gali aholokwane tle, “Nasaret life mago Jisas, bu lisi.” Na bu anisasana we tlole, “Jisas, Devitbë bosemle, ju bome maninibo eletenë!” ⁴⁸ Na feilawa oneho bume këkale motlola, “Euowe! Ju kuju ebe.” Kwe bu anisasana we tlole, “Devitbë bosemle, ju bome maninibo eletenë!” ⁴⁹ Na Jisas bubë we lego aholokwane tlole na këme tlibe, na gali tle, “Sobo gali elëbaklo, ligisi nalëgleme.” Na bu kë naba titiki

tabobë home we mëtelëkakla na gali motlola, “Ju fleflesu ele. Ju huju ele. Bu jume ekë we lelëbakë.” ⁵⁰ Na kwe bubë tli lime kë gelo totokweflebë ëho hwaga totle na hokweinawa huju təkake, na Jisas belë tuju. ⁵¹ Na Jisas bume takune tlole, “Bo jume fëye nëgëtemene?” Na kë naba titiki tabo ho bume gali tlole, “Tisa, ju bobë naba sle etometenë, bo hwi nanëgelëme.” ⁵² Na Jisas bume gali tlole, “Ju bome lowene sle eletenëme nëgëme, jubë naba këme sle meletë. Ju lalowa eiju.” Na hokweinawa bubë naba lalowa memëtletlemu. Na bu hwi təkake. Na bu Jisame alëge elë nagi telëkakle.

11

Jisas bu tako eso ho ha, Jerusalem lifatewa təkaklu

¹ Jisasna, bubë lowene esogo mëglelëtlabë hona, Jerusalem lifatewa lololi mëtla, na bu Betfage lifekuwa na Betani lifekuwa loliwa fwa mutula. Kë lifeku bu Oliv fatini li mëta metëbe. ² Na Jisas bu tlemalë lowene esogo mëglelëtlabë home jine tlëme na bume gali tlome, “Sobo kë hwi egelëkakëlobë lifekuwa eyeume. Sobo eyeume, na ti mëta takuliji tabo afeku donki kleli hwi eglolome. Èbame, ho kë donki kleli matawa hana tafa tle. Sobo taba tohwa etatelome na elesutëname. ³ Na ho li some metakune loglëyona, ‘Sobo ebë donki kleli fëyeme elelulone?’ Kwe sobo bume metaфу saetatelo, ‘Sobobë tako ho bu tole lëletle. Bu këna asë lëleme na bu seme hokweinawa ita jine lelëbakëname, ebë donki kleli ita nëglesutëyome.’” ⁴ Na kwe bu mëtëyeu, na bu afeku donki kleli, alëge li mëta kë liglibebë hwi motlolo. Fli ho bu kë donki kleli, lo ino li mëta watakuliji mototla. Na kwe kë tlemalë ho bubë taba tohwa mëtëtatelo. ⁵ Na lolime kë mitlijabë ho takune motloma, “Sobo kë donki kleli fëyeme tohwa etlone?” ⁶ Na tlemalë bu gali tafu mëtëtatemo, Jisas bume fene gali tlome. Na kë enëne, bume gali motloma, “Sobo lalowa elelulo.” ⁷ Na kwe tlemalë, kë

donki kleli Jisame sei mētlēkakitelo. Na bubē heletabo ēho donki klelibē amlebo mēta kahēba motolo. Na Jisas kē ēho matawa tafa tole. ⁸ Na feilawa oneho bubē heletabo ēho totohwa mētla na alēge mēta kahēba motokouja. Bu Jisame feflesu mētletla, eso hoha fata tēgleme nēgeme. Na Jisas donki klelina kē matawa luguju nalēgleme, eso ho fene asē mētla. Na fli oneho bu yagibeha laba mata glo mētla na alēge mēta kahēba motokouja. ⁹ Na oneho bu Jisasna kē motoutayabē na oneho fli nagi kē mitlijabē, bu kēme memomolē motokouja, “Yahala fēyemene. Sebo Gotome feflesu nēgletlame. Goto bu jine tlēle. Bu Gotobē kalēlegona tisi. Goto kē home ululu sle nalogotleme. ¹⁰ Kē ho bu seme eso home tafa nalēgletēname tisi, Bosemle Devit, sebo bē semlenime eso home fene tafa tletēme. Goto kē eso home ululu sle nalogotleme. Sebo Gotome tako feflesu nēgletlamemu.”

¹¹ Na Jisas bu Jerusalem lifatewa fwa tule na tako lotu lowa tēkaklu. Na bu iniwa wesibi hwi tlagume. Kwe olē ki lēgēbeme nounou latle na buna bubē lowene esogo mēglelētlabē hona Jerusalem lifate kile mētla na Betani lifekuwa hokweinawa mutuja.

Jisas atowaiha time anisasana hana tlole, “Ju liji ita asa fu ele”

¹² Tokwafe li olēna bu Betani lifeku kile mētla na bu alēge mēta mana asē mētla. Na Jisas foneme gli tle. ¹³ Na bu atowaiha ti kakē manogwa hwi telokwakle na bu lebutako labana. Na kwe bu loliwa tuju tle, lijime hohwi nalēgētame, kwe bu liji hwi hana tlometle labawa hwi tlome. Ebē atowaiha ti logowalē jwa lēglebē olē nēgeme hwi jwa kēme tlome. ¹⁴ Na Jisas kē time anisasana hana tlole, “Ju liji ita asa fu ele na oneho bu liji ju mago hi hana mēglekefēyame. Hanane mu.” Na bubē lowene esogo mēglelētlabē ho kē gali aholokwane motlola.

Jisas bu wesibi balitina hihijika home, Gotobē lo mago hehē tletēme

¹⁵ Jisas na bubē lowene esogo mēglelētlabē hona Jerusalem lifatewa fwa mutula. Na Jisas tako lotu lo kē mēta liglibebē life elēme tēkaklu. Na bu wesibi balitina kē glo mēglabē enēneme na wesibi balitina kē hihijika mētlabē enēneme hehē teluletēme. Bu melatotome. Bu li life li life enēnebē baliti kēme kē hihijika mētlabē enēnebē masei obobwelē tetokwakēmetēme. Na bu seuneni fole balitina kē hihijika mētlabē enēnebē tafa labuku mata obobwelē totometēme. (Bu kē fole Gotome ahøjume ahøjume mētlekefētlabē.) ¹⁶ Oneho bu wesibina, tako lotu lo li mago lēglesī tabo life elēme mētlelēkaklukefēma. Na Jisas bu kē onehome hehē tletēme. ¹⁷ Na bu gali tlome, “Gotobē bogo megali lala, ‘Li life li life mago oneho bobē lo elēme migisiyabē, bome gēgali namēlelēkefēname.’ Kwe sobo ebē lo tēbo latlo na bu tokli enēnebē loha lilibetēyo.”

¹⁸ Na lotu lo mēta wege mēglabē eso enēne na Gotobē tafa sle gali lowene sle mēgletlabē ho bu kē gali aholokwane motlola, na alēge hohwi mētētlatla, Jisame mogo nalē tēkle namogotlame. Iniwa oneho bu Jisame tako tole lamētletla. Melēme nēgeme bu kē tētē togotlebē gali kle klelego lamētlekefētla, na lotu lo eso enēne bu Jisame kēme uli mētletla. ¹⁹ Na atome hwi olē, Jisasna bubē lowene esogo mēglelētlabē hona Jerusalem lifate kile mētla na mutuja.

Ho bu Gotome lowene sle lēgletlena na bume mana gēgali lēglelēna kwe bu wesibi glo lēgleme

²⁰ Na li olēna, olobalēwa, Jisasna bubē lowene esogo mēglelētlabē hona, Jerusalem lifatebē alēge mēta mana asē mētlabē, na bu kē atowaiha ti ita hwi mētelēkakla, bu wakoko tēbefe. ²¹ Na Pita bu Jisas kē time kēhana toglolebē gali ita lowene tletle na gali tle, “Euowe, Tisa, yame ju kē atowaiha time anisasana mehana tlole, ‘Ju liji ita asa fu ele.’ Na ēje bu wakoko lēbe.” ²² Na Jisas megali tlome, “Sobo Gotome melowene sle

egletelome, bu kalëlego ho. ²³ Bo some nëgali gali nanëläyo. Ho bu fatinime megali logläna, 'Ju huju elëme na ju nutu elëme okli ekakeme.' Na kë ho bu tële lowene hana lëglena na Gotome lowene sle lëgletlena kwe Goto bu melë logotleme, kë ho fene gali lële. ²⁴ Sobo Gotome wesibime takune eglolona na sobo melowene sle egletelona, 'Goto bu seme kë wesibi lëglënamefe,' kwe Goto bu some kë wesibi lëglëyome, sobo fene takune elolo.

²⁵⁻²⁶ Sobo Gotome gali eglolona, na sobo li ho, some kë tëbo tęgëtobë lowenebë, ita lowene egletelona, kwe sobo kë hobë tëbo lowene aholokwana ti egletelome. Sobo melë egelona, kwe sobobë aya, heven life mëta kë tafa lëglebë bu sobobë tëbo lowene mata aholokwana ti lëgletëyome.*

Bu Jisame takune motlola, "Ju kë egotomebë wesibime, ya gali tolëne"

²⁷ Jisana, bubë lowene esogo mëgletlabë hona, Jerusalem lifatewa ita fwa mutula. Na Jisas bu tako lotu lo li mago lëglesli tabo mëta asë tle. Na lotu lo mëta wege mëglabë eso enëne fli, na Gotobë tafa sle gali lowene sle mëgletlabë enëne fli, na lotu letitabo enëne fli, bu belë mitisiya. ²⁸ Na bu metakune motlola, "Ju kë kalëlego hamago fa totlene?"

²⁹ Na Jisas bume gali tlome, "Bo mata, some li wesibime takune nolëyo. Sobo bobë gali tafu sle latatëna kwe bo some kalëlego kë mago kë fa nogotlëbë gali, gali noglëyome. ³⁰ Bo some metakune nëläyo, onehome tume kë baptais totomebë Jonme ya jine tlëlene? Goto bu jine tlëlene o ho jine mëtlëla? Sobo bobë gali tafu etatëna."

³¹ Na bu blalo gëgali mëtla, "Sebo megali noglolana, 'Goto bu jine tlële,' kwe bu seme megali logloname, 'Kë nëgali nëgebë, sobo bume

lowene sle egletelo jwa fëyemene?' ³² Kwe sebo megali noglolana, 'Ho jine mëtlëla,' kwe oneho bu seme habelë mëgëtanamene?" Bu kë gali fëyeme gali mëlane? Bu onehome uli mëtletëmame nëgeme. Iniwa oneho bu melowene lamëtletla, "Jon bu Gotobë lowene mago gali të lotokweflebë homu." ³³ Na bu Jisame gali metafu mëtëtatla, "Sebo, Jonme kë jine tëglëlebëme, lowene hana nëla." Na Jisas bume gali tlome, "Bo mata sobobë takune tafu hana nëgetatëyome. Na bo kalëlego kë mago kë fa nogotlëbëme hana gali nëglëyome."

12

Ebë wain taba liji nuju kë hwi motlolabë tëbo enënebë wafle gali

¹ Jisas, Juda life mago lotu letitabo home, wafle gali tletëme. Bu megali latle, "Ho bu wain taba, nuju mëta ola tle na lëglesli tle. Na bu life ha totle na fuluju yefi tle, wain taba liji kë mëta fëfe namëglame, bubë tu hi namëglekefëyame. Na bu akolalo, kë nuju mëta gliji tle, ho kë lo mëta sei namogowelëkeflame, ho tokli mëglalime. Na bu fli home gali tlome, 'Sobo bobë wain taba nuju hwi elotëna. Na tokwafe liji mogwalëna, fliye sobobë na fliye bobë.' Na kë ho hune totome na kakë lifewa tuju.

² Tokwafe, wain taba liji niglijji mëtle, bubë wege home, bubë nuju kë hwi moglotlabë ho belë jine tletëme, bubë hi wesibi kë nuju mago glo nalëgleme. Na bu tuju. ³ Kwe nuju kë hwi motlotlabë ho, bu belë kë tigisitëmebë home anisasana tëkle mëtëtagula na kë mago hehë mëtëkakëtla. Na bu kë mago manawa latëglëbouwa. ⁴ Na ita nuju bolijaya, li home jine tletëme. Kwe kë enëne kë hobë eso labulewa mëtëtatla na bume tëbo mototla. ⁵ Na ita li home jine tletëme. Kwe bu kë home mogo nalë tëkle mototla. Na

* **11:25-26** Fli lowene ho bu melowene lamëtla, li gali mana lëbe kë gali mëta. Kë gali melë lëgëbelalële, "Kwe sobo iniwa onehobë tëbo lowene aholokwana hana ti egletemona, kwe sobobë aya, heven life mëta kë tafa lëglebë bu sobobë tëbo lowene mata aholokwana hana ti lëgletëyome."

kême, bu feilawa home kê enêne belê jowa jowa jine tlêkefêmetême. Na bu fli home têtêkewa mêtla na flime mogo nalê têtêke mêtla. ⁶ Na jowa howa tafa tle. Kê ho kê nêgebêye nuju bolijayabê bowene, na bume tako tole latletlemu. Na yawememu, boweneme, bubê nuju kê hwi motlotlabê ho belê jine tletême. Bolijaya melowene latle, ‘Bu bobê nêbabê gali aholokwanewa moglolame.’ ⁷ Kwe bubê bowene alêge mêtla mana asê têtêke na nuju kê hwi motlotlabê ho bu blalo gégali mêtla, ‘Ebê ho kê ligisibê ebê kê nujubê bolijayabê bowene. Tokwafe bolijaya gli lëglena, kwe bu kê nuju bolijaya tafa lëgleme. Te, mana mogo nalê têtêke manotla na kê nuju seme lêbetêneme.’ ⁸ Bu tisitême na hohwê mêtêla na mogo nalê têtêke mototla. Na mogo fa mototla na nuju mêtêbo elê tuku mêtêkaka.”

⁹ Na Jisas lotu letitabo home takune tleme, “Sobo habê lowene lalone, kê nuju bolijaya bubê nuju kê hwi motlotlabê home habelê logotomemene? Sobo aholo bo eto. Bu ligisina, bu kê home mogo nalê têtêbo logotomeme. Na ita kê wain taba liji nuju fli home yo loglomeme, hwi namoglotlame.

¹⁰ Sobo Gotobê bogo mêtla kê lëgêbebê gali hwi hana tlohone? Èye wahwi tloho. Ebê gali metêbe latle,

‘Lo gliji ho, bu lo, anijina gliji mêtla.

Na kwe bu li anijime meweniji lamêtla,
“Têbowa.”

Kême nêgême, mêtêbo elê fo mêtetokwakêya.

Kwe kê aniji mêtêbo elê kê fo mêtetokwakêyabê bu lale anijimu ebamê.

Lo bulego kê aniji mêtla lotle.

Kê aniji jwa nêgena, kwe lo fli lëgleme.

¹¹ Goto melê têtêgême nêgême,
kê wesibi kêha kême fata lële.
Sebo yafe hwi nololamu,
lale wesibimu tlêna.”

¹² Lotu letitabo ho bu melowene lamêtla, “Jisas seme wafê gali lêtênafe.” Kême nêgême, bu Jisasme

êjeha fa motlame. Kwe bu one-home uli mêtletêmame nêgême. Na bu Jisasme kême kile mêtla na bu mitliwaya.

Bu Jisasme takune motlola, “Ho takis baliti, Rom life mago eso ho, Sisarme, lalowa mêtêlamene o hanane?”

¹³ Lotu letitabo ho, bu Farisi enêne fli na eso ho Herotbê wege enêne fliname, Jisas belê jine mêtêma. Bu metole lamêtla, Jisasme sogêneme takune namoglolame na bu Rom life mago eso ho, Sisarme, têtêbo gali nalogloleme. Kê têtêbo galime fwa bume kêna so namêtêtatlame fene. ¹⁴ Na kême mutuja na gali motlola, “Tisa, sebo lowene nanêla, ju nêgali gali homufe na ju hobê têtêbo loweneme na têtêbo galime uli hana eletême. Ju nêgali galimu têtêtagule. Ju baliti musuna home na baliti musujwa home, lili gali hana gali tlagume. Weye. Ju iniwa home, jowa gali mefwa gali tlagume. Ju iniwa onehome, Gotobê lale anebo galiwa têtêtagutême. Na ju habelê lowene lalene? Sebo takis baliti Rom life mago eso ho, Sisarme, lalowa nêglêlamene o hanane? Kêha lowene lalowa nêglamene o hanane?”

¹⁵ Kwe Jisas bubê sosogêneme wafi lowene tletême na bu kê enêneme megali tleme, “Sobo bome fêyeme su etanane? Sobo jowa baliti bome ehitêna, hwi nanoglême.” ¹⁶ Na baliti mêtêhitla. Na Jisas takune tleme, “Ebê amtêtomba yalêbêne, na weniji yalêbêne?” Na kême gali motlola, “Ebê Sisarbêyo.” ¹⁷ Na Jisas bume gali tleme, “Sisarbê wesibiye, kwe Sisarme eglêlome. Gotobê wesibiye, kwe Gotome eglêlome.” Na bu kê gali aholokwane motlola na klelego memêtla.

Sadyusi enêne, Jisasme, lebo enêne huhuju mêtêlabême, takune motlola

¹⁸ Na kême Sadyusi enêne Jisas belê mitisiya. Kê enênebê lowene mêtêbetêmelatle, “Lebo mêtêgebêyabê oneho, hana huhuju mêtêglame.” Na kême Jisasme takune motlola,

19 “Tisa, ëtani, Moses ebë gali meyahi latletëna, ‘Ho nëba jwa lebo lëgëbena, na bubë mëse sei ju mana tafa eleme, kwe ita bolijamo sei lëlëme, na nëbaneni lëlelëme. Na kë nëbale, lebo kë tëglebë hobë wenijina mëtabetla namëglame. Na bu kë hobë nëbaleha tafa namëglame, na lebo kë lëgëbebë hobë weniji hana te lëgletleme na aholokwana hana ti mëglame.’

20 Ètani, ho li tobali ita jowa bolijamonime kënji tlebime. Bolijaha afina mëse sei tlë na kwe bolijaha nëba jwa gli tle. 21 Këme nëgeme, ita kë sei ju bolijamo sei tlë, na bu mata nëba jwa gli tle. Na ita kë sei ju tafa tle ita li bolijamo sei tlë, na bu mata, melatle, kë fenene. 22 Bu iniwa bolijamoni melamëtla, kë sei jume fwa fifiji mëtlelëya na iniwa nëbale jwa gigli mëtla. Na tokwafe kë mëse, bu mata, gli tle. 23 Na sebo jume takune nëlëyo. Tokwafe gigli kë mëglabë oneho huhuju mëglana, kë mëse fëye home tafa egletlemene? Ju wafi lowene ele, bu kënji mitlibëya, tobali ita tële bu kë mëse iniwa sei mëtlëya.”

24 Na këme Jisas bume gali tlome, “Sobo Gotobë bogo mëta kë lëgëbebë gali na Gotobë afutuku lowene sle hana eletelo. Këme nëgeme sobo yaya lowene këme elo. 25 Tokwafe, gigli kë mëglabë oneho huhuju mëglana, kë lebo enëne, one hana sesei mëglame. Weye. Bu heven life mago ensel fene mëtabëya, bu one sesei jwa mëglame.

26 Na eli, bo lebo enëne huhu mëglabë gali të nëgetatëyome. Sobo Mosesbë bogo mago yahi hwi hana tlolone? Èye wahwi tlolo. Kë gali melë lëgëbelalële. ‘Ahuju, ti abo mëta u tle, kwe kë ti abo koko hana tëbe. Moses bu kë hwi tlole na Goto ahoju kë u tëglebë ti abo mëta tètabe na bume gali telulubakle, “Bo blija-fujunibë Goto mana ekë tafa nelë, Abraham, Aisak, na Jekopnabë.”

27 Gotobë lowene melë lëgëbetlelalële, ‘Kë aomalë ho wagigli mëtla, kwe amtëtomba mana mëtabëya, na bubë

Goto mana ekë tafa lëletëme.’ Ebë Goto kë nëgebë lebo enënebë Goto nane. Weye. Mana kë tafa mëglabë enënebë Goto. Sobo melowene kë egelobë, ‘Lebo enëne hana huhuju mëglame.’ Kë yaya lowene lëbetëyo.”

Gotobë lale tafa sle galimu habelëne?

28 Gotobë tafa sle gali lowene sle lëgletlebë ho li këme tètabe. Na bu Sadyusi enëne Jisasna kë gëgali mëtlelogwayabë gali aholokwane tlome. Na bu melowene latle, “Jisas bume lale tafu lalëtatëmefe.” Na bu Jisame këme takune tlole, “Gotobë fëye tafa sle gali blo lotomene, iniwa tafa sle galibëme.” 29 Na Jisas bume tafu tëtatëme, “Gotobë lale tafa sle gali kë lëgëbebëye melë, ‘Israel life mago ho sobo aholo bo eto! Goto buwa sebobë tako letitabo lëtabetëna. Sebobë li Goto hanane lëtabe. Jowa Gotowa lëtabetëna. 30 Sobo Gotome anisasana tole egletelomemu, lowenena ini tolewa egletelomemu.’

31 Na li lale tafa sle gali kë lëgëbebëye melë, ‘Ju iniwa onehome anisasana tole egletëmeme, jume fene tole ele.’ Fli tafa sle gali bu kë tële tafa sle galiha hana mëbe. Kë telë tafa sle gali bu fli tafa sle galime boblo lamotome.”

32 Na këme Gotobë tafa sle gali lowene sle lëgletlebë ho Jisame gali tlole, “Tisa, ju gali kë tafu etatenëbë lalowamu. Ebë nëgali, Goto buwa tako letitabo lëtabe. Na li Goto hana lëtabe. Jowa Gotowa tafa lële. 33 Sebo Gotome anisasana tole nëgletlamemu, lowenena iniwa tole nëgletlamemu. Na sebo iniwa onehome anisasana tole nëgletëmame, seme fene tole nëla. Kë tële anebo gali nëgehwyëyana na esogo nëglelëmana ebë lalëmu. Kwe Gotome afabo kë ahojume ahojume nëglekefëtlabë lowene na iniwa wesibi Gotome kë nëglëlabë lowene ebë lalëha.”

34 Jisas kë home aholokwane tlole na melowene latle, “Lale tafu lalotlefe.” Na Jisas bume gali tlole, “Ju Gotome lowene sle egletleme

nounou lale, na Goto jume eso home tafa lëgletëme nounou lalëlemu.”

Na bu Jisame li takune, takune mololabëme uli memëtletla.

Jisas onehome takune tlome, Goto kë aniji toglolebë hobë galime

³⁵ Jisas tako lotu lo lifeku mëta tafa tle na bu gali kë mëta të têtatëme. Na bu megali latlome, “Gotobë tafa sle gali lowene sle mëgletlabë ho bu megali lamëtla, ‘Goto bume kë aniji toglolebë ho, onehome nëno nalëgleme, kë ho bu Devitbë bosemle.’ Sobo habelë lowene laletelone, bu kë gali fëyeme gali mletlane? ³⁶ Ètani Gotobë Amtëtomba Devitme lowene tlële na Devit bu kë lowene megali latle,

‘Goto, bu bobë tako home megali lalolole,

“Ju bobë tobamu toba elë tafa egletenëme

na ju bona onehome eso home tafa nëletemome.

Sebo onehome mana tafa nëlelëmome

na bo jume kë wame mëglëyobë home boblo nogotomëme

na bu jubë gali hana boblo mëtome.”

³⁷ Devit kë aniji toglolebë home mefë latotle, ‘Bobë tako ho.’ Na bo some takune nëlëyo, Gotobë tafa sle gali lowene sle mëgletlabë ho, mefëwa fëyeme mototlane, ‘Kë ho Devitbë bosemle,’ kwe bu mefë jwa fëyeme mototlane, ‘Devitbë tako ho?’ Bo some gali nëlëyo, bu Devitbë bosemle kwe tako home tètabe. Këme nëgeme, Devit bu tako ho fë këme totle.” Na kë feilawa oneho buna kë mëtëtabëyabë, Jisasbë gali fleflesuna aholokwane motlola.

Gotobë tafa sle gali lowene sle mëgletlabë ho tëbo lowene esogo mëlelëkefla

³⁸ Na Jisas bume okokwe tlome na megali tle, “Sobo Gotobë tafa sle gali lowene mëgletlabë home ululu egelome. Sobo bubë lakale asa esogo elelëtemo. Bu memelë lamla, heletanëno ëho mehwëa na iniwa

onehobë naba lime asë mëbebokwaka. Oneho bu melowene namëgletëmame, ‘Bu lale letitabo enënefe.’ Na bu oneho këme kë tafa mëglabë lifeku mëta asë mëglana, bu metole namëgletëmame, oneho bume megali namoglomame, ‘O letitabo ho. Lale kljimu.’ ³⁹ Bu lotu lome tafa mëglana, bu metole lamla, onehobë naba li mëta, letitabo ho këme tafa mëglekefëyabë tafa labume tafa mlame. Na tako hi olëna, bu metole lamla, onehobë naba li mëta, letitabo ho këme tafa mëglekefëyabë tafa labume tafa mlame, oneho bu melowene namëgletëmame, ‘Lale letitabo enënefe.’ ⁴⁰ Bu sei ju oneme sosogëna moloma na bubë iniwa wesibi manawa mëglëma namëglame. Na bu memelë lamelekefëya, onehobë naba li mëta, Gotome feilawa gëgali mëlelëla, oneho bu melowene namëgletëmame, ‘Lale letitabo enëne fe.’ Bubë tëbo lowene këna lëlamu motla. Tokwafe, Goto fli enëneme tëbo logotomena, kwe kë enëneme tako tëbo logotomememu.”

Wesibi jwa mëse bu baliti Gotome tlële

⁴¹ Jisas, baliti Gotome këme sisike melekefëtlabë bokis li mëta tètabe, tako lotu lo mëta. Na bu onehome hwi tlome, bu baliti Gotome kë bokis mëta sisike mëtletla. Na feilawa oneho bu feilawa baliti sisike mëtla. ⁴² Na kwe wesibi jwa sei ju mëse tisi. Na bu baliti tokwëtokwë tële sike tle. ⁴³ Na Jisas bubë lowene esogo mëglelëtlabë home gali telokwakëme. Na bu mitisitla na gali tlome, “Sobo kë mëseme hwi elëkakëyo. Bo some nëgali nanëlëyo. Fli oneho bu kë bokis mëta feilawa baliti sisike mla, kwe Goto kë wesibi jwa sei ju mëseme melowene lalëletë, ‘Bu feilawamu baliti sike ele.’ ⁴⁴ Fli oneho bubë feilawa baliti mëtëbetëme kwe tëlewa sike mëtla na fli mana mëtëbetëme. Kwe kë sei ju mëse bu baliti iniwamu tlële, fli hana mëtëbetë. Na tokwafe hi wesibi fëye balitina glo eglemene? Hanane mu. Bubë iniwa baliti wayawe tolë.”

13

Jisas bu melême gali tle, “Gotobë tako lo tëbo lëgletleme”

¹ Jisas na bubë lowene esogo mëglelëtlabë hona, tako lotu lo mago metëkaklija na mana bubë lowene esogo mëglelëtlabë ho li gali tlole, “Euowe, Tisa, ju hwi elome. Anijina kë gigliji mëtlabë lo bu lale klisomu. Bu aniji tatakomu na lale klisomu.”

² Na Jisas bubë gali tafu têtatle, “Bo sobo, lo kë hwi eglomobë gali, të nêtatëyo. Tokwafe bu ebë iniwa lo yayei mogotomame. Fli aniji matawa hana mëgëbëme. Weyewa. Iniwa sisike mëkakame.”

Jisas bu megali latle, “Tokwafe tëbo olë folokokwëme”

³ Na bu Oliv ti fatiniwa motokwala. Na Jisas kë fatini lufu mëta tafa tole na tako lotu lo hwi têtelokwakle. Na Pita, Jems, Jon, Andruna buwa bu belë mitisitla, na takune motlola, ⁴ “Ju seme gali enona. Gotobë lo yayeime, kë gali toglonabë gali, habenalë fata lëglemene? Sebo fëye wesibi afina hwi noglomamene na këme lowene nëlame, ‘Hai, kë olë nounou ekë lële.’”

⁵ Na Jisas bubë gali tafu têtatëme, “Sobo ululu slewa saelo. Ho some sogëna möglëyolime. ⁶ Unina feilawa ho migisiyame na sogëname gali mlame, ‘Bo kë nëgebë kwe Gotobë life mago ho, onehome nëno nëgelëbë ho.’ Na bu feilawa onehome sosogëna mlagumame.

⁷ Na tokwafe, sobo tako wame mëglabë gali aholokwane egelona, na li life elë wame gali fafa mogotlabë gali aholokwane egelona, klelego asa elo. Kë wame kwe melëmane, kwe ebë life tëbo lëglebë olë mana lebokwetle.

⁸ Li life li life mago ho, li life hona momogli mëtayame. Na li life li life nano ekoujamëme. Na li life li life mago oneho, foneme gigli mokoujame. Kë wesibi bu tokwëtokwë eliliha, mëse nëba amlebo fene fale etamë. Kwe tokwafe tako elili fa mëtagulame.

⁹ Kë olëna, sobo ululu sle saelo. Sobo bome fwa lowene sle eglëtëname nëgëme na bu some bubë

letitabobë toba elëme mëglelujome. Na bu some lotu lo mëta tëtëke mëgelulame. Na bu some gavman ho belë na eso ho belë sei mugujelëyome. Na kwe sobo Gotobë lale gali të eoutatemome. ¹⁰ Bu Gotobë lale gali iniwa lifeku mago onehome afina të mëtatëmame na yawe olë mana fata lëleme. ¹¹ Bu some fafa mëglana, na hobë gali aholo bo lëgëtabë ho belë mëlelujona, sobo uli asa elo na melowene asa elo, ‘Sebo habë gali nëglamene?’ Weye. Iniwa gali, Goto some kë olëna kë lëglëyobë, të etlome. Sobowa të egotlome nane. Weye. Gotobë Amtëtomba lowene lëlëyome na kë lowenena të etatemome. ¹² Wali ho, fli home melëkei melëmame, bolijahanime mogo nalë tëbo namotomame. Na wali bolijaya mata bubë nëbaleme kë fene, melë mogotomame. Na wali nëbale bubë botaname bolijayaname wame molomame na wame home melëkei melëmame, mogo nalë tëbo namotomame. ¹³ Sobo bome lowene sle eglëtëname nëgëme, iniwa oneho some këme gëglë mëgletëyome. Kwe ho bome fwa esogo lëglënënëna na bubë gli olë nëgena, bome mana esogo lëglënënëna, Goto bume no lëglëleme.”

Tëbo wesibimu fata lëgleme

¹⁴ Na Jisas ita gali tlole, “Tokwafe sobo mehwi egelome, afëfi life mëta home tëbo logotomebë wesibi fata lëgleme. Ho ebë gali hwi loglolena, lowene sle salëletle. Na kë olëna, oneho Judia lifate mëta kë tafa mëglabë, bu fatinina tabo elë matlebouja. ¹⁵ Na ho lo sebatu mëta lëtabena, bu lowa bubë wesibi glome asa malëkaklu. Weye. Lëglëbouwa malële. ¹⁶ Na ho nuju mëta lëtabena, bubë lowa ëho glome asa maluju. Matëbe. Lëglëbouwa malële. ¹⁷ One, kë olëna, nëbale imonabë na one nëbale kolëbo nabë, bo bume tako maninibo nanëletemëmu. Masiwafe, bu habëna mëglënëboujamene? ¹⁸ Sobo Gotome këme gali eglolome, haliji tu olëna kë wesibi fata jwa nalëgleme. ¹⁹ Kë tëbo

olëna tēbo tafamu lēgēbeme. Kēha hobota ētani hana fata tletēme. Ētanimu, Goto iniwa wesibi blēge totomebē olëna, kēha tēbo wesibi hana tēbe. Na ēje mata, kēha tēbo wesibi hana lēbe. Na tokwafe kēha tēbo wesibi hana lēgēbeme. ²⁰ Goto bu kē tēbo olē lēkle jwa logotlebē kwe iniwa oneho tēbo miglitayame fene. Goto fli onehome melowene latletēme, ‘Bo ebē onehome waaniji tломē, bu bobēmufe.’ Na bu kē onehome maninibo tēgletēmeme nēgeme na bu kē tēbo olē kēme lēkle totle.

²¹ Kē tēbo olëna, ho some megali lēglēyona, ‘Hwi elo, Goto onehome nēnome kē aniji toglolēbē ho, ekē lētabe,’ o bu megali lēglēyona, ‘Hwi elo bu ekē tafa lule,’ sobo bubē gali asa aholokwane elolo. ²² Fli ho migisiyana sogēname megali mēglame, ‘Bo ekē, Goto onehome nēnome kē aniji toglonebē ho.’ Na fli ho mata sogēname megali mēglame, ‘Bo Gotobē gali nēgehilēbē ho, bo ekē.’ Na bu Gotobē afutuku fenene, klelegowa wesibi melē blēge motometēmame. Oneho bu meweniji namēglame, ‘Kē enēne Gotobē life mago enēnefe.’ Na bu feilawa onehome sosogēna mlagumame na metole lamētla, Goto bu kē aniji toglomebē onehome mata, sosogēna mlagumame fene. ²³ Kēme nēgeme, ululu sle saelo. Bo some iniwa wesibi, unina mefata mēglebēme, wagali nēlēyo.”

Unina Gotobē life mago ho ligisime

²⁴ Na Jisas ita gali tle, “Kē tēbo olē yawe lēkakeme na mana kliji yemena u jwa mēgleme. ²⁵ Na sēgetoba matafa mago luklu mēleme na mitigome. Na iniwa matafa mago wesibina lili mēleme na tēbo mēleme. ²⁶ Na kwe, bo, Gotobē life mago ho, bo oloba nagi netujulēme. Na bobē tako lolokwēnena, na tako kliji elulego fenene kēhana iniwa nigisime. ²⁷ Na kē olëna, bobē enselme jine nēbelēkakēmēme. Na Goto kē aniji loglomebē onehome loloko mētagujayame. Na Gotobē onehome

iniwa life mago nēno mokoujame. Matafana, lifena kēme tou mēglebē mago.”

Sobo binibwe time lowene sle egletemome

²⁸ Jisas ita gali tle, “Sobo binibwe time lowene sle egletemome. Bubē laba luklu lēglena na tahweji foke lēglena sobo kēme lowene elome, ‘Ebē wanagli tei fe.’ ²⁹ Kē fenene. Sobo kē tēbo olē hwi eglolona, sobo melowene naegletelome, ‘Bo nigisibē olē nounoumu lalēle.’ ³⁰ Bo some nēgali nanēlēyo, fli oneho bu ebē olëna kē tafa mēglabē, bu mana mētabēyame na kē iniwa tēbo wesibi mana fata mēgleme. ³¹ Lifena matafana tēbo mēgleme, kwe bobē anebo gali unauanalēme melē lēgēbekēfeme.”

Ho liha bo kēna nigisibē olē lowene hana lēletle

³² Jisas bu ita gali tle, “Ho liha bo kēna nigisibē olē, lowene hana lēletle. Heven life mago ensel mata lowene hana mletla. Na bo, bubē bowene, mata lowene hana nēletelē. Aya buwa lowene lēletle.

³³ Bobē nigisibē olē, sobo lowene hana eletelome nēgeme. Kēme nēgeme sobo ululu sle saelo na walena satafa elo. ³⁴ Bo nuguwibē na ita nigisibē, ebē ho bubē lo kile lēglebē fenene na li lifewa lujū. Bu bubē mēta kē wege mēglekefēyabē home afina gali tlome, ‘Bobē wesibi sahwi elokwefēmetēna.’ Na bu wege bwa bwa tlēwagume. Na bubē lo mēta kē sei lēglēkeflebē home gali tole, ‘Bo nigisibē olēme, ju walena satafa ele.’ ³⁵ Na sobo mata mehwi egletēname, kē ho fene hwi lēle. Bo lo bolijayaha ho. Na sobo bobē nigisi olēme lowene hana elo. Bo fole olëna nigisimenawa o olobalē nigisimenawa o taboklē nigisimenawa o klabē kuna nigisimenawa. Sobo kē olē lowene hana eletelo. ³⁶ Bo hokweinawa nigisina, na bo some nina hwi noglokwakijona, kwe kē lale nane? Weye. Kē tēbomu. ³⁷ Ebē gali, kē gali noglējyobē, bo iniwa onehome gali nolomē. Sobo

sagli elolome na mana walena satafa elo.”

14

Lotu letitabo ho, gali fa mototla, Jisame mogo nalë tëkle namogotlame

¹ Tële olë mana mëtebokwe na Israelbë afenëbobë tako lotu olë mana folokoke tëmeme. Israelbë afenëbo bu kë olëna, Goto ëtani bolijafujunime këna tëgaitamebë olë na Isip lifate këna kile mëtëglabë olë, lowene mëtëkefëtle. Na li lotu olë, bu sëse wesibina afulu jwa mëglabë bletë nage hi mëtëkefëya. Na lotu eso enëne na Gotobë tafa sle gali lowene sle mëgletlabë enëne bu kë olëna blalo gëgali mëtle, “Sebo Jisame hwelutuwa habëna fa nogotlamene na mogo nalë tëkle notlame. ² Sebo kë wesibi, Juda life onehobë tako lotu olëna asa manotla. Sebo tako lotu olëna melë nëglana kwe oneho tako wame huju mogotlame.”

Mëse li, lëkaluwa tu Jisasbë eso mëta wë eotatle

³ Jisas bu Saimonbë lo mëta tafa tle, Betani life mëta. Ètani, Saimonbë ato juba jubawa tëgëbetlena na Jisas sle totle. Na Jisas bu masei li mëta tafa tle. Na mëse li mana tisi. Na bu lale lëkaluwa tu aniji botolona tehitle. Kë tubë baliti feilawamu. Na bu kë botolobë ëfo tika totle na lëkaluwa tu Jisasbë eso mëta wë totatle. ⁴ Kwe fli ho kë tafa mëtlabë, bu hwi motlola na witi mëtle, na blalo gëgali mëtle, “Bu kë lale lëkaluwa tu blawa fëyeme wë etatlene? ⁵ Sebo kë lëkaluwa tu li hona balitina hihijikame nëglëlana kwe sebo 300 baliti këniji glo nëglame na kë baliti, baliti jwa home nëlëmame.” Na bu kë mëseme wame gali motlëya. ⁶ Na kwe Jisas gali tlome, “Matëbe. Bume asa gali elëyo. Bume fëyeme wame gali elëyone? Bu bome slemu latanëyo. ⁷ Baliti jwa enëne, sobona unaunalëme tafa eglekefome. Na sobo agaitamome tole egletemona, lalowa egaitamome. Bo kwe sobona unaunalëme hana tafa nëglame. Bo sobona tafa jwa nëglana habëna egaitanamene, ebë mëse ëje fene

aitanë? ⁸ Ebë mëse wesibi melë kë egëtatënëbë këwa melë tei etle. Bu melë, bu lëkaluwa tu bobë eso mëta wë eotatenë na bobë ato kë tuna matëmatëme nëgebëbëme sagli elëtenë. Bo some nëgalimu nanëlyo. ⁹ Bu tokwafe iniwa life, Gotobë lale gali të mëtagulana, kwe bu mëse kë wë tëtatlëbë galime të namëtakefëtëyame na bu këme lowene namëgletëyame.”

Judas lotu eso home gali sle tëtatëme, “Bo some Jisame yo noglëyome”

¹⁰ Kë nalëwa, Judas Iskariot, bu lotu eso home tujutëme na gali tujuwelëme, “Bo tokwafe Jisame yo noglëyome.” Judas bu we ita telë Jisasbë lowene esogo mëglelëtlabë ho, bu mago li. ¹¹ Na lotu eso ho bu kë gali aholokwane mëtle na maninibona sle memëtle. Na bume gali sle motlola, “Sebo jume baliti nëglëyome.”

Jisas bubë lowene esogo mëglelëtlabë hona hi mëtle

¹² Na sëse wesibina afulu jwa mëglabë bletë nage kë hi mëtëkefëyabë olë wafolokoke. Kë olëna bu afeku sipsip kleli tëtëkle mëtëtakefëya na hi hi mëtle. Goto bubë bolijafujunime kë taitamebë olëbë lowene namëgletlame nëgеме, bu sipsip kleli këme tëtëkle mëtëtakefëya. Na Jisasbë lowene esogo mëglelëtlabë ho, bume gali motlola, “Sebo kë tako hi wesibi fëye lo mëta sle nogotomamene, Goto sebobë afuninome kë tëgaitamebë olë lowene nanëgletlame?” ¹³ Na Jisas bubë lowene esogo mëglelëtlabë ho tlemalëme jine tlëme na gali tlome, “Sobo lifate takowa eyeumo. Na tu kë lëgehulebë ho some alëgeme esune lëglëyome. Sobo bume nagi elëkaklome. ¹⁴ Bu lowa lëkakluna, sobo mata saekaklujo na kë lo bolijaya home megali elujololome, ‘Tisa bu megali lalële, ‘Hi lo hametane? Na bo na bobë lowene esogo mëtëletënëbë hona kë hi lo mëta, sipsip kleli hi nanëglelëmëme, Goto bu sebobë afuninome kë taitamebë olë lowene nanëgletlame.” ¹⁵ Na kwe bu some

nogowelë kë logobebë lo lebotane lëgëtatëyome. Kë lo bu maseina, tafa labuna, na bu këna iniwa wasle totome. Na sobo kë hi lo mëta sebobë hi wesibi sle etomome.”¹⁶ Na kwe kë lowene esogo mëtlelëtelobë ho mëtëyeu. Na bu lifate takowa fwa mutulo, na bu iniwa wesibi hwi motlomo, Jisas fene gali tlome. Na bu hi wesibi sle mutujetomo. Na bu Jisas belë ita mëtëyeu.

¹⁷ Na taboklë, Jisas bubë we ita tële lowene esogo mëglelëtlabë home tlesume. ¹⁸ Na bu masei labu li mëta tafa motokouja. Na mana hi motokouja na Jisas mana gali tlome, “Bo some nëgalimu nanëlëyo, ho li, sobona kë tafa egelobë, bome wame home yo loglomeme. Kë ho bu bona ekë hi nelo.” ¹⁹ Na bubë lowene esogo mëglelëtlabë ho këbë gali yafe aholokwane motlola na kwe bubë lowene mëta sle hana tletëme na witina tafa mëtla. Na jowa jowa ho bume takune motlola, “Ju bomeha gali elene?” ²⁰ Na Jisas gali tlome, “Kë ho bu sobo we ita tële hobë ku mëta kë lëtabetëyo. Kë ho bu bona weife hi nelo. Bo buna bletë nage, hi wesibi tu mëta weife fuflu notomo. ²¹ Ètani, bu Gotobë bogo mëta meyahi lamëtla, ‘Gotobë life mago ho, bu gli lëgleme.’ Na bo, Gotobë life mago ho, bo gli nëgelëme ekë, Gotobë bogo fene gali tla. Masiwafe, bome, Gotobë life mago home, wame home kë yo loglënëbë ho, bo bume tako maninibomu nanëletelëfe. Tokwafe bu tëbo liglitamemu. Bota kë home fata jwa egotlebë kwe ebë lalowamu.”

Jisas bu bletë nage na wain taba liji tu bubë lowene esogo mëglelëtlabë home tlëme

²² Bu mana hi motokouja na Jisas bletë nage fa totle, na Gotome fleflesu gali tole, na fufu totle na bubë lowene esogo mëglelëtlabë home satëtagutëme. Na gali tlome, “Sobo hi elo, ebë bobë ato.” ²³ Na bu wain taba liji tuna kabo fa tëtätëme na Gotome lale galimu tole, na mana tlëme. Na iniwa kë kabo mago hi motokouja. ²⁴ Na Jisas gali tlome, “Ebë bobë wino.

Bobë wino kë lugujubë, feilawa onehome lëgaitame nalëgleme. Bobë wino kë lugujubë këme lëlekuju tle, Gotobë gali nëgali galimufe na Goto bu melë lëgleme bu ètani fene gali sle tle. ²⁵ Bo some nëgalimu nanëlëyo, bo wain taba liji tu eli hana hi nëgelëme. Kwe tokwafe, Goto bu onehobë eso home kë tafa lëgletëmebë life mëta fwa, bo tiho wain taba liji tu mana hi nëgelëme.”

²⁶ Na kwe bu Gotobë fleflesu sawa jowa fë mëtëtaya, na bu lifate tako kile mëtla na Oliv ti fatiniwa mutuja.

Jisas megali latle, “Pita bu bome kë lowene lëgletenëbë lowenebëme able lëgleme”

²⁷ Jisas bubë lowene esogo mëglelëtlabë home megali latlome, “Sobo tokwafe bome ulime kile egëtaname. Goto, bubë bogo mëta megali tëgleme nëgëme, ‘Bo sipsip kleli lëglëme home mogo nalë tëbo nogotlëme na sipsip kleli ulime mëglënëboume.’ ²⁸ Kwe bo gli nelëme na huju nelëme na bo afina some Galili provinswa noutatëyome.” ²⁹ Pita bume gali tole, “Kë enëne jume kile mëgëtona, kwe bo jume hana kile nëgëtëmemu. Hanane mu.” ³⁰ Na Jisas bume megali latlole, “Bo jume nëgali gali gali nolë, eli klabë, kakalo tëlafë huju jwa lëglëna, ju bome kë lowene egletenëbë lowenebëme aowafe able eglomeme.” ³¹ Kwe Pita Jisame anisasana gali tole, “Bo juna ko nëgelona, bo jume kë lowene nëgletëbë lowenebëme hana able nëgelëme. Hanane mu.” Na bubë iniwa lowene esogo mëglelëtlabë ho mata megali motokouja, Pita fene gali tle.

Jisas bu Getsemani nuju mëta Gotome gëgali tlelële

³² Jisas bubë lowene esogo mëglelëtlabë hona nujuwa fwa mutula. Kë nujubë weniji Getsemani. Na Jisas bume gali tlome, “Sobo emëta tafa elo. Bo Gotome gëgali nanëglelële.” ³³ Na bu Pita, Jems, Jonname tlelume. Na bubë lowene

mëta tako hobota fata tletle na tutune tle. ³⁴ Na bume gali tlo me, “Bo tako hobota nanëlëyo. Kë tako hobota lowenebë bome tako boblo laletanë. Sobo ni asa ebo, emëta hwina tafa elo.” ³⁵ Na sogë fewa təkake. Na life mëta latitigowa na Gotome gëgali tlelële. Bu metole latle, ebë enisusu na tëbo wesibi bume kë migisitlebë, bume sigli namogotleme fene. ³⁶ Na bu Gotome megëgali latlelële, “O aya. Ju iniwa wesibi melë lalowa egotomeme. Na bo metole nanelë, ju ebë tëbo wesibi bome kë migisitenëbë, bo mago sike ekaketenë, na bome migisitenë jwa namëgleme. Kwe ju bobë tole asa esogo elelëtenë. Weye. Matëbo. Jubë tolewa esogo eglelëleme.”

³⁷ Na Jisas bubë lowene esogo mëglelëtlabë ho aomalë betelë tujutëme. Na bume nina hwi tlo me. Na Saimon Pitame takune tlo le, “Pita, ju fëyeme ni ebene? Ju tako tafa hana ele na hokweinawa fëyeme ni ebene?” ³⁸ Sobo ni asa ebo. Tafawa elome na Gotome gëgali elelëlome. Satan some su lëgëtolime, sobo tëbo lowene esogo jwa naeglelëlome. Sobobë lowene lalowa lëbeteyo kwe sobobë ato mogowa lëbetëyo.”

³⁹ Na Jisas bu ita tuju na bu Gotome ita gëgali tlelële, otome fene gëgali tlelële. ⁴⁰ Na bubë lowene esogo mëglelëtlabë hobëtelë ita tisitëme, na bume nina hwi tlokwakime, bu tako nilafalemu memëtla. Na Jisas bume huhuju totome, na bume tiniji na hwë memëtletla na lowene mëtla, “Habë gali noglolamene?” Bu ni mëtëbeyame nëgеме. Na Jisasmе hwiwa motlola.

⁴¹ Tokwafe Jisas aowafeme tisitëme. Na bubë lowene esogo mëglelëtlabë home gali tlo me, “Sobo itaita fëyeme ni ebekefone? Tatei! Bo, Gotobë life mago ho, bu bome tëbo lowene esogo mëglelëlabë home yo loglomebë olë, ekë folokoke. ⁴² Hwi elo. Bome yo loglomebë ho ekë fata lële. Sobo huhuju elo na bu belë nuguja nanëglame.”

Judas Jisasmе wame home yo tlo me

⁴³ Jisas mana gëgali tle na Judas mana tujutëme. Judas, ebë Jisabë lowene esogo lëglelëtlebë ho li. Jisabë lowene esogo mëglelëtlabë ho këniji, we ita tële. Na feilawa ho Judasna mitisiya. Na bu kosina, atobeilana mëtehweija. Na lotu lo mëta wege mëglabë eso enëne na Gotobë tafa sle gali lowene sle mëgletlabë ho na lotu letitabo ho, bume jine mëtelëkakëma. ⁴⁴ Èbame, Jisasmе yo gali kë loglomebë ho, bume megali latlo me, “Bo tokwafe some melë lëlekuju nëgletëyome. Bo ahino mëta momotlë notlëme na sobo mehwi elome kë ho, ebë Jisas. Sobo kë home fa etlo me na kiki sle etlo me na elelulome.”

⁴⁵ Na ebë olë Judas tisi, na Jisas belë hokweinawa tujutle, na gali tlo le, “O Tisa.” Na bume ahino momotlë tletle. ⁴⁶ Na bu Jisasmе fa mototla na kiki mototla.

⁴⁷ Kwe li ho, kë mëta kë tiglibebë, bu Gotobë lo mëta wege mëglabë eso hobë, wege hobë aholo kosina sika metëtatle. Na aholo life mëta latitigotlewa. ⁴⁸ Na Jisas bume gali tlo me, “Sobo kosina atobeilana bome fame fëyeme esijone, tokli home fame fene mutujutla? ⁴⁹ Iniwa olë, bo tako lotu lo mëta kë tafa tëglekëfebë na one-home gali kë të tëgëtakefëtemëbë, sobo bome mana fa tëtana jwa fëyemene? Kwe matëbe. Gotobë bogo mago gali metëgëbetenë watle, kë nëgali galimu lëgëbeme.” ⁵⁰ Na Jisabë lowene esogo mëglelëtlabë ho iniwa ulime lamëtlënboujawa.

Falake ho latlëboukakuwa

⁵¹ Na falake ho, tatiwa lablab ëhowa kë sabu togotlebë, Jisasmе nagi esogo tlagile. Na bume yafe fa mototla, ⁵² kwe bu kë tatiwa ëhowa kile təkake na flatabowa latlëboukakuwa.

Jisasmе hobë gali aholokwane mëglabë letitabo home tetahë mëtlëma

⁵³ Jisasmе kë fa mototlabë ho, lotu lo mëta wege mëglabë enënebë eso hobë lowa mëtlelula. Na lotu lo

mëta wege mëglabë eso enëne, na letitabo enëne, na Gotobë tafa sle gali lowene sle mëgletlabë enëne, iniwa loko mëtleläya. ⁵⁴ Na Pita, Jisame nagi nagiwa esogo tlagule. Na bu lotu lo mëta wege mëglabë hobë eso hobë lo li mago lëglesî elë tēkaklu. Na bu lo mëta kē sei moglokweflabë hona tafa mëtla na ahojume satle.

⁵⁵ Lotu lo mëta wege mëglabë eso enënena hobë gali aholokwane mëglabë letitabo ho, fli onehome, gali tuku mëtletëma, “Sobo Jisabë tēbo lowene hwi eglotelona, kwe sobo esijome na kē galibë tē etatēname.” Bu metole lamëtla, Jisame so mëtatlame na bume mogo nalë tēkle namogotlame. Kwe oneho bu gali tē sle hana mëtëtatla. ⁵⁶ Feilawa ho bume sogëna gali so mëtëtatëma, kwe bubë gali bwa bwa lowene mëta tēbetëme na jowa lowene mëta hana tēbetëme. ⁵⁷ Na fli ho bu Jisame gali meso mëtëtatla, ⁵⁸ “Sebo waaholokwane tlole, bu megali latle, ‘Bo ebë tako lotu lo, ho tobana kē gliji mëtlabë, yayei nogotlëme. Na bo aona olënawa li gliji nëgelëme, kwe bo tobana hana gliji nëgelëme.” ⁵⁹ Kwe kē gali bu kē gëgali mëtlabë, bu mata bwa bwa lowene mëta gëgali mëtla na jowa lowene mëta fwa hana gali mëtla.

⁶⁰ Na lotu lo mëta wege mëglabë enënebë eso ho, bu hobë gali aholokwane mëglabë letitabo hobë li mëta tlibe na Jisame takune tlole, “Kë enëne jume so namëtatëyo. Ju bume kofaya gali gali eglome jwa fëyemene?” ⁶¹ Kwe Jisas mogweliha latiglibewa na bume gali hana tafu tëtätëme.

Na lotu lo mëta wege mëglabë enënebë eso ho bume gali tlole, “Ju ebë ho kē nëgebëne, Goto jume kē aniji toglëbë, onehome nëno naeglemene? Ju kē hone? Ju lale Gotobë nëbane?” ⁶² Na Jisas gali tlole, “Bo ta kē hofe. Na tokwafe, sobo mehwi egloname, bo, Gotobë life mago ho, bo tako kalëlegona Gotobë tobamu toba elë tafa nëgelëme. Na bo heven life mago oloba nagi

nëgetujulëme.” ⁶³ Na lotu lo mëta wege mëglabë enënebë eso ho bu Jisabë gali aholokwane tlole, na bubë ato mago ëho kaka totle, bu Jisabë galime hobota tēgletleme nëgëme. Na bu gali tle, “Sebo fli enëneme hana gali noglomame, seme kē hobë tēbo loweneme gëgali namëglame. Weye. Matëbemu. ⁶⁴ Sobo bubë gali waaholokwane tlole, bu megali latle, ‘Bo Goto fenene.’ Kë gali tēbomu. Bu Gotome tēbo gali latlole. Na sobo habelë lowene lalone, sebo habelë nogotlamene?” Na iniwa anisasana jiyakle mëtla, “Bu tēbo lowenena ho, gli malële.”

⁶⁵ Na fli ho bume nagutabana kokose mëtlëla. Na bubë naba ëhona lamu mototometla na bume mana tēkle mototla na takune motlola, “Ju iniwa wesibi lowene eglëtëmena kwe ju seme gali elona, jume ya tēkle lëtane?” Na lo mëta kē sei mëglëkeflabë ho bume mata tēkle mototla.

Pita bu Jisame kē lowene lëgletlebë loweneme aowafe able lëgleme

⁶⁶ Pita lo li mago lëglesî tabo lifeku mëta mana tlibe. Na lotu lo mëta wege mëglabë enënebë eso hobë wege mëse tisi. ⁶⁷ Na bu Pitame hwi tlole, ahojume sa tle. Na kē wege mëse bume hwi sle tlole, na gali tlole, “Ju mata, Nasaret life mago Jisasna, kē tafa tēgelobë ho li.” ⁶⁸ Kwe Pita bu able tle, “Ju kē gali eglebë gali bo lowene hana nëletelë. Hanane mu.” Na bu ino ëfo elë tuju na ino ëfo mago lëglesî mëta mana telutabe. Na hokweinawa kakalo huju tle. ⁶⁹ Na kē wege mëse bume ita hwi tlole na bu kē tafa mëglabë home gali tlome, “Ebë ho kē nëgebë, buna kē asë mëtëglabë ho li ekëyo.” ⁷⁰ Kwe bu ita able tle, “Hanane mu.”

Na Pita sogë tëtëlëkakewatle, na buna kē mitlijabë ho Pitame gali motlola, “Nëgali mu. Ju buna kē asë tēgelobë ho li ta ekë. Ju mata Galili provins mago ho nëgëme.” ⁷¹ Na Pita bu anيسانamu gali tlome na kakëne tletëme, “Iyemanemu! Bo kē home lowene hana nëletelëmu. Hanane

mu. Bo nēgali gali hana nēgelēna na Goto bu bome tēbo lēgētānēna kwe tēbo malētānē.”⁷² Bu wagali tle, na kakalo mana huju tle. Na Pita, Jisas kē gali toglolebē gali ita lowene tletle, “Eli klabē, kakalo tēlafe huju jwa lēglēna, ju bome kē lowene egletenēbē loweneme aowafe able egglomeme.” Na Pita kē gali ita lowene tletle na bu wabelē tle na tako yemu kletotle.

15

Bu Jisame eso ho Pailat belē mētlelula

¹ Olobalēwamu, lotu eso enēne, na lotu letitabo ho, na Gotobē tafa sle gali lowene sle mēgletlabē ho, na hobē gali aholokwane mēglabē letitabo ho, bu iniwa loko motokweija na blalo gali sle mototla wesibi mogotlabēme, “Sebo habelē nēglamene?” Bu gali wasle mototla na Jisame tabana lei mototla na eso ho Pailat belē mētlelula. ² Na Pailat Jisame takune tlole, “Ju Juda enēnebē tako eso hone?” Na Jisas tafu tētatlē, “Nakwefēyemene. Ju fene gali ele.” ³ Na lotu eso ho Jisame lebutako gali so mētētatlā. ⁴ Na Pailat bume ita gali tlole, “Bu feilawa gali jume so mētātēyo, na ju gali tafujwa fēyeme etatēmene?” ⁵ Kwe Jisas gali tafu hana tētatlē, bu mogweliha tētabe. Na Pailat bu kēme tutune tle.

Pailat gali tle, “Jisabē ato nilina ti mēta bu eletelo”

⁶ Jowa jowa tlibutuna, bubē tako lotu olēna, oneho kalabusu lo mago hobē weniji fēfē mototokwefēma na Pailat bu kē hobē weniji aholokwane lēletle na kē home kalabusu lo mago jine lelēkakētēme. ⁷ Ebē olēna, li ho bu kalabusu lo mēta tafa tle. Bubē weniji Barabas. Ēbame Barabasma fli hona, bu gavman enēneme tako wame motloma na ho flime mogo nalē tētēkle mototoma. Na gavman enēne bu kē home kalabusu lowa sike mētlā. ⁸ Na oneho Pailatme mitisitlā na gali motlola, “Ju seme jowa kalabusu lo mago home jine elētēna, ju seme ēbame ho li kalabusu

lo mago fene jine tlētēna.” ⁹ Na Pailat bume takune tlole, “Sobo metole lalone? Bo some, Juda life mago onehobē eso ho, Jisame, kalabusu lo mago jine nēglētēyomene?” ¹⁰ Pailat bu megali fēyeme lēlene? Bu melowene lēgleme nēgeme. “Lotu lo mēta wege mēglabē eso enēne bu Jisame tēboijiwamu lamletlā na bu bo mēta kēme melesula.” ¹¹ Kwe lotu lo mēta wege mēglabē eso enēne, bu onehome anisasana gali tlole, “Sobo Pailatme, gali elēlo, ‘Jisas matēbo. Barabasma fwa kalabusu lo mago jine elobakētēna.’” ¹² Na Pailat bume metakune tlole, “Kē ho, sobo mēfē kē egotlobē, ‘Israelbē afenēbonibē eso ho,’ bo bume habelē nogotlēmene?” ¹³ Na bu feilawa anisasana jiyakle memētlelēla, “Bume ti mēta nilina bu elo.” ¹⁴ Kwe Pailat takune tlole, “Sobo fēyeme gali elone? Bu fēye tēbo wesibi fa totlene? Bu fēye tlene?” Kwe bu feilawa anisasana jiyakle memētlelēla, “Bume ti mēta nilina bu elo.” ¹⁵ Pailat bu melēme tole tle, oneho bume fleflesu namēgletlame nēgeme, na bu Barabasma kalabusu lo mago kēme jine tletēme. Na bu fli home gali tlole, “Sobo Jisame taba afona feilawa lēlafa etlome.” Na bu Jisame taba afona feilawa lēlafa mototlā. Na tokwafe bu Jisame wame home boblo mogotomabē enēneme tlēme, bume ti mēta nilina bu namēglame.

Wame home boblo mogotomabē enēne Jisame tiniji galina memotlola na bume ssonatlē memototlā

¹⁶ Fli wame home boblo mogotomabē enēne, bu Jisame eso hobē tako lowa mētlelēkakula, na bu fli wame home boblo mogotomabē enēneme gali mētelokwakēma. Na bu iniwa mitisiya. ¹⁷ Na bu Jisame winowa ēho mētehwalā, eso hoha nafata lēgleme. Na bu analēbana taba glo mētlā, na eso hobē eso afeteniha hwatē mētlelā, na bubē eso mēta gelo mētētatlā. ¹⁸ Na bu tiniji galina gali motlola, “O Israelbē afenēbonibē eso ho, lale olobalē?” ¹⁹ Na bubē

eso elème atobeilana tëke motlola na bume nagutabana kokose mètłëla. Na bu Jisasbë elebo li mëta bubusu mètletla, eso home fene bubusu mletla. ²⁰ Bu Jisasmë këbë iniwa tiniji galina wafi gali motlola. Na bu kë winowa ëho tika mètëtatla na bubë ëhomu gelo mètëtatla. Na bume mètłelula, bume ti mëta nilina bu namëglame.

Bu Jisasbë ato ti mëta nilina bu mëtla

²¹ Bu Jisasmë mètłelula na li ho, bubë weniji Saimon, Sairini lifate mago ho, bu li lifate mago tisi na lifate takowa tuju. Kwe wame home boblo mogotomabë enëne bume alëgeme esune mètłëla na enisusuna gali motlola, “Se! Ju Jisasbë ti mana ehule.” Na bu maņa tehule. Saimon bu Aleksandernabë, Rufusnabë boli-jaya.

²² Na bu Jisasmë Golgota lifekuwa mitilekola. Golgota weniji bu ebëha gali fenene, “Hobë eso eleboha life.”

²³ Na bu Jisasmë wain taba liji tu, malasini na sago, yafe fwei mètłëla, tako elili fa jwa nalogotleme fene. Kwe bu yo latletëme na hana hi tle.

²⁴ Na kwe, wame home boblo mogotomabë enëne bu Jisasmë ti mëta nilina bu mëtla. Na bubë ato mago ëho melëna sa mètëtaya. Bu satu salë mëtla na ho mana aniji motloma jowa jowa wesibi glo namëglabëme.

²⁵ Olobalë, kljina, bu Jisasmë ti mëta nilina bu mëtla. ²⁶ Na bu ti katabo, eso matawa elë fla mètëtatla. Na bume kë so mètëtatlabë gali, kë mëta yahi mëtla. Bu meyahi lamëtla, “Juda lifate magobë eso ho.” ²⁷⁻²⁸ Na bu Jisasbë ti li mëta, tlemalë tokli home ti mëta bu mëtla. Lime tobamu elë lë mototla na lime yemane toba elë lë mototla.*

²⁹ Na lifate mago kë mitisiya, mutujabë oneho, bubë eso luluju mototoma na Jisasmë sasonatlëtlë memototla, “Te, ju ëbame megali latle, ‘Bo

ebë tako lotu lo yayeri notlëme na aona olënawa li gliji nelëme.’ ³⁰ Te, ju këha afutukuna ho kwe ju eli jubë ato mana aitale na kë ti mago kle etëkekeme.” ³¹ Na lotu lo mëta wege mëglabë eso enëne na Gotobë tafa sle gali lowene sle mëgletlabë ho bu mata Jisasmë tëtane lamëtëbetla na blalo gëgali mëtla, “Bu fli home taitame na kwe bubë ato lëgaitale hana lëgleme. ³² Kë ho bu ëtani megali latle, ‘Bo kë ho kë nëgebë, Goto bome kë aniji toglonëbë ho, onehome nëno nanëgelëme.’ Na bu mata megali latle, ‘Bo Israel life mago onehobë eso ho.’ Te, sebo kë home nabana mehwi noglolana, ti mago kle lolëme, kwe sebo mana bume lowene sle nanëletlame.” Na ebë tlemalë tokli ho, Jisasbë li mëta ti mëta kë bu mëtlabë, bu mata, Jisasmë tiniji galina gali motlolo.

Jisas gli tle

³³ Kljijuna, kwe klabëha ki tëtëtlëme. Na kë tëgemolebëë na taboklë kljijina ita fetiha tëtëtlëme.

³⁴ Na taboklë, kljijina Jisas anisasana we tole, “Eloi, Eloi, lama sabaktani!” Kë galibë ebëha gali fenene, “Bobë Goto, bobë Goto, ju bome fëyeme kile etanëne?” ³⁵ Fli ho, lolime kë tafa mëtlabë, bu kë we lego aholokwane motlola na gali mëtla, “Aholokwane elo. Elaijame we lolole.” ³⁶ Na li ho fëka tlagutle, na bu sufa iniluha wesibi, wain taba liji tu mëta flu tëtatlë na klenëba mëta lei tëtatlë. Na këna Jisasmë mana fwei telokwakle, wain taba liji tu slo nalëgleme. Na bu gali tle, “Awiya, sebo hwi nolola, bale Elaija bu ligisina na kle lëtłelëbakleme nawa o hanane.” ³⁷ Na Jisas feilawa aflei tle na lagliwa tle.

³⁸ Na kë tako ëho, bu tako lotu lo ino ëfo mëta këkesi tëglebë, lakawa tëmälita kufe lokwati. ³⁹ Na wame home boblo mogotomabë enënebë eso ho, bu Jisasbë li mëta tlibe. Bu Jisasbë aflei lego aholokwane tle na

* **15:27-28** Fli lowene ho bu melowene lamëtla, li gali mana lëbe kë gali mëta. Kë gali melë lëgëbelälë, Gotobë bogo mëta kë lëgëbebë gali bu olafamu këme tëbe. Kë gali melë lëgëbelälë, “Oneho bume mehwi lamotlola, tëbo ho fenene.”

kë gli tëglebë hwi tlole na gali tle, “Euowe, nëgali fe, bu Gotobë nëbafë.”

⁴⁰ Na aomalë one bu kakëha mëtelubokwëya na hwi mëtelokwakëma. Li mësebëye, buna tafa mëtla, bubë weniji Maria, Makdala lifate mago. Na li mata, bubë weniji Maria, Jems tokwëfo nabë, Josep nabë bota, na li mësebë weniji Salome. ⁴¹ Èbame Jisas Galili provins mëta tafa tëglëna, kë aomalë one bume nagi esogo esogo mëtlelëla na mana mëtakitakëfla. Na fli lebutako one mata, kë mëta kë mitlijabë bu iniwa Jisasna Jerusalem lifatewa mitisiya.

Bu Jisas mogome aniji fuluju mëta gwa mototla

⁴²⁻⁴³ Na taboklë, Arimatea life mago Josep, tisi. Bu hobë gali aholokwane mëglabë letitabo ho li. Bu lale homu. Bu mata, Goto iniwa onehobë eso ho kë tafa lëgletëmebë olë hwi loglolebëme hwi lalëlekëfe. Ebë olë ebë Fraide, wesibi sle mototokwefëmabë olë. Uniji ebë bubë tafawa mëgla olë nëgëme, na bu kë olëye wesibi hana sle motomame. Na Josep bu eso ho Pailat belë tujutle. Bu bume uli hana tletle. Na takune tlole, “Bo Jisas mogome ti mago lalowa tohwa nogotlëmene o hanane?” ⁴⁴ Na Pailat bu klelego latle na melowene latle, “Bu waglinawa.” Na bu wame home boblo mogotomabë enënebë eso home gali tujuwelële, ligisinalëgleme. Na bu belë tisi na Pailat bume takune tlole, “Jisas wagli lëlene o mana hwi lëtane?” ⁴⁵ Na kë ho bume gali tlole, “Nëgalimu. Wagli lële.” Bu kë gali aholokwane tle na Josepme gali tlole, “Ju Jisas mogome lalowa tohwa etle.”

⁴⁶ Na kwe Josep bu lale tatiwa ëho heletabo, balitina fa tëtatile na bu Jisas mogome kë ëhona lalei totle. Na bu mogo tehule na aniji fuluju matëmatë mëta gwa telujuwetle. Ho bu kë aniji fuluju tobana go mëtlelëya. Na Josep aniji tako obobwelë tëtajiji na kë aniji fuluju ëfo tiji tletle. ⁴⁷ Na Makdala life mago Maria, na li Maria, Josep bota, bu lolime tafa mëtelo. Na bu Jisas

mogome këme gwa togotlebë aniji fuluju hwi mëtlëyo.

16

Jisas bu matëmatë mago lahujuwa tle

¹ Tafawa olë yawe tle, na Makdala life mago Maria, na li Maria, Jems bota, na Salome, bu lëkaluwa welë tu, balitina glo mëtla, Jisas mogome këna tefo namogotlame.

² Na Sande, olobalëmu, bu aniji fuluju matëmatëwa mutuja. ³ Bu mutujabë, na alëgëme blalo gëgali mëtla, “Seme ya lëgaitanamene, kë tako aniji, matëmatë fuluju ëfo mago obwelë nanëgëtayame.” ⁴ Kwe bu mitisiya na lolime mitlija na hwi mëtëkaka, “Aniji, matëmatë ëfo mëta hana ebamëfe. Kë aniji waobobwelë mëtagujayafe.” Kë aniji tako anijimu. ⁵ Na bu kë aniji fuluju matëmatë elë mëtëkakluja. Na bu falake home, tobamu elë kë tafa tëglebë, hwi mëtelëjuwelëla. Bubë ëho heletabo na tatiwamu. Bu kë home hwi motlola na klelego memëtletla, na ulina memëtletla.

⁶ Na bume gali tlome, “Sobo klelego asa elo. Bo walowene nelë, sobo Nasaret life mago Jisame hohwi etatelo, ti mëta kë bu mëtlabë home hohwi etatelo. Bu eme hana tafa lële. Bu wahuju lële. Sobo hwi elo, eme kë gwa mototlabë tala alujawa ekë lëbe.

⁷ Kwe sobo Pita name, bubë lowene esogo mëglelëtlabë ho fli name sagali ejuwelëmo, ‘Jisas bu afina Galili provinswa waloutatëyo. Na sobo bume këme hwi egujuwelëlome, bu ëbame fene gali tëlëyo.’”

⁸ Na kwe, one bu aniji fuluju matëmatë mago mëtëkaklija na mëtlëbouja. Bu klelego memëtla na lilina hwei memëtla. Na bu këme fli enëneme li gali meha hana gali motloma, bu uli mëtlame nëgëme.

Makdala life mago Maria bu Jisame hwi tlole

⁹ Jisas bu Sande olobalëmu matëmatë mago huju tle. Na bu Makdala life mago Mariame afina

tuhu tlelë. Jisas bu ëtani tobali ita tële ahwane, kë mësebë ato mago hehë tletëme. ¹⁰ Maria bu Jisasna kë asë mëtlabë onehome gali tujuwelëme. Kë enëne bu maninibo mëtletla na ye mëtlekefëtla. ¹¹ Na Maria bume gali tlome, “Jisas mana tafa lële na bo wahwi nololë! Na kë enëne bubë gali aholokwane mëtla kwe melowene lamëtla, ‘Bu sogëna lale.’”

Jisasbë lowene esogo mëglelëtlabë ho tlemalë bume alëgeme esune mëtlëlo

¹² Na tokwafe bubë lowene esogo mëglelëtlabë ho tlemalë, lifate kile mëtelo na alëge alëgewa mëtëyeu. Na Jisas kë tlemalëme li wenianena esune tlëme. ¹³ Na bu kë gali, bubë lowene esogo mëglelëtlabë ho flime, gali mutujuwelëmo. Bu kë gali aholokwane mëtla kwe bubë lowenena hana sle mëtlamu, sogëna tokwë mëgelo.

Jisas bubë lowene esogo mëglelëtlabë home fata tletëme

¹⁴ Na tokwafe bubë lowene esogo mëglelëtlabë ho we ita jowa këniji hi mëtla na Jisas bume mana fata tletëme. Na bume wame galina gali tlome, “Sobo lowene sle jwa fëyeme elone? Na sobo bome, matëmatë mago huju tëgelëna kë hwi motlonabë onehome fëyeme boblo totomone na bubë gali aholokwane toglomo jwa fëyemene?” ¹⁵ Na bume ita gali tlome, “Sobo iniwa lifate Gotobë lale gali, asë elelëtelo. Na Gotobë lale gali iniwa onehome të etagute-mome. ¹⁶ Oneho bu Gotobë lale gali lowene sle mëgletlana, na wafi baptais mëglana, kwe Goto bume lëgaitameme na nëno lëgleme, buna unaunalëme tafa nalëglelëmeme. Kwe oneho bu Gotobë lale gali lowene sle hana mëgletlana, Goto bume hehë lëgletëmeme na tëbo miglitayame. ¹⁷ Bome kë lowene sle mëgletë nabë oneho, bu Gotobë afutuku fenene, wesibi melë mogotomame. Bu bobë weniji fë mogotlana, na ahwane hehë mëgletëmame. Na bu lili anigawa galina gëgali mëglame.

¹⁸ Na bu wametabo taiju tobana atineha fa mogotlana, bume hana tëbo logotomeme. Na bu motaba foha wesibi atineha hi mëglana, bu tëbo hana miglitayame na bu gigli hana mëglame. Na bu tëbo atona home, toba gwa motatëmana, na bu ato titika mlame.”

Goto Jisasmë heven life elë watilekole

¹⁹ Tako Ho Jisas, bume gali watë tëtätëme na Goto bume heven life elë tilekole. Na bu Gotobë tobamu toba elë tafa tletle, Gotona onehome eso home tafa namëgletemome. ²⁰ Na bubë lowene esogo mëglelëtlabë ho mutuja na lale gali të mëtëtagula, li life, li life memëtla. Tako Ho Jisas, bume lataitame, na bubë afutuku lafijiwa tlëme. Na bu, Gotobë afutuku fenene, wesibi melë lamototoma. Na oneho këme hwi mëtla na lowene mëtla, “Bu kë të mëtatë nabë gali nëgalimufe.”

Luk Ebë Lale Anebo Gali Kënëgebëye Jisame Gali nene, Luk Yahî tle

Luk bu kë lale gali Tiofilusme yahî tletle

¹ O letitabo ho, Tiofilus. Ëbame feilawa ho bu, Jisas wesibi sebobë li mëta, melë kë totometënabë yahî mëtla. Kwe bu iniwa gali yahî hana mëtla. ² Fli enëne, bu iniwa wesibi Jisas kë totomebë bubë nabana hwi motloma. Na bu kë gali boname na fli enënename të mëtëtatëna. Na kë enëne bu kë aholokwane motlolabë gali yahî mëtla. ³ Këme nëgeme, bo metole nanelë, bo mata kë lale gali yahî nelëme na jume nelëbakëme. Bo iniwa wesibi, Jisas melë kë totomebë, onehome itaita takune latlokweffëmë. Na bo kë wesibibëme walowene sle nëletemë. Na bo ëje kë wesibi, yahî sle nelë. ⁴ Ju bobë yahî hwi sle eglomena, na melowene sle naegletëmeme, “Kë gali bu jume ëbame kë okokwe mëtëglëyobë, nëgali gali mu.”

Ensel Sekaraiame megali latlole, “Jubë mëse Elisabet nëba fu egotleme”

⁵ Herot bu Judia provins mago eso home tafa tëglena, na lotu lome wege lëglebë ho li këme tètabe. Bubë weniji Sekaraia. Bu Abiyabë ilawa mago ho. Abiyabë ilawa mago ho, bu lotu lome wege mëtëkefëya. Bu na bubë mëse mata, lotu lome wege lëglebë letitabo ho Aronbë bosemle. Bubë nobë weniji Elisabet. ⁶ Nona, bohena, Gotobë naba lime lale tafamu lamëtelo. Na bu Gotobë galiwa lowene sle mëtletelo. Na bu këme fëye wesibiha hana mëtelo. ⁷ Kwe bu nëba jwa mëtëtabo. Elisabet layame tlibeme nëgeme. Na bohe hoti tle na no mëseti tle.

⁸ Li olëna, Sekaraiabë ilawa mago enëne, Gotobë tako lotu lo mëta, Gotobë wege fa mëtëtatla. Na Sekaraia mata, Gotobë wege fa tëtatile. ⁹ Ètani home fene aniji motlokweffëma, kë

fenene Sekaraiame aniji motlola, lale lëkaluna wesibi Gotome ahojume nalëgletleme, Goto bubë lale ahëya lëkalu hëhë nalëgleme. Bu Sekaraiame melëna aniji motlola bu satu salë mëtla na Sekaraiabë weniji fata tletle. Na bu Gotobë tako lotu lowa təkaklu, lale lëkaluna wesibi Gotome ahojume nalëgeluletleme. ¹⁰ Na Sekaraia lale lëkaluna wesibi Gotome kë ahojume tletlebë olëna, feilawa oneho Gotobë tako lotu lo li mëta loko mëtletëya na Gotome mana gëgali motlokweffa. ¹¹ Sekaraia lale lëkaluna wesibi Gotome mana ahojume lëgletlebë, na kwe Gotobë ensel bume mana olafa tletle na lale lëkaluna wesibi këme ahojumebë masei li mëta, tobamu elëme tlibetle. ¹² Sekaraia, enselme hwi tlole na klikina metletlemu na ulina metletle. ¹³ Na këme ensel bume gali tlole, “Sekaraia, ju uli asa ele. Goto jubë mëse nëba egehlebë gali waaholokwane tolë. Këme nëgeme jubë mëse Elisabet nëba fu egotleme. Na ju bubë weniji mēfë saetle, ‘Jon.’ ¹⁴ Kë nëba fu egotlena, jubë lowene lalowamu nalëbetëme na fleffesuna etabeme. Feilawa oneho mata fleffesuna mëtabëyame. ¹⁵ Tokwafe Goto bume mehwi naloglome nëgeme, lale homu. Bu wain taba liji tu na bia tu na hana hi lëglememu. Bu botabë imo mëta manane na Gotobë Amtëtomba bu mëta mana lelutabetleme. ¹⁶ Na bu, Israelbë afenëbome lowene hihijika mëglabëme laitameme na ita bubë Gotome esogo meletlëleme. ¹⁷ Gotobë lowene mago gali të tokwefflebë ètanifu ho, Elaija fenene, bu këha lakalena kalëlegona tafa nalëgleme. Na Tako Home leoutatleme. Bu bolijaya name, nëbale name melë logotomeme, yonane lowene mëta fwa tafa mlame. Na bu Gotobë gali kë momata mëgëtatlabë enëneme sle lotomeme na bu metafana mëglame, lale lowenena enënebë lowene fene lëbetëme. Na bu onehome sagli lëletlëmeme na Gotobë kalëlegona ho ligisibë olëme mana hwi namëgletlame.”

¹⁸ Na Sekaraia enselme gali tlole,

“Bo habëna lowene nëgletelëmene, kë gali nëgali gali mu? Ju hwi ele! Bo wahoti nelë na bobë mëse mata wamëseti ebefe.”

¹⁹ Na ensel Sekaraiame gali metafu tëtatlë, “Bo Gabriel. Bo Gotobë li mëta kë niglibekefëbë ho. Goto bu jine lelëfakënë, jume gali nanoglëme na ebë lale gali të nanëtatëme. ²⁰ Te! Ju aholokwane ele. Ju bobë gali lowene sle jwa egletleme nëgëme, elë ju gali mumu egëbeme. Ju gali mumu tabo tafa eglebëë, na jubë mëse nëba mana fu totleme. Bobë gali olafa lëglebë olë, Goto waaniji lolole.”

²¹ Onoho Sekaraiame yafe hwi mëtletla na metutune lamëtletla, “Bu lotu lo mëta tako tafa fëyeme lelu-lene, wesibi liha fata leluletlene?”

²² Tokwafe tekaklina, gëgali lëgleme fene kwe bu hana gëgali tle. Bu tobanawa lëlekuju tëbebokwaketëme. Bu gali wamumu tëbe. Onoho bume yafe hwi motlola na melowene lamëtletla, “Gotobë tako lotu lo mëta, Gotobë klelegowa wesibi hwi lelujelëlefe.”

²³ Tokwafe, Sekaraia, Gotobë tako lotu lo mëta kë wege tëglebë wege yawe tlole na bubë lifatewa mana tuju. ²⁴ Na tokwafe bubë mëse Elisabet nëba imona tëtabe. Na bubë lo mëta fwa tobali yeme tafa tle. Na bu megali tle, ²⁵ “Goto maninibo tletënë. Bome kë fata lëgletënëbë wesibi, ebë Gotobë wesibi. Bo onehobë naba lime, layame kë tiglibebë tiniji, Goto wasle totle.”

Ensel Mariame megali tolë, “Jisame eghole naegleme”

²⁶ Elisabet bu nëba imona tobali ita jowa yeme tafa tle na Goto, bubë ensel Gabrielme, Galili provinsbë tokwëfo lifate Nasaretwa mana jine tlële. ²⁷ Na bu layo mëse belë tujutë, bubë weniji Maria. Kë mëseme, eso ho Devitbë afenëbo mago ho, Josep sei lëglebëme wafi aniji motlëya. ²⁸ Na Gabriel gali tolë, “Bo nisiyo. Goto juna etabo na jume lataita na tako tole latletë.” ²⁹ Maria kë gali aholokwane tlole na klelego metletle

na tutune tle na melowene tle, “Kë habëtabo galine?”

³⁰ Na ensel gali tolë, “Maria, ju uli asa ele. Goto jume fleflesumu lalëletë. ³¹ Aholokwane ele. Ju nëba egholeme. Na ju iko nëba fu egotleme. Na ju bubë weniji mefë egotleme, ‘Jisas.’ ³² Na bu flesu hoha lëgëtabeme. Na bu mefë namogotlame, ‘Tako kalëlegona Gotobë nëba mu.’ Na Goto bume eso home aniji logloleme, bosemle Devit fene tafa tle. ³³ Na bu Jekopbë ilawa mago enënebë eso home unaunalëme lëtabetëme nalëgleme. Na bu eso home iniwa olë metafa lokoukëfeme.”

³⁴ Na Maria enselme gali tlole, “Eu-owe. Bo nëba habëna nëgeholëmene? Bo ho sei hana nëlëlëfe.”

³⁵ Na ensel bubë gali metafu tëtatë, “Gotobë Amtëtomba jume ligisi tëme na kalëlegona Gotobë afutuku jume lamu lëgëtabeme. Këme nëgëme, kë nëba ju tokwafe fu egotlena bu Gotobë lale homu lëgëtabeme. Na bu mefë namogotlame, ‘Gotobë nëba.’

³⁶ Ju aholo bo eta! Binabi Elisabet bu mësetimu kwe bu mata nëba ehole. Onoho megali kë mëtkefëtëyabë, ‘Bu layame eliboo,’ kwe aona yeme neme na bu nëba mana tafa egleme. ³⁷ Goto bu Elisabetme nëba melë lëlë na jume mata nëba lëglëme. Gotome li wesibiha hana lëkle logotleme, bu lalowa iniwa wesibi melë logotomeme.”

³⁸ Na Maria bume gali tlole, “Aholokwane ele. Bo Gotome wege nëgletelëbë mëse. Bu bome melë malëtanë, ju fene gali ele.” Na kwe ensel bume kile tëta.

Maria Elisabetme hwime tujutë

³⁹ Kë nalëwa, Maria bu hokweinawa fatini mëta kë tëgëbebë lifatewa tokwale, Judia provins mëta, Elisabetme hwi naegwelëme. ⁴⁰ Na bu Sekaraiabë lowa tēkaklu na Elisabetme gali tole, “Bo nisiyo.” ⁴¹ Elisabet kë gali aholokwane tolë na nëba imo mago klikinamu metletë. Na Gotobë Amtëtomba Elisabet belë tisi të na buna mëtëtabo. ⁴² Na bu Mariame anisasana gali tolë,

“Goto jume fleflesumu lalëletë na jume tako lëgaitamë lalële kwe fli oneme, melëgaitame hana lële. Na kë nëba jubë imo mëta kë nëgebë, Goto bume mata tako lëgaitale lëgmemu. ⁴³ Bo lalë mëse nane na bobë Tako Hobë bota, bo belë kë egisibë. ⁴⁴ Aholokwane ele! Bo jubë gali meaholokwane noglëna, ‘Bo nisiyo,’ kwe bobë nëba fleflesu lalëlule na klikinamu meleluletenë. ⁴⁵ Ju Gotome melowene sle tletle, ‘Goto kë wesibi jume kë gali toglëbë, melë lëgleme, këme nëgëme ju fleflesu këme egleme.’”

Maria Gotome kë fleflesu tégletlebë sawa

⁴⁶ Maria gali tle,
 “Bobë lowene mago lowenena Gotome fleflesu nëlekefëtelë, na bibita notokweflë, ‘Goto bu lalë mu.’
⁴⁷ Na bo Gotome fleflesu nëletelë. Bu bome lëgaitanë ho, bo tafa sle këme nelë, bu melë lëgëtanëme nëgëme.
⁴⁸ Bo bubë wege mëse, bo lalë mëse nane. Kwe bu bome hwi tlonë na maninibo tletenë. Elina, unina mata, iniwa oneho megali mokoukefëtëname, ‘Goto bume tako fleflesu latletë.’
⁴⁹ Na Tako Afutukuna Goto, bome lalë wesibimume laitanë. Ebë kë nëgebë Goto, tēbo lowene hanane, lalë lowene nawa lëtabe.
⁵⁰ Bubë gali momata jwa kë mogotlabë onehome, Goto bume maninibo lëglekefëtëmemë. Bu itaita melë lotokefëmeme, ebë olëna kë tafa mëglabë onehome na tokwafe fu onehome mata itaita melë lotokwefëmeme.
⁵¹ Goto bubë afutukuna melë totome. Oneho bu melowene mëtlana, ‘Sebo kwe lalë enënefe. Fli enëne bu seboha nane. Weye.’ Na bume fwa fleflesu mëtletëma na bibita mototoma, bu këha enënehe hehë tletëme, na bu mitliwaya.

⁵² Bu kalëlegona eso home boblo totome,

kwe atwati home taitame.

⁵³ Bu foneme gigli mëtlabë onehome, lalë wesibi tlëme na bubë imo sosolo memëtëtaya. Kwe feilawa wesibina onehome hehë tletëme na bu alujawa mitliwaya.

⁵⁴⁻⁵⁵ Bu bubë wege enëne, Israelbë ilawa mago enëneme taitame.

Na bu Abraham name, sebobë semlenino name,

gali kë sle tëtatëmebë gali aholokwana hana ti tle.

Bu bume megali sle tle,

bume na bubë tokwafe fu afenëbome

itaita memaninibo lëkoukefëtëmeme.”

⁵⁶ Maria bu Elisabetna aona yeme mëtëtabo na bubë lifatewa tuju.

Elisabet Jonme fu totle

⁵⁷ Elisabetbë nëba fu olë fata tletë, na bu iko nëba mana fu totle.

⁵⁸ Bubë life mago oneho na weife mago enëne, Goto bume kë maninibo tégletëbë gali aholokwane mëtla na buna iniwa fleflesu mëtlelëya.

⁵⁹ Nëba tobali ita aona olë kënjiji tëtabe, na bu loko mëtlelëya, kë nëbabë ato jibo tlë namëtatlame. Na bu metole lamëtla, bolijaya Sekaraiabë wenijina lëtabeme. ⁶⁰ Kwe bota gali tlome, “Matëbe. Bubë weniji Jon.”

⁶¹ Na bume gali motlëya, “Ju kë weniji fëyeme fë etlene? Jubë afenëbo mago hobë weniji li këha hana lëbe.” ⁶² Na bu kë nëbabë bolijayame tobana lëlekuju mëtletla,

“Weniji habelë fë egotlemene?” ⁶³ Na bu yahi laba mëglëlabëme, tobanawa lëlekuju tletëme. Na bu mëtlëla na bu kë laba mëta meyahi latle, “Bubë weniji Jon.” Na bu kë weniji hwi motlola na klelego memëtla. ⁶⁴ Na Goto Sekaraiabë gali laslewa tëtatile na bu ita mana gali tle na Gotome fleflesu latletle na bibita totle. ⁶⁵ Na bubë life mago oneho kë wesibi hwi motlola na klelego memëtletla. Na kë gali, Judia provinsbë fatini mëta kë tégëbagubë lifatewa fifiji mëtlagula.

66 Na bu kë gali aholokwane motokouja na tako tutune memotokouja na takune mëtla, “Tokwafe kë nëba habëtabo hoha lëgëtabemene?” Bu melowene mëtlame nëgeme, “Gotobë kalëlego bu mëta lëtabetle.”

Sekaraia Gotobë lowene mago gali të totle

67 Gotobë Amtëtomba, kë nëbabë bolijaya, Sekaraia belë tisi tle na buna mëtëtabo. Na bu Gotobë lowene mago gali metë totle,

68 “Sebo Israelbë Gotome fleflesu manëletla na bibita manotla. Bu seme, bubë onehome, lëgaitana nalëgleme tisi tëna, na seme nëno nalëgleme tisi tëna.

69 Goto, bubë wege ho Devitbë afenëbo mago, kalëlegona ho seme jine tlëtëna, seme lëgaitana nalëgleme, na nëno nalëgleme.

70 Ètani anebomu, Goto bu kë galime gali sle latlona. Na bubë lowene mago gali të mototokweflabë ho, bu kë gali sle toglomebë gali të mototla.

71 Bu wagali sle tle, seme lëgaitana nalëgleme. Na seme kë wame moglonabë enëne magome na gëglë kë moglonabë enëne magome nëno lëgleme, bu seme tëbo hana mëgëtaname.

72 Bu ëbaimë sebobë semleninome megali sle latlome, ‘Bo some maninibo nëgletëyome na nëgaitome.’ Na bume kë gali sle toglomebë gali,

73 Bu sebobë semle Abrahamme gali wasle tëtatile. Na ebë olë, Goto bu metole lalëletëna, kë wesibi seme mefata lëgletëname, bu ètani fene gali sle tle.

74 Bu metole lalële, bu seme kë wame moglonabë enënebë magome nëno lëgleme.

Na sebo Gotome esogo sle nanëglelëame na wame home uli jwa nanëletëmame.

75 Këme nëgeme, sebo ebë life mëta mana nëtabyame, sebo bubë li mëta lalë lowene mëta natafa nëglame.

Na sebobë lowene mëta bubë lalë lowenewamulëbetëname.

76 Na ju, bobë nëba, tokwafe jume mefë mëgëtome, ‘Tako kalëlegona Gotobë lowene mago gali të totokweflabë ho.’ Ju Gotobë kalëlegona hobëme eoutatleme na bubë alëge fu naegetatleme.

77-78 Ju Gotobë onehome okokwe na bu melowene namëglame, ‘Goto bume tako maninibo lalëletëme, na bubë tëbo lowene sle nalëtatëmeme na bume laitameme.’ Na bu heven life mago elulego seme lëglëname.

79 Na oneho bu tëbo lowene mëta kë tafa mëglabë, kë elulego bume lalë lowene olafa lëtatëmeme. Bu lalë tafa lowene seme olafa lëtatëname na sebobë lowene lalowa nalëbetëname.”

80 Tokwafe, Jon, sigli lëleme na bubë lowene lalëmu lëbetleme. Bu ho jwa tabo elë lutabeme. Bu lutabebë na mana Israelbë afenëbobë naba li mëta, bubë wege mana fa lotleme.

2

Maria Jisame fu totle

1 Elisabet bu Jonme wafu totle, na kë nalëwa, Rom lifate mago eso ho Ogastus, bu kë tafa lëglelëmebë onehome tabëi mëglabëme wasle totle. 2 Gavman ëbame onehome hana tabëi tle. Ebënawa tabëi lëgleme.

Na kë nalëwa, Kwirinius bu Siria provins magobë eso ho tëtabetëme.

3 Këme nëgeme iniwa oneho bubë lifekuwa këme mitliwaya, Gavman bubë weniji gogwa nalëgletëmeme.

4 Na Josep Mariana Galili provinsbë

tokwëfo lifeku Nasaret kile mëtelo na Judia provinsbë tokwëfo lifeku Betlehemwa mitimo, bubë bosemlebë life nêgeme. Josepbë bosemlebë weniji Devit, Israelbë ëtanifu eso ho. ⁵ Na bume sei lëglëbëme, kë aniji mototlabë Mariana mitimo, weniji bubëna iniwa sle namogotometëmame. Na kwe Maria nëba imona. ⁶⁻⁷ Betlehem lifewa fwa mutulo. Na kë lifeku mago ni lobë ke mëtlame nêgeme na bulmakaubë ni lo mëta këme ni mëtebo. Na bu kë lo mëta mana mëtëtabo na Maria amlebo mana fale tëta. Na bu abwa nëba mana fu totle. Na ëhona lei totle na bulmakaubë hi wesibi iseku mëta tuku tle.

Gotobë ensel, sipsip kleli kë mëglëmabë home gali mëtehitëma

⁸ Na kwe Betlehem life li mëta, sipsip kleli mëtlëmabë ho mana tafa mëtla. Na bu klabëna bubë sipsip kleli këme mëtlëkefëma. ⁹ Mëtlëmabëë, na Gotobë ensel fata tletëme na Gotobë elulego kljiha sisigli tëtagule na bume hwagënë totome. Na bu tako ulimu memëtla. ¹⁰ Kwe Gotobë ensel gali tlome, “Sobo uli asa elo. Aholokwane elo! Bo some lale galimu nehitëyo. Iniwa oneho bu ebë lale gali aholokwane mëglana, kwe bu tako fleflesu mëglame. ¹¹ Ebë gali melë lëgëbelalële, ebë olëna, Devitbë lifeku mëta, mëse li nëba fu etle. Kë nëba bu some lëgaito nalëgleme, tëbo lowene mago nëno nalëgleme. Bu tako ho, na Goto bume wafi aniji tole, onehome lëgaitame nalëgleme, tëbo lowene mago nëno nalëgleme. ¹² Sobo mehwi eglolome. Èhona leitabo nëba bulmakaubë hi wesibi iseku mëta ni lëbe.”

¹³ Ensel wagali tlome na feilawa ensel lafatawa mëtletëme. Na bu Gotome fleflesu mëtletla na bibita mototla, na Gotobë sawa mefë lamëtëtatla, ¹⁴ “Goto bu heven life mëta kë tafa lëglebë bu lale na tako mu. Oneho Goto kë fleflesu lëgletëmebë, bubë lowene lëgëbetëme sle malëletëme.”

Sipsip kleli kë mëtlëmabë ho, Jisasme hwime mutujutla

¹⁵ Na kwe ensel bume hune mototoma na heven lifewa motokwala.

Na sipsip kleli kë mëtlëmabë ho mana gali mëtla, “Te, mana manuja, Betlehem lifekuwa. Goto seme kë gali toglonabë wesibi hwi nanugujelëlame.” ¹⁶ Na bu hokweinawa mutuja. Na bume hohwi mëtëtagutla. Na Josep na Maria name mana hwi motloma. Na bulmakaubë hi wesibi iseku mëta kë ni tëgëbebë nëbame mata hwi motlola. ¹⁷ Bu hwi motlola na bu ensel kë gali toglobebë gali të mëtëtatëma. ¹⁸ Na iniwa oneho, bu sipsip kleli kë mëglëmabë hobë gali aholokwane motloma, na klelego memëtla. ¹⁹ Kwe Maria kë wesibi aholokwana hana ti tle na itaita lowene tlekefëtla. ²⁰ Na sipsip kleli kë mëtlëmabë ho, kë aholokwane mëtlabë gali na kë hwi motlomabë wesibime Gotome fleflesu motokoutla. Iniwa wesibi melë mëtleme nêgeme, Gotobë ensel fene gali tlome.

Bu kë nëbabë weniji mefë mototla, “Jisas”

²¹ Tobali ita aona olë tëtabe na bubë ato jibo mana tlë mëtëtatla, na bubë weniji mana fë mototla, “Jisas.” Maria kë nëba tehole jwa nêgena kwe Gotobë ensel këbë wenijibëme mana gali tolë.

Simeonna Anana Jisasme tako lotu lo mëta hwi mëtelujelëlo

²² Na kë olë fotokoke tëme, Josep Mariame Jerusalem lifatewa tleouli, toba mago sasu ko, Gotobë naba li mëta sle naegotomeme, Mosesbë gali fene tëbetle. Mëse bu nëba tafa eglana, toba sasu kowa egehona, kwe Gotobë naba li mëta tëbo lalëta. Na kwe bu nëba Jerusalem lifatewa mëtlelulo, Gotome mëglëlo namëgelome. ²³ Tlemalë bu metole lamëtelo, Gotobë gali kë lëgëbebë, kë galiwa esogo mëtlelëtelo. Kë gali melë lëgëbelalële, “Sobo abwa mago iko nëba kë nêgebë, Gotome eglëlome.” ²⁴ Na Gotobë tafa sle gali mata melë lëgëbetlelalële, “Sobo tèle seuneni o tèle yolime nëbale, Gotome egehotelome, Gotobë naba li mëta, toba mago sasu ko këna sle naegotomeme.” Na bu fole këme

mëtehoujo, lotu lome wege lëglebë ho, kë fole Gotome ahøjume nalëgletleme.

²⁵ Na kë nalë, ho li Jerusalem lifate mëta tètabe. Bubë weniji Simeon. Kë ho kë nëgebë bu lale lowenewa esogo tlelële na bu Gotome fwa lowene slemu tletle. Na Gotobë Amtëtomba bu mëta telutabetle. Simeon bu Goto kë jine lëglelebë hobëme hwi tletle. Israelbë ilawa mago onehome lëgaitame nalëgleme. ²⁶ Gotobë Amtëtomba bume megali sle latlole, “Ju ilawa hana gli egleme. Ètani Goto bu megali slemu latle, ‘Bo ho jine nëglëlëme, onehome tëbo lowene mago nëno lëgleme.’ Ju kë home afina hwi eloleme na ju mana gli elëme.”

²⁷ Na kwe Gotobë Amtëtomba Simeonme tisi tle na bu Gotobë tako lotu lowa këme təkaklu. Na Jisabë botana bolijaya name, Jisame Gotobë lowa mëtlelulo, kë nëbame melë namogotlame, Gotobë gali fene lëbetle. ²⁸ Na Simeon kë nëbame hwi tlole na fa tole. Na bu Gotome feflesu tletle na bibita tole na megali tle,

²⁹ “Tako ho, jubë gali sle gali watëbetë, na bo, jubë wege ho, bo maninibona wasle nelë, bo mana lalowa gli nelë.

³⁰ Seme nëno lëglebë home, ju kë jine tëglëlebë ho, bo nabana wahwi nololë.

³¹ Ju kë home, iniwa onehome ekë lebotane etatëme.

³² Na kliji elulegoha, bu Gotobë lowene, Israelbë afenëboni mëtabëya jwa mëglabë enëneme olafa lëgëtatëmeme. Na bu Israelbë afenëbome, lëgaitame nalëgleme jubë lowene esogo mëglëlëlabë. Kë oneho ebë jubë.”

³³ Jisabë botana, bolijayana, Simeon nëbame kë gali toglolebë gali aholokwane mëtelo na klelego memëtletelo. ³⁴ Na Simeon Gotome gëgali tlelële, bume lëgaitame nalëgleme. Na bu kë nëbabë bota, Mariame, gali tolë, “Aholokwane ele! Goto ebë nëbame meaniji latlole,

Israelbë lebutako afenëbome melë logotomeme. Lebutako oneho bume kë lowene sle mëgletlabë lowene, kile mlame na lebutako oneho bume kë lowene mëgletlabë lowene esogo sle meletlame. Ebë nëba kë nëgebëye, Gotobë lale lowene, onehome lebotane lëtatëmebë ho. Kwe feilawa oneho bume tëbo gali moglolame, ³⁵ na bubë lowene mago tëbo lowenebë olafa lëgletëmeme. Na tokwafe ju tako hobota egleme, sëfa yo sle eglëbë fenene.”

³⁶ Na Gotobë lowene mago gali të egotlebë mëse li kë mëta tafa tle. Bubë weniji Ana. Bu Aserbë afenëbo magobë mëse, Fenuelbë nëba. Ètani bu ho sei tlële na bu kë hona to-bali ita tële tlibutu këniji tafa mëtelo ³⁷ na bohe mana gli tletë. Na bu seiju tètabe. Na ëje bu 84 tlibutu këniji etabe. Bu Gotobë tako lotu lo kile hana tletle. Bu hi wesibi itaita yo tlekëfe, Gotome lowene sle naegletleme. Na bu Gotome mana gëgali tlelëkefle. Kliji, klabëna Gotome fwa lowene tlekefëtle. ³⁸ Na kë nalë, Ana bu nëba loliwa tisi tle na Gotome mana gali tlole, “Ebë nëba, yaha fëyeme enënane.” Na feilawa oneho bu mehwi kë mëtlekefëyabë, Goto bu Jerusalem lifate mago onehome nëno lëgleme. Na bu kë nëbabë gali kë onehome të tëtatëme.

Josep, nona, Jisana, Nasaret lifewa ita mutuja

³⁹ Bu iniwa wesibi, Gotobë gali fene tëbe, melë wamototoma. Na kwe bu Galili provinsbë tokwëfo lifeku Nasaret lifekuwa ita mutuja. Ebë bubë life. ⁴⁰ Na kë nëba sigli lëleme na lolokwëne lëgleme. Na lale lowene bubë lowene mëta lëbetleme na Goto bume tako tole lëletleme na bume laitaleme.

Jisas, falake tokwëfo nëgena, na botana bolijayana tako lotu lowa bume iniwa mëtlelulo

⁴¹ Iniwa tlibutuna, Jisas bolijayana, botana, Jerusalem lifatewa itaita lamëtëyeoukefo, Gotobë tako lotu olë lowene mëtletelome nëgeme. Israelbë ilawa mago oneho, bu kë tako

lotu olë, Goto ëtani bosemnime kë tégaitamebë olë na Isip lifate këna kile mëtëglabë olë, lowene mëtkefëtla. ⁴² Jisas bu we ita tële tlibutu kënjiji watle. Na kwe bu Jerusalem lifatewa ita mutuja bu ëbame fene mutujukefëya, Gotobë tako lotu olë lowene mëgletlame nëgeme. ⁴³ Kë tako lotu olë yawe motlola, na kwe bu Jerusalem lifate kile mëtla na bubë lifekuwa mutuja. Kwe falake tokwëfo Jisas, Jerusalem lifate mëta mana tafa tle. Botana bolijayana melowene hana mëtletelo, “Jisas mana tafa lële.” ⁴⁴ Weye, bu meweniji lamëtelo, fli enënena mana asë melawa. Këme nëgeme olë jowa buwa mëtëyeu. Tokwafe, bubë ilawa mago onehome na bubë yabe home, tëtakune mëttagumo. ⁴⁵ Bu yafe tëtakune mëttagumo, kwe hana hwi motlolo. Këme nëgeme bu lu mëtelo na Jerusalem lifatewa ita mëtëyeu, hohwi namogutatelome. ⁴⁶ Bume aona olë yafe hohwi mëtëtatelo. Na tokwafe bume tako lotu lo mëta hwi motlolo. Bu Gotobë gali okokwe moglomabë hobë ku mëta tafa tletëme. Na bubë gali mana aholokwane tlagukefëme na bume tëtakune tlokefëme. ⁴⁷ Iniwa oneho, bubë lowene yafe hwi motlotla na bubë tafu gali yafe aholokwane motlotla, klelegomu memëtletla. ⁴⁸ Botana bolijayana hwi motlolo, na klelego memëtletelo. Na bota bume gali tle, “O hëyai, ju seme melë fëyeme etanone? Sebo blijayana jume yafe hohwi nëtatëyo na maninibona tëbo menëletëyo.” ⁴⁹ Kwe bubë gali tafu tëtatëme, “Sobo bome fëyeme hohwi etatenone? Sobobome melowene hana eletëname, ‘Bo bobë ayabë lo mëta tafa manelë?’” ⁵⁰ Kwe bubë gali lowene hana mëtletelo bu yaya lamëtletelo.

⁵¹ Na kwe buna Nasaret lifewa ita mutuja. Na bubë lowenewa esogo esogo tlelëkefëtëme. Kwe Maria bowene meta kë hwi toglometlebë wesibi, bubë lowene mëta mana tehotle. ⁵² Na Jisas sigli tle na bubë

lowene lalemu lëbetleme. Na Goto bume fleflesu lëletleme na iniwa oneho mata bume tole mëgletlame.

3

Tu mëta baptais logotomebë ho, Jon, gali të tëtatëme

¹ Eso ho Taiberius, bu we ita tobali tlibutu kënjiji, Rom life enënebë tako eso home tafa tletëme. Kë nalëwa, Pontius Pailat Judia provins enënebë eso home tafa tletëme. Na Herot Galili provins enënebë eso home tafa tletëme. Na bolijamo Filip bu Ituria na Trakonitis provins enënebë eso home tafa tletëme. Na Lisantias, bu Abilene provins enënebë eso home tafa tletëme. ² Na Anas na Kaiafas bu lotu lo mëta wege mëglabë enënebë eso ho mëtëtabo. Kë nalëwa, Sekaraia bowene Jon, ho jwa tabo mëta tafa tle na Gotobë gali bubë lowene mëta mana fata tletle. ³ Këme nëgeme, Jon bu Jordan tu lime kë tafa mëtlabë lifekuwa tuju na gali metë tëttagutëme, “Sobo tëbo lowene aholokwana ti elome na lalë lowenewa esogo elelëlome na baptais elome. Na Goto bu sobobë tëbo lowene aholokwana ti lëgletëyome na hana lëgeholeme.” ⁴ Kë wesibi mefata latle, Gotobë lowene mago gali të totokweflebë ho, Aisaia, fene yahi tle. Bu meyahi latle, “Tokwafe, li ho, ho jwa tabo mëta mewe lëgleme, ‘Sobo tako hobë alëge fu etatelo, alëge sle etometelo. ⁵ Bu iniwa klukulego tabobë na iniwa fofu tabobë sle motomame. Na iniwa alëge, ekekë mëglebë sasle mëtaguma. Na iniwa alëge tëbo mëglebë, sasle motoma. ⁶ Na iniwa oneho, Goto onehome kë nëno lëglebë wege hwi moglotlame.” ⁷ Feilawa oneho Jon belë mitisitla, bume baptais nalogotomeme. Kwe Jon bume gali tleme, “Sobo tëbo taijuha. Sobotëbo enëne. Goto tako wame loglëyome na tëbo lëgëtome. Sobomelowene lalone hee! Bosome baptais nëgëtona kwe Gotobë wame some hana tëbo lëgëtomene? Weyewa. ⁸ Sobotëbo lowene aholokwana ti egelona na Gotobë lalë lowenewa

esogo eglelëlona, ta kë lowene saolafa etlo, bu melowene namëgletëyome, 'Bubë tēbo lowene aholokwana wati mēlafa na Gotobē lale lowenewa esogo melelēlafa.' Na sobolalo megēgali asa elo, 'Sebo Abrahambē afenēbo, këme nēgeme Goto bu seme hana tēbo lēgētaname.' Weye. Bo some gali nolēyo, Abrahambē afenēbo ebē tokwēfo wesibi. Goto ebē anijime, Abrahambē afenēbome lalewa fata lotomeme.⁹ Gotobē wame bu onehome fata lēgletēmeme nounou lalēletēmemu, yasi ti wayome wafi lēbe. Na iniwa ti, lale liji mogwalē hana mēglana, kwe Goto kë ti tētēka lēgleme na ahojume sike lēleme."

¹⁰ Oneho bu Jonbē gali aholokwane motlola, na bume metakune motlola, "Sebo habelē nēglamene na Goto seme tēbo jwa nalēgētaname?"

¹¹ Na bume megali tlome, "Fli enēne bu gelowa ēho tēle tēle nēgena, bu fli alujawa kë nēgebē enēneme sa mēlēma. Na fli enēne hi wesibina nēgena, bu hi wesibi jwa kë nēgebē enēneme sa mēlēma." ¹² Takis baliti glo mēglabē ho fli, bu belē mitisiya, bume mata baptais nalogotomeme. Na bu takune motlola, "Tisa, sebo habelē nēglamene?" ¹³ Na bume megali tlome, "Sobo takis baliti meglo egletemome, gavman fene gali tlēyo. Sobo fli baliti manawa asa glo eletemo." ¹⁴ Na wame home boblo mogotomabē enēne fli, bu mata takune motlola, "Na sebowa, sebo habelē nēglamene?" Na bume gali metafu tētātēme, "Sobo fli enēneme gēglē asa elelēmō na bubē baliti toklime glo elome. Na sobo fli onehome gavmanbē naba lime blawa asa so etatemo na bubē baliti blawa glo eletemome. Na gavman some wege baliti kë lēglēyobē, këme fwa fleflesu egelome. Fli baliti glome asa tole elo."

¹⁵ Na oneho Jonme hwi motlola, na bubē lowene fotokoke tēme na bubē lowene nawa melowene mēla, "Jon bu kë ho nawa, seme na nēno lēglebē ho nawa. Goto kë aniji toglolebē ho nawa." ¹⁶ Kēme nēgeme Jon bubē gali metafu tētātēme, "Bo some tu mēta

fwa baptais nēlelēyo. Kwe tokwafe bobē nagi ho li ligisime. Na kë ho kë ligisibē bubē afutuku takomu kwe bobē afutuku tokwēfomu. Bo lale ho nane kë ligisi home kë nēgaitalēme, manawa wege ho fene laitale. Weye. Bo bubē jiteho hana titika nēgletelēme. Bu letitabo homu nēgeme na bo atwati homu. Bu some Gotobē Amtētombana, ahojuna baptais lēglelēyome. ¹⁷ Na kë ho kë ligisibē bu tēbo lowenenabē enēneme na lale lowenenabē enēneme lēselokwame, nuju bolijaya hwetikina witi liji mago fene lēselokwa. Na bu lale lowene enēneme heven life elē sei lēlēmeme, nuju bolijaya bu witi liji, lale lo mēta fene gogwa lēle. Kwe bu tēbo lowene enēne lēle jwa ahoju life elēme sike lēgleme, nuju bolijaya witi liji mago hwetiki ahojume fene sike lēle."

¹⁸ Jon bu feilawa gali tē tētātēme, onehobē lowene huju tētātēme, lowene sle namēglame. Na kë esome fwa, Gotobē lale gali këme tē tētātēme.

Herot bu Jonme kalabusu lowa tuku tle

¹⁹ Herot, Galili provinsbē eso ho, bu bolijamobē mēseme, Herodiasme, hijika totle na sei tlē. Na Jon bume këme wame gali tlole. Na iniwa fli tēbo lowene Herot bu kë tēglebēmeha bume wame gali tlokwefle. ²⁰ Na Herot bu li tēbo lowene tle. Bu melēme, Jonme kalabusu lowa tuku tle.

Jon Jisame baptais totle

²¹ Kē nalēwa, Jon kalabusu lome tafa jwa tēglana. Bu iniwa onehome wabaptais totome, na bu Jisame mana baptais totle na Jisas Gotome mana gēgali tlole. Bu Gotome mana gēgali tlelēlebēē, na heven inoha latikawa tle. ²² Na Gotobē Amtētomba seuneni foleha ji tētēketle. Na bu matafa mēta gali tle, "Ju bobē lale nēba. Bo jume tako tole nanēletē, tako fleflesu nanēletē."

Jisasbē bosemle nibē weniji

²³ Jisas bubē aowafewe tlibutu mutuju tle na bubē wege mana fa totle. Na kwe oneho bume meweniji

lamëtletla, Josepbë bowenefe.
²⁴ Josep Helibë bowene. Na Heli Matatbë bowene. Na Matat Livaibë bowene. Na Livai Melkibë bowene. Na Melki Janaibë bowene. Na Janai Josepbë bowene. ²⁵ Na Josep Matatiasbë bowene. Na Matatias Amosbë bowene. Na Amos Nahumbë bowene. Na Nahum Eslibë bowene. Na Esli Nagaibë bowene. ²⁶ Na Nagai Matbë bowene. Na Mat Matatiasbë bowene. Na Matatias Semenbë bowene. Na Semen Josekbë bowene. Na Josek Jodabë bowene. ²⁷ Na Joda Joananbë bowene. Na Joanan Resabë bowene. Na Resa Serubabelbë bowene. Na Serubabel Sealtielbë bowene. Na Sealtiel Neribë bowene. ²⁸ Na Neri Melkibë bowene. Na Melki Adibë bowene. Na Adi Kosambë bowene. Na Kosam Elmadambë bowene. Na Elmadam Erbë bowene. ²⁹ Na Er Josuabë bowene. Na Josua Elieserbë bowene. Na Elieser Jorimbë bowene. Na Jorim Matatbë bowene. Na Matat Livaibë bowene. ³⁰ Na Livai Simeonbë bowene. Na Simeon Judabë bowene. Na Juda Josepbë bowene. Na Josep Jonambë bowene. Na Jonam Eliakimbë bowene. ³¹ Na Eliakim Meleabë bowene. Na Melea Menabë bowene. Na Mena Matatabë bowene. Na Matata Natanbë bowene. Na Natan Devitbë bowene. ³² Na Devit Jesibë bowene. Na Jesi Obetbë bowene. Na Obet Boasbë bowene. Na Boas Salmonbë bowene. Na Salmon Nasonbë bowene. ³³ Na Nason Aminadapbë bowene. Na Aminadap Atminbë bowene. Na Atmin Arnibë bowene. Na Arni Hesronbë bowene. Na Hesron Peresbë bowene. Na Peres Judabë bowene. ³⁴ Na Juda Jekopbë bowene. Na Jekop Aisakbë bowene. Na Aisak Abrahambë bowene. Na Abraham Terabë bowene. Na Tera Nahorbë bowene. ³⁵ Na Nahor Serukbë bowene. Na Seruk Reubë bowene. Na Reu Pelekbë bowene. Na Pelek Eberbë bowene. Na Eber Selabë bowene. ³⁶ Na Sela Kainanbë bowene. Na Kainan Arpaksatbë bowene. Na Arpaksat Siembë bowene. Na Siem Noabë bowene. Na Noa Lamekbë bowene. ³⁷ Na Lamek Metuselabë bowene. Na Metusela Enokbë

bowene. Na Enok Jaretbë bowene. Na Jaret Mahalalelbë bowene. Na Mahalalel Kenanbë bowene. ³⁸ Na Kenan Enosbë bowene. Na Enos Setbë bowene. Na Set Adambë bowene. Na Adam Gotobë bowene.

4

Satan bu Jisasme tëbo loweneme fene susu totle

¹ Gotobë Amtëtomba, Jisas mëta telutabetle na bu Jordan tu mago ita tuju. Na Gotobë Amtëtomba bume ho jwa tabo elë tlelule. ² Na Satan bume niliafewe olë tëbo loweneme fene susu totokwefle.

Na kë nalë, Jisas hi hana tle na bu foneme gli tle. ³ Satan bume gali tlole, “Ju Gotobë nëba nëgebë kwe, ju ebë anijime gali eolëme na bu bletë nageme fata naeglamëme. Na ju hi elëme.” ⁴ Kwe Jisas bume gali tafu tëtatlë, “Gotobë bogo megali lala, ‘Hi wesibiwa, onehome, lale tafame hana lëgaitameme.’”

⁵ Na kwe Satan bume kë mago mana tilekole. Na bume iniwa tatako lifate lalebotanewa totometle. ⁶ Na gali tlole, “Bo jume tako afutukume nëgaitëme, kë iniwa lifatebë onehome eso ho tafa naegletëmeme na ju tako eso home tafa elëme. Na bo kë lifatebë iniwa lale wesibi jume yo noglëme. Kë iniwa lifate na wesibi ebë bobë, bu bome wayo tlonë. Na bo li home yo noglolëbëme tole nëgelëna, kwe bo lalowa yo noglolëme. ⁷ Ju bome sëkefo miti tafa eletenëna na bome megali eglonëna, ‘Ju bobë lale tako eso ho tafa eletenë, bo jume tako tole nanëletë,’ kwe bo kë iniwa lifate na iniwa wesibi jume yo noglëme.” ⁸ Kwe Jisas bume gali tafu tëtatlë, “Gotobë bogo megali lala, ‘Goto buwa jubë eso home tafa lëletë. Ju bume fwa satole eletle na saesogo elelele.’”

⁹ Na Satan Jisasme Jerusalem lifatewa tlelule na tako lotu lo leli elë tilekole. Na bume gali tlole, “Ju Gotobë nëba nëgebë kwe, ju lalowa emagowa okli etëkake na ju tëbo hana eglitame. Hanane mu. ¹⁰ Gotobë bogo megali eglamëme nëgëme, ‘Goto,

bubë enselme jine lëglëmetëme, na bu jume ululu mëgëtome.’ ¹¹ Na bu mata megali lala, ‘Bu jume fa mëgëmalitome bubë tobana, na jume aniji yo hana sle eglëme.’” ¹² Na Jisas bubë gali tafu têtatle, “Gotobë bogo megali lala, ‘Jubë tako Gotobë afutuku asa su etatle.’”

¹³ Satan bu Jisame memelë wesi-bina wasusu têtetëfale, na bume kile totle, li olë nalë ita su nalogtleme.

Jisas bu Gotobë lale gali, Galili provins mago onehome afina të têtatëme

¹⁴ Jisas bu, Gotobë Amtëtombabë afutukuna, Galili provinswa ita tuju. Na Jisas kë tafa tëglebë gali, Galili provinsbë li life li life mago onehome fifiji mëtlagutëma. ¹⁵ Na bu li life li lifebë lotu lo mëta, Gotobë gali onehome okokwe tlagukefëme. Na iniwa oneho bume fleflesu mëtletla na bibita mototla.

Nasaret life mago oneho Jisame enisusu memëtletla

¹⁶ Jisas bu Nasaret lifewa tuju. Ètani bu kë lifeme sigli tle. Na bubë tafawa olëna, bu lotu lowa tëkaklu, bu ëbame fene tlekëfe. Na bu hujuna tlibe, Gotobë gali hwi naloglotëmeme. ¹⁷ Na bogo kë ululu sle logotokwefëmebë ho, Gotobë lowene mago gali të totokweflebë, Aisaiabë bogo, bume tlële. Na bu bogo ya têtamë. Na këme kë galibë hwi tlome, kë gali melë lëgëbelalële, ¹⁸ “Gotobë Amtëtomba bo mëta têtabe, Këme nëgeme, Goto bu bome waaniji tlonë, bubë lale gali, wesibi jwa onehome të nanëgëtatëmeme. Na bu bome këme jine tlënë, kalabusu mëta kë tafa mëglabë onehome megali nanoglomëme, ‘Sobo kalabusu lo lalowa kile elo.’ Na naba titiki tabo onehome megali nanoglomëme, ‘Sobo lalowa hwi elo.’ Na bu bome këme jine tlënë, gëglë kë mëglelëmabë onehome nanëgaitamëme na bubë afowelili sle nanogotometëmeme. ¹⁹ Na bu bome jine tlënë, onehome megali nanoglomëme, ‘Goto, bubë

onehome kë lëgaitamebë olë, ekë folokoketle.’”

²⁰ Na Jisas bogo geni tëta, na bogo kë ululu sle logotokefëmebë home tlële na mana tafa tle. Na iniwa oneho, lotu lo mëta kë tafa mëtelulabë, Jisame fwa wëya mëtlelëla.

²¹ Na kwe bume gali tlome, “Ebë gali, sobo Gotobë bogo mago kë aholokwane egløbë, bu ëje iniyafememu ekë fata lële.”

²² Lale gali të totleme nëgeme na bume këme fleflesu mëtletla na bibita mototla. Na bume kë të têtatëmebë gali mana lowene mëtletla. Kwe, bu megali mëtla, “Bu ebë galime, kë gali loglonabë, habelëme gali lëlene? Bu seme kë gali loglonabëye, kwe Josepbë nëba tekwe nëge.”

²³ Na Jisas bume gali tlome, “Bo walowene sle nëletëyo. Tokwafe sobo kë ètanifu anebo gali bome të egëtatëname, ‘Dokta, jubë ato elili sle egotleme, na ilawa mago hobë ato elili mata sle etome tëmeme.’ Na sobo mata gali egloname, ‘Ju Kaperneam lifeku mëta wesibi melë kë totomebë sebo waaholokwane tletëyo. Na sebo metole nanëla, ju ebë lifekume mata, kë wesibi melë egotomeme.’” ²⁴ Bo some iniyafeme gali nolëyo, bubë life mago oneho, Gotobë lowene mago gali të mototkweflabë hobë gali aholokwaneme, tole hana mëtla. ²⁵ Bo some iniyafeme gali nolëyo, Gotobë lowene mago gali të totokweflebë ho, Elaija mana têtabena, na seiju one feilawa, Israel provins mëta tafa mëtëkouja. Na kë nalë wanagli tako temotëme na aona tlibutu na tobali ita jowa yeme tu hana teto. Na tako fone iniwa lifateme fata tokoutëme. ²⁶ Kwe Goto bu Elaijame Israelbë ilawa mago seiju mëse belë hana jine tletëme. Weye. Bu li ilawa mago seiju mëse belë fwa jine tlëtë, bume lëgaitame nalëgleme. Kë mëse bu Saidon provinsbë tokwëfo lifeku Sarefat mago mëse na bu Israelbë ilawa mago nane. ²⁷ Na kë mata, Gotobë lowene mago gali të totokweflebë ho, Elisa mana têtabena, na feilawa ato juba jubawa

kë mëtëgeholabë oneho, Israel lifate mëta mëtëtabëya. Kwe, Elisa kë mago juba jubawa onehome li hana sle totle. Weye. Bu Siria life mago ho, Namanme fwa sle totle. Naman bu Israelbë afenëbo nane, li afenëbo mago ho.”

²⁸ Na oneho, lotu lo mëta kë tafa mëtelulabë, bu kë gali aholokwane mëtla na melowene mëtla, “Bu seme, Israelbë afenëbome, gali lëlefe” na tako enisusu memëtletla. ²⁹ Na fe mëtëkaka na Jisame fa mototla, na bume lifeku tiniju elëme so mëttagula, fatini mleibu elëme so namëtelëkaklame fene. Bubë lifeku fatini mëta tobetëme. ³⁰ Kwe bu kukuwa lateiwa tëtagwi na latugujuwa.

Jisas ahwane hobë ato mago hehë tletëme

³¹ Na kwe Jisas Galili provinsbë tokwëfo life, Kaperneamwa tëmatule. Na bubë tafawa olëna, onehome Gotobë gali të tëtatëme. ³² Bubë gali aholokwane motlola, na klelego memëtla. Bubë gali flesu hobë galiha nëgeme, kalëlegona tlëme. ³³ Na kë nalë, li ho lotu lo mëta tafa tle na ahwane bubë ato mëta telutabetle. Na bu feilawa aflei tle, ³⁴ “Nasaret life mago Jisas, ju seme habelë egëtaname esine? Ju seme tëbo naegëtaname esine? Bo jume wafi lowene nëletë, ju kë ho kë nëgebë, Goto jume kë jine tëglëbë homu. Ju Gotobë lale homu.”

³⁵ Kwe, Jisas kë ahwaneme anisasana gali tlole, “Ju kaju ebe na ebë home kile etoleme.” Na ahwane kë home life elëme so telëkakle na masana ku mëta titigo. Na kë ahwane, bume li atoha hana tëbo tëtatle na bume kile togotlena. ³⁶ Na iniwa oneho klelego memëtla na blalo gëgali mëtla, “Euowe! Ebë fëye galine? Bubë gali flesu hobë gali fene, kalëlegona tlëme. Bu ahwaneme anisasana gali tlole na bu home lakilewa mototome.” ³⁷ Na iniwa wesibi, Jisas melë kë totomebë, kë galibë, Galili provinsbë li life li life mago onehome fifiji mëtleletëma.

Jisas bu Saimonbë bokokame sle tëta

³⁸ Jisas lotu lo kile tle, na Saimonbë lowa tëkaklu. Saimonbë bokokabë ato, tako ahojute latletë. Na bu Jisame takune motlola, sle nalëgëtame. ³⁹ Na kwe, Jisas bu loliwa tujutë, na kë ahojuteme anisasana gali tlole, bume kile nalëgëtamëme. Na ahojute bume lakilewa tëta na bu lahujuwa tëkake na hi wesibi ahojume tletëme.

Jisas feilawa onehome sle totome

⁴⁰ Atome hwi olë, oneho bubë yabenime, ato elili kë mëtlabë, Jisas belë mëtlesuma. Na bubë toba iniwa ato elili enëneme gogwa tokoutëme na bu iniwa sle tëtagume. ⁴¹ Na bu ahwane hehë tletëme. Na bu feilawa onehome hune mëtëtagume na meafëflei lamëtla, “Ju Gotobë nëbafë.” Kwe Jisas bume anisasana gali tlole, na gëgalime lëkle totome. Kë ahwane bu melowene mëtleme nëgeme, “Bu Goto kë aniji toglolehtë ho, onehome nëno nalëgleme.”

Jisas li life li life asë tëbelëfa

⁴² Olobalë mu, Jisas kë life kile tle na ho jwa tabo elë tuju. Na oneho bume hohwi mëtëtatla na bume mana hwi motlola. Na bume yafe lëkle mototla, bume kile jwa nalogotomeme. ⁴³ Kwe bume gali tlole, “Goto onehobë eso home kë tafa lëgletëmebë lale gali, fli lifateme mata të nëtagutemëme. Goto bome këme jine tlënë.” ⁴⁴ Na bu Judia provinsbë, li life li life measë tëbelëfa na lotu lo mëta gali të tëtagutëme.

5

Jisas mo fafa home gali tlole, na bume nagi mëtlëla

¹ Li olëna, Jisas, Genesaret lake tu helefome tlibe, na feilawa oneho mitisiya na bume lolime loko mëtleletla, Gotobë gali aholokwane namëglame. ² Na Jisas bu lake tu helefo mëta, tèle ihe, hwi tlole. Kë ihe, mo fafa enënebë ihe. Kwe ihe bolijaya enëne bu ihe wahune mëtla na solo swa mototoma. ³ Na Jisas bu Saimonbë

ihe mēta fe tle. Na bu Saimonme gali tlole, “Ju iheme fe elēme na so elēkakēme, helefo tokwēfo kilewa naegotleme.” Na Jisas iheme tafa tle, na mana onehome gali tē tētātēme.

⁴ Bu gali watē tētātēme, na Saimonme mana gali tlole, “Te, ku tako elē yegu ekake na sobo solo sike etēkakome, mo fafa naegelome.” ⁵ Na Saimon gali tlole, “O tako ho, ēje klabē yafe sike sike nēla na olē feti na loko menēlebla, kwe sebo mo liha hana buhe notla. Kwe lalowa, jubē gali esogo nēgletēyome na solo sike nēglame.” ⁶ Na bu melēmētla, na mo feilawa tēkeji bubuhe mētla, na solo ējeha holēye mēleme. ⁷ Kēme nēgeme bubē weife wege ho flime, li ihe mēta kē tafa mēgelobēme, we motlomo, bume mēgaitamo namēgelome. Na bu mitisi temo, na mo, kē tēle ihe mēta sisike mētla. Na ihe mo hobota manogwa, ējeha flu mēleme. ⁸ Na Saimon Pita kēme hwi tlole. Na Jisasbē elebo lime sēkefo bubusu totometle na gali tlole, “O, tako ho, ju bome kile etanē. Bo tēbo homu.” ⁹ Saimon na kē tafa mētlabē ho, kē feilawa mo hwi motloma na klelegomu memētletēma. ¹⁰ Na Saimonbē yabe, Jems na Jon, Sebedibē nēbale, bu mata klelego memētelo. Kwe Jisas Saimonme gali tlole, “Ju tutune asa ele. Eje ju mo fafa ele, kwe tokwafe ju onehome bo belē eglesumetenēme, bome esogo namēglenēname.” ¹¹ Na kwe bu yegu motokouja na yenēba mēta fla mētla na ihe yenēbawa kiki motokwaka na bubē iniwa wesibi kēme hune mētla na Jisasmē nagi mētlēla.

Jisas bu ato juba jubawa kē tēgehlebē home sle totle

¹² Li olēna, Jisas li lifate mēta tafa tle. Na ato juba jubawa kē tēgehlebē ho kē mēta tafa tle. Bu Jisasmē hwi tlole, na bu belē tisi tle na sēkefo miti bubusu totometle na gali tlole, “Tako ho, ju tole eglēna, ju bobē ato lalowa sle etatenēmene na bo Gotobē

naba lime lalowa nanētabēme.” ¹³ Na Jisas toba gwa totatle na gali tlole, “Bo tole nanelē, ju lalowa etabeme.” Na kē juba juba lalujuwa mētletle. Na bu lalowamu tētabe. ¹⁴ Na Jisas bume anisasanamu gali tlole, “Jubē ato lalowa kē lēgēbetēbē, ho lime asa gēgali eelēle. Matēbe. Ju ejume na jubē ato, lotu lome wege lēglebē home lebotane eoutatleme. Na ju bume wesibi ejuwelēleme, Moses fene gali tle. Na bu kē wesibi Gotome lēlēleme. Na iniwa oneho melowene namēgletēyome, ‘Jubē ato lalowa lēbetē.’” ¹⁵ Na iniwa wesibi, Jisas melē kē totomebē, kē gali, li life li life feilawa fifiji mētlagutla. Kēme nēgeme, lebutako onehomu mitisitla, bubē gali aholokwane namoglolame na bubē tēbo sle nalogotometēmeme. ¹⁶ Kwe bu lebutako olē, onehome hune tlekēfe na ho jwa tabo elē, Gotome gēgalime, tuju kefē tle. Na Jisas bubē lowene wahwi tlotēme na kē ato mogowa home gali tlole, “O nēba iko. Bo jubē tēbo aholokwana wafi ti nēletē.”

Jisas ato mogo tabo home sle totle

¹⁷ Li olēna, Jisas onehome gali mana okokwe tlome. Na Farisi ho* na Gotobē galime okokwe moglomabē hona kē mēta tafa mētla. Bu Galili provins mago, na Judia provins mago, na Jerusalem lifate mago, na li life li life mago mitisiya. Na Gotobē afutuku Jisas mēta mana tēbe, na bu onehome kēbē afutukuna sle totome. ¹⁸ Na fli ho, ato mogo tabo home sanēnena mētlesula. Na bume lowa mēglelukakulame yafene, Jisasbē elebo lime gwa namugujetlame fene. ¹⁹ Kwe lebutako oneho lo mēta tafa mēt lame nēgeme, na lo wake tle, na bu loliwa hana mētehila. Kēme nēgeme, bu lo leli elē mētehilikola, na anabali tatē mototaya, na ni labuku mēta kē ni tēgēbebē ato mogo tabo home onehobē ku mēta alabujuwa gwa mētēmalitala, Jisasbē li mēta. ²⁰ Kē enēne melowene mētla, “Jisas ebē

* **5:17** Farisi ho bu Mosesbē gali feilawa esogo mēglelētlabē hobē weniji. Bu metole lamētla, Gotobē naba li mēta lale tafa namēglame. Bu Jisasbē olē mēta tafa mētla.

ato mogowa home lalowa sle logotle-mefe.” Na Jisas bubë lowene wahwi tlotëme na kë ato mogowa home gali tlole, “O yabe. Bo jubë tëbo lowene aholokwana wafi ti nëletë.”²¹ Na Gotobë galime okokwe moglomabë ho fli, na Farisi ho fli bubë gali aholokwane motlola na blalo gëgali mëtla, “Èëë! Bu habëtabo hone, Gotoha kë fata lëglebëye? Bu këha gali fëyeme gali lëlene? Bu tëbo homu. Bu Gotome fëyeme boblo lotlene? Ho kwe hobë tëbo lowene aholokwana hana ti lëgletleme. Hanane mu. Goto bu kwe fëyemene, tëbo lowene aholokwana lalowa ti lëgleme.”²² Na Jisas bubë lowene walowene tletëme. Na bume takune tlome, “Sobo këha lowenena fëyeme lowene elone?”²³ Bo bume megali noglolëna, ‘Bo jubë tëbo aholokwana wati nëletë,’ sobo habë lowene lalone, bo bubë tëbo lowene aholokwana wati nëletelë? Sobo kë wesibi hwi hana elolo. Kwe bo bume megali noglolëna, ‘Ju huju ele, na jubë lowa ejume.’ Na bu huju lëleme, kwe sobo melowene egelome, ‘Bo Gotobë kalëlegona ho, na bo tëbo atona ho lalowa sle nogotlëme. Na bo mata hobë tëbo lowene aholokwana lalowa ti nëgletemëme.’²⁴ Kwe bo metole nanelë, sobo melowene egelome, ‘Bo, Gotobë life mago ho, bo ebë life mëta, kalëlegona homu nëtabë. Na bo tëbo lowene aholokwana lalowa ti nëgelëme.’” Na Jisas ato mogo tabo home hwi tlole na gali tlole, “Bo jume gali nolë, ju huju eleme, na jubë ni labuku glo eleme na jubë lowa ejume.”²⁵ Na kë ho, kë ni tégëbebë, onehobë naba li mëta lahujuwa tle, na këme ni tégëbebë ni labuku glo tle, na Gotome fleflesu tletle na bibita totle na bubë lowa tuju.²⁶ Na iniwa oneho bu klelego memëtla, na Gotome fleflesu mëtletla na bibita mototla. Na megali mëtla, “Èje sebo lale klelegowa wesibi fli hwi noloma.”

Jisas Livaimë gali tlole, “Ju bome nagi enënë”

²⁷ Tokwafe, Jisas tuju, na takis baliti kë glo lëglekefëtëmebë home hwi tlole.

Bu takis lo mëta tafa telule. Bubë weniji Livai. Na Jisas bume gali tlole, “Ju bome nagi enënë.”²⁸ Na Livai huju tle, na iniwa wesibi hune tle, na Jisasmë nagi telëkakle.

²⁹ Na kwe Livai Jisasmë lebutako hi wesibimu bubë lo mëta ahojume tletle. Na lebutako takis baliti kë glo mëglekefëyabë ho na fli ho mata, buna tafa mëtla na hi mëtla.³⁰ Na Gotobë galime okokwe moglomabë ho, na fli Farisi ho, Jisasmë lowene esogo mëglelëtlabë home momata mëtletlëma na megali motloma, “Sobo, takis baliti kë glo mëglekefëyabë ho na fli tëbo lowene kë esogo mëglelëlabë enënenamë fëyeme hihi elelëkefëmone? Bu tëbo enëne mu.”³¹ Na Jisas bubë gali tafu tëtatëme, “Dokta bu tëbo jwa mëglabë home hana sle logotomeme, hanane mu. Ho tëbo mëglabë kwe fëyemene, dokta bume fwa sle logotomeme.”³² Na bo kë fenene. Oneho bu meweniji lamëtla, ‘Sebo, Gotobë naba li mëta, lale enënefe,’ bo këha onehobë lowene sleme nane tisi. Weye. Kwe oneho bu melë lowenena kë tafa mëglabë, ‘Sebo Gotobë naba li mëta tëbo enënefe,’ kwe bo këha onehobë tëbo lowene sleme tisi, bubë tëbo lowene aholokwana ti namëglame na Gotobë lale lowenewa esogo namëglelëlamë.”

Jisas bu hi wesibi kë yo yo mëglabë lowenëbëme gali tle

³³ Na fli ho Jisasmë gali motlola, “Lebutako olë, Jonbë lowene esogo mëglelëtlabë ho bu hi wesibi yo yo mëtlekefëya, Gotome lowene sle namëgletlame na Gotome gëgali mëtletlëkefla. Na Farisibë lowene esogo mëtletlëtëmabë ho, bu mata melamëtla. Kwe jubë lowene esogo mëglelëtëyobë howe, bu kë lale lowene esogo hana mëlëlëla, bu hihi melekefëya.”³⁴ Na Jisas wafle gali tlome, “Ho bu mëse sei lëglëna, na mëse sei lëglëbë hi wesibi salë fata logotlona, na kë ho buna mana tafa mëglana, kwe bu hi wesibi yo mëglamene? Weye. Hanane mu.³⁵ Kwe tokwafe, wame ho bu kë mëse

sei home mëglelulana, na bu bubë yabe hona tafa jwa mëglana, kwe kë olëna bu hi wesibi mana yo mëglame.”

³⁶ Jisas bume wafle galime gali tlome. Bu megali latlome, “Ho li tiho gelowa ëho hana ka logotleme, na kë tiho ëho katabo hëno gelowa ëho mëta hana susu logotleme. Weye. Bu melë lëglena, kwe bu tiho gelowa ëhome tëbo logotleme, na kë tiho ëho ka tabo na hëno gelowa ëhona weife weniyanena hana mëgebome. ³⁷ Na ho li bu tiho wain taba liji tu, ëtanifu mëmë kleli jibona kë blëge blëge mototlabë botolo mëta hana wë logotleme. Bu melë lëglena, na kë tiho wain taba liji tu sëse lëglena, kwe ëtanifu mëmë kleli jibo botolome bule logotleme na wain taba liji tu lifewa owë lëkakeme. ³⁸ Këme nëgeme, ho li bu tiho wain taba liji tu, tiho mëmë kleli jibo botolo mëta wë logotleme na bu hana bule lëgleme. ³⁹ Oneho bu hëno wain taba liji tu wahi mëglabë, kwe bu tiho wain taba liji tu tole hana mletëma. Bu megali lamla, ‘Hëno wain taba liji tu ebë lalowa mu.’”

6

Jisas, tafawa olëna wege jwa mëgla galibëme gali tlome

¹ Jisas tafawa olëna, witi liji nuju kukuwa bule mëtëtagujaya. Na bubë lowene esogo mëglelëtlabë ho, witi liji tëtälë mëtla, na sosa mototoma, jibo foke namëgletëmeme. Na mana afabo hi mëtla. ² Na Farisi ho fli, bume hwi motloma na këme takune mëtla, “Euowe! Ebë kwe sobo sogëna lalo. Ebë kwe tafawa olë fe. Sobo tafawa olëna, hi wesibi, fëyeme tëtälë elone? Fëyeme wege elone? Moses bu ëtani kë lowenebëme tako hehë latle.” ³ Na Jisas bubë gali tafu tëtätëme, “Sobo, sebobë ëtanifu eso ho, Devitbë gali, Gotobë bogo mago, hwi sle hana elolone? Bo melëme gali nolëyo. Ètani Devitna, kë tafa mëtëglabë ho, foneme gigli memëtla. ⁴ Na Devit Gotobë lowa tëkaklu, na bu Gotobë naba li mëta kë gogwa mëtlabë bletë nage glo telule. Kë bletë nage, oneho hana

hihi mëtla, lotu lome wege mëglabë ho, buwa hihi mëtla. Kwe Devit wali hi tle na bume kë tafa tëglelëmebë home wali sa tëtätëme na bu hi mëtla. Sobo kë gali hwi hana elolone? Èëë?” ⁵ Na Jisas bume ita gali tlome, “Kwe bo, Gotobë life mago ho, bo tafawa olëbë tako ho.”

Tafawa olëna, Jisas toba mogo tabo home sle totle

⁶ Li tafawa olëna, Jisas lotu lowa tëkaklu, na onehome gali të tëtätëme. Na tobamu toba mogo tabo ho këme tafa telule. ⁷ Na Gotobë galime okokwe moglomabë ho, na Farisi ho, Jisame mana hwiwa motlola. Bu melëme hwi motlola, bu tafawa olëna, onehome sle logotomemene o hanane? Bu melowene namëglame, “Jisas bu tafawa olëna onehome sle logotomena, kwe bume onehobë gali aholokwane moglomabë letitabo hobë naba li elëme mëglelula namëglame, bume tëbo namogotlame. Bu tafawa olëna wege lëgleme nëgeme.” ⁸ Kwe Jisas bubë lowene walowene tletëme. Këme nëgeme, kë toba mogo tabo home gali tlome, “Ju bo belë esime na emëta elikakime.” Na kë ho bu belë tuju tle na bubë lime tlibetle. ⁹ Na Jisas bume takune tlome, “Sebobë semle Mosesbë gali habelë lëgëbetle lalëlene? Sebo tafawa olëna lalë lowene lalowa esogo nëglelëlamene o tëbo lowene esogo nëglelëlamene? Sebo onehome lalowa nëgaitamamene, bu lalë tafa namëglame o tëbo nogotomame?” Kwe bubë gali tafu hana mëtëtatla. ¹⁰ Na Jisas bume hwi tlagume, na kë home gali tlome, “Jubë toba elili etokwakle.” Na bu melë totle, na bubë toba lalowa tëbetle. ¹¹ Kwe Gotobë galime okokwe moglomabë ho, na Farisi ho, bu tako enisusu memëtletla, na blalo gëgali mëtla, “Euowe, Sebo Jisame habelë nogotlamene?”

Jisas bu we ita tëlë home aniji tlome

¹² Na kë nalëwa, Jisas fatiniwa tokwale, Gotome gëgali nalëglelëleme. Na bu klabë tako, Gotome gëgali tëgemaitalebëë na mana feti na loko

metleble. ¹³ Kliji fe tole, na bubë lowene esogo mëglelëtlabë home gali telokwakëme, bu belë migisitla namëglame. Na bu belë mitisitla. Na bu we ita tële home aniji tlome, na Aposel* wenijina fëfë totome. ¹⁴ Bu Saimonme aniji tlole. Na Jisas bume li tiho weniji fë tole, “Pita.” Na bu Saimonbë bolijamo, Andrume mata aniji tlole. Na bu Jems, Jon, Filip, Bartolomyu, ¹⁵ Matyu, Tomas, Alfusbë bowene Jems, Saimon name aniji tlome. Saimon bu Selot ho.† ¹⁶ Na bu Jemsbë bowene Judas name aniji tlome. Na Judas Iskariot name mata aniji tlome. Judas Iskariot bu Jisame wamehome kë yo toglomebë ho.

Jisas lebutako onehome sle totome

¹⁷ Jisas, bu kë aniji toglomebë ho name, fatini mago kle mëtëmalitaya. Na buna fli lowene esogo mëglelëtlabë hona, lale tabo mëta tlebime. Na feilawa oneho, Judia provinsbë li life li life mago, na Jerusalem lifate mago, na Tair na Saidon nutu helefo li mago, bu mata kë mëta mëtëtabëya. ¹⁸ Bu këme loko mëtletëla, Jisasbë gali aholokwane namoglolame na bubë tëbo sle nalogotometëmeme. Na ahwane kë tëbo mototomebë onehome, sle totome. ¹⁹ Na iniwa oneho bume yafe lu mototla. Tako afutuku bu mëta tëgëbetleme nëgeme, na kë afutuku bume laslewa totome.

Atwati enëne fleflesu matla

²⁰ Jisas swaya tletëme na bubë lowene esogo mëglelëtlabë home hwi tlagume na këme gali tlome, “Sobo tëlewa wesibina enëne, kwe fleflesu egelome. Sobo Gotobë oneho etabetelo, na Goto bu some eso home tafa lëletëyo.

²¹ Sobo fonoba kë tafa egelobë enëne, kwe fleflesu egelome. Tokwafe sobo hi wesibina memelë wesibina matahëna fe egelome.

Sobo ye kë eglekefobë enëne, kwe fleflesu egelome. Tokwafe sobo soso egelome.

²² Sobo bome, Gotobë life mago home, esogo eglenëname nëgeme, bu some tëboijiwa këme mëglëyome, na këme hehë mletëyome na këme klëi galina gali moglëyome na këme sobobë weniji sisile mogotometëyome. Oneho bu some këha melë mëgëtona, kwe sobo fleflesu egletemome. ²³ Sobo fleflesu elome na tëtane ebome. Tokwafe, Goto some heven life mëta feilawa wesibi lëglëyome. Ètani bubë bosemnenino, bu Gotobë lowene mago gali të mototokweflabë home mata melamototokwefëma.

²⁴ Kwe sobo feilawa balitina enëne. Sobo hai! Sobo, sobobë lale wesibi wafi glo elo na sobobë lale tafa wafi fa etlo. Sobo tokwafe naba lalawa egotome.

²⁵ Sobo hi wesibi mëta kë egemulubë na imo feilawa kë tëtafu egotomobë enëne. Sobo hai! Kwe tokwafe sobo fone egelome na naba lalawa etome.

Sobo sostonawa kë egëtabobë enëne. Sobo hai! Tokwafe sobo ye egelome. Na naba lalawa etome. ²⁶ Na iniwa oneho some fleflesu mëgletëyona na bibita mëgëtona. Sobo hai! Ètani bubë bosemnenino bu Gotobë lowene mago gali të mototokwefëmabë sosogëna enëneme kë fene melë lamototoma.”

Some kë wame moglëyobë enëneme tole sle egletemome

²⁷ Jisas ita gali tlome, “Sobo bobë gali kë aholokwane egletë nabë enëneme gali nolëyo, some kë wame moglëyobë enëneme tole sle egletemome. Na ho some gëglë mëglëyona, sobo bume tole sle egletemome na maninibo egletemome. ²⁸ Fli ho some hana mëglëyona, sobo Gotome gali elëlome, bume lëgaitame nalëgleme na bume lale wesibi lëglëme nalëgleme. Some kë gëglë mëglëyobë enëneme,

* **6:13** Aposel weniji ebë Jisasbë wege kë fa nogotlabë enënebë weniji. Jisas, Gotobë gali tëme kë jine tëglëmebë enënebë weniji. † **6:15** Selot enëne bu metole lamla, li life mago ho bu seme eso home asa tafa malëletëna.

Gotome gali elélome, bume maninibo nalëgletëmeme. ²⁹ Na ho jume ahino elë bu lëglena, kwe bu malële, ju bume kofaya asa tëke elole. Weye. Ju jelë ahino elë obwelë etatleme, bu jubë jelë ahino elë mata bu nalëgleme. Na ho jubë gelowa ëho li fa logotlena kwe fa malotle, na kwe li gelowa ëho mata elëleme. ³⁰ Ho fli jume wesibime takune mëglëyona, ju bume eglëmewa egleme. Na ho jubë wesibi fa logotlena, ita lëgleme asa takune elole. ³¹ Iniwa wesibi sobo fenene tole eletemo, some melë lamëto, sobo kë wesibiwa bume melë egotomome.

³² Ho some kë tole mëgletëyobëme fwa tole egletemona, kwe ho sobobë lakaleme habëna lowene mëgletëyomene? Tëbo lakalena enëne mata bume kë tole mëgletëmabë enëneme, bu tole lamëletëma. ³³ Ho some kë mëgaitobë, sobo bume fwa egaitamona, kwe ho sobobë lakaleme habë lowene mëgletëyomene? Tëbo lakalena enëne mata, bume kë mëgaitamabë enëneme memaitama. ³⁴ Sobo melowene egelona, 'Bu sobobë baliti seme kofayame lalowa mëglënamefe.' Na sobo bume fwa baliti esokwaneme eglëmona, kwe ho sobobë lakaleme habëna lowene mëgletëyomene? Tëbo lowene enëne bu fli tëbo lowene enëneme baliti esokwaneme memelë melëma. Bu melowene mëgletëmame nëgëme, 'Kofaya seme mata mëglënamefe.' ³⁵ Kwe sobo, sobobë wame home tole eletemome na lale lowenenawa yonane elelëmome. Sobo bume baliti elëmome, na melowene asa elo, 'Bu seme tokwafe ita mëglëname.' Weye. Sobo melë lalowa, kwe tokwafe sobo lale wesibi fa egotlome, na sobo tako kalëlegona Gotobë nëbale egëtabome. Gotome fleflesu jwa mëglekefëtlabë enëneme, na tëbo enëneme mata, Goto bume lalowa lëgaitameme. ³⁶ Sobobë heven life mago blijaya, fli enëneme fene maninibo lëletëme, sobo mata melë maninibo egletemome."

Sobo fli enënebë lakale asa hwi eletemo. Matëbe

³⁷ "Sobo fli enënebë lakale asa hwi eletemo na megali asa elomo, 'Bu tëbo enëne.' Sobo melë egelona, kwe kofaya Goto mata sobobë lakale hwi sle lëgletëyome, na megali lëléyome, 'Sobo tëbo enëne.' Sobo fli hobë tëbo lakale aholokwana ti egletemome na lowene asa elekefëtemo. Na Goto sobobë tëbo lakale mata aholokwana ti lëgletëyome na hana lowene lëglekefëtëmeme. ³⁸ Sobo ho lime wesibi elélome na Goto bu mata some kofayame wesibi lëléyome. Bu some feilawa wesibimu lëglëyome. Bu wesibi ëfomemu kale lotomeme, owë mëkaketleme. Na some lëléyome. Sobo wesibi home kënji elëmowe, kwe Goto mata some kënjiwa lëglëyome."

³⁹ Jisas bume wafle galime gali tlome, "Naba titiki tabo ho, li naba titiki tabo home alëge lalowa leb-otane lëgëtagutlemene? Weye. Bu melë mëgelona kwe bu iniwa fulujuwa mitigwëyome. ⁴⁰ Tisa kë okokwe loglolebë nëba bubë tisabë lowene hana sigli lëtatleme. Kwe tokwafe bu tisabë lowene, lowene sle lëletlena, kwe bubë tisabë lowene fene lëbetle, bu këha melë lëgleme.

⁴¹ Ju hwetiki tokwëfo, blijahabë naba mëta kë egëbatlebë, fëyeme hwi elotlene na kwe jubë naba mëta tako ti bule tabo tako kë lëgëbetëbë, lowene jwa fëyeme eletlene? ⁴² Ju tako ti bule tabo tako jubë naba mëta kë lëgëbetëbë hwi hana eglolena kwe ju li afame habë gali eglolomene, 'O afa, bo jubë naba hwetiki tokwëfo, lalowa tufiji nëgëtatëmene?' Weye. Ju sosogëna ho. Tako ti bule tabo, jubë naba mëta kë lëgëbetëbë afina tufiji etokwakleme. Na tokwafe ju hwi sle ekakeme na tokwëfo hwetiki, blijahabë naba mëta kë egëbatlebë, mana lalowa tufiji egëtatleme."

Tëbo ti, tëbo liji mogwalëme

⁴³ Jisas ita wafle gali tle, "Lale ti, tëbo liji hana mogwalëme. Na kë fenene, tëbo ti mata, lale liji hana mogwalëme. ⁴⁴ Ho bu ti liji afina hwi molola na weniji lowene mletla. Ho bu atowai liji, walëléba ti mago hana

tëtlë lëgleme na bu wain taba liji, ikiji taba mago hana tëtlë lëgleme. ⁴⁵ Lale ho bu feilawa lale lowene bubë lowene mëta lëbetle. Këme nêgeme bu lale lowenena këme tafa lële. Kwe tëbo ho bu feilawa tëbo lowene bubë lowene mëta lëbetle këme nêgeme bu tëbo lowenena këme tafa lële. Tëbo lowene bu mëta lëbetlena, kwe tëbo galime gali lële. Kwe lale lowene bu mëta lëbetlena, kwe lale galime gali lële.”

Lale lo gliji ho na tëbo lo gliji ho

⁴⁶ “Sobo bome mefë fëyeme etanane, ‘Sebobë tako ho,’ kwe bobë gali esogo jwa fëyeme elelëtënanane? ⁴⁷ Ho bu bo belë ligisina na bobë gali aholokwane lëglena na esogo lëglelëlena, bo këha hobë lowene some gali noglëyome. ⁴⁸ Kë ho bu lale lo gliji lëglebë ho fenene. Bu life afina kakë yefi lële, na mësëbahihha ti këme lë lëtamë. Na lo kë matawa gliji lole. Na tokwafe haliji tu ligisina na kë lo yafe bëbë logotlena kwe bu hana fli logotleme, bu lale kalëlego lo gliji tēgleme nêgeme. ⁴⁹ Kwe ho bobë gali aholokwane lëglena na esogo hana lëglelëlena, bu tëbo lo gliji lëglebë ho fenene. Bu life hana yefi lëgleme na kalëlego jwa ti lë sle hana lëgētame. Tokwafe haliji tu ligisina na kë lo bëbë logotlena kwe bu lafliwa lotleme na tëbo lëleme.”

7

Jisas bu wame home boblo mogotomabë enënebë eso hobë wege home sle tētate

¹ Jisas onehome gali watë tētātēme na Kaperneam lifewa tuju. ² Na wame home boblo mogotomabë enënebë eso ho kë life mëta tētabe na bubë wege ho jowa. Bu kë wege home tako tolemu latlekefëtletle, kwe bu tako tēbomu latletle na ëjeha gli lëletleme. ³ Na wame home boblo mogotomabë enënebë eso ho Jisas kë tafa tēglebë gali aholokwane tle, na kwe bu Israelbë afenëbonibë letitabo enëne fli, Jisas belë jine tlēme, bume takune namoglolame, bu ligisi nalëgleme na bubë wege home sle

nalëgētateleme. ⁴ Bu Jisas belë mutuju tla na bume anisasana gali motlola, “Kë wame home boblo mogotomabë enënebë eso ho, bu lale homu. Ju lalowa egaitalēmene? ⁵ Bu seme, Israelbë afenëbonime, tole latletëna, na bu sebobë life mago lotu lo gliji tletëna.”

⁶ Na kwe Jisas buna mutuja na loliwa fwa mutula na kë wame home boblo mogotomabë enënebë eso ho, bubë yabe home Jisas belë jine tlēme, bume megali namoglolame, “Tako ho, matëbe, menuju asa këkë ele. Bo lale ho nane, ju bobë lowa kë ekaklime. Weye. Bo tëbo ho. ⁷ Na bo mata, bo lale ho nane, ju belë kë nigisime. Weye. Bo tëbo ho. Kwe, ju galiwa elëme, na bobë wege ho lalowa nalëgetabetenëme. ⁸ Bo ebëha gali këme gali nelë. Fli eso ho bu bome tafa mletëna na bo mata wame home boblo mogotomabë enëneme tafa nēlelēmë. Na bo ho lime megali noglolëna, ‘Ju eiju,’ kwe bu lalugujuwa. Na bo ho lime megali noglolëna, ‘Ju esi,’ kwe bu laligisiwa. Na bobë wege home megali noglolëna, ‘Te, ju wege ele,’ kwe bu lawegewa lële.”

⁹ Jisas kë hobë gali aholokwane tlotle, na klelego metletle, bume tako lowene sle lëgletleme nêgeme. Na bume kë esogo mētletlëlabë onehome swaya tletëme na gali tlome, “Bo some gali nolëyo, bo Israelbë afenëbo ku mëta, këha lowene sle lëgletenëbë home hana hwi nololë. Kë wame home boblo mogotomabë enënebë eso ho bu bome tako lowene sle lëletënë kwe Israelbë afenëbo bu iniwa këha nane, bu bome tokwëfo lowene slewa lamletëna.” ¹⁰ Na kë ho, kë jine tēglëmebë, bu kë eso hobë lowa ita mitisiya, na kë wege home yafe hwi motlola, kwe wasle tle.

Jisas bu seiju mësebë nēba huju tētate

¹¹ Tokwafe, Jisas bu li lifekuwa tuju. Kë lifekubë weniji Nain. Na bubë lowene esogo mëglelëtlabë hona na fli feilawa onehona, bu nani iniwa mutuja. ¹² Na bu kë lifekubë lëgles

ino elëme loliwa fwa mëtëkakija, na bu u mogo kë mëtletëkakilabë home esune mëtëma. Na kë u mogobë bota, nëba jowa na bu seiju tafa ele. Na feilawa oneho kë lifeku mago, bu kë seiju mëseme nani mëtlesujaya. ¹³ Jisas kë mëseme yafe hwi tolë na tako maninibomu metletë na gali tolë, “Asa ye ele.” ¹⁴ Na bu loliwa tuju tle na u mogo kë lëgëbebë sanëne lu totome. Na u mogo kë mëtehilabë ho mana këme fwa mitlija. Na Jisas gali tle, “Falake, bo jume gali nolë, ju mana huju ele.” ¹⁵ Na gli këtëglebë falake, huju tle na tafa tle na mana gëgali tle. Na Jisas botame tlë. ¹⁶ Na iniwa oneho klelego memotokouja na Gotome fleflesu mëtletla na bibita mototla na gali mëtla, “Goto bubë lowene mago gali kë të togotlebë ho tako kalëlegona ekë jine lëletëna. Goto bu wafi lisi tëna, bubë onehome lëgaitame nalëgleme.” ¹⁷ Na Jisas kë nëba kë huju totlebë gali, Judia provinsbë li life li life fifiji mëtlagula na kakë elë mago life mata fifiji mëtlagutla.

Tu mëta kë baptais totokwefëmebë Jon, bubë lowene esogo mëtletëtelobë ho, Jisas belë jine tlëme

¹⁸ Jonbë lowene esogo mëglelëtlabë ho, iniwa wesibi Jisas kë sle totomebë, Jonme gali motlola. ¹⁹ Na Jon bubë lowene esogo mëtletëtelobë home, gali telokwakëme, na bu mitisijo. Na bu kë tlemalë home Jisas belë jine telokwakëme, bume metakune namoglolome, “Goto jine gali kë lëglelebë ho, kë ho ju ekënene, o kwe sebo li home hwi nëgletlamene?” ²⁰ Na kë tlemalë ho, Jisas belë mitisijo. Na bume gali motlola, “Tu mëta, kë baptais totokwefëmebë Jon, seme ju belëme jine lëlebakëno, na bu jume metakune lalolë, ‘Goto jine gali kë lëglelebë ho, kë ho ju ekënene o kwe sebo li home hwi nëgletlamene?’”

²¹ Kë nalëwa, Jisas, bu lebutako onehobë memelë ato elili sle sle totometëme, na onehobë ato mago lebutako ahwane hehë tletëme. Na bu lebutako naba titiki tabo onehome

sle totometëme. ²² Na Jisas Jonbë lowene esogo mëtletëtelobë hobë gali tafu tëtatëme, “Iniwa wesibi sobo kë hwi eglomobë na kë aholokwane egelobë sobo Jonme sagali ejuwelëlo. Naba titiki tabo oneho wahwi mla, na elebo tëbona oneho asë sle mla, na ato juba jubawa kë mëtëbetëmebë oneho, bu lale tafa mla, na aholo titiji tabo oneho bu waaholokwane mla, na gigli kë mëgebëyabë oneho wahuhuju mla, na bu Gotobë lale gali, wesibi jwa enëneme të mëtatëma. ²³ Oneho bome kë lowene sle mëgletë nabë lowene kile jwa mëglana kwe bu fleflesu matla.”

²⁴ Jonbë gali kë mëtehilobë ho wamëtëyeu, na Jisas Jonbë gali onehome megali tlome, “Sobo ëbame ho jwa tabo elë kë tégëyeubë, sobo habëtabo home hwime tēyeune? Sobo li li lowenena home hwime tēyeune, flelu agosaba fene abeiabei lotome? Weyewa. ²⁵ Sobo fēye wesibi hwime tēyeune? Sobo, lale ëho kë gelo togotlebë home hwime tēyeune? Weyewa. Ho bu lale lale ëho ato mëta kë mëgëbetëmebë na lebutako lale wesibi kë mëgëbetëmebë, bu walujume nane tafa mla. Weyewa. Bu tako lifatebë eso hobë lo mëta tatafa mla. ²⁶ Sobo fēye wesibi hwime tēyeune? Gotobë lowene mago gali të totokweflebë home hwime tēyeune? Kwe nëgali fe? Na bo some gali nolëyo, kë Gotobë lowene mago gali kë të togotlebë ho bu lalowa mu, kwe fli Gotobë lowene mago gali kë të mogotlabë ho bu sogë lalowaha. ²⁷ Gotobë bogo, Jonme, megali lalatlë, ‘Aholokwane elo, kwe tokwafe bo ho lime jine nëglëleme, bobë gali të nalëtaguleme. Na bu jume loutatëme. Na bu alëge jume fu nalëgëtagutëme.’ ²⁸ Bo some gali nolëyo, Iniwa oneho bu ëtani kë tafa motokweijabë na ëje mana kë tafa mokouja, bu letitabo hoha kwe Jonye bu tako letitabo homu. Kwe, Goto eso home kë tafa lëgletëmebë oneho mago, li atwati homu kë tëtatabë, bu letitabo homu kwe Jonye bu sogë letitabo ho.”

²⁹ Na iniwa oneho na takis baliti kë glo mëglekefëyabë hona bu kë gali aholokwane mëtla na gali mëtla, “Gotobë lowene ebë lale mu.” Jon bume wafi baptais totomeme nêgeme na bu kë galime këme gali mëtla. ³⁰ Kwe Farisi ho, na Gotobë galime okokwe moglomabë hona bu Jon mëta baptaisme iweniji lamëtla. Këme nêgeme bu, Goto kë lebotane têtatëmebë lale loweneme, tëboijiwa këme molola.

³¹ Na Jisas bu ita gali tlome, “Ebë olëna kë tafa mëglabë oneho bu fëye wesibihane? Bo some wafle galina lëlekuju nëletëyo. ³² Kë oneho bu fli hobë gali tole hana mletëma. Bu nêbale lifeku kume kë salë mëglabë fenene. Bu fli nêbaleme gali melëkakëma, ‘Iniwa wesibi sebo metole kë nêgletëmabë, sobo kë wesibime tole hana eletemo. Sebo some ifeife nëletëyo, sebo sobona sawa nanëglame kwe sobo sawame tëboijiwa lalo. Na sebo maninibo ye nêla kwe sobo tëboijiwa lalo na ye hana elo.” ³³ Na Jisas ita gali tlome, “Jon, onehome kë baptais totomebë ho, bu tisi na bu bletë nage na wain tabo liji tu hana hi tle. Kwe sobo gali telo, ‘Ahwane tëbo bu mëta tafa lële.’ ³⁴ Na bo, Gotobë life mago ho, bo tigisibë na bo hi wesibi hi telë na wain taba liji tu hi telë na sobo gali tlekefo, ‘Sobo hwi elo, bu feilawa hi lëglekefëbë ho na feilawa wain taba liji tu hi lëglekefëbë ho. Na bu takis baliti kë glo mëglekefëyabë hobë yabe na tëbo lowene kë fa motokweflabë hobë yabe.’ ³⁵ Sobo këha gali gali elekefo, kwe oneho bu Gotobë lowene kë fa mogotlabë, bu seme melebotane mëtatëname, Gotobë lowene ebë nêgali mu.”

Mëse li, Jisasbë juba lëkaluwa tuna swa totometle

³⁶ Farisi ho, bubë weniji Saimon, Jisame no tlële, buna hi namëgelome. Na Jisas kë hobë lowa təkaklu na hi labuku mëta tafa tle. ³⁷ Na lisei lisei tēglebë mëse, li kë lifeku mëta tētabe. Kë mëse, gali meaholokwane tle Jisas Farisi hobë lo mëta kë lētabe.

Na bu lale anijina kë blëge blëge mëtëtayabë botolona lëkaluwa tu fa totle. ³⁸ Na bu Jisas kë mëta tafa lëglebë lowa tlelëkakule, na Jisasbë elebo li mëta tlibetle. Na mana ye tle. Bu ye tlebë na nabatu Jisasbë juba mëta tuha tetotë. Na bubë eslehuba heletanënona, Jisasbë juba mago nabatu sosa totometle. Na bubë juba ëfalëbona itaita momotlë tletle na lale lëkaluwa tu juba mëta wë têtatle.

³⁹ Na kë Farisi ho Jisame bubë lowa hime kë notëglëlebë, kë mëse, Jisame kë fa tēgëtatlebë wesibi yafe hwi tole na bubë lowenenawa melowene tle, “Kë ho, Gotobë life mago nêgebë, kwe bu melowene lëgletëme fene, ‘Bu tëbo lakalena mëse.’”

⁴⁰ Jisas bu kë hobë lowene walowene tletle na bume gali tole, “Saimon, bo jume li galime gali nolëme.” Na Saimon bume gali tole, “Tisa, jubë gali të etle.” ⁴¹ Na Jisas gali tle, “Tlemalë ho bu baliti li hobë toba mago esokwaneme glo mëtelo. Li ho bu we lujuafe we baliti esokwaneme këniji glo tle na liye we lujua balitiwa esokwaneme këniji glo tle. ⁴² Kwe tokwafe kë tlemalë ho kofaya baliti mëglëlome fene kwe bu baliti hanane. Na këme nêgeme bu kë tlemalë hobë kofaya baliti glo lëglebë lowene aholokwana ti lëletëmeme na kë balitime ita hana takune loglomeme. Na ju habë lowene lalene, bu mago tlemalë ho ebë kë nêgebë feilawa tole yalë lëgletlemene o sozi tolewa yalë lëgletlemene?”

⁴³ Na Saimon bume gali tafu têtatle, “Bo melowene nanelë, we lujuafe we baliti esokwaneme kë tēglëlebë ho, bume tako tole latletle.” Na Jisas bume gali tole, “Jubë gali nêgali galimu.”

⁴⁴ Na Jisas mëseme swaya tokokwetë na Saimonme gali tole, “Saimon, ju ebë mëse kë eglibebëme hwi hana eolëne? Bo jubë lowa nêkaklina, kwe ju bobë juba tuna swa hana etometenë. Kwe ebë mëse kë nêgebë, bubë nabatuna bobë juba

swa etometenë. Na bubë esolehubana sosa etometenë. ⁴⁵ Na ju bome ëfalëbona sësle hana etanë, kwe ebë mëse bobë juba ëfalëbona sësle etometenë. ⁴⁶ Na ju bobë eso mëta welë tu hana wë etatenë, kwe ebë mëse, bobë juba mëta lëkaluwa tu wë etatenë. ⁴⁷ Këme nëgeme bo jume gali nolë, ebë mëse kë nëgebë, bo bubë feilawa tëbo lowene aholokwana wati nëletë. Këme nëgeme bu bome tako tole këme eletenë. Kwe ho bubë tëbo lowene tokwëfo, na Goto kë tëbo lowene aholokwana wati lëletle kwe bu Gotome tokwëfo tolewa lëletle.” ⁴⁸ Na Jisas kë mëseme gali tolë, “Bo jubë tëbo lowene aholokwana wati nëletë.” ⁴⁹ Na buna masei li mëta kë tafa mëtlabë ho, bu kë gali aholokwane mëtla na blalo mana gëgali mëtla, “Ebë habëtabo hone? Bu sogëna lalële, tëbo lowene aholokwana habëna ti eglemene?” ⁵⁰ Na Jisas kë mëseme gali tolë, “Ju bome lowene sle egletenëme nëgeme, na Goto jubë tëbo lowene aholokwana këme ti lëletë. Jubë lowene wasle nëtatë. Ju fleflesuna eiju.”

8

Jisasna kë mutujabë one

¹ Tokwafe, Jisas li life li life asë tëbelëfa na onehome, Goto onehobë eso home tafa lëgletëmebë, lalë gali të tëttagutëme. Na bubë lowene esogo mëglelëtlabë ho we ita tële, buna mutuja. ² Na fli one mata, ëbame ahwane tëbo bubë ato mago kë hehë tëgletëmebë na tëbo kë sle totometëmebë, buna mutuja. Liye, Makdala life mago Maria. Èbame Jisas, tobali ita tële ahwane tëbo, bubë ato mago hehë tletëme. ³ Na liye Joana na Susana na fli feilawa one mata buna mutuja. Kë one kë nëgebë, bu Jisasna bubë lowene esogo mëglelëtlabë hona, bubë balitina, hi wesibina mëtaitama. Joana ebë Kusabë no. Na Kusa, eso ho Herotbë lo tafa lëlelëkefëtlebë eso ho.

Jisas mewafle gali latlome, “Ho aoba liji nujume sike lëkou”

⁴ Li life li life mago oneho Jisas belë mitisiya. Na feilawa oneho bume loko mëtlelëtla. Na bume wafle gali të tëtatëme, ⁵ “Ho li nujuwa luj, aoba liji sike nalëkoume. Bu aoba liji sike lëkoubëë, na fliye alëgeme mititigo tle. Na oneho jubana fëfe melekefëya na fole jiwa mëtëkekebë lahiwa mële. ⁶ Na fli aoba lijiye anijina flëke mëta mititigo. Na liji hulu mële kwe kë flëke tu jwa nëgeme, na lakokowa mëbe. ⁷ Na fli aoba lijiye, ikiji taba wayo mëta mititigo. Na kë ikiji tabana aoba liji weife hulu mëtle na kë aobame lamuwa mototome. ⁸ Na fli aoba lijiye bu lalë flëke mëtamu mititigo. Na bu hulu mëtle na bubë liji feilawamu motowalë. Bubë liji kënjiji motowalëwagu, we lujuafe we, we lujuafe we.” Jisas kë wafle gali watë tëtatëme na onehome gali tlome, “Ebë gali aholokwane lalo, sobo salowene sle eletelo.”

Jisas bu fëye lowene nane, wafle gali kë të tëtatëmebëye

⁹ Jisasbë lowene esogo mëglelëtlabë ho bume kë wafle gali wayobëme takune motlola. ¹⁰ Na bu këme gali tlome, “Ètani, Goto, onehobë eso home kë tafa lëglelëmebë gali olafa hana tletëme. Kwe ebë olëna bu kë ëho gali some waolafa tëtatëyo. Kwe bo fli onehome wafle galinawa gali tlome. Bo wafle galiwa këme gali tlome, bu mana itaita hwi mëglekefëyana kwe wesibi lowene sle hana mëgletlame. Na bu gali itaita meaholokwane mëglekefëyana kwe gali wayobë lowene hana mëgletlame.”

Jisas bu aoba liji wafle gali wayobë tohwa sle tëtatëme

¹¹ Na Jisas ita gali tlome, “Kë aoba liji wafle gali wayobë melë lëgëbetlëlalële. Aoba lijiye, Gotobë galime lëlekuju ne. ¹² Na aoba liji alëgeme kë mititigobëye, bu Gotobë gali aholokwane mëglabë enëneme lëlekuju ne, kwe Satan ligisiwa lëglebë na kë gali bubë lowene mago lafawa letokwakëtëme. Satan bu melowene lalële, ‘Gotome lowene

sle mëgletlalime na Goto bume nëno lëglelime.’ ¹³ Na aoba liji, anijina life mëta kë mititigobëye, bu ebëha enëneme lëlekuju ne. Bu Gotobë gali aholokwane mla na hokweinawa lowene mletla na fleflesu mletla. Kwe bubë gali bubë lowene mëta lëgëbetëme sle hana lëletëme, olo wesibi fenene tayafo su sle hana motometëme. Këme nëgëme, kë nalëwa këme lowene mletla. Kwe hobota olë yafe fata lëletëme, Gotome aholokwana latiwa mla. ¹⁴ Na aoba liji, ikiji taba wayome kë mititigobëye bu ebëha enëneme lëlekuju ne. Bu Gotobë gali aholokwane mla na lowene mletla, kwe bu ebë life mago hobota wesibime fwa tako lowene lamletëma, na feilawa baliti glo mëglame fwa lowene mla, na bu ebë life mago lale wesibime fwa fleflesu mla. Na kë wesibiwa Gotobë gali lëlamu mëtatle, na bu Gotobë gali lowene sle jwa këme mletla. Bu tëtetabo hi wesibi fenene. ¹⁵ Na aoba liji lale flëke mëta kë mititigobëye bu ebëha enëneme lëlekuju ne. Bu Gotobë gali aholokwane mla, na bu kë gali bubë lowenena kiki motla. Bubë lowenena maninibona lalowa mëbetëmemu. Na bu kë gali aholokwana hana ti mla na bubë lowene li wesibi mëtaha hana soslo lëletëme na bu lale lowene mëta fwa tafa mla.”

Oneho lamo fiji tabo isekuna hana lamu mëgëtayame

¹⁶ Jisas ita gali tle, “Oneho bu lamo fiji mëtayana, na isekuna hana lamu mëgëtayame o ni labuku lokwalëfe mëta hana ëho mëgëtayame. Hanane mu. Bu masei mëta gwa mëtaya. Na oneho lowa mëkaklijana, bubë elulego hwi namoglotëyame. ¹⁷ Na wesibi elulego mëta fene olafa tletëme, iniwa wesibi ëho kë mëglebë, kwe tokwafe Goto olafa lotomeme. Na iniwa wesibi oneho ëho kë motomabë, kë mata, tokwafe Goto olafa lotometëmeme na oneho bu hwi molomame.

¹⁸ Sobo ululu sle saelo, gali aholokwane sle naegelome. Ho bu Gotobë gali lowene sle lalëletlee kwe ita Goto

bume fli lowene lëglëleme. Kwe ho bu Gotobë gali lowene sle hana lëletlee kwe Goto kë hobë tokwëfo lowene ita hijika logotleme na bu kë lowene aholokwana ti lëleme.”

Jisasbë bota na bolijahanino na bolijamonino yalëne

¹⁹ Na kë nalëwa, Jisasbë botana bolijamonina mitisiya, bume hwi namoglolame. Kwe feilawa oneho bume loko mëtleletlame nëgëme na bubë li elë hana mutuju tla. ²⁰ Na bume gali motlola, “Bitana, blijamonina, jume hwime misiya. Bu lo mëglëbo elë ekë milija.” ²¹ Kwe bume gali metafu latëtätëme, “Oneho Gotobë gali aholokwane mëglabë na esogo meletëkefëtlabë, buwa bobë beëninino na keinëbaleninino na afanino.”

Jisas tu name flelu name gali tlome na latliwa mëtëbe

²² Na kë nalëwa, Jisasna bubë lowene esogo mëgleletlabë hona, ihe elë fëfe mëtla. Na megali tlome, “Te, sebo lake tu jelëfo elë mana su manëkaka.” Këme nëgëme bu mutuja. ²³ Ihe tigiwabë na Jisas ni tëbe. Na tako flelu lake tu mëta fata tletëme, na lake tu ihe elë okokli tokoke, na tu tëtäfu lëgleme kofene, tëbo namigitayame kofene. ²⁴ Na bu Jisame ni mago huju mototla na gali motlola, “Tako Ho, huju ele. Sebo tëbo niglitayame ekëyo.” Na bu huju tle na tu susugli name, flelu name kale tlome. Na kwe fleluna tu susuglina latliwa mëtëbe. Na tu mëgelimeha latëgemulewa. ²⁵ Na bubë lowene esogo mëgleletlabë home takune tlome, “Bome lowene sle jwa fëyeme eletëname?” Kwe bu Jisasbë kalëlego hwi motlolame nëgëme na bu ulina tutunena memëtla na blalo gëgali mëtla, “Euowe! Ebë habëtabo hone? Bu galiwa lëglena, na fleluna tuna bubë gali laaholokwanewa molole.”

Jisas ahwane tëbo, hobë ato mago hehë tletëme

²⁶ Jisasna bubë lowene esogo mëgleletlabë hona Galili provins kile mototla na Galili lake tu jelëfo

elë ihena su mëtëkaka na Gerasabë walujuwa fwa mutula. ²⁷⁻²⁹ Jisas ihe kile tle na helefowa fe tokwake, na ahwane kë tetëbo mogotlebë ho bume esune tlële. Kë ho bu feilawa olë, ëhona nane tëtäbekëfe na bu lome fwa nane tatafa tlekëfe. Weyel! Bu matëmatë life mëta fwa tatafa tlekëfe. Olëli olëli ho bume itaita fa mototokwefla na bu senë tabana, toba kabana yafe gëgelo mototokwefëmetla, kwe bu laeluluwa tototokwefëme. Na kë ahwane tëbo bume ho jwa tabo elë memëtlukefle lamëtla. Kë ho Jisame hwi tlole, na tako afëflei metle na bubë elebo lime latitigotlewa. Na Jisas kë ahwaneme megali tlole, “Ju ebë home kile ele.” Na bu anisasana këme afëflei tle, “Jisas ju tako kalëlegona Gotobë nëba mu. Ju bome habelë egëtanëmene? Masiwafe, ju bome asa tëbo etanë.”

³⁰ Na kwe Jisas bume takune tlole, “Jubë weniji fë etlemo.” Bume feilawa ahwane mëtëkaklu tleme nëgeme na bu metafu këme tëtätla, “Bobë weniji feilawa ho.” ³¹ Na kë ahwane Jisame anisasana itaita gali motlokwefla, “Ju seme ahøjuna fuluju elë asa jine enëna. Matëbe.”

³² Na kwe lebutako kleli bu fatini mleibu li mëta monei mëtla. Na ahwane Jisame anisasana gali motlole, “Ju seme kë kleli belë jine elëkakëna, nëkakluja nanëglame.” Na kwe Jisas gali tlome, “Sobo lalowa eyeumo.”

³³ Na ahwane kë home kile mototle na kleli belë mëtëkaklutëme. Na bu fatini mago lake tu elë fëka mëtëmalita na tu mëta lasusugluwa mëtla.

³⁴ Na kleli mëglëmabë ho bu kë wesibi hwi motlola na mëtlëbouja. Na kë gali li life li life të mëtëtagula. ³⁵ Na iniwa oneho mutuja kë wesibi hwi namoglomame. Na bu Jisas belë fwa mutula na ahwane bume kë kile mototlebë home mana hwi motlola. Bu lale ëho wateho na bubë eso hana yaya tletle. Na bu Jisabë elebo lime tafa tletle. Na bu iniwa uli memëtla. ³⁶ Oneho Jisame ahwane kë hehë tëgletëmebëme kë hwi motlolabë, bu

tokwafe kë mitisiyabë onehome kë gali të mëtëtatëma. ³⁷ Na Gerasa lifate li mago life enëne bu kë gali aholokwane mëtla na bu tako uli memëtla na Jisame këme hehë mëtletla, bubë lifeku mago luguju nalëgleme. Na këme nëgeme Jisas ihe mëta fe tle, muguja namëglame fene. ³⁸ Kwe ahwane kë kile mototlebë ho Jisame anisasana takune tlole, “Bona lalowa nëgëyeumene?” Na kwe Jisas bume hehë metletle na këme gali tlole, ³⁹ “Jubë lifekuwa ejumo, na Goto jubë tëbo wesibi kë sle totometëbë gali të eoutatëmeme.” Na kë ho tuju, na kë lifate mago onehome, Jisas bume kë tëgaitalebë gali të tutatëme.

Jisas bu gli këtëglebë nëbame huju tëtamë, na tëbo atona mëseme sle tëtamë

⁴⁰ Na kwe Jisas ihena lake tu jelëfowa ita su mëtëkaka. Na feilawa oneho bume hwi mëtlekefëtla na bume hwi motlola na tako fleflesumu memëtletla. ⁴¹⁻⁴² Na lotu lo hwi loglokweflebë eso ho tisi, bubë weniji Jairus. Jisame hwi tlole, na elebo lime latitigotlewa. Kë hobë nëba gli egleme kofene na bume anisasana këme takune tlole, bubë lowa lëglelule nalëgleme. Kë ho bu jowa nëbawa. Na kë nemosä nëbabë tlibutu tabei këni, we ita tèle.

Na kwe Jisas tuju na feilawa oneho buna gëgeniwa mutuja. ⁴³ Na mëse li kë oneho buna iniwa mutuja. Kë mëse bu we ita tèle tlibutuna ko latëkoukëfe. Ho bubë ato yafe sle mëtëtatëya kwe wino te hanatle.*

⁴⁴ Kë mëse Jisabë leluju elëme tuju tle. Na bubë heletabo ëho mëta tobana lu totle na ko kë tëglebë latewa tle. ⁴⁵ Na Jisas gali tle, “Bome ya lu lëtanëne?” Na iniwa oneho bume gali motlola, “Sebo kwe hanane.” Na Pita bume gali tlole, “Tako Ho, ju hwi hana elene, lebutako oneho juna gëgeniwa kë egëyeubë?” ⁴⁶ Kwe Jisas gali tle, “Bo melowene nanelë, ho li bome tobana lu lëtanë. Bo

* **8:43** Fli lowene ho bu melowene lamëtla, li gali mana lëbe kë gali mëta. Kë gali melë lëgëbelälële, “Bu lili dokta belë yafe asë tëbelëfa kwe bubë baliti dokta enëneme yawe tlotëme.”

mesu nanelë, bome fli afutuku wakile mētanë.”⁴⁷ Na kë mēse melowene tle, “Bu walowene lēlefe, bo hana ëho nēgelēmefe.” Kēme nēgeme bu lilina metle na tisi tle na Jisasbē elebo lime latitigotlewa. Na iniwa onehobē naba lime gali tle, “Bubē ëho, bo lu nētatelēfe. Melēme nēgeme, bobē ato sle nalēgletenēme. Na bobē ato elili laslewa lēletenē.”⁴⁸ Na Jisas gali tolē, “Mola, ju lowene sle egletenēme nēgeme, jubē ato kēme titika lēletē. Na ju eiju. Tutune asa ele, lalowa tafa eguleme.”

⁴⁹ Jisas mana gēgali tlelëbëë, na ho, lotu lo hwi loglokwe flebë eso hobë lo mago nēba wofu mana fata tlelëkakile. Na Jairusme gali tle, “Jubē nēba wagli elo. Ju tisame ita sosalë asa etle. Matëbe.”⁵⁰ Jisas kë gali aholokwane tle na Jairusme gali tle, “Ju tutune asa ele, bome fwa lowene sle egletenēme na jubē nēba lalowa egētabetēme.”⁵¹ Na Jisas Jairusbē lowa taju. Na bu onehome buna mēkaklujame hehë latletēme. Bu Pita, Jems, Jon, kë nēba bota, bolijayaname fwa tlelëkakume.⁵² Na kë lo mēta kë tafa mētlabë oneho bu kë nēbame tako maninibo memētletëya, na ye mētlelëkefëya. Na Jisas gali tle, “Sobo fëyeme ye ye elelëyone? Kë nēba gli hana elo. Ni labe tekwe nēge.”⁵³ Kwe bu Jisame tako soso memētlëlamu. Bu melowene mētlame nēgeme, “Kë nēba wagli sle elefe.”⁵⁴ Kwe Jisas kë nēbabë tobame fa tēta na anisasana gali tolē, “Nēba, ju huju ele!”⁵⁵ Na bubë amtëtomba ita tisitë na lahujuwa tēkake. Na Jisas bume gali tle, “Sobo bume hi wesibi elëyomo.”⁵⁶ Na kë nēba botana bolijayana klelego memëtelo. Kwe Jisas bume anisasana gali tle, “Sobo ebë wesibime ho flime asa gali elomo. Matëbe.”

9

Jisas bubë lowene esogo mēglelëtlabë home jine tēbelëkakēme

¹ Na Jisas, bubë lowene esogo mēglelëtlabë ho we ita tēle kënijime

gali telokwakēme na bu mitisitla. Na bu tako afutuku bume tlēme, bu ahwane onehobë ato mago kë afutukuna hehë namēgletēmame na tēbo kë mēglabë onehome sle namogotomame.² Na bu, Goto onehobë eso home tafa lēgletēmabë gali tē name na onehobë tēbo ato sle name, jine tēbelëkakēme.³ Na bume gali tle, “Sobo egëyeuna, sobo wesibi asa ehoujo. Sobo liji, musu, hi wesibi, baliti, hihijika ehona asa ehoujo. Matëbe.”⁴ Sobo li lifekuwa tuhu egulona na ho some nēno lēglana, sobo kë lo mēta fwa nini ebekefome. Kë lo mēta nini ebekefobëë, na mana kë magowa eyeume.⁵ Na sobo li lifekuwa tuhu egulona na kë lifeku mago oneho some nēno hana mēglana, kwe sobo kë lifeku lakilewa elome. Sobo kë life mago egëyeuna, kwe sobobë juba mago flëke bubë naba li mēta bu elome. Bu some kēme hwi mēglëyona na melowene namēglame, “Fëyeme tēbo nilitayane? Goto seme tēbo lēgëtanamefe.”⁶ Na bubë lowene esogo mēglelëtlabë ho bu mana iniwa lifeku elë mitliwaya. Na bu Gotobë lale gali tē mētëtagumetëma na iniwa onehobë ato elili sle mētëtagumetëma.

Herot Jisame yaya tletle

⁷ Galili provins enënebë eso ho Herot, bu Jisas kë totomebë wesibi aholokwane tle, na bu feilawa kēme tutune tlekëfe. Fli oneho megali mētlame nēgeme, “Ebë kwe, onehome kë baptais togotomebë, Jon, matëmatë mago wahuju tle.”⁸ Na fli oneho megali lamëtla, “Ebë kwe, ëtanifu ho, Elaija tekwe nēge, matëmatë mago huju tlefe.” Na fliye kwe megali lamëtla, “Ebë kwe, Gotobë lowene mago gali ëtani kë tē mogotlabë ho li, tekwe nēge, matëmatë mago huju tle.”⁹ Kēme nēgeme Herot megali latle, “Ëbame, bo wame home boblo logotomebë home gali tle, na bu Jonbë eso, mou lokwati iniwa tlë tëtatile. Kwe kë fëye homune? Bo ho mago meaholokwane nanolokwefëmë, bu

klelegowa wesibi blēge lotokwefēme.”
Na bu Jisame hwime tole tletle.

Jisas bu hi wesibi 5,000 home sa tētātēme

¹⁰ Gotobē gali tēme kē jine tēgelēkakēmebē ho, ita loko mētēkakija na bu iniwa wesibi melē kē mētēlabēme, Jisame tē mētētātla. Na Jisas bume nēno tle, na bu fli onehome hune mētla na bume fwa li lifekuwa tlelume. Kēbē life weniji Betsaida. ¹¹ Tokwafe lebutako oneho melowene mētla, “Bu wafi mujafe.” Na kwe bu nagi esogo mētlaguma. Bu belē mitisitla na Jisas gali tleme, “Sobo lalowa esijo.” Na bu, Goto onehobē eso home kē tafa lēgletēmebē gali, tē tētātēme. Na bu tēbo atona onehome sle totome. ¹² Na taboklē mu, Jisasbē lowene esogo mēglelētlabē ho we ita tēle, bu belē mitisiya na bume gali motlola, “Te, ju onehome mana jine ebelēkakēme, lolime kē mēgēbebē lifeku elē mana migliwaya, hi wesibime hohwi namētayame na ni lo mata hohwi mētātame. Ebē ho jwa life nēgēme.” ¹³ Kwe Jisas bume gali tleme, “Sobowa hi wesibi elēmo.” Na bume gali motlola, “Sebo feilawa hi wesibi hanane. Sebo tobali bletē nage na mo tēle, kēwa ekē mēbe. Ju melowene lalene, ‘Sebo hi wesibi kē iniwa onehome balitina glo nanēgletēmamene, hee?’” ¹⁴ Ebē hobē tabei kēniji 5,000.

Na Jisas bubē lowene esogo mēglelētlabē home gali tleme, “Sobo onehome gali elomo, 50, 50 mēta tafa namokouja.” ¹⁵ Na bu melē mētla na iniwa oneho tafa motokouja. ¹⁶ Na Jisas kē tobali bletē nage na mo tēle glo tle, na matafa elē hwi tokwake na Gotome lale gali tlole, “Ebē bletē nagenā mona yaha fēyeme enēnane?” Na bu klelegowa wesibi blēge totome na kē bletē nagenā mona fufu totome na bubē lowene esogo mēglelētlabē home tlēme, onehome sa namēgētātēmame. ¹⁷ Na bu iniwa hi mētla na hahana memētēlēmā. Na bubē lowene esogo mēglelētlabē ho, lēne hi wesibi loloko mētētaya na

we ita tēle kēniji basketē musu tētafu mototoma.

Pita megali latle, “Jisas, ju ebē ho kē nēgebē, Goto jume kē aniji toglēbē ho, onehome nēno naegleme”

¹⁸ Kē nalēwa, Jisas, buwa Gotome gēgali tlelēle, na bubē lowene esogo mēglelētlabē ho bu belē mutuju tla. Na Jisas bume takune tleme, “Oneho bome habē weniji lamlane?” ¹⁹ Na bume gali tafu mētētātla. “Fli onehowe megali lamētla, ‘Onehome kē baptais togotomebē Jon, tekwe nēge, matēmatē mago huju tle.’ Na fliye megali lamētla, ‘Gotobē gali, ētani kē tēgehilebē ho, Elaija, tekwe nēge, matēmatē mago huju tle.’ Na fliye megali lamētla, ‘Gotobē gali ētani kē mētehilabē ho li, tekwe nēge, matēmatē mago huju tle.’” ²⁰ Na Jisas bume takune tleme, “Na sobo bome habē weniji lalone?” Na Pita bubē gali tafu tētātla, “Ju ebē ho kē nēgebē, Goto jume kē aniji toglēbē ho, onehome nēno naegleme.”

Jisas gali tleme, “Bo gli nelēme na huju nēgelēme”

²¹ Na Jisas bume anisasana gali tleme na meheheē latletēme, “Sobo kē galibēme fli onehome asa gali elomo. Matēbemu.” ²² Na Jisas bubē lowene esogo mēglelētlabē home gali tleme, “Tokwafe bo, Gotobē life mago ho, lebutako elili na hobota fa nogotlēmē. Na letitabo enēne na lotu lome wege mēglabē eso enēne, na Gotobē galime okokwe moglomabē ho, bu bome hehē mēgletēname na bome mogo nalē tēkle mēgētaname. Na bo matēmatē mēta tēle olē nebēme kwe aona olēbēye mana huju nelēme.

²³ Ho bome na bobē loweneme esogome tole lēglēna kwe bu ebē life magobē lale wesibi, bu kē tole lēgletēmebē, aholokwana satimu sle lēletēme na glime uli jwamu lēleme. Ho bume wame gali moglolana na bume mogo nalē tēkleme gali mēglana, bu uli jwa lēgleme na bome iniwa olē mana esogo lēlenēnēme. ²⁴ Ho bu melowene lēglēna, ‘Bo Jisame

esogo nëgglëlëna fli ho bu bome tēbo mēgētaname.’ Na bu, bubē ato uli lēgglëlëna na bome hana esogo lēglenēnēna, kwe kēha ho bu tēbo liglitame. Kwe ho bu bome lowene sle lēgletenēna na bubē ato uli jwa lēgglëlëna kwe kēha ho bu hana tēbo liglitame. Ho bu kē home mogo nalē tēkle mogotlana, kē ho gli sle nane lēle. Weye. Bu unaunalēme lale tafa lēgleme. ²⁵ Ho bu ebē life mago iniwa wesibi glo lēglena, na kē ho bu hel life mēta tēbo liglitana, kwe kē wesibi bume habēna mēgaitalemene? Hanane. Bu blawa glo lēle. ²⁶ Tokwafe, bo, Gotobē life mago ho, bo tako elulegona nigisime. Bo bobē ayabē na bubē enselbē klijiha, kē u lēglebē elulegona nigisime. Na ho li, onehobē naba li mēta bobē galibēme able loglomena na bome able lēglena kwe tokwafe bo nigisina, bo mata kē home kofaya able nēgletelēme. ²⁷ Bo some nēgali nanolēyo. So mago emēta kē tafa egelobē bu mana neme na Goto onehobē eso home kē tafa lēgletēmebē olē mana fata lēleme. Na bu kē olē mana hwi mololame.”

Jisasbē ato li weniyana fata tletle

²⁸ Jisas kē gali wagēgali tle. Na tokwafe tobali ita aona olē mētlēbou na kwe Jisas, Pita, Jems Jonname nēno tle. Na tako fatini lufuwa tilekome, Gotome gēgali nalogolēlēme. ²⁹ Bu Gotome mana gēgali tlelēbēē, na bubē weniyane li weniyana mana fata tletle na bubē ēho melē tatiwamu fata tletle na feilawamu u tletle. ³⁰ Na tlemalē ho lafatawa mētletelo na bume gēgali mētlelēlo. Kē tlemalē hobē weniji, Elaija na Moses. ³¹ Na bu Gotobē elulegona fata mētletelo. Na bu Jisame, Jerusalem lifate mēta wesibi fata mēgletlebēme na bu gli lēglebēme na ebē life kile lēglebēme kē galime gēgali mētlelēlo. ³² Pita bume kē tafa tēgletēmebē ho bu feilawa nilafale mēta na ni mētebēya. Na bu ni mago huhuju mēta na Jisasbē elulego, na bume kē mētlebilobē elulego, hwi motlotēma. ³³ Na

tokwafe, kē tlemalē ho, Jisame kile mogotlome kofene kwe Pita gali tlole, “O tisa, sebo eme tafa nēglabē, ebē lalowa. Sebo aomalē, aona afeteni tli lo gigliji nēglame. Li jubē lo, na li Elaijabē lo na li Mosesbē lo.” Pita bu yaya hoha gali tle na bu kē gali tēglebē gali lowene hana tletle. Bubē efalēbowa lēleguli tletle.

³⁴ Pita mana gēgali tlebēē, na oloba mana tetujule na bume iniwa lamu totome. Na bubē lowene esogo mēglelētlabē ho uli memēta. ³⁵ Na Goto kē oloba kweli mana gēgali tle, “Ebē bobē nēba. Bo bume wafi aniji tlole, bobē wege fa nalētatenēme. Sobo bubē gali aholokwanewa eglolome.” ³⁶ Kē gali wayawe tlole, na bu Jisawa tlibe. Na bubē lowene esogo mēglelētlabē ho, kē olēna, kē hwi motlomabē wesibi, ho flime hana gali motloma.

Jisas bu ahwane kē tēbo lotlebē nēbame sle tole

³⁷ Li olēna, Jisas na bubē lowene esogo mēglelētlabē ho aomalēna, fatini mago kle mētēmalitaya. Na feilawa oneho Jisame alēgeme esune mētlēla. ³⁸ Na ho li kē onehobē ku mago we tlole, “Tisa, bo jume anisasana gali nolē, bobē nēba hwi naeglolome. Bobē jowa nēba nēgeme! ³⁹ Ahwane bume itaita lalēkaklukefētle na bu afēfleina mētlekēfe. Na kē ahwane bume lilina lalogotlewa na nēnafu bubē ēfalēbo elē mowelēbetle. Na kēbē ahwane bubē ato tēbo lētakefētle na bume hokweinawa hana kile logotleme. ⁴⁰ Na bo jubē lowene esogo mēglelētēyobē home anisasana yafe takune tlole, kēbē ahwaneme hehē namēgletlame fene. Kwe bu hana hehē mētletla.”

⁴¹ Na Jisas metafū tētlatle, “Sobo oneho, sobo lowene sle hana elo. Sobo tēbo lowene ehola. Bo sobona li olē tafame tole hana nelē. Bo sobobē hobota ita fa nogotlēbēme tole hana nelē.” Na bolijayame gali tlole, “Te! Jubē nēba ebelē elesutēna.” ⁴² Kē nēba Jisas belē loliwa tisi tle, na ahwane bume lifewa so telēkakle na life mēta tujetigo, na bume feilawa lili tole.

Na Jisas këbë ahwaneme anisasana kale tlole na kë nêbame sle totle na bolijayame tlêle. ^{43a} Na iniwa oneho klelego memëtla, Gotobë tako afutuku hwi motlolame nêgeme.

Jisas, bubë glime ita gali tle

^{43b} Jisas kë togotlebë wesibime, oneho mana lowene mëtlekefëya, na Jisas bubë lowene esogo mëglelëtlabë home gali tlole, ⁴⁴ “Te, sobo aholo bo sle eto. Bo, Gotobë life mago ho, bu bome home yo moglomame.” ⁴⁵ Kwe bubë lowene esogo mëglelëtlabë ho, këbë gali wayobë lowene hana mëtletla. Goto, kë gali wayo bume êho tégëtatëmeme nêgeme na bu kë gali wayo lowene sle jwa këme mëtletla. Bu Jisame uli mëtletlame nêgeme, na bu kë gali wayobëme takune jwa këme motlola.

Logouta ho yalêne

⁴⁶ Li olë na, bubë lowene esogo mëglelëtlabë ho, blalo kofaya kofaya megali mëtlelogwaya, “Semago, logouta home, ya tafa lëlene?” ⁴⁷ Na Jisas bubë lowene walowene tletëme. Këme nêgeme bu nêba tokwëfo no tlêle na bubë lime tlibe. ⁴⁸ Na bubë lowene esogo mëglelëtlabë home gali tlole, “Ho bome lowene lëgletenëna, na ebëha nêbame lëgaitalena, kwe bu bome laitanë. Na ho bu bome lëgaitanëna, bu bomewa nane laitanë. Weye, bome kë jine tëglënëbë ayame laitale. Na ebë nêba fenene, ho somago atwati hoha metafa lëglena kwe kë ho logouta home tafa lëgletëyome.”

Ho some wame hana loglëyona, bu sobobë yabe

⁴⁹ Jon bu Jisame gali tlole, “Tako Ho, sebo ho li mehwi latlola, ho jubë wenijina ahwane têbo hobë ato mago hehë tletëme. Kwe ahwane kë hehë lëgletlebë ho bu sebona jume hana esogo nêglelëyome nêgeme, sebo bume këme fene lëkle totla.” ⁵⁰ Kwe Jisas gali tlole, “Sobo këha home asa lëkle etlo. Ho some wame hana loglëyona, bu sobobë yabe.”

Samaria provinsbë li lifeku mago enêne, Jisas bu belë ligisime tole hana mëtletla

⁵¹ Goto, Jisame heven lifekuwa kë no lëglelebë olë nounou lalële. Këme nêgeme, Jisas lowene fa sle totle, Jerusalem lifatewa nalugujume. Na bu tuju. ⁵² Na bu fli home jine tlême, mogoutaya namëglame. Na bu motoutaya na Samaria provinsbë, lifeku tokwëfo elë mëtëkakluja, Jisasbë wesibi sle namogotometlame. ⁵³ Kwe kë life mago oneho, Jisas bu belë ligisime tole hana mëtletla, Jisas bu Jerusalem lifatewa tugujume nêgeme. Bu melowene lamëtla, “Bu sebona lotume tole hana lëletënawa na bu Jerusalem lifatebë tako lotu lowa këme lujü.” ⁵⁴ Na bubë lowene esogo mëtlelëtlobë ho, Jems na Jon, kë lifekubë onehobë lowene hwi motlometemo na Jisame takune motlolo, “Tako Ho, ju metole lalene, sebo Gotome takune nanoglolome, kë onehome heven life mago, ahoju tuku nalëtëkakëtëmeme, temu namëgebéyame?” ⁵⁵ Kwe Jisas swaya tëkakëtëme na këkale tlole. ⁵⁶ Na bu li lifekuwa mutuja.

Jisame esogome tole mëglabë enêne

⁵⁷ Jisasna bubë lowene esogo mëglelëtlabë hona, alëge elë mutuja na ho li Jisame gali tlole, “Iniwa lifeku ju egujuna kwe bo jume nagi nêglagwime.” ⁵⁸ Kwe Jisas bume gali tlole, “Mëgali bu ni mëgebebë fuluju nane na fole mata ni tiji nane. Kwe, bo, Gotobë life mago ho kë nêgebë, bo kwe ni nêgebëbë lo hanane.” ⁵⁹ Na kwe Jisas li home gali tlole, “Ju bome nagi enënë.” Kwe kë ho gali tlole, “O tako ho, bo bobë ayame matëmatë mëta afina lalowa gwa nugujetlëmene na mana jume nagi nêlême?” ⁶⁰ Na Jisas bume gali tlole, “Gigli mëglabë ho, buwa, gigli mëgebéya home lalowa matëmatë motoma. Kwe juwe, Goto onehobë eso home tafa lëgletëmebë gali tã etagutëme.”

⁶¹ Na li ho Jisame gali tlole, “Tako ho, bo jume nagi nêglême, kwe bobë

weife mago enëneme kaiyo afina lalowa nugujelimëmene?”⁶² Na Jisas gali tole, “Ho bu ihena yegu lëglena kwe bu miti nagi itaita hwi lokoukëfena kwe bu ihe yegu sle hana lëglelème. Na kë fenene, ho bome nagi lëglënëna kwe bu wesibina honame kë hune tëglebème lowene lëglekefëtëmena, kwe këha ho bu Goto onehobë eso home tafa lëgletëmebë wege hana fa logotleme.”

10

Jisas bu 72 home jine tēbelēkakēme

¹ Tokwafe, Tako Ho Jisas, bu 72 home mata aniji tlome. Na bu tlemalē tlemalēme jine tēbelēkakēme, bume mogoutatla namēglame. Iniwa lifate na iniwa lifeku bu kë belème lugujume kë tole lëglebë, bu kë enëneme kë iniwa lifate na lifeku elème jine tēbelēkakēme. ² Na bume wafle gali tlome, “Feilawa hi wesibi bu nuju mago wanigliji mëbe, kwe lebutako wege ho hana mëtabëya, kë hi wesibi fa namogotlame. Këme nēgeme sobo nuju bolijaya, Gotome, sagali elolo, bu wege home jine nalēglēmeme, bubë nuju mago hi wesibi fa namēgëtatlame.”

³ Na bume gali tlome, “Sobo eyemo. Aholokwane elo. Bo some kë jine nēglëyobëye, sobo sipsip kleli nēbale, wame tabo amalebë ku mëta fene mëtabe. ⁴ Sobo baliti musu o wesibi sisike musu o juba jibo asa ehoujo. Na some alēgeme kë esune mëglëyobë onehome, tafana asa gëgali elelëmo. Weye. Sobo hokweinawa saeyeu. ⁵ Na sobo lowa ekaklujona, sobo kë lo mago onehome afina megali eglomome, ‘Sobo ebë lo mëta kë tafa egelobë lowenena sle elo.’ ⁶ Na tu taba ka ho, kë lo mëta tafa lëglena, kwe sobobë lowene sle gali bu mëta malëbetle. Kwe këha ho, kë lo mëta tafa hana lëglena kwe sobobë lowene sle gali sobelë lukwaiji lëkeketëyome. ⁷ Sobo kë lo mëta fwa sani ni ebekefo. Li lo li lo asa elo. Na iniwa hi wesibi some kë lo mago kë mëglëkefëyobë sahi hi elo. Bo ebë galime fëyeme

gali nelëne? Ho wege lëglekëfena, kwe bubë wege wesibi lalowa glo lëgleme. Na kë fenene, ho bu Gotobë wege, wege lëgletlana, kwe bubë wesibi glo lëgleme.

⁸ Sobo li lifatewa tuhu egelona na ho some bubë lowa no lëglëyona, kë hi wesibi some kë mëglëyobë, sahi elo. ⁹ Sobo kë life mago ato elili onehome sasle etomo. Na sobo gali metë saetatemo, ‘Goto bu sobobë eso home natafa lëgletëyobë olë nounou lalëletëyo.’ ¹⁰ Na sobo li lifatewa tuhu egelona na kë life mago oneho some nëno hana mëglana, kwe sobo kë lifatebë alëge mëta elibome na megali elëmome, ¹¹ ‘Sobobë lifate flëke sobobë jubame kë lesili mëglebë sebo sosa nanotoma. Some melebotaneme nēgeme, ebë wesibi sobo kë egelobë wafi tēbo elito. Kwe sobo lowene sle elo, Goto bu sobobë eso home natafa lëgletëyobë olë nounou lalëletëyo, kwe sobo kë olë tole hana eletelo.’ ¹² Bo some gali nolëyo, Goto, iniwa onehobë gali aholokwane loglomebë olë na onehome fufu logotomebë olë fata lëglena, kwe bu ebë lifatebë onehome tako tēbo logotomeme kwe bu Sodom lifatebë onehome sogë tēbowa logotomeme.”

Jisas, bume lowene sle jwa enëneme, maninibo tletëme

¹³ Na Jisas ita gali tlome, “Sobo Korasin lifate mago oneho na sobo Betsaida lifate mago oneho, masiwafe, tokwafe tēbo wesibi somëta fata mëgletëyome. Èbame, bo sobobë ku mëta Gotobë afutukuna, klelegowa wesibi blëge blëge tëtätëyo, kwe sobobë tēbo lowene aholokwana ti hana elo. Ètani, bo Tair na Saidonbë onehome këha klelegowa wesibi hana blëge blëge tëtatemë. Kwe bo Tair na Saidonbë onehome, këha klelegowa wesibi blëge blëge nēgëtatëmëbë, kwe bu ètani anebo bubë tēbo lowene aholokwana wati mëglame fene na lale lowenewa esogo mëglelëlame fene. Na bu tēbo èho wafi gëgelo motomame fene na atikafa wafi ju mëglame fene, bu

melëme lëlekuju mëtla, bubë tēbo lowene wahune mëtla. ¹⁴ Goto, iniwa onehobë gali kē aholokwane loglomebë olë na onehome kē fufu logotomebë olë fata lëglena, bu some tako tēbo lëgētome kwe bu Tair na Saidon life mago onehome sogë tēbowa logotomeme. Sobo kē klelegowa wesibi hwi toglomome nēgema kwe sobobë tēbo lowene aholokwana hana ti elo. ¹⁵ Na sobo Kaperneam life mago oneho, sobo melowene lalone, ‘Sebo lale enēnemu nēgema na Goto seme heven life elë nēno lëgleme.’ Weye. Hanane mu. Goto some tēbo lëgētome na hel lifewa sike lëtëkakeme.”

¹⁶ Na Jisas bubë lowene esogo mëglelëtlabë home gali tlome, “Oneho sobobë gali aholokwane sle lameletëyo bu mata bobë gali aholokwane sle mëgletëname. Na oneho some hehë lameletëyo bu bome mata hehë mëgletëname. Na oneho bome hehë lamëletëna, bu bome kē jine tēglënebë ho, Gotome mata hehë lamletla.”

Jisas kē jine tēglëmebë 72 ho, ita loko mëtëkakija

¹⁷ Tokwafe, Jisas kē jine tēglëmebë 72 ho, fleflesuna loko mëtëkakija. Na bu gali mëtla, “O, tako ho, sebo jubë weniji fë tētona, na ahwane bu sobobë gali aholokwane mëtle na lamëtlëbouwa.” ¹⁸ Na Jisas gali tlome, “Sobo melë tugulona, bo kwe, mehwi latelë, Satan heven lifate mago latitigowa, wawaine fene tle.

¹⁹ Aholokwane elo! Bo some afutuku wafi tlëyo. Na sobo sobobë wame ho, Satanbë afutuku boblo etatelome. Na sobo wame tabo taiju na mlawalë matawa lalowa asë egolome na iniwa wesibi bu some hana tēbo mëgētome.

²⁰ Kwe ahwane, bu sobobë gali kē aholokwane mëgletëyobëme na kē mëtlëboubëme, asa fleflesu elo. Weye. Goto sobobë weniji bubë bogo mëta kē yahi tēgletëyobëme fwa fleflesu egelome.”

Jisas bu fleflesu latle na bubë bolijaya, Gotome gëgali tlelële

²¹ Kē nalëwa, Gotobë Amtëtomba, Jisasbë lowenebë fleflesu tëtatile. Na Jisas gali tle, “Aya, ju heven lifate magobë na ebë life magobë Tako Ho. Yaha fëyemene? Bo jume fleflesu nanëletë. Oneho bume fwa melowene lamëtla, ‘Sebo iniwa wesibi lowene sle nëletëma,’ kwe ju jubë afutuku bume ëho tëtätëme. Kwe oneho bume fwa melowene lamëtla, ‘Sebo nëbale tokwetokwëha, sobobë lowene afluja lalëletëna, sebo iniwa wesibi lowene hana nëletëma,’ kwe ju jubë afutuku bume waolafa tëtätëme. O aya, ju jubë tolewa esogo elëlele na ju melë eleme.” ²² Na Jisas bu ita gali tle, “Bobë aya bu iniwa afutuku na lowene bome watlënë. Iniwa ho bome bubë nëbame lowene sle hana mëletëna. Bolijaya buwa lowene lëletle. Na iniwa oneho, bolijayame lowene hana mletla. Bo bubë nëba na bo ayame lebotane nëtätëmebë, kē oneho buwa lowene mletla.”

²³ Jisasbë lowene esogo mëglelëtlabë ho, bume fwa tafa tlelëme, na bume swaya tletëme na bume fwa gali tlome, “Sobo lebutako lale wesibi wahwi tlomo, na sobo fleflesu egelome. ²⁴ Bo some gali nolëyo, ëtani, lebutako Gotobë lowene mago gali tē mototokweflabë ho na lebutako life mago eso ho bu metole lamëtla, sobo kē hwi toglomobë wesibi, hwi moglomame fene, kwe bu hana hwi motloma, na bu metole lamëtla, sobo kē aholokwane tēgelobë gali, aholokwane mëglame fene, kwe bu aholokwane hana mëtla.”

Samaria lifate mago ho, bume kē wame toglolebë home taitale

²⁵ Gotobë galime okokwe toglomebë ho Jisas belë tisi tle, bume tēbo loweneme su nalogotleme fene. Na bu takune tlole, “Tisa! Bo habelë nēgelëmene, lale tafa unaunalëme fa nanogotlëme?” ²⁶ Na Jisas bume takune tlole, “Gotobë bogo mago gali habë gali lalane? Ju habë hwi laeolëne?” ²⁷ Na Gotobë galime okokwe toglomebë ho gali tafu tëtatile, “Sobo tako Gotome anisasana tole

egletelomemu. Lowenena, afu-tukuna, ini tolewa egletelomemu. Na jubë ato fene tole eletle, ju lime mata metole egletleme.”²⁸ Na Jisas bume gali tlole, “Ebë lalowa. Ju gali tafu sle latle. Ju melë eglena, na ju lale tafa fa egotleme.”

²⁹ Kwe kë Gotobë galime okokwe toglomebë ho bu metole latletle, Jisas bume melowene nalëgletleme, “Lale lowenena hofe.” Këme nëgeme bu Jisame këme takune tlole, “Gotobë bogo mago gali, bobë fëye yabe home gali elane?”³⁰ Na kwe Jisas metafu tëtatile, “Èbame, ho li, Jerusalem lifate kile tle na Jeriko lifatewa tëmatule. Bu tematulebëë na wameho alëgeme èho mëtla, na bu alëgelëme okli mëtëlekukiya na fa mototla na tëkle mototlabëë èjeha gli lëleme. Na bubë èho titika mëtletla na bubë iniwa wesibi mata glo mëtletla na mana bume alëge mëglëbo mëta lakilewa mëtëkaka na bu mëtëlbouja.”³¹ Na kë olë nawa, lotu lome kë wege lëglebë ho mata kë alëge elëme tëmatule. Kwe bu alëge mëglëbome kë lëgëbebë home hwi telokwakle na alëge mëglëbo elë sigli tëtagule na latugujuwa.”³² Na tokwafe, Livaibë afenëbo, lotu lo mëta kë wege lëglekefëbë, bu mata kë alëge elëme tëmatule na kë home hwi telokwakle, na lolime hwime tuju tle na hwi tlole kwe bu mata sigli tëtagule na latugujuwa.

³³ Kwe Samaria lifate mago ho li,* bu mata nagi tëmatule. Na bu kë home hwi telokwakle, na bume tako masiwamu metletle.”³⁴ Na bu loliwa tuju tle, na bu wain taba liji tu, welë tuna, bubë juba këna swa totometle na kë juba, èho kaka tabona lalei totometle. Na bume huju totle na bubë donki kleli amlebo matawa gwa towetle. Na bume oneho këme ni mëtëbekefëyabë lowa tlelule, na bume ululu sle latotle.”³⁵ Na li olëna, bu tële baliti kë ni lo bolijaya home tlële na gali tlole, ‘Ju ebë balitina, ebë home këna satafa elelële. Na jubë baliti,

bume tafa eglelëlebëme, sike eglena, kwe tokwafe bo nigisina, bo kofaya baliti jume nëglëme.’”

³⁶ Na Jisas kë Gotobë galime okokwe toglomebë home takune tlole, “Ju habë lowene lalene? Wame ho kë tëkle mototlabë hobë yabe yalëmune?”³⁷ Na bu gali tle, “Ebë ho bume kë masiwa lëgletlebë na kë lëgaitalebë, ebë bubë yabemu.” Na Jisas bume gali tlole, “Ju ejume na kë ho fene laitale ju melë egleme.”

Jisas Marta nabë, Maria nabë lo mëta tafa tle

³⁸ Jisasna bubë lowene esogo mëglelëtlabë hona Jerusalem lifatewa mutujabë na li lifekuwa fwa mutula. Na kë lifeku mago mëse, bubë weniji Marta, Jisame bubë lowa no tlële.”³⁹ Martabë bolijamobë weniji Maria. Maria, bu Jisasbë elebo lime tafa tletle na bubë gali mana aholokwane tlokwefle.”⁴⁰ Kwe Marta bubë hi wesibi kësle totomebë wegeme tutune tlekëfe na Mariame tëbo lowene fa tëtätë. Na bu këme Jisas belë tuju na gali tlole, “O tako ho, bobë keinëba bome wakile etanë iniwa wege bowa no tlë. Ju këme lowene jwa fëyeme elene? Ju bume gali eolë! Bome egaitanë naegleme.”⁴¹ Kwe Jisas bume gali tolë, “O, Marta, Marta. Ju feilawa wesibime fëyeme tutune elene?”⁴² Maria bu bona kë tafa nëgelobë na kë gëgali nëgelobë wesibi, ebë lale wesibimufe. Këme nëgeme sebo ebë lale wesibime bume hana lëkle nëgetayame. Ju ebë wesibime fwa lowene egletleme.”

11

Jisas, Gotome gëgali mëglelëla lowenebëme okokwe tlome

¹ Li olëna, Jisas Gotome gëgali tlelële. Bu Gotome wagëgali tlelële na bubë lowene esogo tlelëtlebë ho li, bume megali tlole, “O tako ho, ju seme Gotome gëgali nëglelëlabë lowenebëme okokwe enona, èbame Jon bubë lowene esogo mëglelëtlabë

* **10:33** Israelbë afenëboni bu Samaria life mago enëneme yonane hana mëtletlogwaya.

home fene okokwe tlome.”² Na Jisas bume megali tlome, “Sobo Gotome gëgali eglëlëlon, kwe megali eglolome.

‘O, Aya, iniwa oneho bu megali samëla,
“Ju lalemu.”

Sebo metole nanëla,
ju onehobë eso home tafa
egletë nabëme esitëna.

³ Iniwa olë, ju seme hi wesibi
kë olë niwiwa saelëkefëna.

⁴ Ju sebobë tëbo lowene aholokwana
sati eletëna,
fli enëne seme tëbo lowene kë
mëgletë nabë lowene
aholokwana fene ti nëletëma.
Ju seme su mëgëtanabë wesibi elë
asa hwiwa enona.”

⁵ Na Jisas bume ita gali tlome, “So mago ho li bu yabena nëgena, na bu klabë kuna bubë yabebë lowa lujuna na gali loglolena, ‘Ju bome hi wesibi eglëne. ⁶ Bobë yabe kakë mago walisi na bo nëglëlëbë hi wesibi hanane.’ ⁷ Na bubë yabe bume lo mago megali lëgelubaklena, ‘Ju bome asa sosalë etanë. Ino watiji nelë, na bu bobë nëbale labuku mëta wani mebëya. Bo huju hana nëgelëme na jume hi wesibi hana nëglëme.’ Na sobo fëye lowene lalone, kë ho bu habelë lëglemene? ⁸ Bo some gali nolëyo, sobo aholokwane elo, kë ho ebë lo bolijayabë yabemu, kwe bu hana huju lële na bume hi wesibi hana lëlële. Kwe bubë yabe itaita takune lëgelulukwakleme nëgëme na hana kile lotle, na bu këme huju lëgleme na iniwa wesibi bubë yabe kë tole lëgletëmebë mana nalëglëlëme.

⁹ Bo some gali nolëyo, sobo Gotome wesibime takune elokweflome na bu some wesibi lëglëyome. Sobo wesibi hohwi etakefëtëlo me kwe sobo hwi eglolome. Sobo inome këke elekefëtëlo me na Goto some ino tika lëgëtatëyome. ¹⁰ Iniwa oneho Gotome wesibime takune moglokweflana, kwe bu wesibi glo mëglame. Na iniwa oneho wesibi hohwi mëtakefëtëmana kwe bu hwi moglomame. Na iniwa

oneho inome këke mëglekefëyana kwe Goto bume ino tika lëgëtatëmeme.

¹¹ So mogo ho li nëbana lëtabe na kë nëba bolijayame mome takune loglolena, kwe bolijaya bume waiye lëglëlemene? Weye. Hanane mu. ¹² Na bu bolijayame kame takune loglolena, kwe bolijaya bume mlawalë lëglëlemene? Weye. Hanane mu. ¹³ Sobo tëbo lowene itaita esogo elëlekeflo kwe sobo lale wesibi sobobë nëbaleme itaita elëkefëmo. Këme nëgëme sobo melowene eglomemu, ‘Sobobë aya heven life mëta kë tafa lëglebë, bu metole lalële, oneho bume kë takune moglolabë, bubë Amtëtomba, bume lëglëmeme.’”

Bu megali lamëtla, “Jisas Belsebulna wege melo”

¹⁴ Jisas gali mumu tabo hobë ato mago ahwane hehë tletle. Ahwane wafi kile totle na kë ho mana gëgali tle. Na iniwa oneho hwi motlola na klelego memëtletla. ¹⁵⁻¹⁶ Kwe fli metole lamëtla, Jisasme su namogotlame, na bume këme takune motlola, “Jisas ju klelegowa wesibi li leb-otane etatëna. Sebo jume melowene nanëgletëyome, ‘Gotobë afutuku ju mëta lëbetëfe.’” Na fli ho blalo megali mëtla, “Bu, tëbo alibahobë eso ho, Belsebulbë, afutukuna ahwane këna hehë lëlekefëtëme.” (Belsebulbë li weniji Satan). ¹⁷ Kwe Jisas bubë lowene wahwi tlotëme na bume wafle galina gali tlome, “Li lifate mago enëne, bu bwa bwa lowene mëta tafa mëglana na momogli mëgëtayana kwe bu blalo tafa sle hana mëglame. Na weife mago enëne blalo momogli mëgëtayana kwe bu iniwa tëbo miglitayame. ¹⁸ Na Satanbë ilawa mago alibaho, bu bwa bwa lowene mëta tafa mëglana na momogli mëgëtayana kwe bu afutuku mëglamene? Weye. Bu tëbo miglitayame. Bo walowene nelë, sobo bome melowene laletëna, ‘Bu ahwaneme Belsebulbë afutukuna hehë lëletëme.’ ¹⁹ Kwe ebë nëgali nëgebë,

Belsebul bome lalaitanë na bo ahwane tëbo kë hehë nëgletemëbë, kwe sobobë lowene esogo mëglelëlabë home ya laitamene, ahwane kë hehë mëgletëmabë? Belsebul bu laitamene? Sobobë weife mago enëne bu some melebotane mëtatëyome, sobobë lowene tëbo. ²⁰ Kwe bo ahwane Gotobë afutukuna hehë nëgletemëna kwe sobo këme lowene elome, Goto bu sobobë eso home watafa lëletëyo.

²¹ Afutuku tabo ho bu wame home boblo wesibi glo lëglëna na bubë lo mëta këna mana sei sle lëglëlena kwe bubë iniwa wesibi mëgëbetle sle mëgleme. ²² Kwe li tako afutuku tabo ho, bu kë tokwëfo afutuku home wameme ligisi tlena na bume wame loglolenana na bume boblo logotlena kwe bu kë hobë wame home boblo wesibi bume kë afutuku mëglelëlebë wesibi glo lëgletleme. Na bu kë hobë iniwa wesibi ho flime sa lëtagutëmeme.

²³ Oneho bome yabe hana mëglenënana, bu bome wame moglonabë enëne. Na ho bome onehome loloko nëgëtëbëme hana mëgaitanana kwe bu onehome lëlakwanena sisile lamotoma.”

Ahwane tëbo ita tisi tle

²⁴ Jisas gali tle, “Ahwane tëbo home kile logotlena, kwe kë ahwane, lagu lifewa tuju, tafa labume hohwi nalugutame, haha tafu logotlebëme. Kwe haha tafu life hwi hana loglolenana kwe bu këme gali lële, ‘Bo ëbame kë tafa tëgelëbë lowa ita nuguwime.’ ²⁵ Na ita luju na lo mehwi lolole, bu wasle motlafa. ²⁶ Këme nëgëme, bu luju na tobali ita tële yaife tabo ahwane nëno lule. Na bu mëkakluja na këme tafa mla. Èbame kwe kë ho bu sogë tëbowa tëtabe kwe tokwafe bu tëbomu lëtabe.”

Fëye enëne fleflesu mëglamene

²⁷ Jisas lebutako onehome gali tëtëtatëme na mëse li, kë onehobë mago bume anisasana gali tlole, “Jume kë fu tëgetabë mëse na maba kë hi tëgletëbë mëse, bu fleflesu matle.”

²⁸ Kwe Jisas gali tle, “Weye. Oneho bu Gotobë gali aholokwane mëglabë na esogo mëglelëlabë bu kwe fleflesu mëglame.”

Fli oneho Jisame gali motlola, “Ju seme klelegowa wesibi li lebotane etatëna”

²⁹ Lebutako oneho bu Jisame loko motokweitlabë, na bume gali tlome, “Oneho kë nalë kë mëtëtabëyabë bu tëbo oneho mu. Bu bome takune motlona, ‘Ju Gotobë afutukuna, klelegowa wesibi li lebotane etatëna, sebo melowene nanëglame, “Ju Gotobë wege fa etatle.”’ Kwe bu klelegowa wesibi li hana hwi moglolame. Bu jowa wesibiwa hwi moglolame. Wesibi Joname kë fata tëgletlebë wesibiwa hwi moglolame. ³⁰ Ètani, Jona bu mo imo mëta aona olë tafa tle na mana mo imo mago huju tle na Ninive lifate mago onehome gali mana të tutatëme. Na Goto, kë klelegowa wesibina, Ninive lifate mago onehome, melebotane latëtatëme, Goto Joname jine tletëme. Na Jona fenene, bo, Gotobë life mago ho, bo tokwafe, onehome ebë nalë kë mëgëtabëyabë, klelegowa wesibi lebotane nëgëtatëmëme, melowene namëglame, ‘Goto bome jine tlënë.’ ³¹ Goto, iniwa onehobë gali kë aholokwane loglomebë olë na onehome kë fufu logotomebë olëna, nëgemowe life magobë eso mëse, bu huju egleme, na ebë nalë kë mëgëtabëyabë onehobë tëbo loweneme gëgali egletëmeme. Bu bubë tëbo lowene këme gali egletëmeme. Ètani kë eso mëse bu kakë lifatemu tafa tuglebë kwe bubë life kile tle na eso ho Solomon belë tisi. Na bubë lale lowene gali gëgali tlelë na aholobu tëtagutle. Kwe ho li somëta kë tafa lëglebë bubë lowene takomu kwe Solomonbë lowene melëha kwe sobo kë tako lowene hobë gali aholokwane hana elolo. ³² Goto, iniwa onehobë gali kë aholokwane loglomebë olë na onehome kë fufu logotomebë olëna, Ninive lifate mago oneho bu huju mëglame, na ebë nalë kë

mëgëtabëyabë onehobë tëbo lowene gëgali mëgletëmame. Bu bubë tëbo lowene këme gëgali mëgletëmame. Kë Ninive lifate mago oneho, bu Jonabë gali aholokwane motlolame nëgema na bubë tëbo lowene aholokwana këme ti mëtla. Kwe ho li somëta kë tafa lëglebë, bubë lowene takomu kwe Jonabë lowene bu melëha kwe sobo kë tako lowene hobë gali aholokwane hana elolo na esogo hana elelëtelo.”

Jubë naba bu lamo fenene

³³ Na Jisas ita gali tle, “Oneho bu lamo fiji mëtaya na ëho hana mëgëtayame o isekuna hana lamu mëgëtayame. Weye. Bu masei mëta gwa mëtayame. Na oneho lowa mëkaklijana, bubë elulego hwi namoglëyame. ³⁴ Jubë naba lamo fenene. Jubë naba lalowa nëgena kwe jubë lowene mago lowene elulego lëgëbetëme na iniwa ato mëta elulego lëgëbetëmemu. Kwe jubë naba tëbo nëgena, kwe jubë lowene mago lowene kilego lëgëbetëme. ³⁵ Sobo ululu sle këme egelome. Elulego ju mëta kë lëgelubetëbë asa kilego malëletë. ³⁶ Jubë iniwa lowene elulegowa lelubetëna na kilego hana lelubetëna, kwe jubë iniwa lowenebë olëha lelubetëme, lamo elulegoha u eglatëme.”

Farisi ho na Gotobë galime okokwe moglomabë ho bu tëbo lowene esogo mëtlelëkefla

³⁷ Jisas gali watë tëtatëme, na Farisi ho Jisame gali tlole, buna hi namëgelome. Na Jisas kë hobë lowa tëkaklutle na tafa tle, hi namëgelome. ³⁸ Na kë Farisi ho bu Jisame mehwi tlole, bu hime tafa tle kwe bu toba tu afina swa hana totome, Gotobë wegeho Moses fene gali tle. Na bu klelego metletle. ³⁹ Kwe Jisas bume gali tlole, “Sobo Farisi ho, sobo kabona blete ëhou ato elë fwa swa etokefëmo jubë ato fene swa etole. Kwe waholo kë nëgelujebë bu memelë tetëbo wesibi sosolo lameluletëyo. Sobo kë wesibi hana sle etomo. ⁴⁰ Sobo yaya enëne. Ho

bu matawa atowa nane blëge blëge totle. Weye. Bu matawa atona waholona mata iniwa blëge blëge totome. ⁴¹ Kwe wesibi, blete ëhou na kabo mëta kë mëgelubebë, sobo wesibi jwa enëneme elëmo, bume egaitamo naegelome. Sobo melë egelona kwe sobobë iniwa wesibi, Gotobë naba li mëta lalowamu mëgëbetëyome.

⁴² Sobo Farisi ho, sobo hai! Sobo tëbo eglitome! Sobo memelë inilu welujuwa welujuwa lalei egotokwefomome na welujuwa mëta gwa etlome na jowa leitabo Gotome elëkeflome. Kwe sobo lale lowenebë na Gotome tole eglitelobë aholokwana ti lalekefo. Sobo kë lale lowenebë esogo sle eglëlëona na fli lale lowenebë aholokwana ti jwa egelona kwe sobo lale oneho etabome.

⁴³ Sobo Farisi ho, sobo hai! Sobo tëbo eglitome! Sobo lotu lome tafa egelona, sobo metole lalo, onehobë naba li mëta, eso hobë tafa labume tafa egelome. Na sobo oneho këme kë tafa mëglabë lifeku mëta asë egelona, sobo metole lalo, oneho some megali namëglëyome, ‘O letitabo ho. Lale kliji.’

⁴⁴ Sobo hai! Sobo tëbo eglitome! Sobo matëmatë fenene këha mëho lalo. Oneho lowene jwa, na meweniji lamla, ebë lale lifewa, na bu matëmatë matawa measë mogolame na bu Gotobë naba lime tëbowa mëgëtabëyame. Na sobo kë matëmatë fenene. Oneho bu sobobë tëbo lowene hwi hana moglëtëyome na meweniji namëglame, sobo lale enëne.”

⁴⁵ Na Gotobë galime okokwe toglomebë ho, bu Jisasbë gali aholokwane tle na bume gali tlole, “Tisa, ju kë gali Farisi home gali eglomebë kwe ju seme mata gëglë lalëna.” ⁴⁶ Na Jisas gali tle, “Sobo Gotobë gali okokwe eglomobë ho. Sobo hai! Sobo tëbo eglitome! Sobo onehome lebutako tafa sle gali okokwe elokwefomo, esogo namëglelëmame, kwe sobo, kë gali esogo mëglelëmabëme,

egaitamo hana elo na këbëna bume hobota gwa etatemo.

⁴⁷ Sobo hai! Sobo tëbo eglitome! Sobobë bisemlenino bu Gotobë lowene mago gali të mototokweflabë home wamena tètëkle mètëtakefëya. Na sobo kë hobë matëmatë negli etokwefëmetemo. ⁴⁸ Sobo matëmatë negli lakalena, onehome melebotane etatemo, sobobë bisemlenibë lakalame helawawa laletemo. Bu Gotobë lowene mago gali të mototokweflabë home wamena tètëkle lamètëtakefëya.

⁴⁹ Goto këbë hwi tlole na bubë lale lowenena megali tle, 'Bo bobë lowene mago gali të motokweflabë home na bobë gali tëme jine mëglëmabë home jine nëglëmëme, na bu flime wame ijiwa moglomame na flime mogo nalë tètëkle mëtayame.' ⁵⁰ Ètanimu na mana ekë lëbe bu Gotobë lowene mago gali të mototokweflabë home mogo nalë tètëkle mëtëtagijayame nëgëme, na Goto, bu ebë olëna kë mëtabëyabë onehome këme tëbo logotomeme. ⁵¹ Bu Gotobë lowene mago gali të mototokweflabë home mogo nalë tètëkle lamètëtagijaya. Bu ètani Abel mëta afina oto mutula, na flime mata mogo nalë tètëkle lamètëtagijaya na Sekaraia belë mana fwa təkaki na bume mata mogo nalë təkke mototla. Sekaraia bu, Gotome, wesibi kë mëta ahøjume ahøjume melekefëtlabë masei jelë, na Gotobë lo jelë, kë afloko mëta tètabe na bume mana mogo nalë təkke motlola. Na bo some gali nolëyo, ètanifu oneho bu Gotobë lowene mago gali të mototokweflabë home mogo nalë tètëkle mëtëtagijayame nëgëme, na Goto bu ebë olëna kë mëtabëyabë onehome, këme tëbo logotomeme.

⁵² Sobo Gotobë galime okokwe eglomobë ho. Sobo hai! Sobo tëbo eglitome! Sobo, Gotome kë lowene mëgletlabë lobë inoha tei tiji elo. Na sobowa kë ino hana tika etlome na hana ekaklujome, Gotobë lowene nafa egëtatlobëme. Hanane. Na oneho bu kë lowa mëkaklujame fene,

Gotobë lale lowene fa namogotlame kwe sobo lëkleha latokwefomo."

⁵³ Na kwe Jisas kë lo mago toho təkake. Na tokwafe Gotobë galime okokwe moglomabë ho na Farisi ho bume tëboijiwamu lamëtletla na memelë tètakunebëme takune motlola. ⁵⁴ Bume melëme fene sosogëna motlola, tëbo galina tafu lëtatëme nawa na bume mana enisusu mletlame na mogo nalë mana təkke motlame.

12

Sobo Farisi hobë sosogëna lowenebëme ululu sle saelo

¹ Feilawa onehomu loko mëtletlëya. Na bu ke mëtame nëgëme na fli onehome jubame fëfe fëfëha mëtletlogwaya. Na Jisas bubë lowene esogo mëgletlabë home afina gali të tëtatëme, "Sobo Farisi hobë bletë nage sëse wesibime ululu sle saelo. Bo kë gali nëgelëbëye, bubë sosogëna lowenebëme gali nelë. Bubë sosogëna lowenebë, sobobë lowene mëta takowa lëbetëyolime. Bo këme gali nelë, sobo ululu sle saelo. ² Iniwa wesibi oneho èho kë motomabë, kwe Goto olafa lotometëmeme na oneho bu hwi molomame. ³ Na iniwa gali sobo hwelutuwa kë gëgali egelobë, kwe tokwafe ho li kë gali lifeku mëta onehobë aholo li mëta të logotleme."

Sobo Gotome fwa sauli eletelo

⁴ Na Jisas ita gali tlome, "O bobë yabenino, bo some gali nolëyo. Sobo home asa uli eletemo. Weye. Ho some mogo nalë təkke mëglëyome kwe bu some ita hana tëbo mëgëtome. ⁵ Bo some megali sle nëlëyo. Sobo Gotome fwa uli eglitelome. Goto bu lalowa, home mogo nalë tëbo logotleme na bubë afutukuna kë home hel lifewa lalowa tuku lëgleme. Ho kwe melë hana mogotlame. Bo some gali sle nëlëyo, sobo Gotome fwa uli eglitelomemu.

⁶ Fli tokwëtokwë fole, ho melowene lamla, ebë lale wesibi nane, ebë tëboha wesibi tekwe nëge. Kwe, Goto bu kë tokwëtokwë foleme aholokwana hana ti lëletëme. Bu tafa

lëlelëme na ululu sle lalotome. ⁷ Na habenuju eslehuba tabëi sobobë kë nëgebë Goto walowene sle lëletëme na iniwa wesibi mata walowene sle lëletëme. Këme nëgëme bo some gali nolëyo, iniwa wesibi some kë fata mëgletëyobë, sobo uli asa eletemo. Sobo walowene elo, tokwëtokwë fole bu tokwëfo wesibiha kwe Goto bu kë foleme mana tafa lëlelëme na ululu sle lalotome. Kwe sobowe, sobo tako wesibi na Goto bu some tako tolemu lalëletëyo na itaita metafa lëglelëkefëyome.”

Sobo megali egelobëme asa able elo, “Sebo Jisame lowene sle nëgletlabë oneho”

⁸ Na Jisas ita gali tle, “Bo some gali nolëyo, ho bu onehome megali loglomena, ‘Bo Jisame lowene sle nëgletelëbë ho.’ Kwe bo, Gotobë life mago ho, bo Gotobë enselbë li mëta megali noglomëme, ‘Bu bome lowene sle lëgletenëbë ho.’ ⁹ Na ho bu onehobë naba li mëta bome lowene lëgletenëbëme able lëglëna, kwe tokwafe bo Gotobë enselbë li mëta kë home kofaya able nëgletelëme.

¹⁰ Ho bu bome, Gotobë life mago home tëbo gali loglonëna kwe Goto bubë kë tëbo lowene aholokwana ti lëgletleme. Kwe ho bu Gotobë Amtëtombame klëë gali loglolena, kwe Goto bubë tëbo lowene aholokwana hana ti lëgletlememu.

¹¹ Bu some lotu lowa sobobë tëbo lowene gëgalime mëglelujona. O gavman ho o tatako letitabo ho belë sobobë tëbo lowene gëgalime mëglelujona, kwe sobo këme metutune asa elo, ‘Sebo bubë gali habë tafu nëtatëmamene? Sebo habë gali nëglamene?’ Weye. ¹² Kë olëna, Gotobë Amtëtomba, sobo bume këna tafu egëtatëmobë gali lebotane lëgëtatëyome.”

Baliti musuna hobë wafle gali

¹³ Na ho li, kë feilawa onehona mëtëtabëya na bu Jisame gali tlole, “Tisa, bobë aya wagli lële na bo metole nanelë, ju afame gali elole, iniwa wesibi aya kë hune lëglebë, fulelë lëleme na fli bome lëlënëme.”

¹⁴ Kwe Jisas bume gali tlole, “Ju bome kë galime fëyeme gali enonëne? Ho bome gali aholokwane moglomabë home hana aniji motlona, na bo kë wesibi some hana sa nëgëtatëyome. Weye. Hanane.” ¹⁵ Na bu onehome megali tlole, “Sobo ululu sle saelo, feilawa wesibi mëmaune eglëmolime. Sobo feilawa wesibina nëgebë kwe kë wesibi kwe some lale tafame hana mëgaitomemu.”

¹⁶ Na Jisas wafle galime gali tlole, “Baliti musuna hobë nuju mëta, feilawa hi wesibi mëbekefëtle. ¹⁷ Na kwe kë ho melowene tle, ‘Bobë hi wesibi loloko lo wake melefe na bo li lo hananefe, bobë fli hi wesibi këme gogwa nanëgelëme. Bo habelë nëgelëmene?’ ¹⁸ Na bu gali tle, ‘Ai, ta bo melë nëgelëme. Bobë hëno tokwëtokwë hi wesibi loloko lo yaye notomeme na fli tatako wesibi loloko lo gigliji nelëme na bobë hi wesibi na fli wesibi kë mëta loloko nanëgëte. ¹⁹ Na bo bowa melowene nelëme, ‘Bo feilawa wesibina hofe. Bobë lale wesibi feilawa tlibutu niji mëbetenëfe. Ta bo tafawa manelë. Bo tafawa nëlekefëme na fleflesuna hi nëlekefëme.’” ²⁰ Kwe Goto bume megali latlole, ‘Ju yaya homu. Ebë klabëna ju gli egleme. Na iniwa wesibi ju kë loloko egëtabë yalë glo lëgletëmene?’” ²¹ Na Jisas gali tle, “Na wesibi kë home fenene fata tletle, ho li Gotome lowene hana lëgletlëna na bubë feilawa lalale wesibi loloko loloko lëgëтана, na kë wesibina fli onehome lëgaitame jwa lëglëna kwe këha lakale Gotobë naba lime sle hana lëletle.”

Sobo tutune asa elo. Goto bubë nëbaleme tafa sle lëglelëmeme

²² Na kwe Jisas bubë lowene esogo mëglelëtlabë home gali tlole, “Sobo ebë galibë lowene sle eletelo. Na sobobë tafa lale lëgëbetëyobëme tutune asa elo na megali asa elo, ‘Sebo fëye wesibi hi nëglamene? Sebo ëho hamago glo nëglamene?’ ²³ Hi wesibi na ëho bu some lale tafame hana mëgaitome. Jubë lale tafa ebë tako wesibi, kwe hi wesibi ebë tokwëfo

wesibi. Na jubë ato ebë tako wesibi, kwe ëho ebë tokwëfo wesibi. ²⁴ Sobo abagou foleme lowene eletemo. Bu hi wesibi hana tobalo mële na bu hi wesibi loloko hana mëta. Na bu hi wesibi loloko lo hanane. Kwe Goto bume hi wesibi lëlëkefëme. Kë fole kwe bu tokwëfo wesibiha kwe sobo oneho tako wesibimu na Goto bu some mata hi wesibi lëglëyome. ²⁵ Na ho bu ebë life mëta kë tafa lëglebë olëme tutune lëglëna kwe bubë olë lalowa kikli lëgetokwaklemene? Weye. Hanane mu. ²⁶ Sobo ebëha tokwëfo wesibi melë hana egelona kwe sobo fli wesibime blawa fëyeme tutune elone?

²⁷ Sobo lale ti tahweji lowene eletemo. Bu habëtabo foke melene? Bu këkë hana mëgleme na bubë negli wesibi hana susu motomeme. Kwe bo some gali nolëyo, ëtani eso ho Solomon bu lale lale negli wesibi gëgelo totokwefëme. Kwe bubë negli wesibi bu kwe sogë lalowaha, kwe lale ti tahweji bu lalemu mëbe. ²⁸ Sobo lifeku mago agosaba tahwejime lowene eletemo. Lifeku mago agosaba tahweji lifekume ëje kë foke mëglebë, ho uniji wege mëglame na ahoju fiji mëtayame. Kwe Goto bu këha lifeku mago agosaba tahwejime negli sle lalotokwefëme. Këme nëgeme sobo lowene sle egletelome, Goto some mata ëhona negli lëgëtome. Sobo Gotome tokwëfo lowene slewa laletelo. ²⁹ Goto some tafa lëglëyome. Këme nëgeme sobo hi wesibime metutune asa elo. Sebo fëye wesibi hi nëglamene o sebo fëye tu hi nëglamene? ³⁰ Gotome lowene jwa mëgletlabë oneho bu kë wesibime feilawa tutune melekefëya. Kwe iniwa wesibi sobo kë tutune egletemobë, sobobë blijaya këbëme walowene lëletëyo. ³¹ Sobo wesibime tutune asa elo. Weye. Sobo Gotome fwa melowene eglekefëtélome, ‘Bu sobobë eso ho lëtabetënafe, na bubë tolewa esogo eglelëtëlobëme lowene elome. Na kwe bu hi wesibina ëhona some mata lëglëkefëyome.’”

Sobo heven life mëta wesibi loloko

egëtome

³² “Sobo bobë enëne tële. Bo some kë tafa nëglëyobë, ho sipsip kleli fene lëlëme. Sobo uli asa elo. Sobobë blijaya bu wafi gali tle, bu sobobë eso home tafa lëgletëyome na sobo buna eso hoha onehome tafa elëlmome. ³³ Sobobë iniwa wesibi balitina hihijika elome. Na kë baliti glo elome na wesibi jwa onehome aitamome. Sobo melë egelona, kwe sobo unaunalëme tafa wesibi glo egelome, na sobo heven life mëta lale wesibi loloko egotome. Tokwafe sobo heven life mëta këha wesibi hwi eglomome. Heven life mago wesibi, flawei hana mëgleme. Na ho toklime glo hana mëglame, na lahwë hana sisile mogotomeme na gu hana mëglëme. ³⁴ Sobobë wesibi fëye mëta mëbetëyowe, sobobë lowene mata kë mëta lugubëtëyome.”

Lale wege enëne bu sagli melëlame na walena satafa mla

³⁵ “Sobo iniwa wesibi sagli elëlome na walena satafa elo. Sobo ëho gëgelo etomome na lamo fifiji etomome na këna tafa elome. ³⁶ Sobo këha metafa egelome, ho bubë eso home, bubë tako salë mago ligisibëme fene hwi mletla. Bubë eso ho bu ino mëta këke lëglëna kwe bu hokweinawa tika mëtatlame. ³⁷ Na bu ligisina na mehwi lëglëna, bubë wege ho bu ni hana mëgebëyana, kwe kë wege ho bu fleflesu matla. Bo some nëgali gali nanolëyo, kë eso ho bu wege ëho gëgelo lotomeme, na bubë wege home gali lolomeme, ‘Masei mëta tafa elome.’ Na buwa hi wesibi bume lëlëmeme. ³⁸ Na bu klabë kuna o fole olëna ligisina na mehwi lëglëna, bubë wege ho bu ni hana mëgebëyana, kwe kë wege ho bu fleflesu matla.

³⁹ Sobo ebë wesibi lowene sle eletemome. Ho bu tokli ho ligisibë olë lowene lëgletëna, kwe bu kë tokli home lëkle logotleme na bu lowa hana lëkaklume. ⁴⁰ Sobo mata sagli elëlome na mana walena satafa elo. Bo këna nigisibë olë sobo lowene hana eletelo. Sobo melowene jwa elome, ‘Bu ebë olëna hana ligisime,

kwe bo, Gotobë life mago ho, kë olëna mana nigisime.”

Ebë lale wege hobë na tëbo wege hobë waflë gali

⁴¹ Pita Jisame metakune tole, “Tako Ho, ebë waflë gali ju seme fwa gali enonane o iniwa onehona name gali elome?” ⁴² Na bu gali tafu tètatlë, “Bo iniwa lale wege kë fa mogotlabë na lale lowenena kë mëtabëyabë wege home gali nëlëyo. Eso ho bu këha lale wege home meaniji loglome, bubë fli wege home tafa nalëglëlmeme na hi wesibi bume nalëglëlmeme, eso ho kë gali toglolebë olë mëta. ⁴³ Eso ho ligisina na bubë wege home mehwi loglolena, bubë lale wege mana fa lotokwefëtfe. Kwe kë wege ho bu fleflesu malële. ⁴⁴ Bo some nëgali nanëlëyo. Eso ho bu këha lale wege home meaniji lëglëyome, bubë iniwa wesibi tafa nalëglëlëmetleme. ⁴⁵ Kwe kë wege ho bu melowene lëglëna, ‘Bobë eso ho hokweinawa hana ligisimefe,’ na bu fli wege onehome tètëke lëglëna, na bu feilawa hi wesibi na biaha wesibi hi lëglëna, ⁴⁶ na kwe bubë eso ho ligisibë olë lowene sle jwa lëletleme na bu lili sloslowa lëleme na bubë eso ho mana lisime. Na bu kë wege home latëbowamu logotleme, na Gotome lowene sle jwa kë mëgletlabë enëne belë jine lelëkakleme.

⁴⁷ Wege ho bu bubë eso hobë tole lowene lëgletlena kwe bu sagli hana lëgletlena na bubë eso hobë tole hana esogo lëglëtlëna kwe bubë eso ho bume anيسانamu feilawamu lola lëgëbetëfaleme. ⁴⁸ Kwe wegeho bubë eso hobë kë tole lëgletlebë lowene, lowene sle hana lëgletlena na bu wege sle jwa lëleme kwe bubë eso ho bume tokwëfo tëklewa loglotleme. Goto onehome feilawa lowene lëglëmena kwe tokwafe bume takune loglomeme, ‘Bo some kë tëglëyobë lowenena, feilawa wege fa totlone?’”

Jisas onehome fufu nalogotomeme këme ligisime

⁴⁹ Jisas ita gali tle, “Bo kë nigisibëye, bo Gotobë wame ahojuha

ebë lifekuwa tuku nanëgelëme nisi, iniwa tëbo lowene na tëbo wesibi temu namëgleme. Na bo metole nanelë, Gotobë wame bume ahojuha hokweinawa u nalëgletleme. ⁵⁰ Tokwafe feilawa elili na gli bome lamu lëgëtanëme, tu mëta home fene baptais meletëma na bo tako tutune këme nelë. Bo metole nanelë, kë wesibi bome kë fata lëgletenëbë bu hokweinawa tli nalëkaketenëme. ⁵¹ Sobo bome melowene laletëname, ‘Bo ebë lifeku mago wame sleme tisine?’ Weye. Hanane mu. Bo kë tigrisibë, onehome fu nanogotomëme tisi. Oneho bu bobë gali aholokwane mëglana na fu fu mlame. Fli bobë gali lowene sle mletlabë na fli bobë gali lowene sle hana mletlabë. ⁵² Ebë olëna na tokwafe, tobalimalë ilawa mago ho jowa lo mëta kë tafa mëglabë, bu bobë lowene esogo mëglëlëlabëme momata mëlame na fu fu melelogwayame. Na aomalë bu tlemalëme wame moglomame na tlemalë bu aomalëme wame moglomome. ⁵³ Bu bobë lowene esogo mëglëlëlabëme momata melelogwayame na fufu melelogwayame. Na bolijayani bowenenime wame moglomame na boweneni bolijayanime wame moglomame. Na botamenino bokoninome wame moglomame na bokonino botameninome wame moglomame. Na bolujawani bu boweneninobë noninome wame moglomame na boweneni-nobë nonino bolujawanime wame moglomame.”

Oneho bu wesibi kë fata mëglëbë es-obëme lowene hana mla

⁵⁴ Na Jisas bu kë feilawa onehome na gali tlome, “Sobo matafa kë tëbo lëtatlëbë hwi elolome na megali lalekefo, ‘Tu lëgetomefe.’ Na tu leto. ⁵⁵ Na sobo kliji naba mehwi egowelëkaklona, yemeha fata eola kwe megali lalekefo, ‘Eli tako kliji lëgemolemefe.’ Na kliji bu tako lëgemolelële. ⁵⁶ Sobo sosogëna enëne. Sobo klijina matafana hwi elomo na sobo melowene eletemome, ‘Wesibi

tokwafe fata mëglemefe.' Sobo këha wesibi kwe walowene eletemo kwe ëje kë fata mëglebë wesibibë waiyo sobo hwi sle jwa fëyeme elëmone?"

Onehobë gali aholokwane loglomebë ho belë, kë lëgloulibë hona lowene sle etlome

⁵⁷ Jisas bume ita gali tlome, "Sobo lale lowene kë egelobë loweneme lowene sle jwa fëyeme eletelone?"

⁵⁸ Ho li, bu jume onehobë gali aholokwane loglomebë ho belë lëgloulina na sobo alëgeme mana asë elome kwe ju kë hobë lowene alëgeme yafe sle etatleme. Ju sle hana etatlena kwe bu jume onehobë gali aholokwane loglomebë ho belë lëgloulime na bu jume plismanë belë lëloulime na bu jume kalabusu lowa tuku lëleme.

⁵⁹ Bo jume gali sle nolë, jume këniyi kë aniji moglotëyobë balitina sle hana egotlena, kwe ju kalabusu lo mëta mana tafa egleme.

13

Ho bubë tëbo lowene aholokwana ti hana lëglena kwe bu tëbo liglitame

¹ Jisas gali wafi të tëtätëme na fi enëne bu belë mitisiya na megali motlola, "Galili provins mago ho bu Gotome kleli afabo ahøjume mëtlela. Na eso ho Pailat bubë wame home boblo mogotomabë enëneme jine tlëme, kë enëneme mogo nalë tëtëkle namëgëtayame. Bu Gotome kleli afabo mana ahøjume mëtlekefëtlabëë, na bume mogo nalë tëtëkle mëtëtaya." ² Na Jisas bume gali tlome, "Sobo melowene lalone, 'Kë Galili provins mago enënebë tëbo lowene bu takomu lëbetëme na kwe fli Galili provins mago enënebë tëbo lowene bu kwe tokwëfoha lëbetëme na kë tëbo wesibi bume këme fata lëletëme?' Sobo ebë loweneme melowene lalone, hee? ³ Weye. Kë melë hanane mu. Bo some gali sle nëlëyo, sobo tëbo lowene aholokwana ti hana egelona, kwe kë enëneme fene tëbo mototoma, këha wesibi some fata lëgletëyome. ⁴ Na sobo ita lowene elo, ëtani, Siloam lifeku

magobë akolalo bu mogo nalë 18 home tëtäfu tle. Na sobo melowene lalone? 'Kë enënebë tëbo lowene takomu lëbetëme na kwe fli Jerusalem lifate enënebë tëbo lowene bu kwe tokwëfoha lëbetëme na kë tëbo wesibi bume këme fata lëletëme.' Sobo melowene lalone? ⁵ Weye. Kë melë hanane mu. Bo some gali sle nëlëyo, sobo tëbo lowene aholokwana ti hana egelona, kwe kë enëneme fene tëbo mototoma, këha wesibi some fata lëgletëyome."

Ebë ti liji, logowalë jwabë waflë gali

⁶ Na Jisas waflë gali metë tëtätëme. "Ho bu niji olo bubë wain taba liji nuju mëta lë lotle. Na kë niji bu sigli lële. Na kë ho itaita lisi, niji hwi naloglokweleme. Kwe niji logowalë hana lële. ⁷ Këme nëgeme bubë nuju tafa lëglelëtlebë home gali lolole, 'Ju aholo bo eta. Aona tlibutu kë mutu-jubë bo ebë niji yafe hwi tlokwakikeflë, kwe bu logowalë hana lële. Te ebë niji mana tëka etokwakle. Ebë flëkebë ëflëbo yawe loglotlelime.' ⁸ Kwe bubë nuju kë tafa lëglelëtlebë home gali lolole, 'Eso ho. Awi. Ebë tlibutuna kwe malilibe. Bo waiyo mago flëke yefi nëletelëme na ahøjuna somalëfa u nëletelëme. ⁹ Bo melë nogotlëna kwe bo melowene nanelë, Li tlibutuna kwe logowalëme. Kë tlibutuna logowalë jwa lëglena na kwe lalowa tëka nogotlëme.'"

Tafawa olëna, Jisas mëseme sle tëtamë

¹⁰ Tafawa olëna, Jisas onehome bubë lotu lo mëta gali okokwe tlome. ¹¹ Na ahwane kë tëbo tëtamëbë mëse këme telutabe. Na kë ahwane bume 18 tlibutu këniyi tëbo tëtakefëme nëgeme na kë mësebë amlebo nemoha busu këme tlatë na lale tiglibe hana tle. ¹² Na Jisas bume hwi telokwakë na gali telokwakë bu belë egisi tle naegleme. Na bu tisi tlee na gali tolë, "Bo jubë tëbo wasle nëtätë." ¹³ Na toba bubë ato mëta gwa totatë na bu tlibe sle tle, na Gotome fleflesu tletle na bibita totle. ¹⁴ Kwe lotu lo hwi loglokweflebë eso ho bu Jisame këme wame tlole, bu tafawa olëna,

kë mëseme sle tēgētāmēme nēgēme. Kēme nēgēme bu onehome gali tlome, “Tobali ita jowa olē ebē wege olē lēbe. Sobo metole lalo, ho sobobē ato sle lētātēyome kwe sobo kē wege olēna egisijome. Kwe sobo tafawa olēna home ato sleme asa takune elolo. Matēbe.”¹⁵ Na kwe Jisas bubē gali tafu tētatlē, “Sobo sosogēna enēne. Sobobē gēgali na sobobē lowene bwa bwa mēbetēyo. Sobo megali elo, ‘Tafawa olēna asa wege elo.’ Kwe sobo tafawa olēna, bulmakau kleli lowa kaiselo eyeukefo, na sobobē bulmakau kleli na donki kleli tu hime kaiselo elelukwefēmo.¹⁶ Sobo tafawa olēna, bulmakau kleli itaita kaiselo aitakefēmo kwe sobo bome fēyeme gali enonane, tafawa olēna kē mëseme asa sle eta? Sobo hwi elo, ebē mëse kē nēgebēye, Abrahambē afenēbo. Na Satan bume kē yage tēgetabē 18 tlibutu kēnji yage tle. Kēme nēgēme bo kē tēbo, tafawa olēna lalowa sle nētātēme.”¹⁷ Na bume kē wame motlolabē ho, kē gali aholokwane motlola na tiniji na hwē memētletla. Kwe iniwa oneho bu iniwa wesibi melē kē totomebēme fleflesu mētletla.

Goto bu tokwafe eso home tafa lēgletēmēbē waflē gali

¹⁸ Na Jisas ita gali tlome, “Goto onehobē eso home kē tafa lēgletēmēbē, ebē fēyeha wesibine? Bo some ebē wesibime waflē gali nolēyo.¹⁹ Goto bu onehobē eso home kē tafa lēgletēmēbē, bu atowai liji fenene. Atowai liji bu tokwētōkwē mu. Kwe ho bu kē tokwētōkwē atowai liji flēke mēta sike lēle. Na bu hulu mēle na tatako tiwa milibe na iniwa fole bubē tikefo mēta, lo gigliji mēkaki.” *

Bletē nage kēna sēse mēglebē wesibibē waflē gali

²⁰⁻²¹ Na Jisas ita gali tlome, “Goto bu onehobē eso home kē tafa lēgletēmēbē ebē fēyeha wesibine? Bo some ebē wesibime waflē gali nolēyo. Goto bu

onehobē eso home kē tafa lēgletēmēbē bu bletē nage kēna sēse mēglebē wesibi fenene. Mēse, bletē nage kēna sēse mēglebē wesibi tēlewa glo ele na lebutako bletē nage obo mēta u etēkake na kēna afulu ele. Na bu iniwa flēle lēbebokwake na kē bletē nage iniwa feilawa sēse mele.”†

Sobo tokwēfo ino elēme ekaklujome

²² Jisas Jerusalem lifate alēge elē tuju. Na bu li life li life onehome okokwe tlagume. ²³ Na ho li bume takune tlōle, “Tako ho, tokwafe Goto jowa jowa onehome nēno lēglemene o feilawa onehome nēno lēgleme?” Na Jisas gali tlome, ²⁴ “Sobo ino tokwēfo elēme ekaklujome saafutuku elo. Bo some gali nolēyo, feilawa oneho bu heven lifewa mēkaklujame fene, kwe hanane. ²⁵ Tokwafe, lo bolijaya ho, bu huju lēleme na ino tiji lēleme. Na sobo kē ino ēfo li mēta elibome na ino mēta kēke eletelome na mewe elome, ‘Tako ho, ino seme tika etatēna.’ Kwe bu some metafu lētātēyome, ‘Bo some lowene hana nēletēyo, sobo hamagobē enēnēne?’ ²⁶ Na sobo bume megali eglolome, ‘Sebo juna hi tlekefēya na ju sebobē lifeku mēta seme okokwe latlona.’ ²⁷ Kwe bu some megali loglējome, ‘Bo some lowene hana nēletēyomu, sobo hamagobēne? Sobo tēbo lowene esogo eglelēlobē enēne. Sobo hai! Sobo bo mago eyeu.’ ²⁸ Bu some hehē mēgletēyome na sobo Abraham Aisak Jekopna iniwa Gotobē lowene mago gali tē mototokweflabē home mehwi elokwakēmome, bu Goto onehobē eso home kē tafa lēgletēmēbē lifate mēta mētabēya. Kwe sobowa mēglēbo elē egētabome. Na sobo tako ye eglekefome na enino kēkē etokwefomome. ²⁹ Na iniwa life mago oneho, Goto onehobē eso home kē tafa lēgletēmēbē lifewa migisiyame. Bu nogowelē mago na notowelē mago na nēgetujuwelē mago na nēgemowelē

* **13:19** Goto bu onehobē eso home kē tafa lēgletēmēbē, bu kē atowai liji fenene. Ebē olēna Goto bu tēlewa onehobē eso home tafa lēletēme, kwe tokwafe bu feilawa onehobē eso home tafa lēgletēmēme.
† **13:20-21** Bletē nage kēna sēse mēglebē wesibi, bletē nage mēta fene flēle lēkake, Gotobē afutuku meflēle lēbebokwaketleme na Goto bu tokwafe iniwa onehobē eso home tafa lēletēmēme.

mago migisiyame. Na bu kë life mëta tafa mlame na hi melekefëyame. ³⁰ Sobo aholokwane elo. Fli enëne bu ebë olëna letitabo home kë tafa mëglabë, bu tokwafe kë olëna atwati ho tafa mëglame. Na fli enëne bu ebë olëna atwati home kë tafa mëglabë bu tokwafe kë olëna letitabo ho tafa mëglame.”

Jisas Jerusalem lifate mago one-home maninibo tletëme

³¹ Na kë nalë, Farisi ho fli mitisitla na Jisame gali motlola, “Eso ho Herot jume mogo nalë təkeme wahau lëletë. Ju emago li lifewa ejumo.” ³² Na Jisas bume gali tleme, “Sobo kë kulekule home megali ejuwelëlome, ‘Ebë olë na uniji olë bo ahwane, hobë ato mago awi hehë nëletemë na one-hobë ato elili awi sle sle notometemë na aona olëbëna bobë wege mana yawe noglolëme.’ ³³ Kwe eli olë uniji olë kë olë bo Jerusalem lifatewa nuguwi nuguwiwa awi nelë. Melëme nëgeme, Gotobë lowene mago gali të lotokweflebë ho, li lifate meta mogo nalë hana tēkle mogotlame. Weye. Bubë ko Jerusalem lifate mëta fwa lugujutleme.

³⁴ O Jerusalem lifate mago enëne. Masiwafe. Sobo Gotobë lowene mago gali të mototokweflabë home mogo nalë tētēkle etakefëyo na Goto kë jine tēglēkefëmebë home anijina mogo nalë metētēkle etakefëyo. Bo some sago nanëgētome fene, tēbo wesibi some tēbo lēgētolime, tamo kekelo bubë nēbale fene sago etome na hwaklona lamu etome. Kwe sobo tole hana elo. ³⁵ Sobo aholokwane elo. Goto some hune lēgleme na ita hana lēgaitome. Bo some megali sle nēlëyo. Sobo bome eli hana hwi egloname. Sobo afina gali egelona, ‘Gotobë tolëna afutukuna kë ligisibë ho, Goto bume lēgaitalëme.’ Na sobo bome mana ita hwi enoname.”

14

Jisas bu ato sēse sēse tabo hobë ato sle tētatl

¹ Tafawa olëna Jisas, Farisi hobë eso hobë lowa hime tuju. Bu kë lo

mëta tafa tle, na buna kë hi mëtlabë enëne bume mana hwi mëtēbelëkakla, eli bu habelë lēglemene? Bu tēbo lowene fa logotlemene? ² Na ato sēse sēse tabo ho Jisas belë tisi tle. ³ Na Jisas kë home hwi tole na bu Gotobë galime okokwe moglomabë ho na Farisi honame takune tleme, “Sebobë anebo gali habelë lēgēbetëna lalëlene? Sebo tēbo atona home, tafawa olëna, lalowa sle nogotlamene o matēbe?” ⁴ Kwe bu mogweliha tafawa mëtla. Këme nēgeme bu kë tēbo atona home no tlële na sle tole na jine tlële. ⁵ Na bume gali tleme, “Sobobë nēba o bulmakau kleli tafawa olëna yefi fulujuwa mëtetigotëyona kwe sobo tafawa egelomene? Weye, sobo glo egotolome.” ⁶ Kwe bu kë gali tafu hana mëtētatl.

Jisas gali tle, “Ju atwati hoha etabe”

⁷ Na Jisas hime kë mitisiyabë enënebëme hwi tlagume. Fliye eso enënebë tafa labume tafa motokouja. Këme nēgeme bu wafle gali këme të tētätëme. Bu megali latle, ⁸ “Ho bu mëse sei lēglebë olëbëme, fleflesu hi wesibi hime gali lēglena na ju kë hi wesibi hime egujutlena kwe ju eso hobë tafa labume asa tafa eoule. Ju melë eglena na bu kë tafa labu li eso home wafi aniji loglotlena, ⁹ kwe jume kë hi wesibi hime kë gali loglëbë ho bu jume gali loglëme, ‘Ju ebë tafa labu ebë eso home kile eletle.’ Na ju tako tiniji egleme na ju atwati hobë tafa labume tafa eoule. ¹⁰ Ho bu jume hi wesibi hime gali loglëna na ju kë hi wesibi hime egujuna kwe ju atwati hobë tafa labume tafa eoule. Ju melë eglena kwe jume hi wesibi hime kë gali loglëbë ho bu jume gali loglëme, ‘Yabe, ju eso hobë tafa labu mëta tafa eoule.’ Bu jume melë lēgētana kwe juna kë hi egelobë oneho jume melowene mëgletëyome, ‘Bu lale eso hofe.’ ¹¹ Ho bu megali lēglena, ‘Bo tako afutukuna eso hofe,’ kwe Goto bume megali loglölome, ‘Hanane ju atwati homu.’ Kwe ho bu megali lēglena, ‘Bo kwe, bo

atwati hofe,' kwe Goto bume megali logloleme, 'Ju eso ho fe.'"

Jume kofayame mëglëyo jwa enënebëme sle egotomeme

¹² Jisas bume hi wesibi hime kë gali loglolebë home gali tole, "Ju tako salë hi wesibi sagli eglëlena, kwe ju yabe enëneme na blijahanime na weife mago enëneme, na weife life mago feilawa balitina kë nëgebë enëneme migisitëyome asa gali elome. Ju melë eglëna kwe bu tokwafe jume kofaya hime gali mëglëyome. ¹³ Weye. Këha melë asa ele. Matëbe. Ju tako salë hi wesibi sagli eglëlena, kwe ju wesibi jwa enëneme na yage tabo enëneme na naba titiki tabo enëneme gali elagumeme, kë salë hi wesibi hime migisiya namëglame. ¹⁴ Këha enëne jume kofaya hi mëglelëyobëme hana gali möglëyome. Këme nëgëme ju safleflesu ele. Tokwafe, Goto bu lale enëneme matëmatë life mago huhuju logotomebë olëna, kwe bu wesibi jume kofayame lëglëme."

Tako salë hi wesibi waflë gali

¹⁵ Na ho li, Jisas buna kë hi mëtlabë, kë gali aholokwane tle na Jisame gali tole, "Tokwafe, Goto, onehobë eso home kë tafa lëgletëmebë life mëta kë hi mëglabë oneho, bu fle-flesu mëglame." ¹⁶ Kwe Jisas mewafle gali tle, "Ho li tako salë hi wesibi sagli lëglëleme. Na bu feilawa one-home gali tuku təkoutëme, tokwafe migisitla namëglame. ¹⁷ Na tokwafe kë tako salë hi wesibi olë fata tle. Na bu bubë wege home jine tlële ëbame kë gali toglomebë onehome, megali nalugujelëmeme, 'Sobo esijomo. Olë ekë fata lëleo. Salë hi wesibi iniwa wasagli lëlële.' ¹⁸ Kwe iniwa bu megali mëtla, 'Sebo hana nigisiyamo.' Ho li gali tle, 'Bo balitina nuju wahi-hijika telë na bo kë nuju hwime nuguwimo. Masiwafe, bo kë salëme hana nigisime.' ¹⁹ Na ho li gali tle, 'Bo jowafe we bulmakau kleli balitina waglo telë na bo bubë afutuku hwime nuguwitemëmefe. Masiwafe, bo kë salëme hana nigisime.' ²⁰ Na

ho li gali tle, 'Bo mëse tokwafe sei nëlëfe na këme nëgëme kë salëme hana nigisime.'

²¹ Na kwe kë wege ho, kë enënebë gali bubë eso home gali tujuwelële. Na bu kë gali aholokwane tle na tako enisusu metle na bubë wege home gali tole, 'Ju hokweinawa kë lifatebë tokwëtokwë alëge elë na tatako alëge elë eiju. Na ju wesibi jwa enëneme na tëbo atona enëneme na kiju tëbona enëneme na naba titiki tabo enëneme nëno eouleme na elesume tenëme na bobë lowa elelëkakime tenëme.'

²² Na kwe kë wege ho melë tle, bu fene gali tle. Na bubë eso home gali tole, 'Eso ho, bo melë wanelë ju fene gali ele kwe oneho lo ke hana mla.' ²³ Na eso ho bume gali tole, 'Ju ebë lifate tako kile eleme na waluju life elëme asë ebelëfame. Na ju one-home hwi elomena ju bume anisasana sagali elome, bobë lowa migisiya namëglame. Bo metole nanelë, bobë lo ke nalëgleme. ²⁴ Bo jume megali nolë, ëbame bo kë gali toglomëbë oneho, bu bo kë sagli nëglëlëbë hi wesibi hana hi mëglame.'"

Ho bu afina lowene sle lëleme na Jisame mana esogo lëlelëleme

²⁵ Lebutako oneho bu Jisana asë mëtla na Jisas swaya tletëme na gali tlome, ²⁶ "Ho bobë lowene esogo home fatame tole lëglëna, bu bome tako tolewa salëletënë na bubë bolijaya, bota, no, bolijahani, bomoluni, bolijamoniname tokwëfo tolewa salëletëme na bubë atome tokwëfo tolewa salëletle. Bu melë hana lëglëna kwe bu bobë lowene esogo home hana fata lëgleme. ²⁷ Ho bu bobë lowene esogo home fatame tole lëglëna, kwe melowene lëglëna, 'Bo Jisame esogo nëglëlëläna kwe ho bome tëbo mëgëtaname,' kwe bubë ato uli lëglëläna, na fli hobë wame galime uli lëglëna na glime uli lëglëna kwe këha ho bu bobë lowene esogo home hana fata lëgleme.

²⁸ Ho bu kabana lo glijime tole lëglëna, bu kë lo gliji baliti afina melowene sle lëletëmeme, 'Bobë baliti

kaba nijine o hanane? Bo ebë balitina lo yawe noglolëmene o hanane?"
²⁹ Bu melë hana lëglena, na bubë baliti yawe loglomena, na bu lo hana yawe loglolena kwe oneho bume sasonatlëtlë memogotlamemu. ³⁰ Na bu megali moglolame, 'Hwi elolo. Ebë ho bu lo yafe gliji lële kwe yawe hana lolole.'

³¹ Li lifate mago eso ho bu li lifatewa wameme lugujume fene kwe bu afina lowene fa sle lotleme, 'Bobë lifate mago wame home boblo mogotomabë enëne tëlewamufe kwe bubë wame home boblo mogotomabë enëne feilawamufe. Sebo bume boblo nogotomamene o hanane?'

³² Na bu melowene lëglena, 'Sebo bume hana boblo nogotomamefe,' kwe bu melë lëgleme, bume wame moglolabë ho kakë mana neme, kwe bu fli home afina kë lifatebë eso ho belë mana jine lelëkakëmeme, aisenë hi namëglame.

³³ Na kë fenene, somago ho li bubë iniwa wesibi aholokwana hana ti lëglena kwe bu bobë lowene esogo home hana tafa lëgleme."

Iji jwa kë mëglabë këjibë waflë gali

³⁴ Këji lale wesibi mu. Kwe këji iji tëbo mëglena, sebo habelë nogotomamene na ita iji namëgletëname? Hananefe. ³⁵ Këha iji jwa këji bu hi wesibi hana sle motomeme watëbomu mële. Sebo sike manëkaka. Sobo ebë gali aholokwane egelona, lowene sle eletelome.

15

Sipsip kleli kë flawei tëglebë waflë gali

¹ Takis baliti kë glo mëglekefëyabë ho na fli tëbo lowene kë esogo mëglelëlabë enëne bu Jisas belë loliwa mitisitla, bubë gali aholokwane namoglolame. ² Na Farisi hona, Gotobë galime okokwe moglomabë hona wame gali mëtla, "Kë ho bu tëbo lowene kë esogo mëglelëlabë enënena fëyeme yonane lëlelëmene? Na buna fëyeme hi mëlekefëyane?"

³ Jisas bubë gali aholokwane tlome na bu ebë waflë gali këme gali tlome,
⁴ "So mago ho li, we ljuafe we sipsip kleli lëglëmene, na jowa flawei lëgletlena, bo melowene nanelë, bu fli 99 sipsip kleli tako ona mëta hune lëleme na flawei kë lëgletlebë sipsip kleli mana hohwi lëtagutleme. Hohwi lëtagutlebë na hwinaloko lujelëleme. ⁵ Bu sipsip hwi lolole na feiji mëta gwa lowetleme na mana bubë lifekuwa fleflesuna lehileme. ⁶ Bu lifekuwa lehileme, na bubë yabe name, weife mago enënename gali lëlagumeme, migisitla namëglame. Na bu misitlame, na bume gali lolomeme, 'Bobë sipsip kleli li flawei tëglebë ho ita wahwi nolölë. Sobo bona weife iniwa fleflesu nëla.'" ⁷ Na Jisas megali tle, "Bo some gali nolëyo, tëbo lowene kë esogo lëglelëlebë ho, bubë tëbo lowene aholokwana ti lëglena na Gotobë lale lowenewa esogo lëglelëtlena kwe heven life mëta kë tafa mëglabë ensel, bu tako fleflesumu mëglame, sipsip kleli kë hwi toglolebë ho fene fleflesu tle. Kwe 99 enëne bu melowene mëglana, 'Sebobë lowene lalowa lëbetëname, sebo sebobë tëbo loweneme ita hana gëgali nëglamefe,' kwe heven life mëta kë tafa mëglabë ensel, bu tokwëfo fleflesuwa mëgletëmame."

Baliti kë flawei eglabë waflë gali

⁸ Na Jisas ita gali tle, "Mëse libë baliti we kënji mëgëbetëna na jowa flawei eglatëna, bu habelë eglēmene? Kwe bu esi fiji etole na iseku enijina lo mago obo sle etagule na kë baliti mana hohwi etatë. Bu hohwi etatëbë na mana hwinaloko meeolë. ⁹ Bubë baliti wahwi eolë na bubë yabe name, weife mago enënename gali elome, migisitëya namëglame. Na bu misitëya. Na bume gali elome, 'Sobo bona iniwa fleflesu nanëglame. Bobë baliti flawei eglabë, bo ita wahwi nolë.'" ¹⁰ Na Jisas gali tle, "Bo some gali nolëyo, tëbo lowene kë esogo lëglelëlebë ho, bubë tëbo lowene aholokwana ti lëglena na Gotobë lale lowenewa esogo sle lëglelëtlena kwe

Gotobë ensel bu tako fleflesumu mëgletlame, baliti kë hwi toglëbë mëse fene fleflesu tle.”

Falake nëba bolijayame kë kile togotlebë waflë gali

¹¹ Na Jisas megali latle, “Ho li iko nëbale tële. ¹² Na nagi fu nëba bolijayame gali tlole, ‘Aya, bo walowene nelë, ju glime nounou lale, kwe jubë iniwa wesibi seme afana mana fufu egotometëname. Kwe bo metole nanelë, bobë wesibiye, eliwamu eglënëme. Tokwafe kwe matëbe.’ Na këme bolijaya bubë iniwa wesibi tlemalë nëbaleme fufu totometëme na tlëme. ¹³ Tako tafa hana tle, na nagifu nëba, bubë iniwa wesibi balitina hihijika tle. Na bu kë baliti glo tle na kakë lifatewa këna tuju na këme tafa tule. Bu tafa tugulebëë, na memelë tëbo wesibi fafa totle. Na bubë iniwa baliti kë mëta yawe tlome. ¹⁴ Bu baliti wayawe tlome, na kë life mëta, tako fone mana fata tletëme. Kë fone mëta tafa mëtëglabëë na bu foneme ëjeha gli lëleme. ¹⁵ Këme nëgëme, na bu wegëme hohwi tëtagwi. Na kë life mago ho li bubë luku lëglëmetlebë wege fame jine tlële. ¹⁶ Kë luku bu alima jibo hihi mëtlekëfe, na kë falake kë alima jibo hime tako tole latle, bubë imo këna tëtafu nalëgëtame bu foneme tako glimu latle. Kwe ho bume hi wesibi hana mëtlëla. Hanane mu.

¹⁷ Na tokwafe bu lowene fa totle na gali tle, ‘Bobë ayabë wegeho bu kwe feilawa hi wesibi mu mëbetëme, kwe bo foneme kwe gli nelë. ¹⁸ Bo eme hana tafa nëgelëme. Matëbemu. Ita aya belë nuguwime na bume gali nololëme, “Aya, bo Gotome tëbo lowenena watëbo totlë na jume mata watëbo tëtë. ¹⁹ Bo lale ho nane ju bome mefë kë egëtanëme, bobë nëba. Matëbe. Ju bome melë egëtanëme, jubë wegeho fenene.” ²⁰ Na kwe bu kë mago, fowa tokokebë na bolijaya belë tuju.

Bu kakë mana asë tëkeke, na bolijaya hwi telokwakle. Na tako maninibo metletle. Na fëkawa tokoutlebë na lahwëwa tlële na këme

sësle totle na ahino momotlë tletle. ²¹ Na bowene këme gali tlole, ‘Aya, bo Gotome tëbo lowenena watëbo totlë na jume mata watëbo tëtë. Bo lale ho nane ju bome mefë kë egëtanëme, “Bobë nëba.” Matëbe.’ ²² Kwe bolijaya bubë wege home gali tlome, ‘Sobo hokweinawa lale heletabo ëho ehilo na bume gelo etatelome. Na toba baliti lale, toba mëta ehwatelome, na juba jibo mata ehotelome. ²³ Na sobo bobë lale bulmakau nëba elesulome na tëke elolome. Sebo hi nanëglame na fleflesu nëlame. ²⁴ Bobë nëba leboha tëgletenëme nëgëme kwe bu mana ekë lëtabetenë. Bu waflawei tlita kwe sebo ita ekë hwi nolola.’ Na kwe bu hi mëtla na tako fleflesu memëtla.

²⁵ Na kë nalë, abwa nëba nuju mëta mana nuje. Na bu nuju mago tisi, na lolime tlibe na mana fleflesu kë mëtletlabë sawa lego aholokwane tlome. ²⁶ Na këme li wege home we tlole na takune tlole, ‘Kë fëye legone? Fëye mëlane?’ ²⁷ Na wege ho këme gali tlole, ‘Blijamo wafi lisiyo. Na blijaya lale bulmakau kleli nëba walemitle. Bu boweneme tako fleflesu lalëletle, bu ita ligisi tleme nëgëme na lalowa tutabetle.’

²⁸ Abwa nëba kë gali aholokwane tle na tako enisusu metletle na lowa hana tëkaklu. Na bolijaya tëkaklitle na lale lale galina yafe gali tlole, bubë lowene tli nalëgëbetleme fene. ²⁹ Kwe bu bolijayame kofaya gali tlole, ‘Fëyemene? Wege hoha, jubë wege feilawa tlibutu fa tëtakefëtë. Na bo jubë gali momata hana tëtatë. Kwe ju bome mëmë kleli nëba tokwëfoha hana yo tlonë bobë yabenime këna fleflesu nanëglelëmëme. Hanane mu. ³⁰ Kwe jubë nëba kë nëgebëye, jubë baliti lisei oneme fwa yawe tlometëme. Kwe ëje bu lisi na ju bume fëyeme fleflesu eletlene na lale bulmakau kleli nëba fëyeme emitlene?’

³¹ Na bolijaya bume gali tlole, ‘Hëyai! Ju itaita bonawa nëtabekefo. Na bobë iniwa wesibi kë nëgebëye, ebë jubëwa. ³² Kwe sebo eliye, blijamome fleflesu nëgletlabë olë.

Jubë blijamo leboha tëgleme nēgeme kwe bu mana lētabe. Bu waflawei tilita kwe sebo ita ekē hwi nolola.”

16

Ululu sle logotomebē hobē waflē gali

¹ Jisas bubē lowene esogo mēglelētābē home gali tlole, “Ētani, lebutako balitina ho, bubē wege ho jowa tafa tletle. Kē wege ho, kē lebutako balitina hobē wesibi ululu sle totokwefēmetle. Na fli ho kē lebutako balitina ho belē mitisitla na bubē wesibi ululu sle logotomebē hobē wegeme metētāhē lamētlēla, ‘Jubē wesibi ululu sle logotomebē ho, jubē wesibi fli blawa sisile lotometē.’ ² Kēme nēgeme kē lebutako balitina ho bubē wesibi ululu sle logotomebē home gali telokwakle, ligisi nalēgleme. Na bu loliwa tisi tle, na mana bume gali tlole, ‘Bo ebē gali kē aholokwane nēgletēbē, ju fēye tlene? Bobē iniwa wesibi, ju mēta mana mēgēbena, tabei elēme na laba mēta yahi elēme. Ju bobē wesibi ululu sle egotomebē home hana tafa egleme.’

³ Na kwe kē ululu sle logotomebē ho mana melowene tle, ‘Bo habelē nēgelēmene? Bobē wege eso ho, bome ebē ululu sle wegebē mago hehē lēgletenēmefe. Bo life yefi wegebē fa nogotlēmefene, kwe bo kēha afutuku hana lēbetenē. Na bo fli onehome balitime na fli wesibime gēgēba noglomēbēme tiniji nanēletemē.

⁴ Kwe bo wesibi wafi lowene nelē. Bo kē wesibi nēgelēna kwe tokwafe, bobē wege eso ho bu bome hehē lēgletenēna kwe fli ho bome bubē lowa no mēglēname.’ ⁵ Kēme nēgeme, bubē wege eso hobē mago, wesibi manawa kē glo mētletābē home gali telokwakēme, migisi tla namēglame. Jowa ho bu belē afina tisi tle na kē ululu sle logotomebē ho takune tlole, ‘Ju manawa, bobē wege eso hobē mago, habenuju wesibi glo tlenē?’ ⁶ Na bu gali tle, ‘Bo we lujuafe we ēflēbo tu manogwa dram glo telē.’ Na kē ululu sle logotomebē

ho gali tlole, ‘Jubē manawa wesibi weniji kē gogwa mētletēyobē laba tuku ekakeme na tiho laba mēta hokweinawa meyahi elēme, 50 dram ēflēbo tu.’ ⁷ Tokwafe li ho bu belē tisi tle na bume takune tlole, ‘Ju manawa, bobē wege eso hobē mago, habenuju wesibi glo tlenē?’ Na bu gali tle, ‘Bo we lujuafe we witi liji manogwa iseku glo telē.’ Na kē ululu sle logotomebē ho gali tlole, ‘Jubē manawa wesibi weniji kē gogwa mētletēyobē laba tuku ekakeme na tiho laba mēta hokweinawa meyahi elēme, 80 witi liji manogwa iseku.’

⁸ Tokwafe, wege eso ho, bubē wesibi ululu sle logotomebē ho kētēglebē wesibi hwi toglometlena kwe bu kē tēbo wege hobēme fleflesu tletle na kēme bibita totle. Wesibi kē wege ho melē kētēglebē, bu tako lowenena hobē lowenēha nēgeme. Ebē life mago wesibime fwa, tako lowene kē mēgletēmabē oneho, bubē wege wege mēglabēme, tako lowene slemu lamēletēma. Kwe Gotobē lowene mēta kē mētabēyabē oneho bubē wege wege mēglabēme tokwēfo lowene lamēletēma.

⁹ Bo some gali nolēyo, sobo ebē life magobē baliti, wesibi jwa enēneme elēmo, sobobē yabe tafa namēgletēyome. Na tokwafe kē baliti glo mēglabē olē yawe lēglēna, Goto na bubē ensel some unaunalēme tafa mēglabē lowa nēno mēglame.

¹⁰ Bo some gali nēlēyo, ho tokwētōkwē wesibi ululu sle logotokwefēmēna kwe tokwafe bu tatako wesibi mata ululu sle logotomeme. Ho li tokwētōkwē wesibi laboweli logotomena kwe tokwafe tatako wesibi mata melaboweli logotomeme. ¹¹ Sobo ebē life mago baliti ululu sle jwa egotomona, kwe Goto bu some heven life mago lale wesibi ululu slebē habēna lēglēyomene? Weye. Hanane mu. ¹² Na sobo fli enēnebē wesibi ululu sle jwa egotomona kwe sobo sobobē wesibi mata ululu sle hana egotomome.

¹³ Wege enēne bu tēle eso home hana wege mēgletēmame. Bu melē

mëglana kwe bu li eso home fwa tole sle mletlame na lime kwe tëbojiwa moglolame. Bu li eso hobë galiwa aholokwane mololame kwe lime kwe tëbojiwa mletlame. Sobo tële lowene hana esogo eglelëmome. Sobo Goto lowene egletelobë lowene na baliti fa egotobë lowene sobo këna hana sago egotomome.”

Jisas bu fli gali mata të tētātēme

¹⁴ Farisi ho bu baliti tako tole lamëtletēma. Kēme nēgeme bu Jisas kë gali tëglebë gali aholokwane motlola, na bu Jisame sasonatlētē memototla. ¹⁵ Kwe Jisas bume gali tlome, “Sobo metole lalo, oneho some melowene namēgletēyome, ‘Bu lale lowenewa esogo mëglelëlabë hofe.’ Kwe Goto bu sobobë tëbo lowene wahwi lolotēyo. Iniwa wesibi oneho melowene mëgletēmame, ‘Lale wesibi mu,’ kwe Goto bu kë wesibime melowene lalële, ‘Tëbo wesibi mu.’”

¹⁶ Jisas gali tle, “Jon bu fata jwa tēglena, kwe bu Mosesbë gali na Gotobë lowene mago gali të mototokwe-flabë hobë galiwa të mētētakefētēma na bu kë galiwa esogo mētletētēma. Kwe Jon bu wafata tle na ebë olëna, Goto, onehobë eso home kë tafa lēgletēmebë lale gali të mētagutēma. Na oneho bu Goto, onehobë eso home kë tafa lēgletēmebë lifate elë mëkaklujame këkë lamla.

¹⁷ Matafana, lifena kwe tëbo mëgleme, kwe Gotobë gali kwe iniwa hana tëbo lēgletleme.”

Jisas one hehë lowenebëme gali tle

¹⁸ Na bume ita gali tlome, “Ho, nome hehë lēgletēna na li mëseme sei lēglëna, kwe kë ho bu lisei lowene mëta lētabe. Na ho, li ho kë hehë lēgletëbë mëse sei lēglëna, kwe kë ho bu mata lisei lowene mëta lētabe.”

Ebë tako baliti musuna ho na Lasarusnabë gali

¹⁹ Jisas megali tle, “Ètani tako baliti musuna ho tētabe. Na olëli olëli bu lale lale èhomu tehokëfe. Na olëli olëli bu feilawa lale lale hi wesibiwa hi tlekëfe. ²⁰⁻²¹ Na wesibi jwa ho bu kë tako baliti musuna hobë lo ino èfo

li mëta ni tëbekëfe. Kë wesibi jwa hobë weniji Lasarus. Bu melëme tole tle, kë tako baliti musuna hobë masei mago kë luklu mëglekëfebë hi wesibi obobo hi nalëgleme fene. Bubë ato juba jubawa. Na amale bubë juba ololë lamototokwefëmetle.

²² Tokwafe kë wesibi jwa ho gli tle. Na ensel bume heven lifewa mitilekole na Abraham belë sei motowelile. Na kë tako baliti musu na ho mata gli tle. Na matēmatē mutujuwetla. ²³ Na bu hel life mëta tototabe na tako elili mëta tētabe. Na bu Abrahamme hwi towelëkakle. Na Lasarus buna mētētabo. ²⁴ Na kwe, tako baliti musuna ho we towelëkakle, ‘O semle Abraham, ju bome maninibo eletenë. Ju Lasarusme gali elole, bubë toba ku, tu mëta flu lowetleme na lēhitenëme bobë aleji mëta gwa nalētatenëme, tli nalëgëbetenëme. Bo ebë ahoju mëta nēgëtabëbë na bo tako elilimu mëta nētabëfe.’

²⁵ Kwe Abraham gali tle, ‘O hëyai. Ju wesibi lowene sle eletle. Ju atomuna mana tafa tēglena, kwe ju feilawa lale lale wesibi mëta tētabe kwe Lasarus bu feilawa tetëbo wesibi mëta tētabe. Kwe ebë olëna, bu fleflesu mëta lētabe na ju elili mëta etabe. ²⁶ Na li wesibi mētabo. Sebobë ku mëta, Goto tako luju blëge totle. Kēme nēgeme, oneho sebona kë tafa nēglabë, bu kë tako luju sobelë habëna su mëkakitēyomene? Hanane mu. Na oneho juna kë tafa egelobë bu kë luju sebelë habëna su mëkakijamene? Hanane mu.’

²⁷ Na tako baliti musuna ho gali tle, ‘Bu këha nēgebë, kwe, semle, bo jume takune nolë, ju Lasarusme bobë ayabë lowa lalowa jine egelëkakëlemene? ²⁸ Bobë keinëbalenino tobali. Na Lasarus bume anisasana sagali lolome, bubë tëbo lowene hihijika melame na aholokwana ti melame. Bu kë elili lifate tëbo elëme nagi migisiyalime.’ ²⁹ Kwe Abraham gali tle, ‘Mosesbë gali na Gotobë lowene mago gali të mototokwe-flabë hobë gali mana mëbetëme. Jubë blijamoni kë gali

lalowa aholokwane mëglame.’³⁰ Na tako baliti musuna ho gali tle, ‘O semle, Abraham, bu kwe hanane. Kwe ho bu matëmatë mago huju lëglena na bume luguju tëmena, kwe bubë tëbo lowene lalowa hihijika melame na aholokwana ti melame.’

³¹ Kwe Abraham bume gali tlole, ‘Bu Mosesbë gali na Gotobë lowene mago gali të mototokweflabë hobë gali, aholokwane jwa mëglekefëyana, kwe matëmatë mago huju lëglebë hobë gali mëtabo hana aholokwane moglolame. Bubë tëbo lowene hana hihijika mëglame na aholokwana ti hana mëglame.’”

17

Tëbo lowene onehobë, lale lowene sisile lëtatëme

¹ Jisas bubë lowene esogo mëglelëtlabë home gali tlole, “Memelë wesibi onehome fata mëgletëmeme, bume tëbo lowene belë ki namëkakeme. Kwe ho bu li home tëbo lowene belë ki lëkakena kwe masiwafe, Goto kë home tëbo logotlememu. ² Oneho bome tokwafe lowene sle mëgletë nabë, ho li bume tëbo lowene belë ki lëkakena kwe ebë tëbo wesibimu. Kwe Goto kë home tako tëbo logotlememu. Kwe fli ho, kë home afina tako aniji mou mëta kesi mëtatlabë na bume nutuwa tuku mëtëkakabë na bu tu mëta suglu lëglebë kë kwe lalowa. Bu kë onehome tëbo lowene belë kiki hana lëkakeme na Goto bume hana tëbo logotleme. Këme nëgame sobo ululu sle saelo.”

³ “Sobo bome kë lowene sle egletë nabë oneho, somago ho li tëbo lowene mëta litigona kwe sobo eyeutelome na bubë tëbo lowene sle etatelome. Bu kë tëbo lowene aholokwana ti lëglena kwe sobo bubë tëbo lowene aholokwana ti egletelome. ⁴ Na bu jume jowa olëna tobali ita tëlafe tëbo lëgëtakefëna na jume tobali ita tëlafe lisikefëtëna na jume megali lolokwefëme, ‘Masiwafe. Bo tëbo ho. Bo jume tëbo nanëtakefë ebë olëna.’ Kwe ju bubë tëbo lowene aholokwana ti eletleme.”

Gotome lowene sle nëgletlabëme Jisas gali tle

⁵ Na Jisas bubë gali tëme kë jine tëglëmebë ho, bume gali motlola, “Ju seme aitana, Gotome kë lowene nëgletlabë lowene takowa nalëgëbetëname.” ⁶ Na Jisas bume gali tlole, “Sobo Gotome kë lowene egletelobë lowene bu tokwëfowa nëgena, aoba liji tokwëfo fenene, kwe sobo tako wesibi lalowa egotlome. Sobo time megali eglolona, ‘Ju fli elëme na nutu mëta ejuwelëbeme,’ kwe kë ti sobobë gali esogo lëglelëtëyome.”

Lale wege hobëme Jisas gali tle

⁷ “So mago ho li, bubë wege home, nuju wegeme o sipsip kleli lëglëmeme jine lëglëlena na bu wegeme lugujuna na bubë eso ho belë ita ligisina, bubë eso ho bume megali hana logloleme, ‘Ju hokweinawa tafa elëme na hi elëme.’ ⁸ Weye. Bubë wege home megali logloleme, ‘Ju bobë hi wesibi ahajume eletenëme na kë hi wesibi mana glo eletenëme. Bo afina hi nelëme na ju mana hi egleme.’ ⁹ Na kë wege ho bubë eso hobë gali esogo lëglelëtlena kwe kë eso ho bubë wege home yaha gali hana logloleme. Hanane. ¹⁰ Këme nëgame sobo mata, sobo iniwa wesibi Goto some fene gali tolëyo waegelona kwe sobo megali saelo, ‘Sebo wege howa. Goto seme kë gali toglonabë wege, kë wegewa wawege tla. Këme nëgame Goto bu seme yaha gali hana logloname.’”

Welujuwa ato juba jubawa home Jisas sle totome

¹¹ Jisas Jerusalem lifatewa tugu-jubë na bu Samaria provins jelëme na Galili provins jelëme na kë ku kuwa tuju. ¹² Bu li lifatewa fwa tule na ato juba jubawa kë mëtehwëyabë welujuwa ho, bume alëge mëta esune mëtlëla. Bu kakëwa mëtelëkwëya, ¹³ na Jisame feilawa we mëtelokwakla, “Jisas, tako ho, ju seme maninibo eletëna.” ¹⁴ Jisas bume hwi telokwakëme na gali tlole, “Sobo sobobë ato lotu lome wege lëglebë home

lebotane ëjuwetëmetelo, bu mehwi naloglëyome sobobë ato juba juba jwa mëbetëyo.” Na kwe, bu mutujabë na bubë ato juba lalowa mëtletëme. ¹⁵ Na bu mago ho li, bubë ato mehwi togloleme nëgeme lalewa lëbetenëfe na bu alëgeme lu tule na miti nagi tuju. Na bu Gotome feilawamu fleflesu tletle na bibita totle. ¹⁶ Bu Jisame esune tlële na bubë elebo li mëta latitigo tlewa na bume gali tole, “Yaha fëyeme sle etanëne?” Na kë ho bu Samaria provins mago ho. (Samaria provins mago enëne bu Israelbë afenëbonina yonane hana mëtlelogwaya.) ¹⁷ Jisas kë home hwi tole na gali tole, “Bo melowene nanelë bo ëje welujuwa home sle notomë fene. Na fli tobali ita nilinabëye, hameta mëtabëyane? ¹⁸ Ebë ho bu Israelbë afenëboni nane kwe buwa fëyeme lu lulene Gotome fleflesu nalëgletleme na bibita lotleme? Kwe Israelbë afenëboni fli bu ita lulu jwa fëyeme mëlane?” ¹⁹ Na Jisas kë home gali tole, “Ju huju elëme na ejume. Ju bome lowene sle egletenëme nëgeme, jubë ato lalowa këme lëbetë.”

Goto onehobë eso home tafa lëgletëmebë olë fata lëgleme nounou lalële

²⁰ Farisi ho bu Jisame takune motlola, “Goto onehobë eso home habenalë tafa lëgletëmemene?” Na Jisas bubë gali tafu tëtätëme, “Goto onehobë eso home kë tafa lëgletëmebë, sobo nabana hwi eglobë wesibi nane. ²¹ Na bu megali hana mëglame, ‘Hwi elo, ekë lëbe’ o ‘Hwi elo, ekë lube.’ Weyewa. Sobo aholokwane elo. Goto onehobë eso home kë tafa lëgletëmebë, bu sobobë ku mëta walëtabetëyo.”

²² Na Jisas bubë lowene esogo mëglelëtlabë home gali tole, “Tokwafe bo, Gotobë life mago ho, tako afutukuna këna nigisibë olë hwime sobo tako tole egletelome. Kwe sobo kë olë hwi hana eglobome. ²³ Na bu some megali moglëyome,

‘Hwi elo. Gotobë life mago ho ita walisi na bu ebelë ekë lutabë’ o ‘Hwi elo. Bu eme ekë lëtabe.’ Kwe sobo bubë gali asa aholokwane elotemo. ²⁴ Sobo wawaine walowene eletelo, wawaine lëglena kwe iniwa oneho mehwi mlagula. Na kë fenene, bo, Gotobë life mago ho, bo nigisina kwe iniwa oneho bome mehwi mëglaguname, wawaine fene hwi mlagula. ²⁵ Kwe oneho ebë olëna kë tafa mëglabë, bu afina bome tako elili gwa mëtatëname na hehë mëletëname.

²⁶ Ètani, Noabë olëna, oneho fene mëtla, kwe bo, Gotobë life mago ho, bo nigisibë olëna, bu kë esona melë mëglame. ²⁷ Ètani Noabë olëna bu melë lamëtla, bu memelë wesibi monei monei mëtlekefëyabëë, na one sesei sesei mëtlabë na mana Noa tako sibu lowa tëkaklu. Na tako haliji tu fuflu totome na iniwa oneho këhaliji tu mëta susuglu mëtla. ²⁸ Na Lotbë olëna, oneho bu Noabë olëna fene mëtla bu këha melë lamëtla. Bu memelë wesibi monei monei mëtlekefëyabëë na bu wesibi balitina hihijika mëtlekefëyabë, na bu nuju toba tobalo mëtlekefëyabë, na lo gigliji gigliji mëtlekefëyabë, ²⁹ na mana Lot bu Sodom lifate kile tle na kë nalëwa anusesi ahojuha to tëtëkeketëme, na Sodom life mago onehome kë ahoju iniwa latemuwa totome. ³⁰ Na kë oneho fene mëtlekefëya, kwe bo, Gotobë life mago ho, bo këna ita nigisibë olë mata, bu melë mëglekefëyame. Bubë wesibiwa lowene mëgletëmame. Na Gotome lowene mëgletlabë lowene hana lowene mëgletlame.

³¹ Kë nalë, ho li lo sebatì mëta lëtabena, kwe bu lowa bubë wesibi glome asa malëkaklu. Weye. Bu kë magowa hokweinawa lalëglëboukakuwa. Na kë fenene, ho nuju mëta tafa lëglena bu lowa asa maluju. Matëbe. Bu kë magowa lalëglëboukakuwa. ³² Sobo Lotbë mëseme kë fata tëgletëbë tëbo wesibi lowene eletelo.* ³³ Ho bu melowene

* **17:32** Bu melë latle. Bu bubë wesibi kë hune tëglebëme lowene tletëme na miti nagi swaya tekake na Goto bume tëbo tëtamë.

lëglena, ‘Bo Jisame esogo nëglelëläna fli ho bu bome tēbo mēgētaname.’ Na bu, bubē ato uli lëglelëläna na bome hana esogo lëglenëñëna, kwe këha ho bu tēbo liglitame. Kwe ho bu bome lowene sle lëgletenëna na bubē ato uli jwa lëglelëläna kwe këha ho bu hana tēbo liglitame. Ho bu kë home mogo nalë tēke moglolana, kwe kë ho gli sle nane lële. Weye. Bu unaunalëme lale tafa lëgleme.

³⁴ Bo some gali nolëyo, bo këna nigisibë klabë, tlemalë ho hwëna ni mebome, na Goto lime fwa no lëläleme na lime kwe kile lëleme. ³⁵⁻³⁶ Na tlemalë one nage labume mëtabome na Goto lime fwa no lëleme na lime kwe kile lëleme.”† ³⁷ Na bubē lowene esogo mëglelëtlabë ho, Jisame takune motlola, “Kë tēbo wesibi hameta fata lëglemene?” Na Jisas bume gali tlome, “Sobo fotë bota jiji mëglena hwi eglomona kwe sobo melowene elo, ‘Wesibi mogo këme lebo.’ Na kë fenene, sobo tokwafe wesibi hwi eglomome na melowene elome, ‘Kë tēbo wesibi këme fata lëgleme.’”

18

Ebë onehobë gali aholokwane loglomebë hobë na seiju mësenabë wafle gali

¹ Jisas bubē lowene esogo mëglelëtlabë home, li wafle galime gali tlome, bume meokokwe naloglomeme, bu Gotome itaita gali moglokefla namëglame na tēbojiwa jwa namëglame. ² Bu megali latle, “Li lifate mëta, onehobë gali aholokwane loglomebë ho këme tētabe. Kë ho bu Gotome uli hana tletle na bubē gali aholokwaneme momata latlokweftle na onehome mata tole hana tletëme. ³ Na seiju mëse li bu kë lifate mëta mata tētabe. Na bu kë gali aholokwane loglomebë home itaita tisikeftle na gali tole, ‘Bome wame loglonëbë ho, bome tēbo lëgētanëme ekëne. Ju bome ebë

hobota sleme saaitanë.’ ⁴ Èbame kë ho, kë mësebë galime iweniji latlekeftë, kwe tokwafe bu melowene latle, ‘Bo Gotome momata nanotokwefle na bubē gali aholokwane hana nolokwefle na onehome mata momata nanotokwefëmë. ⁵ Kwe bo këha seiju mëseme uli nanëletë. Bome itaita sosalë latakefënë. Bo melowene nanelë, bo bubë hobota sasle nētatë. Bo bume nēgaitëme. Bo bume nēgaitë jwa nēgena kwe bu bo belë itaita egisikëfeme na bu bome feilawa sosalë etakefënëlime.”

⁶ Na Jisas megali tle, “Sobo kë gali aholokwane loglomebë tēbo hobë gali lowene sle eletelo. Kë seiju mëse bume itaita yena takune tlokwefle na bume mana taitamë. ⁷ Na sobo melowene lalone? ‘Goto bubë oneho, iniwa olëna klabë yena kë gëgali moglokweflabë hana lëgaitamemene? Na totoko lëglemene?’ Weye. Hanane mu. ⁸ Bo some gali nolëyo. Bume hokweinawamu lëgaitameme. Kwe bo, Gotobë life mago ho, ebë lifewa ita nigisina, na bo onehome hwi noglokwakimëna, bu bome mana lowene sle mëletëna o hanane?”

Tlemalë ho Gotome gëgali mëglelëlobë wafle gali

⁹ Wali enëne bu melowene lamla, “Sebo kwe lale onehomu kwe fliye sebo fenene këha hanane, bu kwe tēbo oneho.” Na Jisas bu këha enëneme wafle galina megali tlome, ¹⁰ “Tlemalë ho bu Gotobë lowa mëtekaklujo, Gotome nagëgali mëglelëlome. Li bu Farisi ho, na liye bu takis baliti kë glo lëglekëfebë ho. ¹¹ Na kë Farisi ho bu hujuna tlibe na bubē lowene nawa Gotome gëgali tlelële, ‘O Goto bo fli hoha hanane. Weye. Bo kwe lale ho mu. Këme nëgeme bo jume këme gali nolë, “Yaha fëyemene.” Fli ho bu tokli tokli lamelekefëya, na tēbo lowene esogo mëlelëkefla na honaoneme lisei lisei mëglelëmabë. Kwe bo kwe hanane. Na bo takis baliti kë glo lëglekëfebë hoha nane.

† **17:35-36** Fli lowene ho bu melowene lamëtla, li gali mana lëbe kë gali mëta. Kë gali melë lëgëbelalële, “Na tlemalë nuju mëta wege melekefome na Goto lime fwa no lëläleme na lime kwe kile lëleme.”

Weye. ¹² Iniwa wiki, bo tële olë, hi wesibi hi jwa metafa nanëlekefë, jume fwa lowene nanëgletëme. Na bobë baliti na fli wesibi bo kë glo nëglekefëbë, bo melë nanëlekefë, bo welujuwa mëta fulelë fulelë nëlekefë, na jowa fulelë tabo jume nëlëkefë.’ ¹³ Kwe takis baliti kë glo lëglekëfëbë ho kakë tujuwelibe na bu heven lifewa hana hwi tokwake. Na bu tako maninibona yako mëta bu tle na Gotome gali tlole, ‘O Goto, bo tëbo ho mu, ju bome maninibo eletënë.’”

¹⁴ Na Jisas gali tle, “Bo some gali nëlëyo, kë takis baliti kë glo lëglekëfëbë ho bubë lowa ita lugujuna kwe buwa Gotobë naba lime lale ho lëtabeme. Kwe li ho kë kwe hanane. Iniwa oneho bu megali mëglana, ‘Sebo lale oneho mu,’ kwe Goto bume megali loglomeme, ‘Hanane, sobo tëbo enënemu.’ Kwe iniwa oneho bu megali mëglana, ‘Sebo kwe lale enëne nane, sebo tëbo enënemu,’ kwe Goto bume megali loglomeme, ‘Sobo lale enëne.’”

Jisas gali tle, “Sobo nëbale lëkle asa etomo, bo belë matisiyao”

¹⁵ Oneho bu tatako na maba mago nëbale Jisas belë metlesumëtla. Bu metole lamëtla, Jisas bubë atome toba gogwa nalëgletëmeme na Gotome takune nalololeme, bume lëgaitame nalëgleme. Kwe Jisasbë lowene esogo mëglelëtlabë ho bume hwi motloma na wame gali motloma na lëkle mototoma, Jisame sosalë mogotlalime. ¹⁶ Kwe Jisas nëbaleme gali telokwakëme, bu belë migisitla namëglame. Na bubë lowene esogo mëglelëtlabë home gali tlome, “Sobo nëbale lëkle asa etomo. Bo belë matisiyao. Oneho Gotome lowene slemu mëgletlana, ebë nëbale fene lowene slemu mletla kwe Goto bubë eso home tafa lëgletëmeme. ¹⁷ Bo nëgali gali nanolëyo, ebëha nëbale bu Gotome lowene slemu lamletla. Na oneho bu Gotome lowene sle jwa mëgletlabë, ebëha nëbale fene lowene sle mletla, kwe Goto eso home kë tafa lëglebë lifatewa hana mëkaklujame. Hanane mu.”

Wesibi lebutakona eso ho Jisasna gëgali mëtelo

¹⁸ Na wesibi lebutakona eso ho li, Jisame takune tlole, “O Tisa, ju lale ho. Bo jume takune nolë. Bo habelë nëgelëmene, Gotona unaunalëme lale tafa nanëgelome?” ¹⁹ Na Jisas bume gali tlole, “Ju bome lale fë fëyeme etanëne? Ebë life mago ho bu lale nane, Goto buwa lalumu. ²⁰ Ju Gotobë gali walowene eletle. Bubë bogo megali lalamë, ‘Honaone na onenaho sobo lisei lowene mëta asa tafa elo. Sobo onehome mogo nalë asa tëtëke elo. Sobo tokli asa elo. Sobo sosogëna galina fli onehome blawa asa soso etatemo. Sobo bita name blijaya name boblo asa etomo. Bubë galiwa esogo eelëtemome.’” ²¹ Na kë ho Jisame gali tlole, “O Tisa. Bo tokwëfome nëgena bo këbë iniwa gali melë esogo tlagimë na bo ebë olëna mana esogo nëlelëmë.” ²² Jisas bubë gali aholokwane tlole na bume gali tlole, “Ju li loweneme mana afolo ele. Ju melë egleme. Jubë iniwa wesibi balitina hihijika eleme. Na kë baliti, wesibi jwa onehome sa etagutëmeme. Ju melë eglena kwe heven lifate mëta lale wesibimu lamëbetë. Na ju bome mana esogo elenënëme.” ²³ Kë ho kë gali yafe aholokwane tlole na bu witi tle. Bu lebutako wesibina ho nëgeme.

²⁴ Jisas kë home mehwi tlole, witi lalëlefe na gali tle, “Wesibi lebutakona enëne, Goto bubë eso home kë tafa lëgletëmëbëme, ebë kalëlego lalëletëme. ²⁵ Kamel kleli, bu ëho susu nili fulujuwa lëkaklume ebë sogë kalëlego lalële, kwe wesibi lebutakona enëne, Goto onehobë eso home kë tafa lëgletëmëbë lifatewa mëkaklujabëme ebë kalëlegomu lalëletëme.” ²⁶ Oneho bu kë gali aholokwane mëtlabë, na klelego memëtla na gali mëtla, “Këha melë nëgena, kwe Gotobë lifateme unaunalëme ya tafa lugulemene?” ²⁷ Na Jisas gali tle, “Oneho wesibi mogotoma jwa kë mëglabë, Goto bu kwe lalowa logotomeme.”

²⁸ Na Pita bume gali tlole, “Aholok-

wane ele! Sebobe lo na iniwa wesibi wahune tula na sebo jume ekë esogo nëlelëyo.”²⁹ Na Jisas gali tlome, “Bo nëgalimu nanelë. Oneho Goto, bubë eso home kë tafa lëgletëmebë lowenebëme, lowene mletlana bubë lo o nonino o bolijahani o bolijamoni o botamenino o bolijayani o nëbale hune mëglana,³⁰ kwe Goto bume lebutako wesibimu lëglëmeme. Bu ebë life mëta mana tafa mëglana, kwe Goto bume lebutako wesibimu lëglëmeme. Ètani kë hune mëtlabë wesibi bu tëlewaha kwe Goto bume kë lëglëmebë wesibi bu lebutakomu. Na tokwafe bu Gotona unaunalëme tafa mokocefëyame.”

Jisas bu gali tle, “Bo gli nëgelëme na huju nelëme”

³¹ Jisas bubë we ita tële lowene esogo mëglelëtlabë home mëglëbo elëme fo tlekekakëme na gali tlome, “Sobo aholokwane elo, sebo Jerusalem lifatewa ekë nuja. Ètani, Gotobë lowene mago gali të mototokweflabë ho, bu iniwa wesibi bu tokwafe bome, Gotobë life mago home, mefata mëgletenëbëme, Gotobë bogo mëta wayahi mëtletëna. Na eli kë wesibi bu iniyafemu bome mefata mëgletenëme.³² Na bu bome, Israelbë afenëboni mëtabëya jwa mëglabë enëneme yo moglomame. Na bu bome soso na tlë mëgëtaname na tëbojiwa mëgletëname na nagutabana kokose mogloname.³³ Na bome taba afona feilawa tëkle tëkle mëgëtaname na mogo nalë gwa mëtaname. Na bo matëmatë mëta tële olë nebëme, kwe aona olëbëye këna huju nëgelëme.³⁴ Kwe bubë lowene esogo mëglelëtlabë ho bu kë gali wayo lowene sle hana mëtletla. Kë gali wayo bume èhomu latletëme.”

Jisas bu naba titiki tabo hobë naba sle totometle

³⁵ Jisas, Jeriko lifate lololi totle na naba titiki tabo ho bu alëge mëglëbo li mëta tafa tle. Kë ho onehome balitime gëgëba latlokwefëme.³⁶ Na bu lebutako onehobë lëleguli lego aholokwane tlagime, na bu loli mago

onehome takune tlome, “Kë fëye mëlane?”³⁷ Na bume gali metafu mëtëtatla, “Nasaret life mago Jisas sigli lële.”³⁸ Na kwe kë naba titiki tabo ho, bu feilawa we telokwakle, “Jisas, Devitbë afenëbo, ju bome maninibo eletenë!”³⁹ Na motoutayabë enëne, bume wame gali motlola, “Ju kuju ebe.” Bu ita anisanamu we telokwakle, “Devitbë afenëbo, ju bome maninibo eletenë!”⁴⁰ Na Jisas këme tlikaku na gali telëkakeme, “Sobo kë home elesutëna.” Na bu loliwa tisi tle na Jisas bume takune tle,⁴¹ “Bo jume habelë nëgëtemene?” Na kë ho bume gali tle, “O tako ho, bo hwi nanëgelëme fene.”⁴² Na Jisas gali tle, “Ju hwi egleme. Ju bome lowene sle egletenëme nëgeme, jubë naba këme tika meletë.”⁴³ Na hokweinawa bubë naba latikawa mëtletle na bu hwi təkake. Na bu Jisame fleflesuna nagi tlële. Na Gotome mana fleflesu tokoutle na bibita tëttagule. Na iniwa oneho buna kë mutujabë kë wesibi hwi motlola na bu mata Gotome fleflesu mëtletla na bibita mototla.

19

Jisas Sakiusbë lowa tuju

¹ Na kwe Jisas Jeriko lifate elë fwa tule na lifate kukuwa kë lugu-jubë alëge, esogo tlagule.² Na ho li bu kë lifate mëta tafa tle bubë weniji Sakius. Bu takis baliti glo mëglekefëyabë eso ho. Na bu feilawa balitina tafa tle.³ Bu Jisame hwi naloglöleme fene, habëtabo hone? Kwe bu hwi hana tle. Bu afolo ho nëgeme na lebutako oneho lili-fuha memëtletla.⁴ Këme nëgeme bu afina fëka tokou na ti elë tokwale, kë magowa, Jisame hwi naloglöleme. Bu melowene latle, “Jisas eli ebë alëge elë ligisime.”⁵ Na kwe Jisas kë ti li elë fwa tule na hwi tokwake na Sakiusme hwi telokwakle na gali tle, “Sakius, ju hokweinawa kle ele. Eli sebo jubë lowa nëgëyeu nanëgelome.”⁶ Këme nëgeme hokweinawa laklewa tëtëkakettle na bu Jisame bubë lowa fleflesuna tlelule.⁷ Na iniwa ho kë

hwi motlolabë wame galina gëgali mëtla, “Bu tëbo lowene esogo lëglelebë hobë lo elë fëyeme lujune?”

⁸ Bu lo mëta tafa mëtelo na Sakius hujuna tlibe na Jisame gali tlole, “O tako ho. Eli bo bobë iniwa wesibi fu tële nogotomëme. Na jowa fulelë tabo, wesibi jwa enëneme sa nëgëtatëmëme. Na bo ho lime sogëna toglolëbë na bubë wesibi tokli tëgletelëbë kwe bo bume kofayame niliafe nëglëlë nëgelëme.” ⁹ Na Jisas bume gali tlole, “Èje, Goto bu ebë lo mago enëneme walaitame na bubë tëbo lowene mago wanëno lële. Kë ho bu mata Abrahambë afenëbo lëtabe. ¹⁰ Bo, Gotobë life mago ho, bo tëbo loweneme kë tafa mëglabë onehome hohwi nëtatëmë na bume nëgaitamëme na tëbo lowene mago nëno nanëgelëme. Bo këme tisi temë.”

Welujuwa wege hobë wafle gali

¹¹ Onoho bu Jisasbë gali mana aholokwane mëtlagulabëë na bu wafle gali olisina loko metotle na wafle gali metë tëtatëmë. Bu Jerusalem lifate elë lololi tle na onoho bu meweniji mëtla, Goto onehobë eso home kë tafa lëgletëmëbë olë, eliwa fata lëglemewa. Këme nëgëme Jisas këbë wafle galibëme gali tlole, bubë kë yaya lowene sle nalëgëtatëmëme. ¹² Bu megali tle, “Letitabo ho, kakë lifatewa lugujume, bume tako eso home aniji namugujelëlame. Na tokwafe bu ita lisime na bubë lifate mago onehobë eso home tafa nalëkakitëmëme. ¹³ Bu lugujume kofene na bubë welujuwa wege home gali telokwakëme bu betelë migisitla namëglame. Na bu mitisitla na bume tëlafa we (20) baliti, tëlafa we (20) baliti kënjiji tlëwagume. Na bume gali tlole, ‘Sobo ebë baliti glo elome, na bobë nagi ebë balitina sawege elo. Sobo wege egelebëë na fli baliti kë wegena saboblo etomo. Sobo mana wege elekefobëë na bo mana fata nëkakime.’

¹⁴ Kwe kë hobë weife lifate mago onoho bume wame lamotlola. Këme nëgëme, bu wafi tuju,

na bu gali mëtehula home nagi jine mëtelëkakëma, kë lifatebë eso home megali namugujuwelëmame, ‘Sebo kë home sebobë eso home tafame tole hana nëletlamu.’ ¹⁵ Kwe bume eso home aniji mutujuwelëla na bu ita tisi. Bu tisi na gali tle, ‘Èbame baliti këtëglëmëbë wege home gali elokwakëmo, bo belë migisiya namëglame. Bo lowene nanëgelëme, bu kofaya baliti kë balitina habenuju boblo mëtëtayane?’

¹⁶ Na kwe bubë wege ho li afina tisi tle na gali tlole, ‘O eso ho, ju kë tëglënëbë tëlafa we (20) balitina bo wege fa totlë na bo jubë nagi 200 kofaya baliti këna blëge tëtë.’ ¹⁷ Na eso ho gali tlole, ‘Ju bobë lale wege ho mu. Ju bobë nagi lale wege fa totle. Ju kë tokwëfo wesibi ululu sle togotleme nëgëme na bo jume meaniji këme nolë, ju jowafe we lifatebë onehobë eso home tafa egletëmëme.’

¹⁸ Na li wege ho bu mata tisi tle na gali tlole, ‘O eso ho, ju kë tëglënëbë tëlafa we (20) balitina bo jubë nagi wege këna fa totlë na bo we lujuafe we (100) kofaya baliti blëge tëtë.’ ¹⁹ Na eso ho bume gali tlole, ‘Bo jume meaniji nanolë, ju tobali lifatebë eso home tafa egletëmëme.’ ²⁰ Na li wege ho bu mata tisi tle na gali tlole, ‘O eso ho. Jubë tëlafa we (20) baliti mana ekë mëbe. Bo këbë baliti afeteni sosa ehona lei totomë na gogwa telë. ²¹ Bo jume uli tëgletëmë nëgëme. Bo melowene latletë, “Ju këha lakalena ho nëgëme ju ho libë wesibi lomanëbawa etatle. Wesibi ho li gogwa lëglebë kwe ju lafawa etokwakle. Na hi wesibi li ho tobalo lëglebë kwe ju lamëmëwa eletle.”’

²² Na kwe kë eso ho bu kë wege home gali tlole, ‘Ju tëbo wege homu. Bo jubë galime fwa jume tëbo nëgëtëmë. Ju bome melowene laletenëne, “Bo wesibi momanëba nogotomëbë lakalena ho. Wesibi li ho gogwa lëglebë kwe bo lafawa netokwaklë. Na wesibi li ho tobalo lëglebë kwe bo lamëmëwa nëletelë.” Ju melowene laletenëne? He? ²³ Ju kë

lowenebème walowene egletenëbë, kwe ju bobë baliti, baliti loloko lo mēta gogwa tugule jwa fëyemene? Na bo kēnigisibë bo fli kofaya balitina glo nanëkakime fene.’²⁴ Na bu lolime kē mitlijabë home gali tlome, ‘Sobo bu mago tēlafe we (20) baliti glo elome na 200 balitina kē tafa lēglebë home elēlome.’²⁵ Na bume gali motlola, ‘Eso ho. Ju hwi ele. Bu 200 baliti lamēbetlefe. Ju seme fëyeme gali elonane sebo fli baliti mata nēglēlabëme.’

²⁶ Na bu gali tlome, ‘Bo some gali nolëyo, iniwa oneho, Goto kē lēglēmëbë wesibi, ululu sle motomana, kwe Goto bume fli wesibi mata lēglēmeme. Kwe iniwa oneho, Goto kē lēglēmëbë wesibi, ululu sle jwa motomana kwe Goto kē wesibi bu mago ita hijika logotomeme.’²⁷ Na bome bubë eso home fatame tēboijiwa kē mētletēnabë wameho, sobo eli bume bo belë elesumome na bobë naba li mēta mogo nalë tētëkle etome.’”

²⁸ Jisas kē wafle gali wayawe tole na bu Jerusalem lifatewa mana tokwale. Na bubë lowene esogo mēglelētlabë ho nagi esogo mētlagula.

Jisas bu eso hoha, Jerusalem lifatewa tēkaklu

²⁹ Jisas bu Betfage lifekuwa na Betani lifekuwa loliwa fwa tule. Kē lifeku bu Oliv tiwa fatini li mēta mētëbe. ³⁰ Na Jisas bubë lowene esogo mēglelētlabë ho tlemalëme gali tlome, “Sobo ebë kē lugubëbë lifeku elë eyeumo. Sobo eyeume, na kē lifekuwa tuhu egulona, kwe sobo afeku donki kleli, hwi eglolome, ti mēta watakuliji mototla. Ètani ho li kē donki kleli matawa hana tafa tle. Sobo taba tohwa etlome na ebelë elesulome. ³¹ Na ho li some metakune loglëyona, ‘Sobo ebë donki kleli fëyeme tohwa etlone?’ Kwe sobo bume metafu saetatelo, ‘Sebobë tako ho bu kēna luguju nalëgleme.’”

³² Na Jisas bu kē tlemalë home jine tlëme, na bu mētëyeu. Na bu iniwa wesibi hwi motlomo, Jisas fene gali

tlome. ³³ Na bu kē donki kleli kēna kēkesi mototlabë taba mago taba, mana tohwa mototokweflobëë na mana kē donki kleli bolijaya ho mana takune telëbakëme, “Sobo ebë donki kleli fëyeme tohwa etlone?” ³⁴ Na bu gali tafu mētëtatalo, “Sebobë tako ho kēna lugujume.”

³⁵ Na kwe bu kē donki kleli Jisame sei mētletakitelo. Na bubë heletabo ëho donki klelibë amlebo mēta kahëba motoletelo. Na bu Jisame mētaitalo, kē donki kleli matawa tafa nalogolebëme. ³⁶ Na bu kēna tuju. Na oneho bubë heletabo ëho totohwa motokouja na alëge mēta gogwa motokouja. Bu Jisame fleflesu mētletla, eso hoha fata tēgleme nēgeme. ³⁷ Na bu Oliv tiwa fatini kle tēmaitabë nounou totle, na Jerusalem lifatewa fwa tuguleme nounou latotle. Na bubë feilawa lowene esogo mēglelētlabë enëne fli, bu fleflesu lamētletla. Na bu, klelegowa wesibi, Jisas kē blëge blëge totomebë, ita lowene mētletëma na bu Gotome anisasana fleflesu kēme mētletla na bibita mototla. ³⁸ “Yaha fëyeme jine tlëlene? Sebo Goto kē jine tēglëlebë eso home fleflesu nēgletlame. Bu Gotobë afutukuna lisi tēna. Goto kē eso home lëgaitaleme na ululu sle logotleme. Goto bu heven life mēta kē tafa logolebë bu lale na tako mu. Goto sebobë, ebë life mago onehobë lowene lëgëbetëme sle malëletëme.”

³⁹ Na Farisi ho, bu kē feilawa onehobë ku mēta mētëtabëya na bu onehobë galime tole hana mētletëma na bu kēme gali motlola, “O Tisa, jubë lowene esogo mēglelëlëbë home lëkle etome kaju namëgebëyame.” ⁴⁰ Kwe Jisas bume gali tafu tētätëme, “Bo some gali nolëyo, ebë oneho bu kaju mēgebëyana kwe aniji buwa momolë mēgleme na Gotobë weniji bibita mētätleme.”

Jisas Jerusalem lifate mago onehome ye tletëme

⁴¹ Jisas Jerusalem lifate lololi totle na bu kē lifate hwi telokwakle na mana bubë onehome naba tu tletëme. ⁴² Na gali tle, “Oë Jerusalem lifate

mago enëne. Bo metole nanelë, iniwa wesibi sobobë lowene kë sle mogotometëyobë, lowene sle egletemome, lalowa tafa naegelome. Kwe kë wesibi ëho lameletëyo na sobo hwi hana elomo. ⁴³ Tokwafe tëbo olë somëta fata lëgleme. Na kë olëna sobobë wame enëne bu some lukume fu sle mëgletëyome na sobobë life mago lëglesu ini sabuwa mogotlame na wameme mokwatëyome. ⁴⁴ Na kë wame enëne bu some na sobobë lifatena iniwa tëbo mëgëtome. Na li aniji bu li aniji matawa hana egëbamëme. Bu life silijiwa lëgëbeme. Goto some lëgaitome fene tisi tëyo kwe sobo kë olëbëme lowene sle hana tëgletelome nëgeme na kë tëbo olë some këme lisitëyome.”

Jisas Gotobë lo mago wesibi balitina hihijika onehome hehë tletëme

⁴⁵ Jisas tako lotu lowa təkaklu. Na bu seuneni fole na sipsip kleli na bulmakau kleli balitina kë hihijika mëtlekefëyabë onehome kë mago hehë tletëme. ⁴⁶ Na bu gali tle, “Gotobë bogo megali lala, ‘Bobë lo, onehome bome këme gëgali mëglelëkefë nabë lo.’ Kwe sobo ebë lo tëbo latlo na bu tokli enënebë loha lilibetëme.”

⁴⁷ Na iniwa olë, bu tako lotu lo mëta onehome okokwe latlokwe fëme. Na lotu lome wege mëglabë eso enëne na Gotobë galime okokwe moglomabë ho na onehome letitabo enëne, Jisame mogo nalë tēke moglolabë gali fame oto mëtla. ⁴⁸ Kwe bu onehome uli mëtletëmame nëgeme. Kë iniwa onehome Jisasbë gali aholokwaneme tako tole mëtletlame nëgeme na Jisame mogo nalëme tēkle jwa këme mototla.

20

Bu Jisame takune motlola, “Iniwa wesibi ju melë kë egotomebë, ya aniji tolëne”

¹ Na kë nalëwa, Jisas onehome tako lotu lo mëglëbo mëta okokwe tlome na bu Gotobë lale gali tē tētātëme. Na lotu lome wege mëglabë eso enëne na Gotobë galime okokwe moglomabë ho na onehome letitabo enëne bu

belë mitisitla, ² na takune motlola, “Ju seme gali enona, iniwa wesibi ju melë kë egotomebë, jume ya aniji tolëne? Kë afutuku ya tlënë?” ³ Na Jisas bume gali tlome, “Bo mata, some li wesibime takune nëlëyome. Sobo bome gali enona, ⁴ Jonme ya aniji tlole, onehome tu mëta kë baptais totomebëye? Goto bu aniji tlole o ho buwa aniji motlola?” ⁵ Bu Jisasbë gali aholokwane motlola na blalo gëgali mëtla, “Sebo megali noglolana, ‘Goto bu aniji tlole,’ kwe bu seme megali logloname, ‘Kë nëgali gali nëgebë, sobo bume lowene sle egletelo jwa fëyemene?’ ⁶ Kwe sebo megali noglolana, ‘Ho, buwa aniji motlola,’ kwe iniwa onehome bu seme anijina tëtëkle mëgëtayame. Iniwa onehome Jonme melowene sle mëgletlame nëgeme, ‘Bu Gotobë lowene mago gali tē tokweflebë homu.’” ⁷ Na kwe bu Jisame gali tafu mëtëtatla, “Sebo, Jonme kë aniji toglolebëme, lowene hana nëla.” ⁸ Na Jisas bume gali tlome, “Bo mata, iniwa wesibi bo melë kë nogotomebë bome kë aniji toglonëbëme some hana gali sle noglëyome.”

Ebë wain taba liji nuju kë hwi motlola tēbo enënebë wafle gali

⁹ Jisas, onehome wafle gali latlome, “Ho bu wain taba, nuju mëta tobalo tle. Na tokwafe bu fli home gali tlome, ‘Sobo bobë wain taba nuju hwi elotëna na tokwafe wali wain taba liji lalowa glo elo, baliti këna glo naegelome.’ Na kë nuju bolijaya bu kakë lifatewa tuju. ¹⁰ Feilawa olë tafa tule na kë wain taba liji mana niglijji mëtle. Këme nëgeme nuju bolijaya ho, bubë wege ho lime, bubë nuju kë hwi moglotlabë ho belë jine telëkakle, bubë wain taba liji, kë nuju mago glo nalëgleme. Na bu tuju. Kwe nuju kë hwi moglotlabë ho, bu kë wege home hwi motlola na tēkle mototla na kë mago hehë mëtëkakëta. Na bu toba alujawa tēhou. ¹¹ Na ita nuju bolijaya, li wege home jine telëkakëte. Kwe kë enëne, bume hwi motlola

na bume mata tëkle mototla na unalëme sosalë sosalë sle memototla na kë mago hehë mëtëkaketa. Na bu toba alujawa tehou. ¹² Na ita li home jine telëkakëtëme. Kwe këbëme mata unalëme sosalë sosalë sle memototla na kë mago hehë mëtëkaketa. ¹³ Na nuju bolijaya bu kë wesibi hwi tlome na këme lowene tle, 'Bo habelë nêgelëmene? Bo melowene nanelë. "Bobë jowa iko nêba jine nêgelëkakëtëme. Bo bume tako tole nanëletelë. Bu bubë gali aholokwane moglolame na bume hana tëbo mogotlame." Na bu kë nêbame jine telëkakëtëme. ¹⁴ Na nuju kë hwi motlotlabë ho bu kë nêbame hwi mëttagila na blalo gëgali mëtla, 'Ebë ho kë ligisibë ebë kë nujubë bolijayabë bowene. Tokwafe bolijaya gli lëglena, kwe bu kë nuju bolijayame lëtabeme. Te, mana mogo nalë tëkle manotla na tokwafe bolijaya gli lëglena kwe kë nuju sebo nanëglame.' ¹⁵ Këme nêgeme bu tisi tëme na bume nuju mëglëbo elëme hehë motokoutla na mogo nalë mana tëkle motlola.

Sobo habë lowene lalone, kë nuju bolijaya bubë nuju kë hwi moglotlabë home habelë logotomemene? ¹⁶ Sobo aholokwane elo, bu ligisi nêgena, na bu kë home mogo nalë tëbo logotomeme. Na ita kë wain taba liji nuju fli home yo lolomeme." Oneho kë gali aholokwane mëtla na gali mëtla, "Melë asa malële."

¹⁷ Jisas bume hwi tëbelëkakëme na takune tle, "Ebë gali, Gotobë bogo mëta kë tégëbebë, bubë wayobë habelëne? Kë gali melëgëbelalële,

'Lo gliji ho, bu lo, anijina gliji mëtla.

Na kwe bu li anijime meweniji lamëtla, "Tëbowa."

Këme nêgeme, mëglëbo elë fo mëtetokwakëya.

Kwe kë aniji mëglëbo elë kë fo mëtetokwakëyabë

bu lale anijimu ebamë.

Lo bulego kë aniji mëta lotle.

Kë aniji jwa nêgena, kwe lo fli lëgleme.'

¹⁸ Inywa oneho bu kë aniji matawa mitigwëyana kwe bu mogo nalë tëbo

migitayame. Na kë aniji, home matawa etigwatlena kwe bume lëlafowa egotleme."

¹⁹ Gotobë galime okokwe moglomabë ho na lotu lome wege mëglabë eso enëne melowene lamëtla, "Jisas seme fwa wafle gali lolonafe. Bu melowene lalëletëna, 'Sebo kë tëbo enëne. Sebo nuju kë hwi noglolabë tëbo enëne.'" Këme nêgeme, bu Jisame ëjeha fa motlame. Kwe bu onehome uli mëtletëmame nêgeme, oneho Jisame tako tole lamëtletla. Na bu Jisame fa jwa këme mototla.

Bu Jisame, takis baliti Sisarme mëglëlabë lowenebëme, takune motlola

²⁰ Gotobë galime okokwe moglomabë ho na lotu lome wege mëglabë eso enëne bu Jisame olëli olëli mana hwiwa mëtëbelëkakla. Na bu ho flime jine mëtlemë, Jisame mogweliha hwi namëbelokwaklame. Kë enëne mesosogëna lamotlola, "Sebo jubë gali aholokwaneme tako tole nanëla." Bu metole lamëtla, Jisame sogëname takune manolola na bu Rom life mago eso ho, Sisarme, tëbo gali naloglome. Kë tëbo galime fwa bume këna so namëgëtatlame fene.

²¹ Na kë mogweliha hwi ho, Jisame këme takune motlola, "Tisa, sebo lowene nanëla, ju nêgali gali homufe. Ju nêgali galimu iniwa onehome të tëtätëme. Ju lebutako balitina home na baliti jwa home, lili gali hana gali tlome. Weye. Ju iniwa home, jowa galime fwa gali tlome. Ju iniwa onehome, Gotobë gali, iniyafeme fwa okokwe tlome. ²² Na ju habë lowene lalene? Sebo takis baliti Rom life mago eso ho, Sisarme, lalowa nêglëlamene o hanane? Këha lowene lalowa nêglamene o hanane?"

²³ Kwe Jisas bubë sosogëna lowene walowene tletëme na bume këme gali tlome, ²⁴ "Sobo jowa baliti bome ehitëna, hwi nanoglëme." Na bu baliti mëtëhitla. Na Jisas këbëme hwi tlome na takune tlome, "Ebë amtëtomba yalëbë lëbetlene, na yalëbë weniji lëbetlene?" Na këme megali motlola, "Ebë Sisarbëyo." ²⁵ Na Jisas bume gali

tlome, “Te! Sisarbë wesibiye, kwe Sisarme eglëlome. Gotobë wesibiye kwe Gotome eglëlome.”²⁶ Bu onehobë naba li mëta bume sogëna galime yafe takune motlola, bu Rom life mago eso home, tëbo gali naloglome fene. Kwe bu tëbo gali hana gali tle. Bu kë tafu têtatëmbë gali yafe aholokwane motlola na klelego memëtla na tune memëtla na këme kuju mëtebëya.

Sadyusi ho, bu Jisame, ho gli mago hujubëme takune motlola

²⁷ Na Sadyusi ho fli, Jisas belë mitisiya. Sadyusi hobë lowene metëbetëmelatle, “Oneho lebo mëgebëyana, hana huhuju mëglame.”²⁸ Na bu Jisame takune motlola, “Tisa, ëbame, Moses bu ebë gali meyahi latletëna, ‘Ho nëba jwa lebo lëgëbena, na bubë mëse mana tafa eglëna, kwe ita bolijamo sasei lëlë, nëbaneni namëgelome. Na kë nëbale, lebo kë lëgëbebë hobë wenijina namëtabëyame. Na bu kë hobë nëbaleha tafa namëglame, na lebo kë lëgëbebë hobë weniji lëgëbagutle nalëgleme.’²⁹ Ètani, ho li tobalì ita jowa këniji bolijamonime tlebime. Bolijaha mëse bu afina sei tlë na kwe kë bolijaha nëba jwa gli tle.³⁰ Këme nëgëme, ita këme këbë, kë mëseme sei tlë, kwe bu mata nëba jwa gli tle.³¹ Na ita këme këbë bu mata, melatle, kë fenene. Bu iniwa bolijamoni melamëtla, kë mëseme fwa sei mëtlekefëya na bu iniwa nëba jwa gigli mëtla.³² Na tokwafe kë mëse, bu mata, gli tle.³³ Na sebo jume metakune nanëlëyo. Tokwafe gigli kë mëglabë oneho huhuju mëglana, kë mëse fëye hobë mëse tafa eglëtemene? Ju wafi lowene ele, kë mëseme tobalì ita tële ho këniji kë sei mëtlëya.”

³⁴ Na Jisas bume gali tlome, “Oneho, ebë olëna kë tafa mëglabë bu one sesei melekefëya.³⁵ Kwe tokwafe Goto bu fli lebo onehome megali loglomeme, ‘Sobo huhuju eglome na bona tafa nëlame.’ Kë huhu mëglabë enëne bu hana sesei

mëglame.³⁶ Bu heven life mago enselha mëtabëyame nëgëme, na bu ita gigli hana mëglame. Goto bume matëmatë mago wahuhuju logotomeme nëgëme, bubë nëbaleha këme tafa mletlame.³⁷ Na bo some lebo enëne huhu mëglabë gali li të nêtatëyo. Ètani Moses bu mata seme melebotane latëtatëna. Oneho gigli mëglabë, bu matëmatë mago huhuju mëglame. Ètani Moses bu, ahoju ti abo mëta kë u tëglebë galime meanebo gali latletle. Na bu Gotome melë galina yahi tletle, ‘Tako Ho, bu semleninobë, Abraham, Aisak, Jekopnabë Goto mana ekë tafa lële.’³⁸ Kë gali bu seme melebotane lalëtatëna, Goto bu lebo enënebë Goto nane. Weye. Bu mana kë tafa mëglabë enënebë Goto. Gotobë naba lime, iniwa oneho, giglibë na mana kë tafa mëglabë, iniwa bu mana hwi mëtaya.”

³⁹ Na Gotobë galime okokwe moglomabë ho fli, bu Jisasbë gali yafe aholokwane mëtla na bume gali motlola, “Tisa, ju bume kë tafu ètatëmbë gali lalemu.”⁴⁰ Na Sadyusi ho bu Jisame li loweneme takune moglolame fene, kwe bu uli memëtletlamu.

Jisas, Goto kë aniji toglolebë hobë galime, onehome takune tlome

⁴¹ Na Jisas onehome takune tlome, “Bu megali fëyeme mëlekefëyane, ‘Goto kë aniji toglolebë ho, onehome nëno lëglebë ho, kë ho bu Devitbë afenëbo.’ Sobo habelë lowene laletelone, bu kë galime fëyeme gali mëlekefëyane?⁴² Ètani Devit buwa Buk Song mëta meyahi latle,

‘Goto, bu bobë eso home megali lalolole,
“Ju bobë tobamu toba elë tafa eglëtenëme,
na ju bona onehome eso home tafa nëletemome.

⁴³ Sebo onehome mana tafa nëlelëmome,
na bo jume kë wame mëglëyobë home boblo nogotomëme
na bu jubë gali boblo jwa mëtome.”

⁴⁴ Sobo hwi elo. Devit kwe kë home mefë latotle, 'Bobë eso ho.' Na bu Devitbë bowene tafa habelë lëglemene?"

Gotobë galime okokwe moglomabë ho bu tëbo lowene esogo mëtlelekefla

⁴⁵ Iniwa oneho bubë gali mana aholokwane mëtlagulabëë, na mana bubë lowene esogo mëglelëtlabë home gali tlome, ⁴⁶ "Sobo Gotobë galime okokwe moglomabë home ululu sle saeletemo. Bubë lowene mëta asa etabetemo. Bu metole lamla, oneho bume hwi molomame na melowene mëletëmame, 'Bu lale enënefe.' Këme nëgeme, bu heletabo ëho gëgelo motokwefëma na asë mla. Na bu këna bume fwa fleflesu mla na bibita motoma. Na bu oneho këme kë loloko mëglabë lifeku mëta asë mëglana, bu metole lamla, oneho bume sësle galina gali namoglomame. Bu lotu lome tafa mëglana, bu metole lamla, onehobë naba li mëta, eso hobë tafa labume tafa mlame. Na hi wesibi salë olëna, bu metole lamla, onehobë naba li mëta, eso hobë tafa labume tafa mlame, oneho bume melowene namëgletëmame, 'Letitabo enënefe.' Na bu këna bume fwa fleflesu mla na bibita motoma. ⁴⁷ Na bu seiju oneme sosogëna moloma, bubë iniwa wesibi manawa mëglëma namëglame. Na bu memelë lamla, onehobë naba li mëta, Gotome megëgali gëgali mëglelëlabëë, bubë tëbo lowene këna ëho motoma, oneho bu melowene namëgletëmame, 'Letitabo enënefe.' Unina, Goto onehobë tëbo lowene aholokwane loglometëmebë olëna, bu kë Gotobë galime okokwe moglomabë home tëbomu logotomeme."

21

Wesibi jwa mëse, baliti Gotome tlële

¹ Jisas tako lotu lo mëta tafa tle, na bu lebutako balitina onehome hwi tlome, bu Gotome kë sike melekefëtlabë bokis mëta baliti sisike mëtletla. ² Na bu mana mehwi tolë, wesibi jwa seiju mëse, baliti tokwëtokwë tële kë bokis mëta sike tule. ³ Na Jisas gali tle, "Bo some nëgali nanolëyo. Fli oneho kwe bu kë bokis mëta, tokwëfo balitiha

sisike mla, kwe Goto kë wesibi jwa seiju mëse melowene lalëletë, 'Bu feilawa balitimu sike ele.' ⁴ Fli oneho bubë feilawa baliti mëbetëme kwe tëlewa sike mla na fli mana mëbetëme. Kwe kë wesibi jwa seiju mëse bu baliti tokwëfo mu, kwe bubë hi wesibi glo baliti iniwa sike ele."

Jisas bu melëme gali tle, "Gotobë tako lotu lo yayei mogotlame"

⁵ Jisasbë lowene esogo mëglelëtlabë ho, bu Gotobë tako lotu lo hwi motola na gali mëtla, "Ebë lo bu lale klisomu. Bu ebë lo lale lale anijinamu gliji mëtla. Na lale lale wesibina, Gotome kë mëglëlabë, ebë lo neglina lamëtlëla." ⁶ Na Jisas gali tlome, "Bo ebë wesibi sobo kë hwi eglomobëme gali nolëyo. Tokwafe bu ebë lo iniwa yayei mogotlame. Fli aniji matawa hana mëgëbëme. Iniwa sisike mëkakame."

Jisas gali tle, "Tokwafe tëbo olë fata lëgleme"

⁷ Na kwe bu Jisame takune motola, "Tisa, bu ebë lo fëye olëna yayei mogotlamene? Sebo fëye wesibi afina hwi noglolamene na këme lowene nëletlame, kë olë nounou ekë lële." ⁸ Na Jisas gali tlome, "Sobo ululu sle saelo. Ho some sosogëna möglëyolime. Unina feilawa ho migisiyame na sogëname megali mlame, 'Bo onehome tëbo lowene mago nëno nëgelëbë ho.' Na bu gali mëglame, 'Yawe olë nounou ekë lële.' Sobo bubë gali asa aholokwane elomo na bume asa esogo elelëmo. ⁹ Na sobo fli lifate enëne tako mögli mëtayabë gali aholokwane egelona, sobo uli asa elo. Kë wesibi bu afina melë mëgleme, kwe yawe olë nounou hana lëkeke."

¹⁰ Na bu gali tlome, "Li life li life mago ho, bu li life hona mömögli mëgëtayame. ¹¹ Na tako nano ekoujamëme. Na li life li life oneho tako foneme gigli mëkoujame na tako ato elili mëkoujame. Na sobo tokwafe fli tëbo wesibi matafa mago hwi eglo-mome na sobo kë wesibime tako uli eglomemu."

12 Kë tëbo wesibi bu fata jwa mëleme na bu some fafa mlame na tëbo mètome. Bu bubë lotu lo elëme mëlelëkakujome na bubë letitabo enëne belë sei mugujuwelëyome. Na sobobë gali aholokwane molëyome. Na bu some kalabusu lowa sike mlame. Na bu gavman enëne belë na eso enëne belë sei mugujuwelëyome, sobo bome lowene sle egletëname nëgeme. 13 Na sobo kë nalë, Gotobë lale gali bume lalowa të egëtatemome. 14 Kwe sobo tutune asa elo na melowene asa elo, 'Sebo habë gali noglomamene?' Weye. 15 Bo some kë olëna lale lowene nëglëyome. Na sobo kë lale lowenena gali të egëtatemome. Na some kë wame moglëyobë ho kë gali aholokwane mëglëyona, na sobobë gali hana momata mëgëtatëyome na megali hana mëglame, 'Bu yaya gali lamla.' Weyewa. Hanane mu.

16 Na tokwafe, blijayanino, bitamenino, bolijahanino, ilawa magobë, yabeninona, bu mata some kë wame moglëyobë ho belë sei mugujuwelëyome. Na somago wali mogo nalë tëtëkle mëtayame. 17 Na iniwa oneho some këme gëglë mëglëlëyome, sobo bome lowene sle egletëname nëgeme. 18 Kwe Goto bu some tafa lëglëlëyome na some hana kile lëgëto. Na ho sobobë heven lifate magobë lale tafa hana tëbo mëgëtatëyome. 19 Sobobë kë tëbo olëna bome kë lowene sle egletëname lowene asa elëkëlo. Sobobë melë egelona kwe sobo tokwafe unau-nalëme lale tafa egelome."

Jisas gali tle, "Jerusalem lifate tëbo lëgleme"

20 Na Jisas ita gali tle, "Sobo tokwafe mehwi egelona, wame home boblo mogotomabë enëne, Jerusalem lifate lukume fu mëgletlana na ini sabuwa mogotlana, kwe sobo këme lowene elome, kë lifate tëbo lëglebë olë ekë fata lëlefe. 21 Na kë olëna, Judia provins mëta kë tafa mëglabë oneho, bu fatiniwa matlëbouja. Na Jerusalem lifate mëta kë tafa mëgelulabë oneho,

bu kë lifate kile mlame na jebelëme mëlëboujame. Na Jerusalem lifate li mëta kë tafa mëglabë oneho, bu lifatewa ita asa matëkakluja. 22 Kë nalë, Jerusalem lifate enëneme, memelë tëbo lowene kë mëglabë enëneme Goto tëbo logotomeme. Na iniwa gali, bu Gotobë bogo mëta kë yahi mëtëglabë, bu iniyafemu mefata mëgleme. 23 Kë olëna, one nëbale imo nabë na one nëbale kolëbo nabë, bo bume tako maninibo nanëletemëmu. Masiwafe, bu habëna mëglënboujamene? Tëbo olë, kë onehome fata lëgletëname. Na Goto bu kë onehome wame loglomeme na tëbo logotomeme. 24 Na wame home boblo mogotomabë enëne bu flime mogo nalë tëbo motomame. Na iniwa tatako lifate ebë life mëta kë mëgëbagubë lifate elë flime mëlelumame na kalabusu lowa sike mokoujame. Na li lifate mago wame enëne, na Gotome lowene jwa kë mëgletlabë enëne, bu Jerusalem lifate hijika motomame na yelukwafe tuku mlame. Bu Jerusalem lifate mana bubë yelukwafe mëta mana lëgebetëmebëë, na mana Goto bume gali lolomeme, 'Sobo emago eyeu.' Na bu kë lifate kile motlame na mujame."

Tokwafe Gotobë life mago ho ligisime

25 Jisas ita gali tle, "Kë nalëwa, tetëbo klelegowa wesibi, kliji, yeme, sëgetobana mëta fata mëgleme. Na iniwa lifate mago oneho, bu nutubë tako liglinitigo lego aholokwane mëglana, kwe bu tako tutune mëglame na tako ulimu mëglame. 26 Na feilawa oneho, iniwa tëbo wesibi kë lifateme kë fata mëglebëme tako tutune mëglame. Na bu tako uli mëglame na nabasahoba mlame na mogowa mitigwëyame. Iniwa matafa mago wesibi lili mëgleme nëgeme na bu këme uli mëglame. 27 Na kë nalë, iniwa oneho bu bome, Gotobë life mago home, mehwi mogloname, bo oloba nagi nigisime. Na bo tako lolokwënena, na tako kliji elulego

fenene kēhana nigisime. ²⁸ Sobo kē tēbo wesibi hwi eglomona, kwe sobo kēme uli asa elo, walena satafa elo. Goto some nēno lēglebē olē nounou lēgleme nēgeme.”

Jisas binibwe ti tahweji waflē gali latle

²⁹ Jisas waflē gali tlome, “Sobo binibwe time na fli time walowene eletemo. ³⁰ Bubē laba luklu mēglena na tahweji foke mēglena sobo kēbēme lowene eletelo, ‘Ebē wanagli tei fe.’ ³¹ Kē fenene. Sobo kē tetēbo wesibi, hwi eglomona, sobo melowene naegelome, ‘Goto iniwa onehobē eso home natafa lēgletēmēbē olē nounou lalēletle.’

³² Bo some nēgali gali nanēlēyo, fli oneho bu ebē olēna kē tafa mēglabē, bu mana mētabēyame na kē iniwa tetēbo wesibi, mana fata mēleme. ³³ Lifena matafana tēbo mēgleme, kwe bobē gali unaunalēme melē lēbagukēfeme.”

Sobo sagli sle elēlome na walena etabome

³⁴ Jisas ita gali tlome, “Sobo ululu sle saelo. Sobo bia na fli biaha wesibi itaita asa hihi elo na kēna yaya elome. Na sobo sobobē ato lēgaitalebē wesibime feilawa tutune asa elo. Sobo kēha lowene mēta tafa eglekefona kwe bo kē nigisibē olē bu some hokweinawa tafu lotokwakijome, ³⁵ kole bu klelime fene tafu etole. Kē olē li life li life mago onehome iniwa, lafatawa lokoutēmeme. ³⁶ Sobo olēli olēli walena satafa elekefo. Na sobo Goto olēli olēli takune elokweflome, bu some lēgaito nalēgleme na bubē afutuku some lēlēyome. Na tokwafe kē tēbo wesibi somēta, fata mēglena kwe sobo kē afutukuna lalowa boblo egotomome na bu some hana tēbo mēgētome. Na sobo tokwafe, bome, Gotobē life mago hobē naba lime, tiniji jwa naeglibetēname.”

³⁷ Na iniwa olē, Jisas tako lotu lo mēta onehome okokwe latlokwefēme. Kwe klabēye, bu Oliv tiwa fatini mēta ni tubekēfe. ³⁸ Na iniwa oneho, bu olobalē mu, tako lotu lowa

mutujukefēya, bubē gali aholokwane namoglolame.

22

Judas bu lotu lome wege mēglabē eso enēneme gali sle tētātēme, “Bo Jisame some yo noglēyome”

¹ Israelbē ilawa magobē tako lotu olē fata lēgletēmeme nounou tletēme. Israelbē afenēbo, bu kē lotu olēna, sēse wesibi jwa bletē nage hi mētlekefēya. Na bu kē lotu olē, Goto ētani bosemnime kēna tēgaitamebē olē na Isip lifate kēna kile mētēglabē olē, lowene mētlekefētla. ² Na lotu lome wege mēglabē eso enēne na Gotobē galime okokwe moglomabē ho bu onehome uli mētletēmame nēgeme na bu blalo gali kēme fa mototla, Jisame hwelutuwa mogo nalē tēkle namogotlame.

³ Judas Iskariot na fli we ita jowa (11) hona, bu Jisabē lowene esogo mēglelētlabē ho. Na Satan bu Judasbē lowenewa tēkaklu tle. ⁴ Na bu lotu lome wege mēglabē eso enēneme na lotu lo magobē plismanēme kēme tuju tēme, Jisame yo naloglomebē galime gēgali nalēglelēmeme. ⁵ Na kē enēne bubē gali aholokwane motlolabē na tako fleflesu memētletlamu na bu buna gali sle mototla, bume baliti tokwafe namēglēlabēme. ⁶ Na Judas bubē galime helawa tletēme. Na bu kēme melowene tle, “Bo Jisame habelē yo noglomēmene?” Bu melowene tle, “Lebutako oneho Jisana mētabēya jwa mlame na bo Jisame mana yo nolomēme.”

Jisabē lowene esogo mētlelētlobē ho hi wesibi loko mētēto

⁷ Sēse tabo wesibi jwa bletē nage kē hi mētlekefēyabē olē wafata tletēme. Kē olēna Israelbē afenēbo, bu sipsip kleli nēbale tētēkle mētētakefēya na hihi mētla. Hihi mētlekefēyabē, na Goto, bubē bosemnime kēna taitamebē olē lowene mētlekefētla. ⁸ Kēme nēgeme Jisas Pitaname, Jonname gali tlome, “Sobo eyeumo na tako lotu olēbē hi wesibi loko eoutome. Sebo hi nanēglame.” ⁹ Na tlemalē bume gali

motlolo, “Sebo kë hi wesibi hameta loko nëgëtomene?”¹⁰ Na bume gali tlome, “Sobo Jerusalem lifatewa eyeume. Na ho li, sospenëna tu lëgehilena some alëgeme esune lëglëyome. Na sobo bume nagi elëkaklome. Na bu lowa lëkakluna, sobo mata kë lowa ekaklujome.”¹¹ Na kë lo bolijaya home megali egelujuwelëlome, ‘Sebobë tisa bu megali lalële, “Hi lo hametane? Bona, bobë lowene esogo mëglelëtë nabë hona, kë hi lo mëta, sip-sip kleli hi nanëglelëmëme, Goto bu sebobë semleninome këna taitamebë olë, lowene nanëgletlame.”’¹² Na kwe bu some matawa kë ke logolebë lo ke lebotane lëgëtatëyome. Kë lo bu tafa labuna, na maseina. Sobo kë hi lo mëta sebobë hi wesibi loko etome.”¹³ Na bu tlemalëme mana jine telëkakëme. Na bu tako lifatewa mëtëyeu. Na bu iniwa wesibi hwi motlomo, Jisas fene gali tlome. Na bu hi wesibi sagli motlolo.

Jisas bu bletë nage na wain taba liji tu bubë lowene esogo mëglelëtlabë home tlëme

¹⁴ Hi olë fata tle, na Jisas matawa kë ke logolebë lo ke masei mëta tafa tle. Na bubë gali tëme kë jine tëglëmebë ho, buna iniwa tafa mëtla.¹⁵ Na bume gali tlome, “Bo ebë hi wesibi sobona hi nëglame, tako tole nanelë, Goto, sebobë semleninome këna tégaitamebë olë lowene nanëgletlame. Bo sobona ebë hi wesibi afina hi nëlame, na tokwafe bo elili mana fa nogotlëme.¹⁶ Bo some gali nolëyo, bo sobona ebë tako lotu olëbë hi wesibi ita hana hi nëglame. Kwe tokwafe, Goto iniwa onehobë eso home tafa lëgletëmebë olë fata lëglena, ebë tako lotu olë hi nëglabë wayo mana olafa lëgleme. Na bo ebë tako lotu olëbë hi wesibi ita mana hi nëgelëme.”

¹⁷ Na bu wain taba liji tuna kabo fa tëtamë na Gotome gali tlole, “Ebë wain taba liji tu, yaha fëyeme enënëne?” Na bu gali tlome, “Sobo ebë tu fa etlome na sobo lalo hi ekoujome.”¹⁸ Bo some gali nolëyo, bo wain taba liji tu eliwa sobona tei hi nëla. Kwe tokwafe Goto bu

onehobë eso home tafa lëgletëmebë olë fata lëglena kwe bo wain taba liji tu mana ita hi nëgelëme.¹⁹ Na bu bletë nage fa totle, na Gotome gali tlole, “Yaha fëyeme enënëne?” Na fufu totle na bubë lowene esogo mëglelëtlabë home sa tëtatëme. Na gali tlome, “Ebë bobë atome lëlekuju ne. Bobë ato kë nëglëyobë some lëgaitome. Sebo ebë bletë nage fene hi nëla, sobo itaita melë sa elekefo, bome lowene eglekefëtë nabëme.”²⁰ Bu bletë nage wahi mëtla, na bu wain taba liji tu kabo fa tëta na bletë nage fene tlëme ita metlëme tle. Na bu gali tlome, “Ebë bobë winome lëlekuju lële. Bobë wino kë lugujubë, some lëgaitome. Ètani Goto bu Mosesme megali sle latlole, Israelbë afenëbome lëgaitameme. Kwe bobë wino kë lugujubë këme lëlekuju lëgleme, Goto bu bubë onehome tiho gali sle tëtatëme, bume lëgaitame nalëglebëme.²¹ Sobo aholokwane elo, bome wame ho belë yo loglonëbë ho bu sebona ebë masei mëta weife tafa nëla.²² Kwe bo, Gotobë life mago ho, bo gli nëgelëme, Goto ètani fene gali tle. Kwe kë ho bome kë yo loglomebë, masiwafe, bu tēbo liglitame.”²³ Na bubë lowene esogo mëglelëtlabë ho kë gali yafe aholokwane motlola, na blalo tëtakune mëtlelogwaya, “Melë yalë logotlemene?”

Semago, logouta home, ya tafa lëlene

²⁴ Na kwe bubë lowene esogo mëglelëtlabë ho bu blalo momata mëtlelogwaya, “Semago, logouta home, ya tafa lëlene?”²⁵ Na Jisas bume gali tlome, “Israelbë afenëboni mëtabëya jwa mëglabë enënëbë eso ho, bu memelë lamla, onehome baba tei motoma. Na bu metole lamla, oneho bume megali molomame, ‘Sebobë lalë lakalena letitabo ho.’²⁶ Kwe, kë eso ho fene mëtabëya, sobo këha lowene asa fa etatemo. Weye. Matëbe. Ho li somago logouta home tafa lëglebëme tole lëglena kwe bu melë salëletëyo, atwati hoha lëtabeme. Na sobobë eso ho bu melë salëletëyo, some wegeme lëgaito hoha

tafa lëletëyome. ²⁷ Sobo walowene elo. Mogoutayame kë tafa mëglabë ho, bu memelë lamla, bu masei mëta wege jwa tafawa tei lële na bubë wege ho hi wesibi tobanawa mehweitëma na masei mëta gogwa mëkakitëma na bu mana hiwa lële. Bo kwe, këha hana nëletëyo sobobë ku mëta. Bo some wegeme nëgaito hoha nëtabetëyo.

²⁸ Tëbo wesibi bome kë susu mëtëtanëbë, kwe sobo bona tafa tla na hana kile tëtana. ²⁹ Bobë aya bu bome meaniji latlonë, onehobë eso home tafa nëgletemëme. Na kë fenene bo some këme aniji nolëyo, onehobë eso home bona tafa nanëgletëmame. ³⁰ Na bo tokwafe onehobë eso home tafa nëgletemëna, sobo bona bobë masei mëta tafa nëglame na hi wesibi hi nëlame. Na sobo eso hobë tafa labu mëta tafa egelome, na sobo Israelbë we ita tële iko nëbalebë bosemnenibë eso home tafa egletemome na bubë lowene mana hwi ebelëkakëtemome.”

Jisas megali latle, “Pita, ju bome kë lowene egletenëbë lowene able eglelëleme”

³¹ Na Jisas Pitame gali tlole, “Saimon, aholokwane ele. Satan bu Gotome watakune tlole, sobobë lowene feilawa susu nalogotometëyome. Bu mehwi naloglëyome, sobo bome kë lowene egletë nabë lowene mëta mana tafa egelomene o aholokwana ti egelome. ³² Kwe bo Gotome, jume lëgaitame, wagali nololë, ju bome kë lowene egletenëbë lowene iniwa aholokwana ti jwa naegleme. Kwe tokwafe ju bome kë lowene egletenëbë lowene ita lowene egletlana, kwe juna kë tafa egelobë afanime, egaitameme, bu bome kë lowene mëgletë nabë lowene aholokwana ti jwa namëglame.”

³³ Na Pita bume gali tlole, “O tako ho. Bu jume kalabusu lowa mëglelujona, kwe bo juna kalabusu lo mëta weife lalowa tafa nëgelulome na sebo weife lalowa gigli nëgelome. Bo kë wesibime uli hana nëletelë.” ³⁴ Na Jisas bume gali tlole, “Pita, bo jume gali nolë, eli klabë, kekelo gali jwa

lëglana, ju bome kë lowene egletenëbë loweneme aowafe able eglomeme.”

Jisas megali tlome, “Sobo baliti, musu, wame kosina meegehajome”

³⁵ Na Jisas bubë lowene esogo mëglelëtlabë home gali tlome, “Èbame bo some Gotobë gali tëme jine tēglëyona sobo baliti, musu, juba jibona hana tehojo. Na sobo kë tēgëyobë nalë, sobo wesibi jwa tafa tulone?” Na bume gali motlola, “Weye.” ³⁶ Na bume gali tlome, “Kwe eli, sobo baliti musuna, musumuna meegehajoegelome. Na ju wame kosi jwa nëgena kwe jubë heletabo gelowa èho, li home balitina hihijikame elëleme na wame kosi kë balitina fa etleme. ³⁷ Ètani bu, Gotobë bogo mëta wayahi tle, ‘Oneho bume mehwi lamotlola, tëbo ho fenene.’ Na bo some gali nolëyo, tokwafe oneho bome këha melë mëgëtaname. Ètani bu Gotobë bogo mëta meyahi mëtla, wesibi bome fata mëgletenëme, na kë wesibi bu iniyafe fata mëgleme ekëne.” ³⁸ Na bume gali motlola, “Tako Ho, hwi ele. Sebo wame kosi tële ekëne mëbetëna.” Na bu gali tlome, “Ta tei.”

Jisas Oliv tiwa fatini mëta Gotome gëgali tlelële

³⁹ Na Jisas lifate kile tle na bu Oliv tiwa fatiniwa tokwale, bu itaita fene tokwakefle. Na bubë lowene esogo mëglelëtlabë ho bume nagi mëtlëla. ⁴⁰ Bu kë belë fwa mutula, na bume gali tlome, “Sobo Gotome gëgali eglelëleme, some lëgaito nalëgleme na some su mëgëto wesibi somëta fata jwa namëgletëyome.” ⁴¹ Na bume hune totome. Na ho aniji tuku lëkakeme, kë aniji egujuwetigwabë fenene Jisas këniji mēfë latëkake. Na bu sēkefo miti tafa tle na Gotome mana gëgali tlelële, ⁴² “O aya. Ju metole eglana kwe ju ebë tëbo wesibi bome kë fata mëgletenëbë, bo mago sike ekaketenëme. Kwe ju bobë tole asa esogo elelëtenë. Matëbemu. Jubë tolewa saesogo elelële.”

⁴³ Na heven life mago ensel bume tisi tle na bume taitale. ⁴⁴ Na Jisas bu tako maninibo latle na Gotome anيسانamu gëgali tlelële. Na bubë afeteni tu, wino fene mesësëbo tle tle na life mëta toto tletle. ⁴⁵ Bu Gotome wagëgali tlelële, na huju tle, na bubë lowene esogo mëglelëtlabë ho betelë ita tuju. Na bume nina hwi tlome, bu tako hobota mëttletlame nëgeme këme ni mëtebëya. ⁴⁶ Na bume gali tlome, “Sobo fëyeme ni ebone? Sobo huhuju elome na Gotome gëgali elelëlome, some lëgaito nalëgleme na su mëgëto wesibi somëta fata jwa namëgletëyome.”

Judas Jisame wame home yo tlome

⁴⁷ Jisas mana gëgali tle na feilawa ho mana mitisitla na Judas kë enëneme toutatëme. Judas, ebë Jisasbë lowene esogo mëglelëtlabë ho li. Jisasbë lowene esogo mëglelëtlabë ho kënji, we ita tële. Na bu Jisame loliwa tisi tle, bume sësle nalogotleme. ⁴⁸ Kwe Jisas bume takune tole, “Judas, ju bome, Gotobë life mago home, fëyeme sësle etanëne na këna wame home yo elomeme.”

⁴⁹ Na bubë lowene esogo mëglelëtlabë ho, buna kë tafa mëtlabë, bu këme hwi mëtla, bu Jisame fa mogotlame nounou ekënefe. Na Jisame këme takune motlola, “Tako ho, sebo bume wame kosina lalowa tëtëke nëglamene?” ⁵⁰ Na bu mago ho li, wame kosi ki tokoke, na lotu lome wege lëglebë letitabo hobë, wege hobë tobamu elë mago aholo sika metëtatle. ⁵¹ Kwe Jisas kë wesibi hwi tole na gali tlome, “Matëbe. Eme fwa tou elo!” Na bubë toba kë hobë aholome gwa tëtëtatle na laslewa tëkakettle.

⁵² Jisame fame kë mitisitlabë enëne bu melë, lotu lome wege mëglabë eso enëne na lotu lo magobë plismanë, na letitabo enëne. Na Jisas bume gali tlome, “Sobo kosina atobeilana bome fame esijone? Sobo melowene laletënane, ‘Bo tokli ho,’ ëëë?” ⁵³ Itaita, bo sobona tako lotu lo mëta kë tafa tëglekefëyabë na kë

nalë sobo bome mana hana fa tëtana. Kwe sobo bome këna fa egëtanabë olë ekënefe. Satan bu tako afutukuna ekë lëtabe.

Pita bu Jisame kë lowene lëgletlebë loweneme able tle

⁵⁴ Jisas wagali tlome, na bume mana fa mototla na lotu lome wege lëglebë letitabo hobë lowa mëtlëlula. Na Pita bume nagi hwiwa hwiwa tlagume. ⁵⁵ Na bu lotu lome wege lëglebë letitabo hobë lo li mago lëglesì elë tëkaklu. Na fli enëne bu kë mëta ahoju hoho mëtlëlula. Na Pita buna kë ahoju mëta sa mëtla. ⁵⁶ Na wege mëse bu Pitame hwi tole, ahojume sa tle. Na kë wege mëse bume tësëlële, na gali tle, “Kë ho bu melë Jisana kë tafa mëtlabë ho.” ⁵⁷ Kwe Pita bu able tle, “Mëse mëtabone. Bo kë home lowene hana nëletelëmu. Hanane mu.” ⁵⁸ Na bu sogë tafawa tle na ho li tësëlële na megali tole, “Ju mata, bubë lowene esogo tëglelëtelobë ho li.” Kwe Pita bu able metle, “Hanane mu. Bo bubë lowene esogo tëglelëtelëbë ho nane.” ⁵⁹ Bu tako tafaha tle na ho li anisasana gali tle, “Nëgalimu. Hwi elo. Bu mata Galili provins mago holife. Kë ho buna kë tafa mëtlekefëyabë ho.” ⁶⁰ Kwe Pita able tle, “Ju kë gali eglebë gali bo lowene hana nëletelëmu. Hanane mu.” Bu mana gëgali tle, na kekelo mana huju tle. ⁶¹ Na Jisas swaya tletle na Pitame hwi telokwacle. Na Pita, Jisas kë gali toglolebë gali ita lowene tletle. Kë gali melë, “Eli klabë, kekelo gali jwa lëglëna, ju bome kë lowene egletenëbë loweneme aowafe able eglomeme.” ⁶² Na Pita bu able kë tëglebëme lowene tle na lo li mago lëglesì mago tëkakli, na tako ye kle tole.

Bu Jisame sosonatlëtlë memototla na tëkle mototla

⁶³ Jisas lotu lome wege lëglebë letitabo hobë lo mëta tafa tle na bume kë fa mototlabë ho bume sosonatlëtlë memototla na bume tëkle mototla. ⁶⁴ Na bubë naba ëhona lamu mototometla na bume mana tëkle mototla na takune motlola, “Ju iniwa wesibi lowene egletëmena kwe

ju seme gali sle enoname, jume ya tēke lolēne?" ⁶⁵ Na bume feilawa tiniyi galina gali motlola.

Jisame onehobē gali aholokwane moglomabē letitabo hobē naba li elēme mētlelula

⁶⁶ Oloba olē, onehobē gali aholokwane moglomabē letitabo ho, Gotobē galime okokwe moglomabē ho na lotu lome wege mēglabē eso enēne bu loko mētlelēya. Na bu Jisame, kē loko mētlelēyabē enēne belē mētlelutēma. Na kē enēne Jisame takune motlola, ⁶⁷ "Ju seme gali enona, Goto kē aniji toglēbē ho, onehome nēno naeglebēme. Ju kē ho ekēne?" Na bu gali metafu tētātēme, "Bo some megali noglēyona, 'Bo kē ho ekēne,' kwe sobo bobē gali lowene sle hana egletelome. ⁶⁸ Na bo some fli galime takune noglēyona, kwe sobo bobē gali hana tafu egētātēname. ⁶⁹ Kwe elina, unina, bo, Gotobē life mago ho, bo tako kalēlegona Gotobē tobamu toba elē tafa nēgelēme."

⁷⁰ Na iniwa bume takune motlola, "Ju melowene lalene, 'Bo Gotobē nēba,' hee?" Na bume tafu tētātēme, "Sobo nēgali gali gali elo. Bo ta kē ho ekēne." ⁷¹ Na bu gali mētle, "Sebo fli enēneme hana gali noglomame, seme kē hobē tēbo loweneme gēgali namēglenēname. Sebo ēje bubē tēbo gali, bubē ēfalēbo mago waaholokwane nolotlame nēgēme."

23

Bu Jisame eso ho Pailatbē naba li elēme mētlelula

¹ Na kwe, kē onehobē gali aholokwane moglomabē letitabo ho, bu Jisame eso ho Pailat belē mētlelula. ² Na bu Jisas kē tafa lēglebē galime Pailatme megali motlola, "Ebē ho bu sebobē life mago onehobē wame lowene tufiji latotometēme. Bu megali latlome, 'Sobo takis baliti, Rom life magobē eso ho, Sisarme, asa elēlo.' Na bu megali latle, 'Bo Goto kē aniji toglēnēbē ho, onehome nēno nēgelēbē ho, bo kē eso ho.'" ³ Na

Pailat Jisame takune tlole, "Ju Israelbē afenēbobē tako eso hone?" Na Jisas tafu tētātē, "Nēgalife. Ju fene gali ele." ⁴ Na Pailat lotu lome wege mēglabē eso enēneme na oneho name gali tlole, "Bo ebē hobē, li fēye wesibiha, hwi hana nolotelē na bo manawa hana tēbo nogotlēme." ⁵ Kwe bu bubē gali anisasana tafu mētētātla, "Bu Judia provinsbē, li life li life asē tēbelēfa na onehome okokwe latlagukefēme. Na bu iniwa onehobē wame lowene tufiji latētāgutēme. Bu Galili provins mēta okli tle na bu li life li life asē tēbelēfa na ebelē mana ekē lisi."

Bu Jisame eso ho Herotbē naba li elēme mētlelula

⁶ Pailat kē gali aholokwane tlole na takune tlole, "Ebē ho, bu Galili provins mago hone?" ⁷ Pailat melowene tle, "Jisas Galili provins mago hofe. Bo bume Galili provins mago onehobē eso ho Herot belē jine nēgelēkākēme." Na bu Jisame eso ho Herot belē kēme jine telēkake. Herot bu ēbame bubē provins kile tle na kē nalē Jerusalem lifateme esokwaneme tafa tle.

⁸ Bu Jisame Herot belē mētlelula. Herot bu Jisas wesibi kē togotomebē gali waaholokwane tletle na bu anebo Jisame hwi loglōleme fene kwe bu hwi hana tlole. Kēme nēgēme bu Jisame hwi tlole na tako fleflesu kēme tle. Bu metole latle, Jisas bubē naba lime klelegowa wesibi blēge blēge nalogotometleme. ⁹ Kēme nēgēme Herot bu Jisame feilawa wesibime kēme tētākune tlole. Kwe Jisas bubē iniwa gali hana tafu totometle. ¹⁰ Na lotu lome wege mēglabē eso enēne na Gotobē galime okokwe moglomabē ho eso ho Herotme loliwa mutuju tla na bu Jisame blawa kē so mētētātlabē galime feilawa gali motlola. ¹¹ Na kwe Herotna bubē wame home boblo mogotomabē enēnena Jisame sisile lamototla na klēē galina gali motlola. Na eso ho fene mohweya, bu kēha lale ēho bume mētehvatla na bume Pailat belē ita jine mētelēkakla. ¹² Etani

Herotna Pailatna gëglë lamëtkefo. Kë olëna kwe yonanewa lamëtelo.

Pailat bu gali tle, “Jisasbë ato ti mëta nilina bu eletelo.”

¹³ Na Pailat bu lotu lome wege mëglabë eso enëneme na Israelbë afenëbobë eso enëneme na onehome gali telokwakeme na bu belë loko namokweijame na bu mëta loko mëtëkakija. ¹⁴ Na bume gali tlome, “Sobo ebë home bo belë elesulo, na sobo megali lalona, ‘Ebë ho bu sebobë life mago onehobë wame lowene tufiji latotometëme.’ Na bo sobobë li mëta bume kë galime watakune slemu nololë. Kwe sobo aholokwane elo. Bo ebë hobë, li fëye wesibiha, hwi hana nolotelë. Bo melowene nanelë, ‘Sobo bume fene so etatlobë wesibi, bu melë hana totle. ¹⁵ Na Herot bu mata, bubë li fëye wesibiha, hwi hana lolotle, na bu ebë ho sebelë ita këme jine lelëbakle.’ Aholokwane elo, ebë ho bu li fëye wesibiha hana totle na bo megali hana nëgelëme, ‘Bume lalowa, mogo nalë tëke elolo.’ Hanane mu. ¹⁶⁻¹⁷ Këme nëgëme, bo bobë wame home boblo mogotomabë enëneme afina gali nolomëme, bume taba afona lëlafä motlame na bo mana jine nelëkklëme.”*

¹⁸ Kwe oneho iniwa anisasana gali mëtla, “Ju kë home mogo nalë tëke elole na ju Barabasmë kalabusu lo mago jine elëbakëtëname.” ¹⁹ Barabas, ëtani, fli onehobë wame lowene tufiji tëtätëme, na bu gavman enëneme tako wame lamotloma, Jerusalem lifate mëta. Na bu kë nalë, ho lime mogo nalë tëke tole. Na gavman enëne bume kalabusu lowa këme tuku mëtla. ²⁰ Kwe Pailat metole latle, Jisasmë jine lëgelëkakleme. Këme nëgëme ita gali tlome, Jisasmë jine nalëgelëkakleme. ²¹ Kwe bubë gali aholokwane hana motlola na anisasana gali mëtla, “Bubë ato ti mëta nilina bu eletelo! Bubë ato ti mëta nilina bu eletelo!” ²² Na

bume ita gali tlome, “Sobo kë gali fëyeme gali elone? Bu fëye tëbo wesibi totlene? Bo ebë hobë, li fëye wesibiha, hwi hana nolotelë na bo megali hana nëgelëme, ‘Bume lalowa, mogo nalë tëke elolo.’ Hanane mu. Këme nëgëme, bo bobë wame home boblo mogotomabë enëneme afina gali nolomëme, bume tëklewa namogotlame na bo mana jine nelëkklëme.” ²³ Kwe bu Pailatme itaita anisasnamu gali motlola, “Bubë ato ti mëta nilina bu eletelo!” Na Pailat bubë wame gali yafe aholokwane tlokwe fëme na bu kwasa metletëme na melowene tle, “Matëbe. Bu melë matotla.” ²⁴ Këme nëgëme bu bubë lowenewa esogo tletëtëme na gali tle, “Jisas gli malële.” ²⁵ Na Pailat, Barabasmë, kalabusu lo mago tuhu totle na jine telëkakëtëme, bu fene gali molola. Barabas, ëtani, fli onehobë wame lowene tufiji tëtätëme na bu gavman enëneme tako wame lamotloma. Na kë nalë bu ho lime mogo nalë tëke tole. Na gavman enëne bume kalabusu lowa këme tuku mëtla. Na oneho fene tole mëtla, bu Jisasmë bubë wame home boblo mogotomabë enënebë toba elë gwa tetokwaketëme.

Bu Jisasmë ti mëta nilina bu mëtla

²⁶ Na wame home boblo mogotomabë enëne Jisasmë lifeku mago mëtlëlula, na bu Sairini lifate mago Saimonme alëgëme esune mëtlëla. Saimon bu waluju mago Jerusalem lifatewa tuju fene kwe bume fa mototla na bu Jisasmë këme bu mëglabë ti, bubë feiji mëta gwa mototatla na gali motlola, “Se! Mana ehule na Jisasmë nagi elëkakleme.” Na bu ti fejina nagi esogo tlagule.

²⁷ Na lebutako oneho bume nagi esogo mëtlagula. Na lebutako one bu yena esogo mëtlagula. ²⁸ Kwe Jisas bume swaya tletëme na gali tlome, “Sobo, Jerusalem lifate mago one, sobo bome asa ye eletëna.

* **23:16-17** Fli lowene ho bu melowene lamëtla, li gali mana lëbe kë gali mëta. Kë gali melë lëgëbelalële. Li li tlibutuna, bubë tako lotu olëna, eso ho Pailat bu jowa jowa kalabusu lo mago home bu belëme jine latlëkefëmetëme.

Matëbe. Sobo some fwa ye elome na sobobë nëbaleme fwa ye eletemome. ²⁹ Tokwafe, li tëbo olë fata lëgleme. Kë tëbo olë fata lëglena, kwe bu megali mëglame, 'One nëbaleme yoneti mëglabë bu fleflesu mëglame.' ³⁰ Kë nalë, oneho megali mëglame, 'Sebo metole nanëla, ebë fatini kwe seme tëtafu matla na lamu matëtana, hokweinawa gigli nanëglame na wame ho seme tëbo jwa namëgëtaname.' ³¹ Bo li fëye wesibiha hana telë kwe bu bome manawa tëbo mëtana. Bu bome melë mëtanana kwe bu Jerusalem lifate mago enëneme, memelë tëbo lowene mëta kë tafa mëglabë, tako tëbomu mogotomame."

³² Na wame home boblo mogotomabë enëne, bu tlemalë memelë tëbo lowenebë home mata mëtletluma. Bume, Jisasname mogo nalë tëtëke namëglame. ³³ Na bu li lifekuwa fwa mutula. Kë lifeku weniji melë, "Eso Elebo." Na kë fatini lufu mëta wame home boblo mogotomabë enëne Jisasme ti mëta bu mëtla na bu Jisasme kë ti magowa lë mototla. Na bu kë tlemalë memelë tëbo lowenenabë home bubë li mëta mata ola mëtla. Li tobamu toba elë tlibetle na li yemane toba elë tlibetle. ³⁴ Na Jisas ti magowa gali tëtëkeke, "Aya, ju ebë enënebë tëbo lowene, bome mogo nalë kë tëke moglonabë lowene, aholokwana ti eletëme. Bome melë kë mëgëtanabë wesibi, lowene sle jwa mëgletlame nëgeme." Na wame home boblo mogotomabë enëne bubë ato mago ëho blalo melëna sa mëtëtaya. Bu satu salë mëtla na ho mana aniji motloma jowa jowa wesibi glo namëglabëme.

³⁵ Onoho bu mana hwiwa motlok-wefëma, na kwe Israelbë afenëbobë eso enëne, Jisasme mana sosatletlë memototla na gali motlola, "Bu fli home taitame. Na bu ebë ho nëgebë kwe Goto bume kë aniji toglolebë, onehome lëgaitameme na nëno lëglebëme, kwe bubë ato lëgaitaleme fene." ³⁶ Na wame home boblo mogotomabë enëne, bu mata, bume sosatletlë memototla. Na bu loliwa mutuju tla na bume kaya tabo

wain taba liji tu mëglëla namëglame fene. ³⁷ Na gali motlola, "Ju Israelbë afenëbobë esoho nëgebë kwe jubë ato mana aitale." ³⁸ Na bu gali ti ka tabo mëta yahi mëtla na Jisasbë eso lufu elë fla mototatla. Bu kë mëta meyahi lamëtletla, "Israelbë afenëbobë tako eso ho."

³⁹ Jisasname iniwa kë bu mëtëglabë tëbo lowenenabë ho li, Jisasme tiniji galina megali tlole, "Ju melowene lalene, Goto jume kë aniji toglobë hone, hee? Hanane mu. Kwe melëbë kwe jubë ato aitalëme na seme mata aitanome. Kwe hanane." ⁴⁰ Kwe li tëbo lowene ho, libë gali aholokwane tlole na bume wame gali metlole, "Tokwafe Goto jume kë tëbo lëgëtabë wesibime ju uli jwa fëyeme elene? Ju hwi ele, bu seme iniwa tëtëkle mëtana. ⁴¹ Kwe bu seme kë tëtëkle mëgëtanabë kë kwe lalowa, bu sebobë memelë tetëbo lowenebë niji tëtëkle mëtana. Kwe ebë ho kë nëgebë, bu li fëye wesibiha hana totle bume blawamu tëkle motla." ⁴² Na bu Jisasme gali tlole, "Jisas, ju unina eso home tafa eglena kwe ju bome aholokwana asa ti ele." ⁴³ Na Jisas bume gali tlole, "Bo jume nëgalime gali nolë, eli ju bona heven lifeme weife tafa nëglome."

Jisas gli tle

⁴⁴⁻⁴⁵ Kliji ku mëta tlibe na kliji ki tetëfatle na tlukufiniwa tëbe. Na këha tëgemowagulebëë na taboklë kliji ita fetiha tëbe. Na kë tako ëho, bu tako lotu lo ino mëta këkesi tëgelulebë, lakawa tëmälita kufe lokwati.

⁴⁶ Na Jisas anisasnamu afëflei tle, "Aya, bo bobë amtëtomba jubë toba elë ekë gwa netëfaklë." Bu megali wafi tlole na tuku tëkakë.

⁴⁷ Na wame home boblo mogotomabë enënebë eso ho, bu këme hwi tle na Gotome fleflesu tletle na bibita totle na gali tle, "Nëgalimufe. Ebë ho bu lalë ho fe. Bu li fëye wesibiha hana tëbo totle."

⁴⁸ Na onoho kë hwime kë mitisiyabë, Jisas kë gli tëglebë yafe hwi motlola na bu tako maninibo memëtla na bubë lo elë ye motokouja.

⁴⁹ Na Jisasbë yabe enëne na Galili provins mago Jisasna kë mitisiyabë one, bu kakëha mëtelibukëya na iniwa wesibi hwi mëtelëkakëma.

Bu Jisas mogome aniji fuluju matëmatë mëta gwa mototla

⁵⁰⁻⁵¹ Arimatea lifeku mago ho bu kë mëta tètabe. Bubë weniji Josep. Arimatea bu Judia provinsbë li lifeku. Bu lale homu. Bu, Goto iniwa onehobë eso home kë tafa lëgletëmebë olëbëme, hwi lëglekëfebë. Bu onehobë gali aholokwane moglomabë letitabo ho li. Kwe bu onehobë gali aholokwane moglomabë letitabo ho flibë lowenebëme, Jisame mogo nalë kë tëkle mototlabë lowenebëme, helawa hana tletëme. ⁵² Na Josep eso ho Pailatme taju tle na takune tole, “Bo Jisas mogome ti mago lalowa tohwa nogotlëmene?” Na Pailat gali tole, “Lalowa tohwa etle.” ⁵³ Na kwe Josep Jisas mogome ti mago tohwa tëtëtëbakle na bu lale tatiwa ëho heletabona lei tole na tehule na tiho aniji fuluju matëmatë mëta gwa tujuwetle. Kë aniji fuluju, ho tabana go mëtlelëya. ⁵⁴ Bu Fraide taboklë mu, Jisas mogome gwa tole, na bubë tafawa mëglabë olë nounou watletëme.

⁵⁵ Galili provins mago Jisasna kë mitisiyabë one bu Josepme esogo mëtlagula na bu kë aniji fuluju matëmatë hwi motlëya na bu mata Jisas mogome këme kë gwa tégelujuwetlebë tala hwi motlola. ⁵⁶ Bu wahwi motlola na mana bubë lowa mutuja. Na lëkaluwa welë tu na fli lëkaluwa wesibi sle mototoma, Jisas mogome këna tefo namogotlame. Na tafawa mëglabë olë bu tafawa mëtla, Moses bu ëtani fene gali tle.

24

Jisas bu matëmatë mago huju tle

¹ Sande, olobalëwa mu, one bu matëmatëwa mutuja. Na lëkaluwa welë tu na fli lëkaluwa wesibi mata mëtehouja. ² Bu matëmatëwa fwa mutula na mehwi mëtla. Matëmatë ëfo kë tiji mëtlabë aniji waobobwelë

mëtagujayafe. ³ Na bu kë aniji fuluju matëmatë elë mëtëkakluja. Kwe bu Jisas mogome hwi hana mëtelujelëla.

⁴ Na melowene mëtla, “Jisas mogo hameta lëbene?” Bu lowene mëtlabëë, na tlemalë ho, bubë lime lamitlikakijowa. Bubë ëho kliji fene u mëtletëme.

⁵ Na kwe one bu tako ulimu memëtla na laibibuwa mëtla. Kë ho bume gali motlomo, “Sobo tuja ato home, gigli enënebë tala mëta, fëyeme hohwi etatelone? ⁶ Bu eme hana lëtabe. Bu wahuju lële. Bu some Galili provins mëta kë gali toglëyobë gali ita lowene egletelome. Kë gali melë, ⁷ ‘Bu bome, Gotobë life mago ho, Gotome lowene jwa mëgletlabë enëneme yo moglomame, bome ti mëta bu namëglame. Na bo matëmatë mëta tële olë nebëme kwe aona olëbëna huju nëgelëme.”

⁸ Bu tlemalë hobë gali aholokwane mëtla na bu ëbame, Jisas kë gali téglebë gali ita lowene mëtletla. ⁹ Na bu matëmatë mago mëtëkaklija na ita mutuja. Na bu kë hwi motlomabë wesibi gali, Jisasbë lowene esogo mëglelëtlabë we ita jowa home, na fli onehome, të mututatëma. ¹⁰ Makdala life mago Maria, na Joana na li Maria, Jems bota, na buna kë tafa mëtlabë fli one, bu kë galime, bubë gali tëme kë jine tégëlëmebë home yafe gali motloma. ¹¹ Kwe bubë gali tëme kë jine tégëlëmebë ho bu melowene mëtla, “Bu sogëname gali molonafe.” Na bubë gali aholokwane hana motloma. ¹² Kwe Pita hujawa téglebë na matëmatëwa fëka tokou. Na bu blou tle na hwi telukwake na bume këna kë lei mototlabë ëhowa hwi tlotle. Na kwe bu ita lowa tugujuna lowene fafa tëtagule.

Tlemalë ho bu Jisame, Emeus lifebë alëge mëta, hwi motlolo

¹³ Kë olë nawa, tlemalë ho, Jisame kë esogo mëtlelëlobë, Emeus lifeku elë mëtëyeu. Emeus lifeku bu Jerusalem lifate kakëha lëbe. ¹⁴ Tlemalë bu mëtëyeubëë na bu iniwa kë fata mëtëglebë wesibime gëgali motokoujo. ¹⁵ Bu gëgali motokoujobëë na mana Jisas lafatawa tletëme na buna

iniwa mutuja. ¹⁶ Kë tlemalë bume hwi motlolo kwe bume mëtëselëlo sle hana mëtelo. Goto bubë mëtëselëlo sle lowenebë obwelë latëtatëme na mëtëselëlo sle jwa këme motlolo.

¹⁷ Na Jisas kë tlemalë home takune tlome, “Sobo kë egisijobë, fëye wesibime gëgali ekweijone?” Bu megali watle, na tlemalë mana mitlibo na wabelë mëtletelo. ¹⁸ Na bu mago ho li, bubë weniji Kliopas, gali tlole, “Lebutako li life li life mago oneho, Jerusalem lifatewa esokwafe nime fwa mitisiya. Kwe ju Jerusalem lifatewa tokwafe ekë esine. Na juwa kë lifate mëta kë fata mëtëglebë wesibi lowene jwa këme eletëmene?” ¹⁹ Na Jisas bume takune tlome, “Fëye wesibi Jerusalem lifate mëta fata mëtlenë?”

Na tlemalë metafu mëtëtatelo, “Sebo, Nasaret lifate mago Jisasme kë fata tëgletlebë wesibime gëgali nokweijo. Bu Gotobë lowene mago gali të totokweflebë homu na bu Gotobë afutukuna klelegowa wesibi blëge blëge totokwefëme. Bu kalëlego gali të totokwefle ho. Gotona, iniwa oneho mata, melowene lamëtletla, ‘Bu lale homu.’” ²⁰ Kwe sebobë lotu lome wege mëglabë eso enëne na sebobë fli eso enëne, bume gavmanme yo motloma, na bu gali fa mëtëtatla, bume mogo nalë tëke namoglolame na bume ti mëta bu mëtla. ²¹ Sebo ëbame melowene latletla, ‘Jisas kë nëgebë kwe Goto kë aniji toglolebë ho, seme Israelbë afenëbobë wame hobë mago nëno nalëgleme.’

Na li gali mata lalëbe. Bu mogo nalë kë tëkle mototlabë, aona olë wamujutle. ²²⁻²³ Na ëje olobalëwamu semago one fli matëmatëwa muja na bu Jisas mogome, hana hwi molola. Na bu misiya na seme megali lamolona, ‘Sebo, enselme fwa hwi noloma na bu megali lamla, “Jisas tuja ato mana lëtabe.”’ One seme kë galime gali molona na sebo klelego menëletëma. ²⁴ Na semago ho fli, bu mata matëmatëwa muja, na one fene gali mla, bu mata Jisas mogome hwi hana mujuwelëla.”

²⁵ Na kwe Jisas tlemalëme gali tlome, “Sobo yaya fëyeme eletelone na Gotobë lowene mago gali të mototlabë hobë iniwa gali lowene sleme tole jwa fëyeme eletelone?” ²⁶ Gotobë lowene mago gali të mototlabë ho, bu ëtani Gotobë bogo mëta meyahi lamëtla, ‘Goto kë aniji toglolebë ho, onehome nëno lëglebë ho, bu elili afina fa lotleme na mana Goto bume iniwa afutuku lëlelëme na bu Gotona onehobë eso home weife tafa meletemome.’ Sobo kë gali lowene sle jwa fëyeme eletelone?” ²⁷ Na iniwa wesibi bume, Gotobë bogo mëta kë yahi mëtletlabë, bu kë wayo galime okokwe tlome. Bu ëtanifu ho, Mosesbë gali wayome afina okokwe tlome na Gotobë lowene mago gali të mototlabë hobë gali wayome mata okokwe tlome.

²⁸ Bu mutujabëë, na tlemalë këme ni mëgebobë lifeku loliwa fwa mutula. Kwe Jisas, luguju lugujuwa nalëgleme fene. ²⁹ Na kwe tlemalë bume lëkle mototlo, na gali motlolo, “Eguju egujuwa asa ele. Kliji walëtetigo na ki lëgebeme ekëne. Ju sebona eme ni nebëya.” Këme nëgеме bume lowa mëtletlulo. Na buna lowa mëtëkakluja. Na tafa mëtletlula. ³⁰ Na buna hi mëglabë masei mëta tafa mëtla. Na bu bletë nage fa totle na Gotome yaha gali tlole, “Ebë bletë nage yaha fëyeme enënanë.” Na bletë nage fufu totle na kë tlemalëme tlëme. ³¹ Bu melë tëglëna, na bubë lowene titika tëtatëme na mana bume mëtëselëlo sle mëtelo. Na bubë naba li mago laëhowa tëkakëte. ³² Na buwa gëgali mëtelo, “Sebo buna ëje alëgеме gëgali nokweijana, na bu Gotobë bogo mago wayo gali seme të lëtatënona kwe sebobë lowene klelego memeleteno na sebo tako fleflesu menelo.”

³³ Bu megali mëtelo na fowa motokokobë na ita Jerusalem lifatewa lafëkawa mëtëkoujo. Na bu Jisasbë we ita jowa lowene esogo mëglelëtlabë ho na buna kë loko mëtletlëyabë onehome hwi mutujuwelëmo. ³⁴ Na kë enëne bu tlemalëme gali motloma, “Nëgalimufe. Jisas matëmatë mago, wahuju lëlefe

na Pita wahwi lololefe.”³⁵ Na tlemalë bume alëgeme kë fata lëgletëmebë wesibime gëgali mëtletëmo. Na bu gali mëtelo, “Bu bletë nage fufu lëtatena sebo bume mana nëselëlo sle nelo.”

Jisas bubë lowene esogo mëglelëtlabë home olafa tletëme

³⁶ Kë tlemalë ho mana gëgali mëtelo na mana Jisas bume ku mëta lafatawa tletëme. Na bu megali tlo, “Sobobë lowene lëgëbetëyo sle malëletëyo.”* ³⁷ Kwe bu meweniji lamëtla, “Alibahofe,” na bu këme tako uli memëtla. ³⁸ Na Jisas bume gali tlo, “Sobo klelego fëyeme elone? Sobo tutunena fëyeme tafa elone? ³⁹ Sobo bobë toba yayahuju na juba yayahuju hwi elokwakimetëna. Ebë bo tekwe nëge. Sobo bobë ato lu etokwakilo lowene naegelome bo afabona, elebona nëtabë. Sobo lowene lalo, alibaho bu afabo jwa na elebo jwa mëtabëya bu kwe fleluwa.” ⁴⁰ Bu megali tle na bubë toba yayahuju na juba yayahuju bume lebotane totometëme.† ⁴¹ Na bu klelego memëtletla na tako fleflesu memëtla kwe bu lowene sle hana mëtla na melowene mëtla, “Ebë Jisas nawa, alibaho nawa.” Na Jisas takune tlo, “Sobo hi wesibi fli mana mëbetëyone?” ⁴² Na bume muniji mo lëne fa mëtëtatla na mëtletla. ⁴³ Na bu hilika totome na bubë naba li mëta hi tletëme.

⁴⁴ Na bume gali tlo, “Ëtani bo sobona mana tafa tëglana bo some megali latlëyo, ‘Iniwa wesibi, ëtani Moses na Gotobë lowene mago gali tle mototlabë ho, bome kë yahi mëtletë nabë na Buk Song mëta kë yahi mëtletë nabë bu kë iniwa wesibi fata mëglememu.” ⁴⁵ Na bubë lowene ha totometëme, Gotobë bogobë wayo gali iniwa lowene sle namëgletlame. ⁴⁶ Na bume gali tlo, “Gotobë bogo megali lalamë, ‘Goto kë aniji tlolebë

ho, onehome nëno nalëglebë ho, bu elili fa lotleme na gli lëleme na bu matëmatë mëta tle olë lëbeme na aona olëbëna kwe huju lëgleme. ⁴⁷ Na bu bubë wenijina iniwa life mago onehome gali tle mëgëtagutëmame, bubë tlebo lowene aholokwana ti namëglame na Gotobë lala lowenewa esogo namëglelëtlame. Bu melë mëglana, kwe Goto bubë tlebo lowene iniwa aholokwana ti nalëgletëmeme. Bu kë gali Jerusalem lifate mëta afina tle mëgëtatëmame.’ ⁴⁸ Iniwa wesibi sobo kë hwi toglobobë iniwa lifate mëta satë etagutemo. ⁴⁹ Sobo aholokwane elo. Ëtani aya Goto bu megali sle tle, bubë Amtëtomba some lëglëyome na bo bume sobelëme jine nëgelëbakëtëyome. Kwe sobo ebë lifate mëta fwa mana hwi elome na Gotobë Amtëtomba somëta mana letujutëyome na bubë afutuku fa etatelome.”

Goto Jisame tilekole

⁵⁰ Na kwe Jisas bume Betani lifate li elë tlelume. Na bubë toba elili tetokwakëme na Gotome takune tlo, kë onehome lëgaitame nalëgleme na ululu sle lotomeme. ⁵¹ Bu Gotome mana gëgali tëglagulebëë, na Goto bume mana heven lifewa alabujuwa tilekole. ⁵² Na bu sëkefo miti tafa mëtla na Jisame mana lotu mëtletla.‡ Na bu Jerusalem lifatewa tako fleflesuna mutuja. ⁵³ Na bu itaita tako lotu lowa mutujukefëya na Gotome fleflesu mëtkefëtla na bibita mototkwefla.

* **24:36** Fli lowene ho bu melowene lamëtla, “Kë gali, bu tle sëgetoba kume kë mëgëbebë, Luk bu nane yahi tle, kwe ho li bubë nagi yahi tle.” † **24:40** Fli lowene ho bu melowene lamëtla, “Kë gali, bu tle sëgetoba kume kë mëgëbebë, Luk nane yahi tle, kwe ho li bubë nagi yahi tle.” ‡ **24:52** Fli lowene ho bu melowene lamëtla, “Kë gali, bu tle sëgetoba kume kë mëgëbebë, Luk nane yahi tle, kwe ho li bubë nagi yahi tle.”

Aposel Jisasbë ëfalëbo mago gali kë mëgehilabë hobë wege melë tëgebetëme latle

*Jisas gali sle tlome, Gotobë
Amtëtomba jine nalëglëtëmeme*

¹⁻³ O yabe Tiofilus. Jisas ebë life mëta tafa tëglena bu onehome feilawa wesibi totometëme na okokwe tlome. Na Goto bume heven lifewa mana no tlële. Na iniwa wesibi, Jisas onehome kë totometëmebë na kë okokwe toglomebë bo ëbame wayahi tletë.

Jisas elili fa totle na gli tle na matëmatë mago huju tle. Na ebë life mëta niliafewe olë tëtabe. Na kë niliafewe olëna, bu kë aniji toglomebë Aposel home itaita tuhu tlelëkefëme na bume feilawa wesibi lebotane totometëme. Bume melowene namëgletlame, “Bu tuja ato lëtabefe.” Goto bubë onehome, eso home, kë tafa lëgletëmebë galime okokwe tlome. Gotobë Amtëtomba, Jisasme lalë lowene tlële. Na bubë Aposel home, loko tëtamë na iniwa wege bu melë namogotomabëme okokwe tlome. Na Goto bume heven lifewa mana no tlële. ⁴ Bubë Aposelna mana mëtëtabëyana, Jisas bume anisasana megali tlome, “Sobo Jerusalem lifate mago hokweinawa asa eyeu. Sobo Aya kë gali sle toglëyobë Amtëtomba fame sahwi eletelo. Ëbame bo kë wesibime kë gali toglëyobë. ⁵ Ètani, Jon onehome tu mëta baptais totome, kwe tokwafe, tokwëfo olëna kwe aya Goto bubë Amtëtombana some baptais logotome.”

⁶ Na li olëna, Aposel ho bu Jisasna loko mëtletlëya na bu këme takune motlola, “O tako ho, ju ebë olëna, sebobë, Israelbë afenëbonibë eso home tafa egletënamene, ètani sebobë semle Devit eso home fene tafa tletëna? Na ju sebobë wame home, Rom life mago home, hehë

naegletëmeme.” ⁷ Na Jisas bume gali metafu tëtatëme, “Bobë aya buwa olë wafi aniji tole, wesibi melë nalogotomebëme. Ebë olë lowene egletelobëme sobobë wesibi nane. ⁸ Kwe tokwafe, Gotobë Amtëtomba ligisi tëyome, na somëta lëtabeme na bu some afutuku nalëglëyome. Na sobo kë afutukuna, bobë gali të naegëtagutëmome. Sobo Jerusalem lifate mëta, na Judia provinsbë li life li life mëta, na Samaria provins mëta, na iniwa lifate mëta të etagutëmome.”

Jisas heven lifewa tokwale

⁹ Jisas kë gali watë tëtatëme. Bume mana hwi motlolabëë. Na Goto bubë naba lime tilekole. Na oloba lamo ttle na bume hwi hana motlola. ¹⁰ Bu mana hwi motokwakekefëya na tlemalë ho lamitlikakijowa. Bubë ëho tatiwamu. ¹¹ Na kë tlemalë gali motlomo, “Galili provins mago oneho, sobo mana fëyeme elibekefone na matafa elë fëyeme hwi ekwakekefone? Kë Jisasme kwe, Goto heven lifewa wafi lilekole. Kwe tokwafe ita bu lëgetujuleme, ëje sobo matafa elë lokwalebëme fene hwi eluluglo.”

Bu ho lime aniji motlola, Judas fene wege tle, bu këha wege fa nalogotleme

¹² Na Aposel ho kë fatini kile mëtla na Jerusalem lifatewa mëtëmatula. Kë fatinibë weniji ebë “Oliv tiwa fatini.” Bu kakë nane elijamë, loli mëta mu. ¹³ Bu lifekuwa fwa mototola na ëbame kë mëta tafa mëtletkefëyabë lowa ita mutuja. Na matawa kë ke togolebë lo ke elë motokwala. Bu kë lo mëta kë tafa mëtletkefëya enënebë weniji melë, Pita, Jon, Jems, Andru, Filip, Tomas, Bartolomyu, Matyu, Alfiusbë nëba Jems, Saimon Saimon bu Selot ho*, na li Jemsbë bowene Judas. ¹⁴ Kë enëne bu iniwa loko mëtletkefëya, na Gotome itaita gëgali mëtletkefëfla. Jisas bota Maria, na fli one, na Jisas bolijamoni mata mitisiya, buna iniwa Gotome gëgali namëgletlëkeflame.

¹⁵ Tokwafe, li olëna, bu loko mëtletlëya, Gotome gëgali namëgletlëlame.

* **1:13** Selot enëne bu metole lamla, Rom provins mago ho bu seme eso home asa tafa malëletëna.

Jisame lowene sle mëtletlabë oneho këniji loko mëtletlëya 120. Na Pita ku mëta tlibetëme na gali tleme, ¹⁶ “O bobë afanino na oneglëni, bo some Judasbë galime gali nolëyo. Ètani Gotobë Amtëtomba, eso ho Devitbë lowene huju tètatile na gali tle. Na kè galibë Gotobë bogo mëta lëbetle. Kè galibë, Jisame wamehome kè yo toglomebë home, Judasme, gali nene. Na ebë olëna kè wesibi wafi fata tle, Devit fene gali tle. ¹⁷ Sebo walowene nëla, ëbame Jisas, seme, Judasname iniwa aniji tlonä, bubë wege fa nanëtatlame.”

¹⁸ Judas, Jisame wame home kè yo toglomebë balitina, life afloko këna fa totle. Na bu kè life mëta titigo na imo labulewa tlatle na bu aliji tei tabo tëbe. ¹⁹ Jerusalem lifate mago oneho kè gali aholokwane mëtla, na bubë galina kè lifeku mefë mototla, “Akeldama.” “Akeldama” weniji ebë kè gali fenene, “Kola life.”

²⁰ Pita megali tle, “Devit, Buk Song mëta, Judasme gali meyahi latletle, ‘Kè hobë lo mëta ho li hana tafa lëgleme. Kè lo bwa malilibe.’ Na Devit li gali Buk Song mëta meyahi latle, ‘Ho li bubë wege afloko safa lëtatle.’

²¹⁻²² Këme nëgeme, sebo ho lime aniji noglolame, Judasbë afloko mëta wege fa nalogotleme. Na bu sebona Tako Ho Jisas matëmatë mago kè huju tëglebë gali weife të nanogotlame. Sebo ebëha home tole nëletla, Jon Jisame kè baptais totlebë hwi toglolebë. Na bu sebona Jisame mana kè esogo tëglagilabë bubë gli belë fe tëkaki. Na bu iniwa wesibi Jisas melë kè tëtagilebë bu wahwi tlagime. Na bu Jisame hwi tole, Goto kè no tëglëlebe heven lifewa. Sebo këha home tole nëletla.”

²³ Pita megali tle na bu tlemalë home aniji motloma. Li howe Josep, bume mefë lamototla, Barsabas. Na bubë li weniji, Jastus. Na li howe, Matias. ²⁴ Na bu Gotome megali motlola, “Tako Ho, ju iniwa onehobë lowene wahwi elagumetëna. Këme nëgeme sebo jume këme takune nëlëyo. Ju

seme lebotane naegëtatëname. Kè tlemalë mago, ju fëye home aniji tolene, ²⁵ Aposel hobë wege fa nalogotleme. Judas kè wege wakile tle, na bu wagli tle, na Goto kè le tëglëtëmebë tëbo lifewa tuju.” ²⁶ Na bu wenijina goglë sike mëtla na Matiasbë weniji fata tletle. Na bume aniji motlola, we ita jowa Aposel kè nëgebëna tafa namëglame.

2

Gotobë Amtëtomba letujule

¹ Bubë tako lotu olë fotokoke tëme. Kè lotu olëbë weniji Pentikos. Bu kè olë, nuju mago kè fafa motokweflabë wesibime, Gotome fleflesu mëtletla. Na Jisame lowene sle mëtletlabë oneho iniwa jowa lo mëta fwa loko mëtletlëya. ² Na mana, labasagli flelu lego fenene, heven lifate mago latigisitëmewa. Na kè tako lego bu kè mëta loko mëtletlëyabë lo iniwa lakewa tlotëme. ³ Na bu anusesi ahojuha wesibi hwi motloma. Na kè anusesi ahojuha wesibi, iniwa mëta tlëwagutëme. Na bubë eso mëta ahoju naflëboha metlëwagutëme? ⁴ Na Gotobë Amtëtomba kè iniwa enëneme tisi tëme. Na bu mëta tëtabetëme. Na bume afutuku tlëme. Na kè afutukuna lili anigawa gëgalina, gëgali mëtla.

⁵ Kè olëna, Israelbë afenëboni feilawa, Jerusalem lifate mëta mëtëtabëya. Bu Gotome kè lotu melekefëtlabë oneho. Kè oneho li life li life mago mitisiya. Na bubë galina bwa bwa gëgali mëtla. ⁶ Oneho kè legobë lego aholokwane mëtla, hwime loko motokweija. Bu Jisame kè lowene sle mëgletlabë enënebë gali aholokwane motloma na klelego memëtletëmamumu. Bubë lili galina gëgali mëtletëmame nëgeme. ⁷ Bu klelego memëtletëma na gali mëtla, “Ebë oneho bu sebobë lili galina kè gëgali mëglabë, bu Galili provins mago tekwe nëge. ⁸ Sebo lowene hana nëletëmafe, bu sebobë lili galina habëna gëgali mëglamene? ⁹ Sebo kè nëgebë, li life li life mago oneho

loko nëlelëya. Sebo fliye Partia na Midia na Elam lifate mago enëne. Na sebo fliye Mesopotemia na Judia na Kapadosia na Pontus na Esia provins mago enëne. ¹⁰ Na sebo fliye Frigia na Pamfilia provins mago enëne. Na sebo fliye Isip life mago enëne, na Libia provins li mago lifate Sairini mago enëne, na sebo fliye Rom life mago enëne, ¹¹ na fliye Israelbë afenëbonimu na fliye bu Israelbë afenëboni nane kwe bu Israelbë afenëbonibë lotu tokwafe esogo mëtletlëla. Na sebo fliye Krit life mago na Arebia provins mago enëne. Sebo iniwa, li li galina nētabēyabē enëne, kwe kē oneho, Gotobē tako afutukuna wesibi melē kē logotlebē, sebobē lili galina ekē tē motla.” ¹² Na bu iniwa klelego memētla na tutune mētla. Na blalo gēgali mētlelogwaya, “Ebē wesibi, ēje mēfata kē lēglebē ebē fēye wesibine, sebo lowene hana nēletlafa?” ¹³ Kwe fliye sostonatlētē memototoma na bume tiniji gēgalina gali motloma, “Tiho wain taba liji tu feilawa hi mēglame nēgeme, bu kēme yaya mla.”

Pita gali tē totle

¹⁴ Pita na fli we ita jowa Aposelna mitlija. Na bu onehome anisasana gali tlome, “Bobē ilawa mago enëne na sobo fli enëne, Jerusalem lifateme kē tafa egelobē, sobo aholo bo etatēna. Bo some kē wesibi wayobēme gali nēglēyome, sobo lowene naegletelome. ¹⁵ Sobo seme melowene laletēnane, ‘Wain taba liji tu hi mēglame nēgeme kēme yaya mla?’ Weyewa. Hanane mu. Sobo hwi elo, ebē olobalē klijina, na ho bu olobalē klijina wain taba liji tu hana hi mēlekefēya. ¹⁶ Ebē wesibi ēje kē fata lēglebē, Gotobē lowene mago gali tē totokweflebē ho, Joel, ētani wagali tletle. Bu megali latle, ¹⁷ ‘Goto megali latle, “Yawe olē nounou lēglena, bobē Amtētomba iniwa enēneme nēglēwagumēme. Sobobē nēbale bobē lowene mago gali tē mogotlame. Sobobē falake na filemi ho, bu Gotobē toba mago nimitelē

hwi mēglame. ¹⁸ Kē olēna, bobē Amtētomba, bobē wege onehome nēglēmēme. Na bu bobē lowene mago gali tē mogotlame. ¹⁹ Bo klelegowa wesibi matafa mēta fata nogotomēme na life mēta, mata, fata nogotomēme, bobē afutuku naolafa nogotlēmē. Na bu wino, ahoju, tako ahēyana hwi moglomame. ²⁰ Na kliji ki letofatleme na klabēwa lēbeme, na yeme u mata obwelē tlamēme na winowa fata tlamēme. Kē wesibi yawe lēkakeme na mana Goto bubē tako afutuku olafa lotleme. ²¹ Na kē nalē, iniwa oneho, Goto bume lēgaitameme, kē takune moglolabē, kwe Goto bume lēgaitameme na nēno lēleme. Na bu tafa sle mlame.” Ebē gali kē nēgebē, Gotobē lowene mago gali tē totokweflebē ho bu gali tle.”

²² Na Pita ita gali tle, “Sobo Israelbē afenēboni, sobo aholo bo etatēna. Bo some Nasaret life mago Jisame gali nolēyo. Goto bu kē home aniji tlole. Na tako afutuku tlēle. Na bu kē afutukuna, memelē tako afutukuna wesibi na memelē klelegowa wesibi blēge blēge totome, sobobē naba li mēta. Goto melē kē tēglebē, sobo melowene naegelome, ‘Goto ebē home jine tlēlefe.’ ²³ Goto bu ētani walowene sle tle. Na bu ebē home some watlēyo, sobo wame home yo naeglomome, bume ti mēta, mogo nalē bu namēglame. ²⁴ Kwe Goto bume matēmatē mago wahuju totle. Bu kē gli tēglebē elili mago wafi no tlēle. Gli bume hana fa logotleme. ²⁵ Etani eso ho Devit bu kē home wagali tletle,

‘Bo Tako Home wahwi nololē,
bobē lime unaunalēmemu lētabe.
Bobē lime lētabeme nēgeme
bo li wesibimeha uli jwa kēme
nēletelē.

²⁶ Kēme nēgeme bobē lowene lalowa
kēme lēbetenē,
fleflesu na kēme gēgali nelē.

Lale wesibi, Goto bome melē kē lo-
tometenēbē,
bo kē hwi nēletemē.

²⁷ Ju bome lebo enēnebē life mēta kile
hana egētanēme.

Jubë lowenewa esogo sle
lëglelëlebë lale wege home,
matëmatë mëta kibo lëglëbëme,
hwiwa hana eglolome.

²⁸ Ju bome lale tafa lowenebë waleb-
otane têtatenë,
na ju bona unaunalëme tafa
nëgelome
na ju bome tako fleflesu
enënëmu.'

Ebë gali Devit bu të totle."

²⁹ Na Pita megali tle, "Bobë afanino
na oneglëningo, bo sebobë ëtanifu eso
ho Devitme gali sle nëglëyome. Bu
wagli tle na bume matëmatë mëta
gwa mototla na bubë matëmatë
semëta mana mëbe. ³⁰ Kwe Devit bu
Gotobë lowene mago gali të totokwe-
flebë ho. Na Goto bume anisasana
megali sle latlole, 'Nëgalimu, ju eso
home fene tafa ele, tokwafe, jubë
weife mago hobë nëba bu metafa
lëgleme.' ³¹ Devit bu Goto tokwafe
logotomebë wesibime lowenemu
sle latletëme. Na bu, Goto kë aniji
toglëlebë home, onehome nëno
lëglebë home, melowene sle tletle, 'Bu
matëmatë mago huju lëgleme.' Këme
nëgeme bu megali tle, 'Goto bume
gigli enënebë life mëta hana hwiwa
loglölome na bubë ato matëmatë mëta
kibo hana lëgletleme.' ³² Na kwe kë ho
bu ebë Jisas. Na Goto bume matëmatë
mago wafi huju totle. Na sebo bume
hwi tlole na sebo kë wesibime këme
gëgali nëletla. ³³ Goto bume fleflesu
tletle na mana no tlële, Gotobë
tobamu toba elë tafa nalëgleme, eso
home weife tafa namëgelome. Na
bolijaya Amtëtomba bume tlële, bu
ëtani fene gali tle. Na Jisas ëje seme kë
Amtëtomba ekë lënëna. Këme nëgeme
ëje kë wesibi sobo kë hwi eglolobë
na kë aholokwane eglolobë, ebë kë
wesibi Jisas seme kë lënëna. ³⁴ Kë
galibëme, Devit bu bume nane gali
tle. Weye, li home gali tletle. Sobo
walowene elo. Devit bu heven lifewa
hana tokwale Jisas fene tokwale.
Hanane. Kwe Devit bu megaliwa
latle,

'Tako Ho bobë Tako Home megali lat-
lole,

"Ju bobë tobamu toba elë tafa
eleme,

na eso home weife tafa
nëletemome.

³⁵ Sebo onehome mana tafa
nëlekefëtemobëë
na jume kë wame mëglëyobë one-
home,
bo mana boblo nogotomëme
na bu jubë gali boblo jwa
mëgëtatëyome."

³⁶ Na kwe, sobo Israelbë afenëboni,
sobo melowene sle eglolome, 'Ebë
ho Jisas kë nëgebë, sobo time kë
bu tégelobë, Goto bume Tako Ho
lëgëtabebëme wafi aniji tlole. Bubë
enëneme nëno nalëglebëme wafi aniji
tlole."

*Lebutako onehome baptais moto-
toma*

³⁷ Oneho Pitabë gali yafe aholok-
wane mëtletla na bubë gali bubë
lowene sisilemu metëtatëme. Na
bu Pitaname Aposel fliname këme
takune motloma, "O afanino, eli
sebo habelë nëglamene?" ³⁸ Na
këme Pita gali tlome, "Sobo jowa
jowa kë nëgebë, tëbo lowenebë
aholokwana ti elome na Gotome
fwa lowene sle eletelome na sobo
Jisas Klaisbë wenijina baptais elome.
Sobo melë eglolona, kwe Goto bu
sobobë tëbo lowenebë aholokwana
ti lëgletëyome na bubë Amtëtomba
lëlyëyome. ³⁹ Ètani Goto wafi gali
sle tle, bubë Amtëtomba some
lëglëyobëme na sobobë afenëboni
mata na kakë kë tafa mëtlabë one-
home mata lëglëmëme. Sebobë Tako
Ho, Goto, iniwa onehome, bu belë
migisiyabëme, kë we loglölomebë,
bubë Amtëtomba lëglëmëme."

⁴⁰ Na Pita bu fli feilawa gali të
tëtatëme na këme bume anisasana
gali tlome, "Sobo tëtëbo wesibime
ululu sle sa elo na Goto some
lëgaito nalëgleme satakune elokwe-
flo, sobona, tëbo lowene kë esogo
mëglelëlabë enënena, iniwa tëbo egli-
tolime." ⁴¹ Na feilawa oneho Pitabë
gali lowene sle mëtletla na Aposel ho
bume mana baptais mototoma. Na
kë olëna, Aposel ho, 3,000 onehome
baptais mototoma. Na buna, Jisame

ëtani kë lowene sle mëtletlabë onehona, iniwa sago mëtla.

Jisame lowene sle mëtletlabë oneho bu jowa lowenenawa mëtëtabëya

⁴² Iniwa olë, Jisame tokwafe lowene sle mëtletlabë oneho, Aposel ho kë të mototokweflabë gali aholokwane mëtkefëya na kë galiwa esogo sle mëtletlëla. Na bu Jisame lowene sle mëtletlabë oneho flina loko mëtkefëya. Na bu blalo yonane lowenena hi mëtkefëya na Jisas bu gli tëglebë olëna kë hi tëglelëmebë hi wesibi mata hi mëtkefëya. Na Gotome gëgali mëtletlëkefla. ⁴³ Na Aposel ho bu Gotobë afutukuna, klelegowa wesibi blëge blëge mototokefëma. Na iniwa oneho hwi motloma na klelego memëtletëma na tako tutune memëtla. ⁴⁴ Na iniwa oneho, Jisame kë lowene mëtletlabë, bu jowa lowene nawa tafa mëtlamu. Na bu melowene lamëtla, “Jowa jowa enënebë wesibi kë nëgebëye, ebë sebo Jisame kë lowene sle nëgletlabë iniwa enënebë wesibi.” ⁴⁵ Na li li olëna bubë flëke na fli wesibina balitina hihijika mëtla. Na bu kë balitina hi wesibi jwa enëneme mëtaitama. ⁴⁶ Na iniwa olë bu Gotobë tako lotu lo mëta loko mëtletlëkefëya. Na bu li lo li lo mëta mana loko motokoukefëya. Na hi wesibi mana hi mëtkefëya. Bu yonane lowenena tafa mëtla na fleflesu lowenena hi motokoukefëya. ⁴⁷ Na iniwa olë bu Gotome fleflesu lamëtkefëtla na bibita mototokwefla. Na iniwa oneho bume fleflesu lamëtkefëtëma. Olë li olë li, Tako Ho bume lowene jwa mëgletlabë onehobë lowene sle tëtakefëtëme. Na bume lowene sle mëtletla. Jisas bu melë tle na bume lowene sle mëtletlabë oneho feilawamu fata mëtletla.

3

Kiju mogotabo ho sle tle

¹ Li olëna, Pitana, Jonna, taboklë klinjina oneho Gotome gëgali mëttagulabë olëna, Gotobë tako lotu lowa mëtëyeu. ² Na tlemalë, fli enëneme hwi motlomo, kiju mogotabo home mëtlesula.

Bu botabë imo mago kiju mogotabo fata tle. Iniwa olë bu kë belë mëtlesukefla na Gotobë tako lotu lobë lëglesli ino ëfo li mëta gwa mototokwefla. Bu kë inobë weniji mefë lamototla, “Lale Ino.” Na kë kiju mogotabo ho, tako lotu lowa kë mëtisikefëyabë onehome, balitime, gëgëba tlokwefëme. ³ Na kë ho tlemalëme hwi tlome, Gotobë tako lotu lowa mëtaklujo namëgelome kofene, na bu balitime mana gëba tlome. ⁴ Pitana Jonna bume anisasana hwi motlolo na Pita gali tole, “Ju seme hwi elëfakëna.” ⁵ Na kë ho bume anisasana wëya tlelëme na melowene latle, “Baliti mëglënomefe.” ⁶ Kwe Pita gali tole, “Masiwafe, bo baliti hananefe. Kwe bo jume kë nëglëbë wesibi nane. Bo Nasaret life mago Jisas Klaibë afutukuna jume gali nolë, ju huju elëme na asë elëme.” ⁷ Na Pita tobamu tobame fa totle na hujume taitale. Na bubë kiju laslewa metletle. ⁸ Na bu hokweinawa huju totokwakle na asë tëbelëfa. Na buna, tlemalë hona, iniwa Gotobë tako lotu lowa mëtëkakluja. Na bu asë tëbelëfa. Na okokli okokli tëbelëfa. Na Gotome mana bibita tëttagule. ⁹ Na iniwa oneho lotu lo mëta kë tafa mëtlabë, bume mehwi motlola, bu asë tëbelëfa na Gotome bibita tëttagule. ¹⁰ Na bume lowene sle mëtletla na melowene lamëtla, “Ebë ho kë nëgebë kwe bu Gotobë tako lotu lo lëglesli mago ino ëfo li mëta kë tafa lëglekëfebë ho, balitime kë gëgëba lëglekëfebë ho.” Bume hwi motlola, kiju lalowa mëbetle na klelego memëtla.

Pita bu tako lotu lome gali të totle

¹¹ Iniwa oneho kë home kë fata tęgletlebë wesibi gali aholokwane mëtla na klelego memotokouja. Na bu fëka motokweija, kë home hwi namoglolame. Na bume mehwi motlola, Pitaname Jonname tobame fafa tle. Na bu lotu lo sebatlë mëta mana mitlija. Bu kë sebatibë weniji mefë lamotla, “Solomonbë sebatlë.” ¹² Pita onehome hwi tlome na gali tlome, “Sobo Israelbë afenëboni, sobo ebë wesibi kë fata lëglebëme fëyeme

klelego ekoujone? Na sobo seme anisasana fëyeme wëya eelënanane? Sobo melowene lalone, 'Sebo Gotobë naba lime asë sle nanelo na kë home mana sle notlo?' Weye. Hanane mu. Sebo kë home sebobë afutukuna hana sle notlo. Weye. Hanane mu. ¹³ Sebobë semleninobë Goto, Abraham, Aisak, Jekopnabë Goto seme meolafa latëtatëna, bubë wege ho, Jisas, bu tako afutukuna ho, na bu Jisame tako fleflesumu latletle. Kwe sobo bume wame ho betelë tlelulo, mogo nalë tëkle namogotlame. Eso ho Pailat bume jine lëgelëkakleme tole latle fene, kwe sobo bume jine lëgelëkaklebëme tole hana tletelo na bume hehë tletelo. ¹⁴ Jisas bu Gotobë iniwa gali esogo sle tëglelëtlebë ho, na bu lalemu na li fëye wesibiha hana tole. Kwe sobo bume tole hana tletelo na hehë tletelo. Na sobo eso ho Pailatme gali tlolo, ho mogo nalë kë tëke toglobë home kalabusu lo mago jine nalëglëleme, Jisame asa jine elëtëna. ¹⁵ Jisas bu seme lala tafame sle lëgëtana ho. Kwe sebobë galime fwa nëgeme bume mogo nalë këme tëkle mototla. Kwe Goto bume matëmatë mago huju tole. Na sebo tlemalë kë wesibi sebobë nabana hwi tlolome nëgeme, kë loweneme fwa këme gali nelo. ¹⁶ Sebo melowene sle nëgelome nëgeme, 'Jisas ebë home lalowa sle logotleme, na bubë afutuku ebë home këme sle lotle.' Jisas sebobë lowene buwa huju lëtateno na këbë lowenena ebë home sle notlo. Na sobo ebë home wahwi elolo, ëtani buwe kiju mogo tabo tëtabe kwe ëje lalowa ekë asë lëbelëfa.

¹⁷ O, bobë afani, bo walowene nelë, sobona, sebobë eso hona, sobo melowene hana tletelo, 'Goto Jisame wafi aniji tlolefe, onehome nëno nalëgleme.' Sobo kë wesibime lowene hana telo, na Jisame këme tëbo totlo. Sobo meweniji latelo, Jisas bu atwati howa. ¹⁸ Gotobë lowene mago gali ëtani kë të mototokweflabë home, Goto megali latlome, onehome nënome, kë gali tëgletlebë ho, bu tako elili fa logotleme na gli lëleme. Iniwa

galime bu kë gali toglobë, bu fatamu latotome.

¹⁹ Këme nëgeme sobo tëbo lowene, aholokwana ti elome na Gotome fwa lowene sle eletelome. Sobo melë egelona kwe Goto bu sebobë tëbo lowenebë aholokwana ti lëgletëyome. ²⁰ Na Tako Ho some tiho lowenena tafa egelobë lowene lëglëyome. Na unina, bu Jisame ita jine lëgelëfakleme. Bu kë home wafi aniji tlole seme nëno lëglebëme. ²¹ Kwe bu heven lifate mëta tafa lëglebë, na Goto iniwa wesibi ëtani kë blëge totomebë, ita sle logotomebë olë mana folokoke tleme. Eëtani mu, Goto kë galime, gali sle tleme. Na bu bubë lowene mago gali të mototokweflabë home aniji tleme, kë gali onehome të namëgëtakefëtëmame.

²² Eëtani Moses megali latle, 'Sebobë Tako Ho, Goto, bu sebobë semle lime aniji loglome, bubë gali të nalëgëtatëyome. Na bo Gotobë lowene mago gali të notokweflëbë ho fene tafa nelë, bu mata mefata nalëgleme. Sobo bubë gali aholokwane elolome na kë gali esogo eelëlome. ²³ Na iniwa oneho, kë hobë gali aholokwane jwa mëglana na esogo jwa mëglelëana kwe Goto bume tëbo logotomeme. Na bu Gotobë onehobë ku mëta hana tafa mëgelulame.' ²⁴ Gotobë lowene mago gali të mototokweflabë ho iniwa, bu ebë olëna kë fata lëglebë wesibime, gëgali motokweija. Samuel bu kë wesibime afina wagali tle na tokwafe Gotobë lowene mago gali të mogotlabë enëne fli, Samuelbë nagi kë fata mëtlabë, bu mata kë wesibime gëgali mëtla.

²⁵ Goto bu ëtani megali sle tle, bu ho lime jine lëglëleme, onehome nëno nalëgleme. Na Gotobë lowene mago gali të mototokweflabë ho bu kë galime onehome gali motlokwefëma. Na Goto bu kë home sobelë jine tlëtëyo, bu fene gali mëtla. Goto sebobë bisemleninome megali sle latlome, bume lala tafa nalëglelëmeme. Na kë gali sle gali bu soboname iniwame gali tle. Goto bu Abrahamme megali

sle latlole, 'Bo tokwafe iniwa lifate mago enëneme lale tafa nëglëmeme. Na kë lale tafa lëglëme ho, jubë bisemleni mëta fata lëglëme.' ²⁶ Këme nëgeme, Goto bubë wege home aniji tlole na sobelëme afina jine tlëtëyo, some ululu sle nalogotome na some jowa jowa onehome, tëbo lowenebë aholokwana ti egløbëme laitome."

4

Bu Pitana Jonname kalabusu lowa sike mëtla

¹ Pitana Jonna onehome mana gëgali mëtlelëmobëë, na lotu lo mëta wege mëglabë ho fli, na Gotobë tako lotu lobë plismanëbë eso ho, na Sadyusi enëne* fli, mana mitisiya. ² Bu melowene lamëtla, "Tlemalë bu onehome megali të mëtatemo, 'Goto Jisame gli mago wahuju totle.' Na këme sebo melowene nanëla, 'Goto iniwa gigli enëneme huhuju logotomeme.'" Këme nëgeme bu tlemalëme tako wame lamotloma. ³ Na bu tlemalëme fafa mëtla na Israelbë afenëbonibë lotu eso enëne belë mëglelumame fene. Kwe taboklëmu nëgeme na bume kalabusu lo elë fwa këme sike mëtla. Li olëna namëglelumame. ⁴ Kwe lebutako oneho bu Pitabë gali aholokwane mëtla na bu Jisame lowene sle mëtletla. Na Jisame lowene sle mëtletlabë onehobë tabei këniji mefata latla 5,000 elë ëjeha fwa neme.

Bu Pitana Jonname, Israelbë afenëbonibë lotu eso enënebë naba li elë mëtlesuma, bubë gëgali aholokwane namëgletëmame

⁵ Jowa olë mëtla na Israelbë afenëbonibë letitabo enënena, lotu eso enënena, Gotobë galime okokwe moglomabë hona, bu Jerusalem lifate mëta loko mëtlelëya. ⁶ Na Gotobë tako lotu lo mëta wege lëglebë tako eso ho Anas, buna iniwa loko mëtlelëya. Na Anasbë ilawa mago ho, Kaiafasna, Jonna, Aleksanderna bubë fli ilawa mago ho mata buna

loko mëtlelëya. ⁷ Na bu Pitaname Jonname mëtlesuma na bubë naba lime ola mëtëkakija. Na bu tlemalëme metakune motloma, "Some ya gali tloyone, na some kë afutuku ya tlëyone na sobo kë home sle totlo?"

⁸ Na Gotobë Amtëtomba Pitame afutuku tlële, na bu megali latlome, "O Israelbë afenëbonibë letitabo enëne na sebobë eso enëne. ⁹ Bale, sobo seme kiju mogo tabo home kë tëgaitalobëme takune naeglonamene? Na sobo melowene sle naegletelomene, 'Ebë ho habelë sle lamototlone?' ¹⁰ Kwe melë nëgebë, kwe sobo iniwa melowene egletelome, na sobo Israelbë afenëboni iniwa sobo mata melowene egletelome, 'Nasaret life mago Jisas Klaisbë afutuku ebë kiju mogotabo home sle totle na sobobë naba li mëta ekë lilibetëyo.' Kwe sobobë so galime fwa bume mogo nalë ti mëta këme bu mëtla. Kwe Goto bume matëmatë mago huhuju totle. ¹¹ Gotobë bogo, bu ebë wesibime mewafle gali lalatle, 'Lo gliji ho, bu lo, anijina gliji mëtla. Kwe bu li anijime meweniji lamëtla, "Tëbowa." Këme nëgeme, mëglëbo elë gwa mëtetokwakëya. Kwe kë aniji kë gwa mëtetokwakëyabë bu lale anijimu ebamë. Lo bulego kë aniji mëta lotle.' Sobo aholokwane elo. Sobo kë lo gliji enënena Jisas bu kë aniji fenene. ¹² Jisas buwamu seme nëno lëglëme. Goto, Iniwa life mago onehome, limeha meaniji hana tlole, seme nëno lëglebëme. Goto Jisame fwa aniji tlole."

¹³ Na iniwa Israelbë afenëbonibë lotu eso enëne melowene lamëtla, "Pitana, Jonna, skulme hana mëtëyeu. Tlemalë bu atwati ho." Kwe bume yafe hwi motloma, tlemalë bubë naba lime gëgalime uli hana mëtelo. Na bu këme klelego memëtletëma na melowene mëtla, ëbame tlemalë bu Jisasna asë mëtla. ¹⁴ Na bu kiju mogotabo kë sle tëglebë home hwi motlola, Pitana Jonna weife mitlija, këme nëgeme Pitanabë Jonnabë gali

* **4:1** Sadyusi enëne bu melowene mëta tafa mëtla, "Lebo enëne bu hana huhuju mëglame."

habëna tafu mëgetatëmamene?

¹⁵ Na kwe Israelbë afenëbonibë lotu eso enëne, Pitaname, Jonname bu mago jine mëtelëkakëma. Tlemalëme wajine mëtelëkakëma na bu blalo mana gëgali mëtla, ¹⁶ “Sebo kë tlemalë home habelë nogotomamene? Tlemalë bu klelegowa wesibi blëge mototlo. Na iniwa oneho, Jerusalem lifate mago, bu këbë wesibi wafi lowene sle mletla. Sebo megali hana nëglame, ‘Ebë sogëna wesibi.’ Sebo able hana nëglame. ¹⁷ Kwe kë kiju mogo tabo ho, kë sle lëglebë gali, iniwa oneho betelë fifiji mëglagulalime. Këme nëgëme sebo bume anisasana lëkle nogotomame, bu fli onehome, Jisasbë galime gali jwa namoglomame.” ¹⁸ Na kwe bu tlemalëme ita mëtlelëkakima na anisasana gali motloma, “Jisas kë totomebë wesibime, itaita asa gëgali elekefo na sobo fli onehome Jisasbë wesibime asa okokwe elokwefomo. Matëbemu.”

¹⁹ Kwe Pitana Jonna bubë gali metafu mëtëtatemo, “Sobo habë lowene lalone, Gotobë naba lime fëye lowene lalë lëlene? Sebo Gotobë tole esogo nëglelëlome o sobobë tole esogo nëglelëlome. Sobo kë wesibi mana lowene sle eletemo. ²⁰ Kwe sebo ëfalëbo kujuna hana tafa nëgelome. Sebo Jisame kë hwi toglobë wesibi, na Jisasbë ëfalëbo mago kë aholokwane toglobë gali, onehome të nëgetatëmome.”

²¹ Na kwe Israelbë afenëbonibë lotu eso enëne bu kë tlemalëme ita anisasana gali motloma. Bu bume tëbo mogotomabë lowene yafe sle mototla, kwe iniwa oneho, Goto kë kiju mogo tabo home kë sle togolebëme, lowene mëtla na Gotome fletesu mëtlekefëtle. Këme nëgëme, Israelbë afenëbonibë lotu eso enëne bu onehome uli memëtletëma na bu kë tlemalëme hana tëbo mototoma na bume jine mëtelëkakëma. ²² Na kë kiju tëbona home, tlemalë Jisasbë afutukuna kë sle mototlobë, bu niliafewe tlibutu wasigli totome na botabë imo mago kiju mogo tabo fata

tle.

Bu Gotome gëgali mëtlelëla Jisasbë gali të mogotlabëme afutuku nalëglëmeme

²³ Israelbë afenëbonibë lotu eso enëne, Pitaname Jonname wafi jine mëtelëkakëma. Na kwe tlemalë Jisame lowene sle mëtlelabë oneho fli betelë ita mëtëyeu. Na lotu lo mëta wege mëglabë eso hobë gali na fli Israelbë afenëbonibë letitabo enënebë gali bume gali të mëtëtatemo. ²⁴ Bubë gali aholokwane motloma, na kwe iniwa bu jowa lowenenawa Gotome gëgali mëtlelëla, “Tako Ho, ju matafa blëge totle, na life blëge totle na nutu blëge totle, na iniwa wesibi kë mëta kë mëgëbebë mata blëge totome. ²⁵ Ètanimu jubë Amtëtomba, sebobë semle, Devitme gali tlële. Bu jubë wegeho tafa tletë. Na bu megali latle, ‘Gotome lowene jwa mëtlelabë enëne, bu fëyeme enisusu mëlane?

Li life li life mago oneho, bu Gotome wameme, gali yafe sle mototla, kwe hanane.

²⁶ Iniwa lifate mago eso ho bu wameme sagli metlëla, na bu loko mëtlelëya,

Tako ho na, seme nëno lëgleme kë aniji toglobë honame, momogli namëgletomame.’

²⁷ Ebë gali Devit kë yahi tëglebë, bu iniyafememu yahi tle. Herotna, Pontius Pailatna, Israelbë afenëboni mëtabëya jwa mëglabë enënena, Israelbë afenëbonina, bu kë lifate, Jerusalem mëta loko mëtlelëya, Jisame tëbo namogotlabëme. Jisas, jubë lalë wege ho. Na ju bume wafi aniji tlolë, jubë onehome nëno lëleme. ²⁸ Bu kë wesibi melë kë mëtlebë, kwe jubë gali na jubë tolewa esogo mëtlelëla. Jubë afutuku nawa, ju ètani wafi gali sle tle, këbë wesibi fata lëglebëme. ²⁹ Kwe Tako Ho, ëje sebo jume gali nolëyo, bu seme kë wame moglonabë gali, lowene egletleme. Na ju seme, jubë wege enëneme, afutuku elëlëname na sebo jubë gali tëme uli jwa nanëglame. ³⁰ Goto, jubë

afutuku onehome olafa etatēmeme na onehobē ato elili sle etometēmeme na klelegowa wesibi mata blēge etometēmeme. Ju kē wesibi jubē wege ho Jisasbē afutukuna melē saetometēme.”

³¹ Bu Gotome wafi gēgali mētletlēla, na kē mēta, kē loko mētletlēyabē lo, asēwa tletēme. Na Gotobē Amtētomba bume afutuku tlēme na bu Gotobē gali feilawa tē mototla na bu kē gali tē mogotlabēme uli hana mētla.

Jisame lowene sle mētletlabē oneho, wesibi blalo sa mētētaya

³² Jisame lowene sle mētletlabē oneho bu jowa lowene nawa tafa mētla. Ho li bu megali hana tle, “Ebē wesibi kē nēgebēye, ebē bobēwa.” Weye. Iniwa wesibi kē nēgebē ebē iniwa onehome lēgaitamebē. ³³ Na Aposel ho bu tako afutukuna, Tako Ho Jisas matēmatē mago kē huju tēglebē gali, onehome tē mētetakefētēma. Na Goto bume lēgaitameme tako fleflesumu latletēme. Na bume ululu sle totome na bu tafa sle mētla. ³⁴ Na bubē ku mago, li hoha, wesibime hana afolo tle. Hanane mu. Iniwa oneho bu flēke o lona kē mētētābēyabē, bu kē wesibi balitina hihijika mētla. Na bu kē baliti glo mētla na Aposel ho betelē mētehweiya. ³⁵ Na bubē toba mēta gogwa mētla. Na Aposel ho kē baliti, wesibime kē afolo mētlabē enēneme sa mētētāgutēma.

³⁶ Na ho li buna tafa mētla bubē weniji Josep. Na Aposel ho bume li weniji fē mototla, Barnabas. Barnabas weniji kē nēgebē kē gali fene lēbe, “Onehobē tutune lowene sle lēgētātēmebē ho.” Barnabas kē nēgebē bu Livaibē afenēbo na bu Saiprus afayo mago ho. ³⁷ Bu bubē flēke afloko li, balitina hihijika tle. Na bu kē baliti tehwei na Aposelbē toba mēta gogwa tle.

5

Ananiasna Safairana Gotome sogēna motlolo

¹ Na ho li buna tafa mētla. Bubē weniji Ananias. Na bubē nobē

weniji Safaira. Ananias bubē flēke afloko balitina hihijika tle. ² Na kē glo tēglebē baliti fli ēho totome. Na no mata kē wesibi lowene latletle. Na Ananias bu kē baliti lēne glo tle na Aposel home tujuwelēme na sogēna tlome, “Bobē flēke baliti kēnijiwa glo telēyo.” ³ Na Pita bume megali tole, “Ananias, Ju Satanbē tole fēyeme esogo tletlētene? Ju bome megali kē eglonēbē, ‘Ebē baliti bobē flēke mago kēniji glo telē,’ kwe ju Gotobē Amtētombame sogēna lalole. ⁴ Ju kē flēke afloko jubē tole nawa balitina hihijika tle. Na baliti ju kē glo tēglebē ebē mata jubē wesibi. Na ju kē balitina fēye wesibi egleme tole eglebē ebē jubē tolewa. Ju kēha tēbo lowene fēyeme tlene? Na mesogēna ele, ‘Baliti kēnijiwa ekēne.’ Ju melowene asa ele, ‘Ju onehome sogēna elome.’ Weyewa. Ju Gotomemu sogēna elole.” ⁵ Ananias kē gali aholokwane tle na bu mogowa latitigowa. Na oneho bu Ananiasme kē fata tēgletlebē wesibime yafe aholokwane motokouja na bu tako uli memētla. ⁶ Na falake nēbale bu mitisiya. Na bu mogo ēhona lalei mototla na matēmatē mutuje tla.

⁷ Tokwēfo tafawa tētēkake, na Ananiasbē no bu mata tēkakli. Bubē home kē fata tēgletlebē wesibime lowene hana tle. ⁸ Na Pita, bohe kē tēgehweibē baliti bume lebotane totometē na megali tolē, “Ju bome gali enonē, sobo bihena, flēke baliti kē glo tēgelobē ebēwa glo telone?” Na Safaira bume gali tafu tētātle, “Na kwe fēyemene? Ta kēnijiwa fe.” ⁹ Na Pita bume megali tolē, “Sobo bihena gali fēyeme sle totlone? Gotobē Amtētombame su naegotlomene? Ju aholokwane ele. Biheme kē gwa mogujetlabē falake nēbale, ino ēfo mēta ekē melujuwelukwēya. Na ju mogome mata mēgehōjome.” ¹⁰ Na bu mata Pitabē elebo lime mogowa latitigowa. Na falake nēbale metēkaklija na bume mogowa hwi motlēya. Na fa mētētaya na mētehujaya. Na bohebe mēglēbo lime matēmatē mētētaya.

11 Na Jisame lowene sle mëtletlabë oneho iniwa na fli oneho mata bu kë gali yafe aholokwane mëtla na ulimu memëtla.

Aposel ho klelegowa wesibi blëge blëge mototoma

12 Aposel ho bu feilawa klelegowa wesibi onehobë naba lime blëge blëge mototoma. Na Jisame lowene sle mëtletlabë oneho bu tako lotu lowa itaita mutujukefëya na lotu lo sebatì mëtà loko mëtlagukefëya. Bu kë sebatibë weniji mefë lamototla, “Solomonbë sebatì.” 13 Na Jisame lowene jwa kë mëgletlabë oneho, Jisame lowene sle mëtletlabë onehome fleflesu lamëtkefëtëma na bume megali lamëtkefëtëma, “Bu lale lale oneho mu mëtäbëya.” Kwe buna lokome uli lamëtletëma. 14 Na feilawa onehomu bu Jisame lowene sle mëtletla na Jisame lowene sle mëtletlabë oneho flina iniwa sago mëtla.

15 Iniwa oneho bu klelegowa wesibi Aposel ho kë blëge blëge mogotomabë wafi lowene mëtletëma. Na bu tëbo atona onehome këme mëtlesumetëma. Na Pita kë betelë asë lëglebë alëge mëglëbome ni labuku kahëba motokouja. Bu metole lamëtla, Pita bu loliwa lisime na toba gwa lëtagutëmeme, bubë ato sle mëletëmeme. O melë hana lëglëna, kwe bubë amtëtombawa lamu lotomeme na bu sle mlame. 16 Na feilawa oneho Jerusalem lifate lime kë tafa mokoujabë bu mata, ato tëbona enëneme na ahwane kë tëbo mogotomebë enënename, Aposel ho betelë mëtlesumetëma. Na bu kë onehome, Jisabë afutuku sle tëtagume.

Ensel bu Aposel home kalabusu lo mago nëno tle

17 Gotobë tako lotu lo mëtä wege lëglebë tako eso ho, bu Sadyusi enënena ilawa yonane mëglabë ho. Na bu iniwa, Aposel enëne kë mëtëglabë wesibi yafe hwi motloma na bume moumou mëtletëma, feilawa enëne Aposel enënebë loweneme tako fleflesu mëtletëmame nëgëme. 18 Këme

nëgëme Aposel home fafa mëtla na kalabusu lowa sike mëtla. 19 Kwe klabë Gotobë ensel kalabusu lo ino tika totle na Aposel home tlelëkakime na megali tlome, 20 “Sobo eyeume na Gotobë tako lotu lowa ekaklujome na onehome gali të eoutatemome. Na Gotobë unaunalë lale tafa lëglelëmebë gali, onehome të eoutatemome.” 21 Aposel ho bu kë gali aholokwane mëtla na kwe olobalëmu Gotobë tako lotu lowa mëtëkakluja. Na bu onehome Jisabë galime okokwe motloma.

Na lotu lo mëtä wege lëglebë letitabo hona bubë yabenina, Israelbë afenëbonibë lotu eso enëneme na fli Israelbë afenëbonibë eso enëneme mata gali mëtelokwakëma migisiya namëglame. Na bu mitisiya na iniwa loko mëtletëya. Na bu lotu lobë plismanë, kalabusu lowa jine mëtélulukakëma, Aposel home nëno namëglame na bubelëme mëglesuma namëglame. 22 Na plismanë kalabusu lowa mutuja kwe bu Aposel home hwi hana motloma. Na bu Israelbë afenëbonibë lotu eso enëne belë ita mutuja na lotu eso enëneme megali motloma, 23 “Sebo kalabusu lowa tuja na kalabusu ino hwi tlola, tiji sle wamëtla. Na kalabusu ino ëfo mëtä kë miglibekefëyabë ho bu mana mitlija. Na kwe sebo ino tika totlana, sebo ho limeha kë mëtä hwi hana telujuwelëla.”

24 Gotobë tako lotu lobë plismanëbë eso ho na lotu lo mëtä wege mëglabë eso ho kë gali aholokwane mëtla na tako tutune memëtla na gali mëtla, “Bu ebëha wesibi melë kë lëglebë, fëye wesibi fata lëglemene?” 25 Na ho li tisi na gali tlome, “Aholokwane elo! Sobo kalabusu lowa kë tëglelumobë ho, bu Gotobë tako lotu lo mëtä milibo na Jisabë galime onehome okokwe molomo.” 26 Këme nëgëme, lotu lobë plismanëbë eso ho na fli plismanë mutuja na Aposel home nëno mutula na mëtlesuma. Kwe bu Aposel home tëbo hana mototoma. Bu onehome uli mëtletëmame nëgëme, bume anijina mogo nalë tëtëkle mëgëtayalime.

Aposel ho eso enënebë naba lime, Jisasbë gali tëme uli hana mëtla

²⁷ Na plismanë, Aposel home mëtlesuma. Na bu Israelbë afenëbonibë lotu eso enënebë naba lime mitlibo. Na Gotobë tako lotu lo mëta wege lëglebë tako eso ho bume megali tleme, ²⁸ “Sebo some Jisasbë galime onehome tëme waheheë tletëyo. Kwe sobo sebobë gali boblomu latotlo na sobo kë hobë galime, Jerusalem lifate mago enëneme iniwa wafi okokwe elagumo. Na sobo seme gali blawa meso naegëtatëname fene, ‘Jisas kë gli tëglebë gli eso, somëta lëbetëyo.’”

²⁹ Kwe Pitana Aposel flina bubë gali metafu mototla, “Sebo Gotobë galiwa esogo nëglelëtlame. Sebo hobë gali hana esogo nëglelëtëmame. ³⁰ Sobo Jisame mogo nalë ti mëta bu telo. Kwe sebobë semlenibë Goto, bume huju totle. ³¹ Goto bume tako fleflesu metletle na bume tilekole na bubë tobamu toba elëme tafa lëgletlebëme gali tlole, buna iniwa, onehome eso home tafa namëgletemome. Na bu seme nëno lëglebë ho ekë tafa lële. Na bu seme Israelbë afenëbonime tëbo lowenebë aholokwana ti mëglabëme na lala lowenewa esogo mëglelëlabëme laitaname. Na Goto sebobë tëbo lowene aholokwana ti lëletëname. ³² Jisame kë fata mëtëgletlebë wesibi sebo wahwi tloma. Na sebo onehome kë gali të nëtakefëtëma. Na Gotobë Amtëtomba mata onehome lowene tlëme, ebë gali kë nëgebëye nëgalimu. Oneho, Gotobë lowene kë esogo mëglelëlabë, Goto bubë Amtëtomba bume tlëme.”

Gamaliel, Israelbë afenëbonibë lotu eso enëneme gali tleme

³³ Israelbë afenëbonibë lotu eso enëne, bu kë gali yafe aholokwane mëtla na bu feilawamu enisusu mëtla na Aposel home mogo nalë tëtëkle namëgëtayame fene. ³⁴ Kwe letitabo ho li bubë ku mëta tëtabe, bubë weniji Gamaliel. Kë ho bu Farisi ho, na bu Mosesbë tafa sle galime, okokwe loglokwefëmebë ho. Iniwa oneho

bume tako fleflesu lamelekefëtla. Na kwe bu huju tle na gali tleme, “Sobo Aposel home toho elelëkakëmo, haha sogë tafuwa namogujetlame.” ³⁵ Bu Aposel home toho mëttelekëkëma. Na Gamaliel bu Israelbë afenëbonibë lotu eso enëneme gali tleme, “O Israelbë afenëboni, sobo kë enëneme wesibi li egëtatemome tole egelona kwe sobo lowene sle afina elome. ³⁶ Sobo walowene elo, ëtani nane, ho li tëtabe, bubë weniji Teudas. Bu bume melowene latle, ‘Bo tako ho, eso home lalowa tafa nëgelëmefe.’ Na onehome gali tleme, bume esogo namëglelëtlame. Na 400 ho kënjiji, bume esogo mëttelelëla, gavman enëneme boblo namogotomame fene. Kwe wame home boblo mogotomabë enëne bume mogo nalë tëke motlola na iniwa ho bume kë esogo mëtëglelëlabë lamëtëlboujawa, na gavmanme wame moglolibë lowene aholokwana ti mëtla. ³⁷ Na tokwafe, gavman, onehome tabei tokouna, Galili provins mago Judas bu tisi na fli onehobë wame lowene tufiji tëtatëme. Na fli oneho bume esogo mëttelelëla na Gavmanme heheëme wame mla. Kwe wame home boblo mogotomabë enëne bume mogo nalë tëkle mototla. Na iniwa ho bume kë esogo mëtëglelëlabë lamëtëlboujawa. Na gavmanme wame moglolibë lowene aholokwana ti mëtla. ³⁸ Këme nëgëme, eli bo some gali nolëyo, sobo kë Aposel home asa tëbo etomo. Sobo bume hwiwa elomo, tafa matla. Kwe ebë wege bu kë fa mogotlabë, hobë afutuku magowa nëgena, kwe tëbo lëgletëmeme. ³⁹ Kwe ebë wege bu kë fa mogotlabë, Gotobë afutuku mago nëgena, kwe sobo lëkle hana egotomome. Sobo melë egelona kwe Gotome wame lalolo.”

Na kwe Israelbë afenëbonibë lotu eso enëne bu Gamalielbë lowenewa esogo mëttelelëtlame. ⁴⁰ Na kwe bu ita Aposel home gali motloma, mëkakluja namëglame. Na bu mëtëkakluja. Na bu lotu lobë plismanëme gali motloma, taba afona lëlafame namogotomame. Na bume lëlafame mototoma. Na Israelbë afenëbonibë lotu eso enëne, bume

anisasa galina lëkle mototoma, “Sobo Jisasbë gali onehome itaita asa të eoutatemo. Matëbe.” Na bume mana jine mëtelëkakëma. ⁴¹ Aposel ho, bu Israelbë afenëbonibë lotu enëneme hune mëtla. Na fleflesu motokouja. Bu Gotome melowene mëtletlame nêgeme, “Bu seme fleflesu lalëletëna. Sebo Jisame lowene sle nêgletlabë ho nêgeme na oneho seme këme wame molona.” ⁴² Na iniwa olë bu Gotobë tako lotu lowa mutujukefëya na Jisasbë galime onehome okokwe motlokwefëma. Na onehobë lowa mata mutujukwefëtëma na Jisasbë galibëme onehome okokwe mëtlagukwefëma. Na bu megali sle lamëtla, “Goto Jisame jine tlële, bubë onehome nëno lëglebëme.”

6

Bu tobali ita tële home aniji motloma, Aposel home mëgaitama namëglame

¹ Na kwe, kë olëna, Jisame lowene sle mëgletlabë oneho, bu lebutakomu mëtëtabëya. Na kë mago, Grik gali lowene mëglabë oneho bu Hibru gali lowene mëglabë onehome wame motloma na megali lamotloma, “Iniwa olë sobo hi wesibime kë afolo mëglabë onehome laitakefëmo, kwe sebobë sei ju oneme hana aitakefëmo.” ² Këme nêgeme, we ita tële Aposel, Jisame lowene sle mëtletlabë onehome gali mëtelëkakëma, bu belëme migisitëma namëglame. Na bu mitisiya na bume megali motloma, “Sebo hi wesibi sa wege kë fa nogotlabë seme Gotobë gali tëme lëkleha lalëtana. Kë lalë nane. Sebobë wegemuwe, Gotobë galiwa të nogotkweflabë. ³ Këme nêgeme, afanino na mësenëbanino, sobo somago, tobali ita tële lalë home hwi sle saelomo, kë hi wesibi sa wegebëme mogoutatla namëglame. Lalë lowenena mëtabëyabë home hwi sle elomome. Na Gotobë Amtëtombabë afutukuna kë tafa mëglabë home mata

hwi sle elomome. Na sebo Aposel ho bume kë hi wesibi sa wegebëme aniji nanoglomame. ⁴ Kwe sebo kwe, Gotome gëgali nêgletlëkeflame na Gotobë gali onehome okokwe nolokwefëmame.”

⁵ Iniwa oneho bu kë galime fleflesumu lamëtla. Na bu Stivenme aniji motlola. Stiven bu Gotome feilawamu lowene sle tletle. Na Gotobë Amtëtombabë afutuku bu mëta feilawa tëtabetle. Na bu Filip na Prokorus na Nikanor na Timon na Parmenas na Nikolasname aniji motloma. Nikolas bu Antiok life mago ho na bu Israelbë afenëbo nane. Kwe bu Israelbë afenëbonibë lotu tokwafe esogo tlelële. ⁶ Bu kë tobali ita tële ho, Aposel enënebë naba lime mitlija. Na Aposel ho Gotome gëgali mëtlelëla, kë home lëgaitame nalëgleme. Na bubë toba kë hobë eso mëta gogwa motoletëma, bume kë wege fame aniji motloma.

⁷ Na Gotobë gali li life li life fifiji mëtlelëla. Na Jerusalem lifate mëta, Jisame lowene sle mëgletlabë oneho bu feilawamu fata mëtla. Na lotu lo mëta wege mëglabë ho feilawa mata, Jisame lowene sle mëtletla.

Israelbë afenëboni bu Stivenme bubë lotu eso enëne belëme mëtlelula, bume gali so namëgëtatlame

⁸ Goto Stivenme tako lëgaitale lalële na tako afutukumu tlële. Këme nêgeme Stiven bu feilawa klelegowa wesibi onehobë naba lime këme blëge blëge lotokwefëme. ⁹ Kwe fli ho bu Stivenbë gali tole hana mëtletla na bume momata mëtlelëla. Kë oneho bu Israelbë afenëbonibë li lotu lo mago. Bu kë lotu lo mefë lamototla, “Frimanbë lotu lo.”* Kë ho fli bu Sairini lifate na Aleksandria lifate mago na fliye bu Silisia na Esia provins mago. ¹⁰ Kë ho Stivenbë gali boblo mëgëtatlame fene kwe Gotobë Amtëtomba Stivenme lalë lowene tlële na bubë gali boblo hana mëtëtatla.

* **6:9** Friman gali melë galibëme gali mla, “Ho, li hobë wege afina manawa kë fa lëgëtakefëtëlebë na tokwafe bubë eso ho, bume jine lelëkakleme, wege jwa manawa tafa nalëgleme.”

11 Këme nêgeme bu fli onehome uwa-beli baliti mëtlëma, na megali motloma, “Sobo Stivenme megali saso etatelo, ‘Sebo Stivenme waaholokwane tlola, Mosesname, Gotoname tëbo gali latlome.’” 12 Na kë galina, onehobë, na Israelbë afenëbonibë eso enënebë, na Gotobë galime okokwe moglomabë hobë wame lowene tufiji mëtëtatëma. Na bu Stivenme fame mutuja na Israelbë afenëbonibë lotu eso enëne belë mëtlesula. 13 Na fli home mata mëtlesuma, Stivenme gali so namëgëtatlame. Kë enëne megali lamëtla, “Kë ho Gotobë tako lotu lome sisile lalotokwefle. Na Goto Mosesme kë gali toglolebë tafa sle galime mata itaita sisile lalotokwefle. 14 Sebo bume meaholokwane latlola, ‘Nasaret life mago Jisas bu Gotobë tako lotu lo yayei lotleme, na Mosesbë anebo gali ëtani afuni-nome kë tëglëmebë hihijika lëleme.’” 15 Na Israelbë afenëbonibë lotu eso enëne iniwa, Stivenme feilawa wëya mëtlelëla, na bubë wenyane, enselbë wenyane fenene mehwi motlotla.

7

Stiven Israelbë afenëbonibë lotu eso enëneme gali të tëtätëme

1 Na Gotobë tako lotu lo mëta wege lëglebë tako eso ho, Stivenme metakune tlole, “Ju lowene lalene? Ebë gali, ho jume kë so mëgëtatëyobë, nëgaline o sogëna lamla.” 2 Na Stiven Israelbë afenëbonibë lotu eso enëneme megali latlome, “O afani na ayani, sobo aholokwane elo. Ètani, sebobë tako afutukuna Goto, sebobë semle, Abrahamme fata tletle. Kë olëna, Abraham bu Mesopotemia provins mëta mana tafa tle. Bu Haran lifatewa tuguju jwa tle. 3 Na Goto bume megali tlole, ‘Jubë home hune elëme. Na jubë life mata kile elëme. Na jume lebotane gali kë nëtätëbë life elëme ejume.’ 4 Na Abraham bubë life, Kaldia, kile tle. Na bu Haran lifate mëta tafa tule. Abraham bolijaya wafi gli tle na Goto, sebo ëje kë tafa nëglabë life elëme jine telëbakle. 5 Kwe Goto bume

kë lifebë flëke afloko tokwëfo hana tlële. Weye. Hanane. Kwe Goto bume megali slewa latlole, ‘Kwe tokwafe, bo jume ebë life nëglëme. Na kwe kë life melëgëbeme, jubë na jubë bisemleninobë.’ 6 Goto bu Abrahamme li galime megali latlole, ‘Jubë bisemlenino bu li life mëta tokwafe nibowai mugulame. Na bu kë life enënebë wege manawa fa mëtakefëtëmame. Na kë bisemlenime tëbo mogotomabë tlibutu këniyi 400. 7 Kwe tokwafe bo kë onehome tëbo nogotomëme. Na tokwafe bisemleni kë life kile mlame na misiyame. Na ebë life kë nëgebë mëta bome lotu mëlekefëtëname.’ 8 Na Goto gali tle, Abraham bubë ato jibo tlë lotleme, na bubë tokwafe fata mëglabë iko nëbalebë ato jibo mata, satëtlë mogotometëmame. Kë yayahuju melëme lëlekuju lëletëmeme, bu Gotobë onehomu mëtabëya mëglamemu. Bu kë yayahuju hwi moglomana, Goto bu Abrahamme kë gali sle toglolebë galime, ita lowene mletlame. Na tokwafe, Abraham nëbana tle. Bubë weniji Aisak. Kë nëba tobali ita aona olë këniyi tëtabe na bu kë nëbabë ato jibo mana tlë tëtätle. Na Aisak bu nëbana tle. Bubë weniji Jekop. Na bume mata kë fene melë latotle. Na Jekop bubë we ita tële nëbaleme mata melë latotome. Kë we ita tële nëbale kë nëgebë bu sebobë semlenino.

9 Jekopbë nëbale, bubë bolijahani Josepme, tako moumou lamëtletlëla. Na tëbo lowene memëtletla. Na bu Josepme, li life mago enëne mëta balitime hihijika mëtla, li hobë wege manawa fa nalëtatleme. Na kë enëne bume Isip lifatewa mëtlelula. Kwe Goto buna mëtëtabo. 10 Goto bume taitale, na iniwa tëbo wesibi bume kë fata mëtletlebë, Goto bu sle totometle. Bu eso ho Ferobë naba lime tiglibena, Goto bume taitale na lala lowene tlële. Këme nêgeme eso ho Fero bume tako tole latletle na bume Isip lifate mago onehome tafa lëglelëmebë eso home aniji tlole. Na bubë lo mago iniwa wesibi hwi loglometlebëme mata anijii tlole.

11 Tokwafe tako fone Isip lifate mēta na Kenan lifate mēta fata tle. Na iniwa oneho bu tēbo tafa memētla. Na sebobē semlenino bu hi wesibime afolo mētla. 12 Kwe Jekop ebē gali aholokwane tle, hi wesibi Isip life mēta kē mēbe. Na bubē nēbaleme Isip lifewa otome afina jine tlēme, hi wesibi glo namugulame. Na bu mutuja hi wesibi glome. Na hi wesibi glo mutula. Na ita mitisiya. 13 Na kē hi wesibi wafi yawe motloma na kwe bu ita mutuja na Josep bubē bolijahanime gali tlome, ‘Bo Josep, sobobē keinēba.’ Na tokwafe, Isip life mago eso ho Fero, Josepbē ilawa mago enēneme lowene tletēme. 14 Na kwe Josep, bubē bolijahaninome gali tlome, ‘Sobo eyeume. Na sebobē aya, Jekopme gali ejuwelolome. Buna, sebobē ilawa mago onehona, iniwa esijo naegelome, Isip lifateme tafa naegelome.’ Na kē enēnebē tabēi bu kēniji, 75 oneho. 15 Na kwe Jekop, bubē nēbalena, Isip lifewa mitimiya na kēme tafa mētemola. Na tokwafe buna bubē nēbalena, kē mēta fwa gigli mētemola. 16 Na bu mogo, kē mago Sekem lifewa mētehwojuja. Na kēme matēmatē mēta gogwa mētetula. Ētani Abraham bu kē matēmatē life, Hamorbē bowenenino mago, balitina fa totle.”

17 Na Stiven ita gali tle, “Ētani Goto Abrahamme megali sle tlole, bubē afenēbonime lēgaitametleme na wame enēnebē toba mago nēno lēleme. Na kē olē fata lēgleme lololi lalēle. Na Israelbē afenēboni bu Isip life mēta lebutakomu fata mētla. 18 Na kē nalēwa, tiho eso ho Isip life mēta fata tle. Kwe kē eso ho, Josep ētani kē fa togotlebē wege, lowene hana tletle. 19 Na kē eso ho bu sebobē semleninome sogēna latlome na tēbo totome. Na bume gali tlome, ‘Sobo iko nēbale fufu egelona kwe walujume sahune elekefo, gigli namēglame.’ 20 Na kē olēna, bota Mosesme mana fu tle. Na bu lale nēba klisomu fata mototlo. Botana bolijayana hwe-lutuwa lo mēta aona yeme mētlēlo. 21 Tokwafe bume waluju mēta gwa

mutujetla. Na eso hobē boko hwi tujuwelēle na fa totle. Na bubē nēbaha fata tletē. 22 Na Isip life enēnebē iniwa lale lowene, bume okokwe motlola. Na bu gali anisasana anebo gali lēglebē ho tētabe. Na tatako kalēlego wege fa togotlebē afutukuna ho tētabe.

23 Moses bu nili yafewe tlibutu kēniji wafi tle na bubē enēneme hwime lowene tle. Kē enēne bu Israelbē afenēboni. 24 Na bu fe tēkake, na Isip life mago home hwi tlole, Israelbē afenēbo mago ho lime, tēkle totle. Na bu fewa tēkakebē na bubē ilawa mago home taitale. Na Isip life mago home mogo nalē tēke tlole. 25 Moses bu melowene latle, ‘Bubē enēne bume melowene namēgletlame, “Goto bume wafi aniji tlole, bume lēgaitame nalēglebēme na Isip life mago nēno nalēglebēme.”’ Kwe bu kēbēme lowene hana mētletla. 26 Jowafe niwa tēbe na ita Moses tuju. Na bu tlemalē Israelbē afenēboni blalo momogli mētēto kē labu mēta hwi tlome. Na bu belē tujutēme, bubē wame lēkle nalēgētātēmeme na gali tlome, ‘Hai! Sobo ilawa magofe. Sobo sobolalo memomogli fēyeme etone?’ 27 Kwe wame kē togotlebē ho, Mosesbē gali fleflesu hana tletle. Kēme nēgeme Mosesme so telēkake, na gali metafu tētatlē, ‘Sebobē eso home na sebobē tafa hwi eglotēnabē home jume ya aniji tolēne? 28 Ju bome gli nalē tēke naeglonēmene, yame Isip life mago home mogo nalē fene tēke tlole? Ju bome melē naegētānēmēnē.’ 29 Moses kē gali yafe aholokwane tle na bu Midian lifatēwa ulime tlēboukaku. Bu kē mēta tako tafa tule. Na mēse sei tlē. Na iko nēbale tēle fata totome. 30 Moses bu kē lifate mēta niliafewe tlibutu kēniji tafa tule. Na tokwafe, li olēna, Moses ho jwa tabo mēta, Sainai fatini wayo li mēta, tafa tle. Na ahojuna ti tokwēfo hwi telokwakle. Na ensel kē ahoju mēta, Mosesme mana fata tletle. 31 Moses klelego metletle. Na bu melēme tole tle, lolime hwi sle nalogloleme na kēme nēgeme bu loliwa tuju tle. Na Tako

Ho bume megali latlole, ³² 'Bo bisemlenibë, Abraham, Aisak, Jekopnabë Goto.' Na Moses lili tle na ita kë ahoju hwi loglolebëme uli metletle. ³³ Na Tako Ho gali tlole, 'Jubë juba jibo hohwaga ele. Ebë life ju kë mëta kë eglibebe, ebë bobë life nëgëme. Bo kë mëta tafa nëgelëbe life. ³⁴ Bo Isip life mago oneho, bobë onehome kë tēbo mogotomabëme, wahwi nolomë. Bo bubë elili afëflei lego waaholokwane nolotemë. Eje bo këme netujulë, bume nëgaitamë nanëgelëme, Isip life onehobë toba mago nëno nanëgelëme. Këme nëgëme bo jume gali nolë, ju huju ele. Bo jume Isip lifatewa ita jine nëgelëkakëme.'

³⁵ Ètani, Israelbë afenëboni bu Mosesme boblo lamototla na megali lamotlola, 'Sebobë eso home na sebobë tafa hwi eglotë nabë home, jume ya aniji tolëne?' Kwe kë Moses fwa Goto jine tlële, Israelbë afenëbonibë eso home tafa nalëgletëmeme. Na bume Isip life mago nëno nalëgleme. Goto bume kë ti tokwëfo wayo mëta enselha fata tletle. Na bume kë wegëme mana aniji tlole. ³⁶ Na Moses bume Isip life mago tlelume. Na bu memelë klelegowa wesibi blëge blëge totome. Bu kë klelegowa wesibi Isip life mëta na Winowa Nutu* mëta mata blëge blëge totome. Na bu ho jwa yenëbawa life mëta, niliafewe tlibutu kë asë tēglelëmebë olëna mata blëge blëge totome. ³⁷ Na kë Moses buwa, Israelbë afenëbonime megali latlome, 'Goto, sobobë ilawa mago ho lime aniji logloleme, bubë gali tē nalëgëtatëyome. Na bo, Gotobë lowene mago gali tē notokweflëbë ho fene tafa nelë, bu mata mefata nalëgleme.' ³⁸ Sebobë semlenino ho jwa tabo elëme mutuja. Na këme loko mutulelëya na Moses buna tafa tlelëme. Na bu Sainai fatiniwa tokwale na Gotobë ensel bume gali mana tlële. Na bu Gotobë gali fa totle. Kë lale galibë seme ëhwati tafabëme lëgaitana nalëgleme. Na Moses kë gali

seme tlëna.

³⁹ Kwe sebobë semlenino Mosesbë gali boblo lamëtëtatla. Na bu Isip lifatewa, ita muguja namëglabëme, tako tole memëtla. ⁴⁰ Moses bu Sainai fatini mëta mana tafa tole, na Israelbë afenëboni Eronme megali motlola, 'Moses seme Isip life mago kë tēglesunabë, bume fëye wesibi fata loletle nawa. Bu ita hana lëgetujuleme nawa. Këme nëgëme, ju seme fëso li blëge blëge etatëna, na bu Gotoha fata nalëgletëname. Na bu seme lëgaitana nalëgleme na logoutatëna nalëgleme na alëge lebotane nalëtagutëname.' ⁴¹ Na kë nalë bu bulmakau kleli nëba fëso blëge blëge totle. Na bu kë bulmakau kleli nëba fësöme, wesibi ahojume mëtletla na bu kë siniki-bome fleflesu nalëgletëmeme. Na bu tako hi wesibi blëge mototla. Na bu kë blëge mototlabë wesibime mana fleflesu mëtletla. ⁴² Këme nëgëme, Goto bume yeolë latletëme. Na bu kliji name, yeme name, sëgetoba name lotu namëgletëmame. Na kë wesibi melë latle, ëtani Gotobë lowene mago gali tē mototkweflabë hobë bogo mëta gali fene tēbe. Kë gali melë, 'Sobo Israelbë afenëboni, sobo ho jwa tabo mëta niliafewe tlibutu këniji tafa tēgelobë, sobo bulmakau kleli na sipsip kleli tëtëkle tëtakëfëyo na ahojume ahojume tlekefo. Kwe sobo këha wesibi bome nane totometëna. Weyewa. ⁴³ Na sobo kë asë eglëlëlobë selë lotu lo, bobë lotu lo nane. Weye. Bu sogëna goto Molokbë lotu lo. Na sobo, sogëna goto Refanbë sëgetoba weniyaneha wesibi, asë elëlëlo. Sobobë tobana kë blëge blëge egotomobë wesibime fwa lotu eletemo. Këme nëgëme bo sobobë life mago këme hehë nëkaketëyome. Na some Babilon lifate elëme jine nelëkakëyome na sobo Babilon lifate sigli etokwaklome na tafa ekekome.'

⁴⁴ Sebobë semlenino bu ho jwa tabo mëta tafa mëtлана, bu Gotobë selë lo asë lamëtlelëkefëtla. Kë selë lo bu melëme lëlekuju tle, Goto bubë ku mëta tëtabe tēme. Bu kë selë lo

* 7:36 Winowa Nutu bubë weniji.

kë gliji mëtëglabë, bu iniwa wesibi Goto Mosesme fene gali tlole, bu këha melë lamototla. Na Goto, Mosesme fene lebotane têtatle, bu këha melë lamototla. ⁴⁵ Tokwafe, kë semleninobë nëbale, bu kë selë lo ita fa mototla, na buna Josuana mitisiya, kë life mago enënebë life wame nagi hiliika mototoma. Na Goto bu kë life mago enëneme hehë tletëme. Na bu kë selë lo kë life mëta lë mototla. Na kë selë lo kë lifeme tlibekëfëbë, na eso ho Devit mana fata tle. ⁴⁶ Na Goto Devitme feflesu latletle. Na Devit Gotome takune tlole, ‘Bo jubë tako lotu lo lalowa gliji nëgelëmene, bobë semle Jekobë afenëboni, këme lotu namëglekefëtëyome?’ Kwe Goto kë lotu lo glijime ehe hana tlole. ⁴⁷ Kwe tokwafe Devitbë nëba Solomon kë lotu lo gliji tle.

⁴⁸ Kwe tako afutukuna Goto, bu ho tobana gliji mëglabë lo mëta hana tafa lëglekëfeme. Gotobë lowene mago gali të totokweflebë ho fene gali tle. Bu megali latle, ⁴⁹ ‘Tako Ho megali lalële, Heven life ebë bobë tafa labu. Na ebë life kë nëgebëye, bo juba këme gogwa nolë. Na bo kë iniwa wesibibë eso ho tafa nëletemë. Këme nëgame sobo fëye lo gliji egletënamene, bo këme tafa nanëgelëme? Weye. Sobo bome lo habëna gliji egletënamene?’ ⁵⁰ Iniwa wesibi heven life mago na ebë life mago bowa blëge blëge totomë.”

⁵¹ Na Stiven, Israelbë afenëbonibë lotu eso enëneme, gali tlole, “Sobo aholo titiji tabo enënemu. Sobobë lowene bu tëbo lowenewa lëbetëyo, Gotome lowene jwa mëgletlabë enënebë loweneha lëbetëyo. Na sobo Gotobë gali aholokwane hana elolo na esogo hana elelëlotelo. Sobo Gotobë Amtëtomba galibë itaita boblo latlo, sobobë bisemlenino fene boblo mëtëtatla. ⁵² Sobobë semlenino bu Gotobë lowene mago gali të motokweflabë home iniwame, wame lamotlokwefëma. Ètani, Gotobë lowene mago gali të motokweflabë ho fli, bu megali lamëtla, ‘Gotobë lalë lowenewa kë esogo lëglelëkefetlebë home, jine lëglëleme.’ Na sobobë

semnenino bu kë gali metletëmabë enëneme mogo nalë tëtëkle mëtëtaya. Na Gotobë lalë lowenewa kë esogo lëglelëtlebë ho wafi tisi. Na Goto bume feflesu latletle. Kwe sobo bume wame home yo tlole na bume mogo nalë tëtëkle mototla. ⁵³ Goto bubë enselme jine tlëme na bubë gali sebobë semleninome mëtlëma. Na sobo kë gali waaholokwane tletemo kwe sobo esogo hana tletëtemo.”

Bu Stivenme mogo nalë anijina tëtëkle mototla

⁵⁴ Israelbë afenëbonibë lotu eso enëne, Stivenbë gali yafe aholokwane motlola. Na enisusumu memëtletla. Na enino këkë memototometla. ⁵⁵ Kwe Gotobë Amtëtomba Stivenme afutuku tlële na bu heven elë hwi tokwake. Na Gotobë tako elulego hwi telokwakëtla. Na Jisame hwi telokwakle, Gotobë tobamu toba elëme tlibetle. ⁵⁶ Na Stiven gali tle, “Aholokwane elo! Bo heven ino tikatabo wafi hwi nololë. Na bo Gotobë life mago home hwi nololë, Gotobë tobamu toba elëme lilibetle.”

⁵⁷ Bu kë gali yafe aholokwane mëtla, na Stivenme tako wame memotlola. Na bu feilawa juwafe mëtla na bubë tobana aholo titiji mototoma. Na iniwa huhuju mëtëkaka na Stivenme hohwë mëtlëla. ⁵⁸ Na bume Jerusalem lifate mëglëbo elëme tobana anisasana ki motokouja. Na aniji atome mana sisike mëtletla, bume mogo nalë tëtëkle namogotlame. Na bume gali kë so mëtëtatlabë ho, bubë matawa mago heletanëno èho totohwa mototoma na falake hobë elebo lime gogwa mëtla. Kë falake hobë weniji Sol. ⁵⁹ Bu anijina mana tëtëkle mototla na Stiven Jisame mana megali telokwakle, “O Tako Ho Jisas, ju bobë amtëtomba eli sa no elëtenë.” ⁶⁰ Na bu sëkefo miti tafa tle na feilawa we tlole, “Jisas, bome kë wame moglonabë onehome kofaya asa wame elome, aholokwana sati ele.” Bu kë galime wafi gali tlole na mana tuku tëtakake.

8

1a Na Sol, bu Stivenme kë tëtëkle

mototlabë lowenebëme, helawawa latletëme.

Sol, bu Jisame lowene sle mëtletlabë onehome tëbo totome

^{1b} Stivenme kë tëkle mototlabë olëna, Jisame lowene sle mëtletlabë onehome, Jerusalem lifate mëta kë tafa mëtlabë, kë oneho mëta afina oto mëtla tëbo namëtagumane. Këme nêgeme, Jisame lowene sle mëtletlabë oneho iniwa Jerusalem lifate kile mëtla na Judia provins na Samaria provins li mago life elëme mëtlënëbouja. Kwe Aposel ho buwa, Jerusalem lifate mëta mëtëtabëya. ² Gotobë lale lowene esogo mëglelëtlabë ho fli, Stiven mogome fa mototla na matëmatë mëta gwa mutujetla na bume tako ye lamëtletlamu. ³ Kwe Sol bu Jisame lowene sle mëtletlabë onehome tëbo totokwefëme. Bu melatotokwefëme. Bu li lo li lowa fe tokoukefëtëme na onehome kë lo mago nëno tokoukëfe na kalabusu lowa tlelukefëme.

Bu Jisabë lale gali Samaria provins mëta të mototla

⁴ Jisame lowene sle mëtletlabë oneho, bwa bwa lifate elë kë mëtlënëboujabë, bu Jisabë lale gali iniwa lifate mëta të mëtëtagutla. ⁵ Filip Samaria provinsbë li lifatewa tuju. Na bu kë life mago onehome ebë gali të têtatëme, “Jisas bu Goto kë aniji toglobë ho na nëno lëglebë ho.” ⁶ Feilawa oneho Filipbë gali aholokwane mëtla na bu kë blëge totlebë klelegowa wesibi hwi motlotla. Na këme nêgeme, bubë gali aholo bo sle mëtëtagutla. ⁷ Na bu Filipme mehwi motlola, bu ahwane lebutako onehobë ato mago hehë tletëme. Na kë ahwane aflei tëbowa ëë memëtliële. Na kë onehome lahunewa mototome. Na feilawa oneho, elebo mogo tanënobë na elebo tëbonabë bu lalowa mëtëtabëya. ⁸ Këme nêgeme, ebë life mago oneho bu tako fleflesu këme mëtla.

⁹ Ho li, kë lifate mëta tafa tle, bubë weniji Saimon. Bu itaita humë tlekëfe na memelë olo tlësëme. Na lebutako

oneho, Samaria provins mago, wesibi bu melë kë tëglebëme, klelego memëtletla. Kë ho bu megali latlekëfe, “Bo tako letitabo ho tafa nelë.” ¹⁰ Na letitabo ho fli na manawa oneho, kë hobë gali aholokwaneme, tako tole lamëtla. Na bu megali lamëtla, “Kë ho kë nëgebë, Gotobë tako afutukuna ho!” ¹¹ Bu kë tëglekëfebë wesibime, feilawa oneho klelego lamëtletkefëtla. Na këme nêgeme bubë lowene këme esogo mëtlelëkefëtla. ¹² Kwe Filip, Goto onehobë eso home kë tafa lëgletëmebë lale gali, të têtatëme. Na Jisas Klaisbë lale gali mata të têtatëme. Na oneho bu kë gali lowene sle mëtletla. Na Filip bume baptais totome. ¹³ Na Saimon bu mata kë gali lowene sle tletle. Na Filip bume mata baptais totle. Na bu Filipna asë mëtelo na iniwa klelegowa wesibi Filip kë totokwefëmebë hwi tlome na klelego metletëme.

¹⁴ Aposel ho, Jerusalem lifate mëta kë tafa mëtlabë, bu meaholokwane mëtla, Samaria provins mago oneho bu Gotobë gali lowene sle lamletla. Këme nêgeme bu Pita name, Jon name këme jine mëtlëma. ¹⁵ Bu Samaria provinswa fwa mutulo, na bu Goto me gali motlolo, bu kë onehome, bubë Amtëtomba lëglëme nalëgleme. ¹⁶ Filip bume ëbame Tako Ho, Jisabë weniji nawa baptais totome kwe Gotobë Amtëtomba bu belë tigisi tëme hana tle. ¹⁷ Këme nêgeme, bu Goto me afina gali motlolo na mana toba gogwa motoletëmo na Gotobë Amtëtomba bu belë tisi tëme.

¹⁸ Saimon bume mehwi tlome, bu toba gogwa mëtletëmo na Gotobë Amtëtomba bu belë tisi tëme. Këme nêgeme baliti glo tle na Jonna Pitana belë tisi tëme na gali tlome, ¹⁹ “Sobo kë afutukubë bome enëna. Na bo mata ho lime toba gwa nêgëtatëlëna, Gotobë Amtëtomba bu belë ligisi tle nalëgleme.”

²⁰ Kwe Pita bume gali tlole, “Gotobë Amtëtomba, Goto manawa kë lëglë nabë, ju balitina hana fa egotleme. Hanane mu. Ju këha tëbo lowene fëyeme lowene elene?”

Juna, jubë balitina tēbo life mēta tēbo eglitame. ²¹ Jubë lowene Gotobë naba lime lalowa hana lēbetē. Kēme nēgeme, ju sebona Gotobë wegeme hana wege nēglame. ²² Ju kē tēbo lowenebē aholokwana ti ele, na Tako Hobē gali eholeme, jubē aholabu lowenebē sle nalēgētātēme na aholokwana ti lēletēme. Bu jume maninibo lēgletēme nawa na jubē tēbo lowene aholokwana ti lēletēme nawa o hanane. ²³ Bo jume walowene nēletē, mēmaune lowene ju mēta takomu lēbetē. Na ju tetēbo lowene mēta fwa tei tafa elekēfe.” ²⁴ Kwe Saimon, Pitaname Jonname metafu latētātēme, “Sobo Tako Home gali elolo, bome maninibo nalēgletenēme. Na kē tēbo wesibi, sobo bome kē gali eglonabē, bo belē migisitenē jwa namēgletenēme.”

²⁵ Na kwe Pitana Jonna, Jisasbē lale gali tē mētētātēme na Jisas bume melē kē totomebē wesibime gali motlomo. Na tokwafe Pitana Jonna Jerusalem lifatewa mētēyeu. Bu mētēyeubē, na Jisasbē lale gali, Samaria provinsbē fli life elēme, tē mētētāgutemo.

Filip Jisasbē lale gali, Itiopia lifate mago home tē tētatlē

²⁶ Gotobē ensel bu Filipme megali tlole, “Ju sagli elēleme na nēgemowelēme eimeme. Na Jerusalem lifate mago Gasa lifate elē kē lugujubē alēge elēme ejume.” Kē alēge bu ho jwa tabo mēta lēbe. ²⁷ Na Filip fe tēkake na kē alēge elēme time. Bu alēge elēme wafwa temole, na Itiopia lifate mago home, kē alēge mēta hwi tlole. Bu Itiopia lifatebē gavmanbē letitabo ho. Na bu Itiopiabē eso mēse, Kandasibē baliti tafa tlelēkefēmetēbē ho. Bu Jerusalem lifatewa Gotome lotume tugujubē kē mago tisi, ²⁸ na bubē lifatewa luguju nalēgleme. Bu hos kleli kē kiki mēglebē kalē loha wesibi, wesibi mēta tafa tole. Na bu Gotobē lowene mago gali tē tokweflebē

ho, Aisaiabē bogo, hwi tlagwi. ²⁹ Na kwe Gotobē Amtētomba Filipme gali tlole, “Ju kē kalē loha wesibi, wesibi li elēme ejume. Na ju kalē loha wesibi, wesibina, mēglēbo lēlē eyeu elome.” ³⁰ Na kwe Filip loli elē fēka tokou. Na mana aholokwane tlole, kē ho bu Gotobē lowene mago gali tē tokweflebē ho Aisaiabē bogo hwi tlagwi. Na Filip kēme takune tlole, “Ju kē gali wayobē lowene laetlene?” ³¹ Na bu tafu tētatlē, “Ho li bubē wayo galibēme bome okokwe jwa loglonēna, bo habēna lowene sle nēgletelēmene? Ju kalē loha wesibi, wesibi elē lalowa etokwalemene na bona weife tafa nelome.” Na Filip bu kalē loha wesibi, wesibi elē fe tokwake.

³² Gali bu kē hwi toglolebē, me-gali lalēle, “Bu kē home sei mutujuwelētēma, sipsip kleli mogo nalē tēkleme fene sei mutujuwelētēma. Na kē ho bu ēfalēbo ji hana totle, sipsip kleli nēbalebē hobo fene le mēlēmētēma na bu afēflei mēgle jwa. ³³ Bume tiniji galina gali motlola. Na bume onehobē gali aholokwane moglomabē ho belēme mētletlētēma. Kwe bume blawa so mētētatlā na blawa tēkle mototla. Bume mogo nalē tēkle mototla na bu hana tafa lēle. Kēme nēgeme bu nēbale tafa jwa kēme mletla.”

³⁴ Kē ho kē gali hwi tlole na Filipme mana takune tlole, “Bo jume takune nolē, Gotobē lowene mago gali tē tokweflebē ho, bu yalēme gali tletlene? Bu bume gali tlene o bu li home gali tletlene.” ³⁵ Na kwe Filip kē home gali okokwe tlole. Bu Aisaia kē yahi tēglebē wayo gali afina okokwe sle tlole na bu Jisasbē lale galime mata okokwe tlole. ³⁶⁻³⁷ Tlemalē bu kē alēge elēme mētēyeubēē na tu helefo elē fwa mutulo. Na kē ho gali tlole, “Ju hwi ele, tu ekē lemule. Ju bome lalowa baptais egētānēmene?”*

³⁸ Na kwe, kē letitabo ho, bu hos

* **8:36-37** Fli lowene ho bu melowene lamētla, li gali mana lēbe kē gali mēta. Kē gali melē lēgēbelalēle, “Na Filip gali tlole, ‘Ju Jisame lowene sle egletlena kwe bo jume lalowa baptais nēgētēme.’ Na bu kēme tafu tētatlē, ‘Bo wafi lowene sle nēletelēfe, Jisas Klais bu Gotobē nēba.”

kleli kë asë lëglelëlebë home gali tlole, “Ju hos kleli lëkle etle.” Na bu Filipna kë tu elë kle mëtëtëkako na Filip bume baptais tetofakle. ³⁹ Na bu tu kile mëtelo na helefowa fe motokoko. Na Gotobë Amtëtomba Filipme kë mago latëglelulewa. Na kë letitabo ho bume ita hana hwi tlole, kwe kë ho bubë lifatewa flefesuna tuju. ⁴⁰ Na Filip bu Asdot lifatewa hokweinawa lafwawa tule. Na Jisasbë lale gali li life li life meta te tëtägutëme na mana Sisaria lifewa fwa tule.

9

Sol lowene hihijika tle

¹ Kë nalë, Sol bu mana anisasana gali tlekëfe, “Bo, Jisame lowene sle mëtletlabë onehome, mogo nalë tëbo nogotomëme.” Na bu Gotobë tako lotu lo mëta wege lëglebë tako eso ho elëme tujutle, ² na bume takune tlole, “Ju Israelbë afenëbonibë lotu lo hwi moglokeflabë home, Damaskus life mëta kë tafa mëglabë, pasë lalowa yahi ekaketëmemene?” Na kwe Gotobë tako lotu lo mëta wege lëglebë tako eso ho pasë yahi tletëme na Solbë tobame tlële. Kë pasë megali lala, “Sol, Jisame lowene sle mëtletlabë onehome hwi loglomena, kwe lalowa fafa malële na kalabusu lowa sike malële na Jerusalem lifatewa sei lëlëkakimeme.” ³ Na këme, Sol Jerusalem lifate kile tle na Damaskus lifate elëme tuju. Bu Damaskus lifatewa tuhu lëgleme kofene, na heven life mago elulego mana hokweinawa lafatawa tletle na bume ini lamuwa totle. Kë elulego takomu. ⁴ Na Sol lifeme latitigowa. Na bu li hobë we lego aholokwane tlole na bu këme gali tlole, “Sol, ju bome fëyeme tëbo etakefënëne?” ⁵ Na Sol takune tlole, “Tako ho, ju yalëne?” Na bu tafu tëtätle, “Bo Jisas, ju bome tëbo latakefënë. ⁶ Te! Huju ele. Na Damaskus lifate elë ejume na këme eoutabeme. Na ho li jume gali loglëme na ju kë iniwa gali saesogo sle elelëmetle.”

⁷ Solna kë mutujabë ho klelego memëtletla, na gëgali hana mëtla,

ëfasuna tafa mëtla. Bu gali lego aholokwane motlola, kwe kë home hwi hana motlola. ⁸ Na këme, Sol huju tle na bubë naba yafe tika totome kwe bu wesibi hwi hana tlome, bubë naba kilego mëtletleme nëgeme. Këme nëgeme bume tobame fa mototla na Damaskus lifatewa nasi mëtëtagula. ⁹ Bu naba kilego tabo tëgëtabebëë aona olë latle. Na kë aona olëbë bu hi jwa tafa tle.

¹⁰ Na Jisame lowene sle lëgletlebë ho li, Damaskus lifate mëta tafa tle. Bubë weniji Ananaias. Na bu nimitelë hwi tle, na Tako Ho Jisas bubë weniji fë tëtätle, “Ananaias.” Na Ananaias tafu tëtätle, “Tako Ho, bo mana ekë.” ¹¹ Na këme, Tako Ho, megali tlole, “Ju huju eleme, na alëge mēfë lamotla, Ininiwa alëge, ju kë belëme ejume. Na ju Judasbë lowa ejume na ho li Tarsus lifate mago kë mëta tafa lële na ju takune eletleme, ‘Tarsus life mago ho hameta lëtabene bo hwi nanoglolëme.’ Kë hobë weniji Sol. Bu Gotome mana kë gëgali lëlelëkefle. ¹² Kë ho bu nimitelë mehwi tle. Li ho, bubë weniji Ananaias, bu tēkaklutle na bubë toba gogwa toletle, bu naba tika namëgletleme.”

¹³ Na Ananaias bubë gali metafu tëtätle, “Tako Ho! Lebutako oneho, kë hobë lakaleme wagali motlona. Bu Jerusalem lifate mëta, jubë onehome memelë tëbo wesibina tëbo lamotkwefëma. ¹⁴ Na ëje bu Damaskus lifatewa tisi, jume kë lotu mëgletëyobë onehome kalabusu nalotomeme. Na lotu lo mëta wege mëglabë eso ho bu wesibi kë ho melë nalëglebëme halawa lamëtletla.” ¹⁵ Kwe, Tako Ho, bume gali tlole, “Ju Sol belë eiju. Kë ho bu bobë wege home fata lëgleme. Bo bume wafi aniji tlole, Israelbë afenëboni mëtabëya jwa mëglabë enëneme, na bubë eso enëneme na Israelbë afenëbonime, bobë gali tē nalëgëtatëmememe, na bu bome lowene sle mëletëname. ¹⁶ Na bo bume meolafa nëtätelëme, ‘Bu bobë galiwa tē logotlena, memelë tetëbo wesibi bume fata mëgletleme.’”

¹⁷ Na Ananias, Sol kë tafa lëglebë lowa tuju. Na lowa tëkaklu. Na Solme toba gogwa toletle na megali latlole, “Afa Sol, Tako Ho Jisas bu jume alëge mëta olafa tletë. Na buwa bome jine lelëfakënë, jubë naba tika namëgletëme na Gotobë Amtëtomba ju belë naligisitëme.” ¹⁸ Ananias kë gali wafi yawe tlole, na hokweinawa, mo lënëboha wesibi, Solbë naba mago mititigo tle na bu ita hwi tekake. Na bu huju tle na Ananias bume baptais totle. ^{19a} Na tokwafe Sol hi wesibi hi tle na afutuku bume ita tisi tle.

Sol Jisasbë lale gali Damaskus lifate mëta të totle

^{19b} Sol Damaskus lifate mëta, Jisame lowene sle mëtletlabë onehona fli olëwa tafa mëtla. ²⁰ Na kwe, bu Israelbë afenëbonibë lotu lowa mana latujuwa, na gali metë latëtatëme, “Jisas bu Gotobë nëba.” ²¹ Iniwa ho, Solbë gali kë aholokwane motlolabë, klelegomu memëtla. Na bu megali lamëtla, “Kë ho kë nëgebë, Jisame kë lotu mëtkefëtlabë onehome, tëbo totokwefëmebë ho. Bu Jerusalem lifate mëta melatokatwefëme. Na ëje ebelë kë ligisibë mata, kalabusu lowa nalëglelumeme, na bume lotu lo mëta wege mëglabë eso ho belë lëglelume nalëgleme, Jerusalem lifatewa.”

²² Kwe Goto Solme afutuku tlële na bu kë afutukuna Israelbë afenëbonime, Damaskus life mëta kë tafa mëtlabë, kalëlego gali të tëtatëme. Sol megali slemu latlome, “Goto Jisame kë aniji toglobë, bubë onehome nëno nalëglebëme.” Israelbë afenëboni, Solbë gali yafe aholokwane motlola. Bubë gali habëna tafu mëgëtatlamene? Bu gali olafa slemu tëgëtatëmememe nëgeme.

Israelbë afenëboni bu Solme wame motlola

²³ Lebutako olë wamutuju na Israelbë afenëboni loko mëtletlëya na gali sle mototla, Solme mogo nalë tëkle namogotlame. ²⁴ Kwe Sol bume kë fa mëtëtatlabë gali waaholokwane tletëme. Na Israelbë afenëboni,

olëli olëli na klabë, Damaskus lifatebë lëglesibë ino ëfo li mëta, sei mëtletkefëtla, Solme mogo nalë tëke namoglolame. ²⁵ Kwe klabë kuna, Solbë yabeni, bume kë lifate mago tako lëglesibë mëglëbo li elë mitilekola. Na Solme tatijiha wesibi mëta tuku mëtla na bu kë mëta tafa tokoke na tabana kesi mototla, na kë manogwa lëglesibë mëglëbo elëme alabujuwa tuku mëtëmalitya. Na bu mana tuju.

Sol Jerusalem lifate mëta tafa tle

²⁶ Tokwafe, Sol Jerusalem lifatewa tuju, Jisame kë lowene mëgletlabë enëhona loko namëglame. Kwe bu iniwa uli lamëtletla na melowene lamëtletla, “Bu Jisame lowene lëgletlebë ho nane.” ²⁷ Kwe Barnabas Solme lataitale, na Aposel ho belë sei tlële. Na bume gali tlome, “Sol Tako Ho Jisame alëge mëta wafi hwi tlole. Na Tako Ho Jisas bume wagëgali tlelële. Na Sol mata, Damaskus lifatebë onehome, Jisasbë gali të tëtatëmebëme, uli hana tle.” ²⁸ Barnabasbë gali aholokwane motlola na Aposel enëne lowene mëtla, “Nëgalife.” Këme nëgeme, Sol bu Aposelna, Jisame kë lowene mëgletlabë onehona iniwa tafa mëtla. Na buna iniwa Jerusalem lifate mëta asë mëtla. Na bu Jisasbë gali onehome të tëtatëmebëme uli hana tle. ²⁹ Na bu Israelbë afenëboni flina, Grik gali kë lowene mëtlabë, Jisasbë galime gëgali tlelëme na bume momata lamëtletlëla. Kwe bume melowene mëtletla, “Sebo habelë nogotlamene, bume mogo nalë tëke nanogotlamefe?” ³⁰ Jisame kë lowene mëgletlabë oneho kë wame gali aholokwane mëtla, na bu Solme Sisaria life elëme mëtletlula na Tarsus life elëme jine mëtletlakla.

³¹ Na kwe kë nalëwa, Jisame kë lowene sle mëgletlabë oneho, Judia provins na Galili provins na Samaria provins mëta lalowa tafa mëtla. Ho bume hana tëbo totome. Na Gotobë Amtëtomba bume afutuku tlëme. Na iniwa bu itaita Jisasbë tolewa esogo mëtletkefëtla. Na lebutako oneho bu Jisame lowene sle mëtletla.

Pita Ainasme sle totle

³² Pita li life li life elême asë tëbelëfa. Na bu Lita lifewa tuju na kë life mëta, Gotobë onehona tafa mutula. ³³ Na bu kë life mago ho li hwi tlole. Bubë weniji Ainas. Bubë iniwa elebo mogowa. Bu tëgëbe tëgëbewa latle. Na bu tobali ita aona tlibutu këniji melë latle. ³⁴ Na Pita bume megali latlole, “Ainas, Jisas Klais jume elë sle lëgetame. Ju huju ele na jubë ni labuku mana hohlo etleme.” Na bu hokweinawa huju tle. ³⁵ Na iniwa oneho, Lita na Saron lifate mëta kë tafa mëtlabë, Ainas kë sle tëglebëme hwi mëtla na Jisame lowene sle mëtletla.

Pita Tabitame gli mago huju tëtamë

³⁶ Jisame lowene sle egletlebë mëse li, Jopa lifate mëta tafa tle. Bubë weniji Tabita. Bu Grik galina bubë weniji mefë lamëtëtaya, Dorkas. Iniwa olë bu iniwa onehome taitakefëme. Na bu wesibi jwa onehome, hi wesibi na fli wesibina mata tlëkefëme. ³⁷ Na kë olëna, bu atowelili tle na gli tle. Na bu mogo tuna swa mëtëtaya. Na matawa kë ke togolebë lo ke mëta gwa mototaya. ³⁸ Jopa life bu Lita life li mëta lëbe. Na Jisame lowene sle mëtletlabë oneho gali meaholokwane mëtletla, Pita Lita life mëta tafa lële. Këme nëgeme bu tlemalë home, Pita belë këme jine mëtlëma. Bu Pita belëme fwa mutulo na bume megali motlolo, “Ju sebobë lifewa hokweinawa saesi. Ju ahuta asa ele.” ³⁹ Na Pita kë tlemalë hona mutuja. Na bu kë lo elême fata tle. Na matawa kë ke togolebë lo kewa sei motowelëlo. Na sei one iniwa, Pita belëme mitisitla na ye mëtlekefëya. Na Tabita, tuja ato mana tëtabena, kë susu totomebë ëho, Pitame lebotane mototometla. ⁴⁰ Na Pita bu iniwa onehome kë mago hehë tëkaketëme. Na sêkefo miti tafa tètëkake. Na mana Gotome gëgali tlelëkakle. Na kë gëgali yawe tlole, na bu kë mëse mogobë li elême swaya tokoke na gali tolë, “Tabita, ju huju ele.” Na kë mëse naba hobo tika totome na Pitame hwi tlole na huju tle na tafa tëkake.

⁴¹ Na Pita bume tobame fa tëtamë na huju tetokwakë na bu hujuna tlibe. Na Pita, sei onehome na Jisame lowene sle mëtletlabë onehome, gali telokwakëme, migisitla namëglame. Na bu bubelë mitisitla. Na bume lebotane tëtatëme, Tabita tuja ato mana ekëne. ⁴² Na kë gali, Jopa life mëta asë tëbelëfatle. Na lebutako oneho Jisame lowene sle mëtletla. ⁴³ Na Pita Jopa life mëta lebutako olë tafa tle. Bu ho lina tafa mëtelo. Bubë weniji Saimon. Kë ho kë nëgebë, bulmakau kleli jibo slesle totokwefëmebë ho, kibo mëgle lime.

10

Ensel Korniliusme fata tletle na bume gali tlole

¹ Ho li, Sisaria lifate mëta tafa tle. Bubë weniji Kornilius. Kë ho bu Rom life gavmanbë, wame home boblo mogotomabë enënebë eso ho. Na bu we ljuafe we wame home boblo mogotomabë enëneme tafa tlelëme. Kë enëne, bu Itali lifate mago enëne. ² Kornilius bu Gotobë tolewa esogo tlelëkefëtle. Na buna, bubë nona, nëbalena, na bubë lo mëta kë tafa tëglelëmebë enënena, Gotome lotu melekefëtle. Bu Israelbë afenëboni, wesibi jwa kë tafa mëtlabëme, taitakefëme na baliti tlëkefëme. Na bu Gotome itaita gëgali tlelëkefle. ³ Olë li, taboklë klijina, bu Gotobë enselme nimitelëha wesibina hwi tlole, bubë lowa tëkaklitle. Na bume megali latlole, “Kornilius!” ⁴ Kornilius enselme hwi tlokweflebë na uli metletle na gali tlole, “Tako ho, fëyemene?”

Na ensel këme gali tlole, “Ju Gotome kë gëgali eglelëkeflebë, bu kë gali waaholokwane lolokwefë. Na ju wesibi jwa enëneme, wesibi kë eglekefëmebëme, Goto wahwi lolotë na bu jume tako fleflesumu lalëletë. ⁵ Eli ju ho flime Jopa lifewa sajine elême, ho lime hohwi namugutat-lame. Bubë weniji Saimon na bubë li weniji Pita. Na bume, gali mujelëleme, ju belë ligisitë nalëgleme. ⁶ Na kë ho, bubë wenisa Saimonbë lo

mëta lëtabe. Kë ho bu bulmakau kleli jibo sle sle lotokwefëmbë ho, kibo mëglelime. Bubë lo nutu helefo li mëta lilibetle.”

⁷ Ensel Korniliusme wafi gali tlole na kile totle. Na Kornilius bubë tlemalë wege home na jowa wame boblo logotlebë home gali telokwakëme, bu belë migisitla namëglame. Kë wame boblo logotlebë ho mata Gotobë tolewa esogo tlelëkefëtle. Na bu Korniliusme feilawamu taitakefle. ⁸ Aomalë mitisitla na Kornilius iniwa wesibi bume nimitelë mëta kë fata mëtletlebëme gali tlome. Na kë aomalë home Jopa life elëme jine telëkakëme, Saimon Pitame hohwi namugutatlame.

Pita nimitelëha wesibi hwi tle

⁹ Kornilius kë jine tëglëmbë ho mutuja na alëge mëta jowa klabëwa ni mëtebëya na ita kë mago huju mëtla na mutuja. Mutujabë na kliji ku mëta tlibe bu Jopa lifate lololi mototla. Na kë olëna, Pita matawa kë ke togolebë lo ke elë tokwale, Gotome gëgali nalëglelëleme. ¹⁰ Pita bu fone latle na hi wesibi hime tole tle. Bu hi wesibi mana sle mototokwefëma na bu nimitelëha wesibi hwi tle. ¹¹ Na matafa inoha latikawa tëkakettle na tako lablab ëhoha wesibi kë mago tuku tëmalitlatle. Nilina taba kë ëho mëta jejelë wako elëme këkesi mëtletle na mana tuku tëmalitlatle. ¹² Kë ëho mëta, memelë kleli na memelë taiju na memelë tato na memelë fole kë mëta motowelibe. (Israelbë afenëboni bu këha wesibi hana hihi mëlekefëya. Bu melowene lamëtla, “Bu kë wesibi hi mëglana kwe bu Gotobë naba lime tëbo miglitayame.”) ¹³ Na Pita gali lego aholokwane tle na megali tlole, “Pita ju huju eleme na kë hi wesibi tëtëkle etame na hi eleme.” ¹⁴ Kwe Pita gali tle, “Weye. Tako Ho, bo hanane mu hi nëgelëme. Sebo, Israelbë afenëboni, këha wesibi hihi hana nëlekefëya. Sebo melowene nanëla, ‘Ebë wesibi hi nëglana kwe sebo Gotobë naba lime tëbo nanilitaya.’ Bo ëtani kë nëgebë na ëje mana ekë bo këha wesibi hihi hana nelë.” ¹⁵ Na kë ëfalëbo lego Pitame ita gali

tlole, “Wesibi Goto megali kë lëglebë, ‘Ebë lale hi wesibi,’ ju megali asa ele, ‘Ebë tëbo hi wesibi.’ Weye.” ¹⁶ Na kë gali lego kë galime aowafe gali tlole na mana kë ëho matafa elëme lakiwa tokwake.

¹⁷ Na Pita kë nimitelë mana lowene tlekefëtlebëë na Kornilius kë jine tëglëmbë ho mana fata mëtëkakija. Bu fli home afina metakune motloma, “Saimonbë lo hametane?” Bu mitisiya, na Saimon këme tafa tëglebë lo ino ëfome mitejuwelikwëya. ¹⁸ Na gali motloma, “Saimon Pita ebë lo mëta mana tafa lëlene o hanane?” ¹⁹ Pita bu kë nimitelë gali mana lowene tlekefëtlebëë na Gotobë Amtëtomba bume mana gali tlole, “Aholokwane ele! Jume aomalë ho jume kë hohwi mëtagitëyo. ²⁰ Ju huju elëme na kë home esune eglëmbëme kle etëkakeme na buna eyeume. Ju buna egëyeume tutune asa ele. Bo jine nelëbakëmetë.”

²¹ Na kwe Pita kë ho belë kle tëtëkake na gëgali tlelëme, “Sobo kë hohwi etatelobë ho, ta bo ekë. Sobo fëyeme esijone?” ²² Na bu megali mëtla, “Wame home boblo mogotomebë enënebë eso ho, Kornilius, bu jine telëbakëna. Bu lale lakalena homu na bu Gotome lotu lëlekefëtlebë ho. Na Israelbë afenëboni iniwa melowene lamletla, ‘Bu lale lakalena homu.’ Na Gotobë ensel bume wagali tlole, ‘Ju ho flime, Jopa lifewa jine elëkakëmeme, Saimon Pitame ju belë mëglesula namëglame. Na ju bubë gali aholokwane naeglotleme.”” ²³ Na Pita kë aomalë home lowa nëno tle na këme weife ni tlebëme. Na olobalë bu nani kë mago iniwa mutuja. Na Jisame lowene sle mëtletlabë oneho fli, Jopa life mëta kë tafa mëglabë mata bume esogo mëtlelëma.

Pita Korniliusbë lowa tuju

²⁴ Bu mutujabëë na alëge mëta ni mëtebëya. Na li olëna Sisaria lifatewa fwa mutula. Korniliusbë ilawa mago enënename, na bubë yabeniname, bu wafi gali tlagume. Na bu wafi loko mëtëkakija na Pitame mana hwi mëtletla. ²⁵ Pita Korniliusbë lowa fata

tule na lowa tēkaklu. Na Kornilius, Pitabē li elē tisi tle na sēkefo miti tafa tletle na Pitame lotu tletle. ²⁶ Na kēme Pita huju tetēbakle na gali tlole, “Ju huju ele. Bo melē, howa, ju fenene. Ju melē asa ele.” ²⁷ Na Pita buna gēgali mētelobē na oneho buna iniwa kē mitisiyabē lowa mētēkakluja. Na Pita kēme hwi telujuwelēme, lebutako oneho loko mētelujuwelēya.

²⁸ Na Pita bume gali tlome, “Sobo walowene elo. Sebo Israelbē afenēboni kwe memelē nanēla, Israelbē afenēboni mētabēya jwa mēglabē enēnena hana loko nēglelēyame na sebo buna hana tafa nēglame. Kwe Goto bome melebotane latētatenē, bo melowene asa manelē, ‘Fli enēne bu Gotobē naba li mēta tēbowa mētabēya.’ Weye. ²⁹ Kēme nēgeme, sobo kē gali tēgelokwakēnabē gali hana boblo nētātēyo, bo hokweinawa kēme tisi. Na bo some takune nēlēyo. Bome sobelē nigisibēme, fēyeme gali telokwakēnane?”

³⁰ Na Kornilius bu kēme gali tle, “Aona olē wamutuju, wesibi bome mana fata tletenē. Kē wesibi melē latle. Taboklē klijina, ebē fenene, bobē lo mēta tafa telē na Gotome gēgali tlelēlē. Bo Gotome gēgali tēglelēlēbēē na mana ho li bobē lime latlikakiwa. Bubē ēho kliji fene u tletle. ³¹ Na bu gali tle, ‘Kornilius. Ju Gotome kē gēgali eglelēkeflebē, bu waaholokwane lolē. Na ju wesibi jwa enēneme, wesibi kē eglelēkēfēmebēme, Goto wahwi lolē. ³² Na ju ho flime Jopa lifewa sajine elēkakēme, na Saimon Pitame nagali mugujelēlame, ju belē nalgisi tēme. Kē ho, bowenisa Saimonbē lo mēta tafa lēle. Kē Saimon bulmakau kleli jibo sle sle lotokwefēmebē ho, kibo mēglelime. Bubē lo nutu helefo li mēta lilibetle.’ ³³ Kēme nēgeme, bo fli home ju belē hokweinawa kēme jine telēkakēmē. Na ebē lakale, ju yaha esitēnamu. Na ēje sebo iniwa Gotobē naba lime ekē nētabēya nētabēya. Na Tako Ho jume kē tēglēbē gali, sebo aholokwane nanēgletlame.”

Pita Korniliusbē lo mēta gali tē totle

³⁴ Na kwe Pita megali latle, “Nēgalimufe. Bo walowene nelē. Habētabo onehobē, Goto iniwa metole lalēletēme. Bu Israelbē afenēbonime fwa nane tole lēletēme. ³⁵ Iniwa oneho, Gotome lotu mēlekefētlana na lale lowenewa esogo mēlelētlanana, kwe Goto kēha onehome tole lalēletēme na lalaitame. ³⁶ Goto seme Israelbē afenēbonime kē lēglēnabē gali, sobo wafi lowene eletelo. Na kē lale gali melē lēgēbetle lalēle, ‘Jisas Klais bu iniwa onehobē eso home tafa lēletēmeme. Jisas seme kaiselo laitakefēna, sebo Gotona yonane nanēglabēme.’ ³⁷ Sobo walowene elo. Ētani, Jon bu gali tē tētātēme, baptais namēglame. Na bu lebutako onehome baptais totome. Jon bu onehome wabaptais totome na mana kē olēna Jisas Israel life mēta lebutako wesibi totometēme. Kē wesibi bu Galili provins mēta afina oto tle. Sobo kē wesibime wafi lowene eletelo. ³⁸ Sobo ebē walowene elo. Goto bu Nasaret life mago Jisame aniji tlole na bubē Amtētomba na tako afutuku bume tlēle. Na Jisas bu kē afutukuna li life li life asē tēbelēfa na onehome taitame. Goto buna tafa mētēgelome nēgeme, na iniwa oneho Satan kē yage totomebē, bu iniwa wasle tētagume. ³⁹ Na iniwa wesibi, Jerusalem lifate mēta na Israelbē afenēbonibē li life li life mēta, Jisas melē kē totomebē, sebo wafi hwi tlola. Na wesibi melē kē totomebē, kē gali kēme tē nētātla. Na bume mogo nalē ti mēta bu mētla. ⁴⁰ Kwe tēle olē mutuju na aona olēbēna Goto bume gli mago mana huju totle. Na bume olafa tētagutēme, oneho hwi namoglolabēme. ⁴¹ Kwe Israelbē afenēboni iniwa, bume nane hwi motlola. Weye. Goto ēbame sebo Aposel home waaniji tlome, bume ita hwi nanoglolame na bubē gali tē nanēgētatlame. Na bu matēmatē mago huju tēglana, sebo buna hi tla. ⁴² Na bu seme anisasana gali tlonana, bubē lale gali iniwa onehome tē nanēgētātēmame. Na sebo onehome metē sle nanēgētātēmame,

'Goto Jisame waaniji tole, gigli mëtlabë onehobë lowene na mana tafa mëglabë onehobë lowene abiabi hwi lolotëmeme na mana lëselokwame.'
⁴³ Ètani, iniwa Gotobë lowene mago gali të mototokweflabë ho, Jisame megali lamëtletla, 'Iniwa oneho ebë home kë lowene sle mëgletlabë, Goto bubë tëbo lowenebë aholokwana ti lëgletëmeme.'"

Gotobë Amtëtomba Israelbë afenëboni mëtabëya jwa mëglabë enëne belë tisi tëme

⁴⁴ Pita gali mana të togotlebëë, na Gotobë Amtëtomba, Gotobë gali kë aholokwane mëglabë onehome mana tisi tëme. ⁴⁵⁻⁴⁶ Këme nêgeme bu lili anigawa galina gëgali mëtla na Gotome bibita mototla. Këme nêgeme, Jisame lowene sle mëtletlabë oneho, Pitana kë mitisiyabë, hwi motloma na klelego memëtletëma na megali mëtla, "Hwi elo, Israelbë afenëboni mëtabëya jwa mëglabë oneho, Goto bubë Amtëtomba bume walëlëme." Na Pita bume megali latletëme, ⁴⁷ "Gotobë Amtëtomba kë enëneme wafi lisitëme bu ëbame seme fene tisitëna. Ho seme ebë onehome tu mëta baptaisme hana lëkle mëgëtaname. Bo melowene nanelë, 'Sebo bume lalowa baptais notomame.'" ⁴⁸ Na Pita kë onehome megali latlome, "Sobo Jisasbë weni-jina baptais elomo." Na Pita bume baptais totome. Na bu Pitame takune motlola, buna habenuju olë tafa namëglame.

11

Pita bume kë fata tēgletlebë wesibime gali tlome

¹ Aposel ho na, Jisame lowene sle mëtletlabë oneho flina, Judia provins mëta kë tafa mëtlabë, bu megali aholokwane mëtla, Israelbë afenëboni mëtabëya jwa mëglabë enëne, Jisasbë gali lowene sle lamëlëtla. ² Pita Jerusalem lifatewa tugujuna, na Jisame lowene sle mëtletlabë oneho fli bume wame gali memotlola. Kë enëne bu melowene lamëtla, "Bu ato jibo

tëtälë mogotomabë lakale esogo sle mëglelëlabëme feilawa afutuku mëtla." ³ Bu megali motlola, "Ju ato jibo tëtälë jwa motomabë hobë lowa fëye esome tēkaklune na buna fëyeme hi telulone?"

⁴ Na kwe, iniwa wesibi bume kë fata mëtletlebë, Pita këme gëgali tle. Bu megali tle, ⁵ "Bo Jopa life mëta tafa telë na bo Gotome gëgali tēglelëkeflëbëë na bo nimitelëha wesibi mana hwi telë. Bo tako lablab ëhoha wesibi hwi tlolë, matafa mago tuku tēmalita. Nilina taba kë ëho mëta jejelë wako elëme këkesi mëtla na mana tuku tēmalita. ⁶ Bo kë wesibi lowene sle nanëgletemëme na bo kë ëho elëme mana hwi sle telokwaklë. Na bo mehwi tlomë, memelë tobaluku kleli na memelë waluju mago kleli, na memelë tato na memelë taiju na memelë fole. Israelbë afenëboni bu këha wesibi hana hihi mëlekefëya. ⁷ Na ëfalëbo lego bome megali tlonë, 'Pita ju huju ele na wesibi tētëkle etamë na hi elëme.' ⁸ Kwe bo megali telë, 'Tako Ho, bo hanane mu hi nēgelëme. Sebo, Israelbë afenëboni, këha wesibi hihi hana nēlamu. Sebo melowene nanëla, "Kë wesibi hi nēglana kwe Gotobë naba lime tëbo nanilitaya." Këme nêgeme këha wesibi hi hana telë, bo ëtani kë nēgebë na ëje mana ekëne.' ⁹ Kwe kë ëfalëbo lego heven life mago ita megali tle, 'Wesibi Goto megali kë lëglebë, "Ebë lale hi wesibi," ju megali asa ele, "Ebë tëbo hi wesibi." Weye.' ¹⁰ Goto kë galime aowafe gali tle na kë ëho matafa elëme ita mana ki tokwake.

¹¹ Kë olë nawa, aomalë ho, sebo këme tafa tēglabë lowa mitisiya. Sisaria lifate mago ho li, bo belëme jine telëbakëme. ¹² Na Gotobë Amtëtomba bome megali tlonë, 'Ju kë enënena egëyeubëme, tutune asa ele. Buna lalowa eyeu.' Na ebë toballi ita jowa afanino kë mëglijabë, bu mata iniwa Sisaria lifatewa bona tuja. Na seme kë gali tēgelëbakë nabë hobë lowa tēkakluja. ¹³ Na bu seme megali latlona, 'Ensel bobë lowa tēkaklë na këme tlibe na megali tlonë, "Ju ho

flime Jopa lifewa sajine elëkakëme, ho lime hohwi namugutatlame. Bubë weniji Saimon Pita. Na bume gali mujelërame, ju belë naligisitëme. ¹⁴ Na kë ho jume na jubë lo mëta kë tafa mëglabë enëneme gali të nalëgëtatëmeme. Sobo kë gali aholokwane elërome na Goto some nëno lëleme.” ¹⁵ Bu nimitelë gali kë të togotlebë wayawe tlole, na bo mana gali tëme ototelë. Bo gali tokwafe kofene të tëtagulë, na mana Gotobë Amtëtomba bume tisi tëme, seme ëbame otome fene tigiisi tēnabë. ¹⁶ Na, Jisas ëbame seme kë gali toglonabë gali bo ita lowene tletelë. Bu megali latlona, ‘Jon onehome tu mëta baptais totome, kwe tokwafe Goto bubë Amtëtombana baptais lëgëtome.’ ¹⁷ Ëbame sebo Tako Ho Jisas Klaisme lowene sle tletla na Goto bubë Amtëtomba seme tlëna. Na kë fenene Goto kë enëneme bubë Amtëtomba tlëme. Bo melowene nanelë, ‘Kë wesibi ebë Gotobë wesibi. Na bo Gotome hana boblo nogotlëme na bubë tole hana lëkle nëgëtatelëme. Goto bume kë totometëmbë wesibime lëkle hana nogotomëme.”

¹⁸ Na kwe, bu Pitabë gali yafe aholokwane mëtla. Na bume kë wame motlolabë lowene latliwa tēbetëme. Na bu Gotome bibita mototla na megali lamëtla, “Israelbë afenëboni mëtabëya jwa mëglabë enëneme, Goto ino tika tētātëme, bubë tēbo lowene aholokwana ti mëglabëme na unaunalëme lale tafa mëglabëme.”

Antiok lifate mago oneho, Jisame lowene sle mëtletla

¹⁹ Ëbame, Stivenme mogo nalë kë tëkle mototlabë olëna, Israelbë afenëboni fli bu Jisame kë lowene sle mëtletlabë oneho flime mana tēbo mototoma. Këme nëgëme, bu mago lebutako, li life li lifewa mitliwaya. Bu Fonisia provinswa, na Saiprus afayowa na Antiok lifatewa memitliwaya lamëtla. Na bu Jisasbë lale gali mana të mētëtagutëma. Kwe Israelbë afenëboni mëtabëya jwa mëglabë enëneme gali hana të mētëtatëma.

Weye. Bu Israelbë afenëbonime fwa të mētëtagutëma. ²⁰ Kwe bu mago ho fli, Saiprus afayo mago na Sairini lifate mago, Antiok lifatewa mutuja na Tako Ho Jisasbë lale gali Israelbë afenëboni mëtabëya jwa mëglabë enëneme të mētëtatëma. ²¹ Na Tako Hobë afutuku bu mëta tēbetëme na bu kë afutukuna Jisasbë lale gali të mētëtatëma. Këme nëgëme lebutako oneho Jisame lowene sle mëtletla na bubë tēbo lowenebë aholokwana ti motokouja. Na Jisasbë lowenewa esogo mëtleletla.

²² Na Jisame lowene sle mëtletlabë oneho, Jerusalem lifate mëta kë tafa mëglabë, kë gali aholokwane mëtla na bu Barnabasma Antiok lifatewa jine mëtelëkakla. ²³ Barnabas Antiok lifatewa tuhu tule na mehwi tlome. Goto kë onehome ululu sle totome na lataitame. Na bu këme tako flelesu latletëme. Na bume lale galime meokokwe tlome, “Sobo Tako Ho Jisame unaunalëme lowene sle eglekefëtelome na bubë lowenewa esogo elelekefëtelome.” ²⁴ Na Barnabas bu lale homu nëgëme. Na Gotobë Amtëtombabë afutuku bu mëta feilawa tētabetle. Na bu Gotome feilawamu lowene sle tletle. Na këme nëgëme feilawa oneho bu Jisame lowene sle mëtletla.

²⁵ Na kwe, Barnabas bu Tarsus lifatewa tuju, Solme hohwi nalugutatleme. ²⁶ Bu hohwi tētagutlebëë na Solme mana hwi tujuwelële. Na no tlële na Antiok lifatewa elebo nagi tlesule. Na tlemalë, Jisame lowene sle mëtletlabë onehona, kë lifate mëta kë tafa mëtlabë, jowa tlibutuna loko mëtlelekefëya na Gotobë gali okokwe motlokefëmo. Na Antiok life mëta, bu Jisame lowene sle mëtletlabë onehome, afina mefë lamototoma, “Kristen.”

²⁷ Kë nalëwa, Gotobë lowene mago gali të mototkweflabë ho fli, Jerusalem lifate mago, Antiok lifewa mitisiya. ²⁸ Na Gotobë lowene mago gali të totokweflebë ho li, bubë weniji Agabus, bu Kristen onehobë naba li mëta hujuna tlibe na Gotobë Amtëtombabë afutukuna megali

tlome, “Tako fone, iniwa life mēta fata lokoume.” Na tokwafe, Sisar Klodius eso home tafa tēglena, kē fone mana fata tokou. ²⁹ Kristen oneho, Agabusbē gali aholokwane motlola. Na bu gali sle mototla. Kristen oneho flime, Judia provins mēta kē tafa mēglabē, balitina mēgaitama namēglame. Na jowa jowa ho, bubē baliti musu niji loko mētētaya. ³⁰ Na bu Barnabas na Solname jine mētelēkakēma. Na bu kē baliti, Kristen onehobē letitabo home mētehoutemo na mutujuwelēmo.

12

Eso ho Herot, Jemsme mogo nalē tēke tlole na Pitame kalabusu lowa tuku tle

¹ Na kē nalēwa, eso ho Herot bubē wame home boblo mogotomabē enēneme gali tlome, Kristen oneho flime tēbo namētagumame. ² Na bu li home gali tlole, na bu Jonbē bolijamome, Jemsme kosina mogo nalē tēke tlole. ³ Herot bu mehwi latlome, Israelbē afenēboni kē wesibime fleflesu lamētla. Kēme nēgeme, bu Israelbē afenēbonibē tako lotu olēna, bubē wame home boblo mogotomabē enēneme gali tlome, Pitame kalabusu lowa tuku namēglame. Israelbē afenēboni, kē tako lotu olēna, sēse wesibi jwa bletē nage hi mētlekefēya. ⁴ Bubē wame home boblo mogotomabē enēneme Pitame fa mototla na kalabusu lowa tuku mētla. Na Herot bu, wame home boblo mogotomabē enēne we tobali ita jowa kēniji aniji tlome, Pitame hwi namoglokweflame, bu lēglēboukakulime. Nilimalē afina hwi motlokwefla. Na fli mana hwi mētla. Na tokwafe fli nilimalē ita hihijika mētla. Na otobē mutuja. Na bu olēna klabēna mehijikawa lamētlekefēya. Herot bu melowene latle, Israelbē afenēbonibē tako lotu olē yawe lēleme na Pitame kalabusu lo mago mana lēlesuleme, na onehobē naba lime bubē tēbo loweneme takune lololeme. ⁵ Kēme nēgeme Pita kalabusu lo mēta tafa tle. Na wame home boblo mogotomabē

enēne bume hwi motlokwefla. Kwe Kristen oneho, Gotome anisasana takune motlokwefla, Pitame lēgaitale nalēgleme.

Ensel Pitame taitale, kalabusu lo kile nalogotleme

⁶ Na kwe Herot bu olē waaniji tlole, onehobē naba li mēta Pitabē tēbo loweneme takune nalogloleme. Na kē klabēwa, Pita bu wame home boblo mogotomabē enēne tlemalēbē ku mēta nitēbetēme. Na bume senē taba toba mēta kēkesi mētletla na li senē tobamu toba elē kē tafa tēglebē wame home boblo logotomebē hobē toba mēta kesi tuletla na li senē tabo yemane toba elē kē tafa tēglebē wame home boblo logotomebē hobē toba mēta kesi tuletla. Na wame home boblo mogotomabē enēne fli, kalabusu ino ēfome mana sei mētlēkefētla. ⁷ Na kwe Gotobē ensel lafatawa tle. Na kē kalabusu lo, elulego telube. Na ensel Pitame mēglēbo mēta luluju totle na gali tlole, “Ju hokweinawa huju ele.” Na senē taba, bubē toba mago, lalukluwa mētētēkakettle. ⁸ Na ensel gali tlole, “Pita jubē ēhona, juba jibona gēgelo etome.” Na Pita melē tle. Na ensel gali tlole, “Jubē heletabo ēho mata gelo etleme na bome nagi enēnēme.” ⁹ Na Pita kē tlē tabo lo tokwēfo kile tle na enselme nagi tlēle. Kwe Pita melowene hana tle, “Bume kē fata lēgletlebē wesibi ebē nēgali wesibi o hanane.” Bu melowene tle, “Bo nimitelē hwi nelēwa.” ¹⁰ Tlemalē weife nagi mētēyeu na kalabusu lo kē hwi moglokweflabē home lasigliwa mototomo. Na ita mētēyeu. Na kalabusu lo kē hwi moglokweflabē ho flime sigli motujetomo, kwe bume hwi hana motloma. Na tlemalē bu kalabusu lobē ainēna ino elē fwa mutulo, kē kalabusu kile namogotlome, na lifate elē mēyeume. Na kē ino blawa latikawa tēkakētēme. Na bu kalabusu lo kile mētelo na li alēge esogo mētletlolo. Na kwe ensel Pitame alēge mēta lakilewa tēkake.

¹¹ Na Pita bu kē wesibime lowene tle na gali tle, “Bo walowene nelē, ebē nimitelē nane. Weye. Goto bubē

ensel bo belë jine lëlëtenë, bome lëgaitanë nalëgleme. Këme nêgeme Herotna, Israelbë afenëbonina, bome tēbo mēgētanabē lowene kē nēgebē, hana tēbo mēgētaname.”¹² Na bu Jon-Makbē bota, Mariabē lowa tuju. Lebutako oneho kē lo mēta loko mētēlulēya na Gotome gēgali mētēlēkefla.¹³ Pita kē lo ino mēta kēke telukwaketēme. Na li wege mēse, bubē weniji Roda, tisi, ino tika naegetatleme fene.¹⁴ Bu Pitabē mou lego aholokwane tlole. Na bu tako fleflesu tēgletleme nêgeme, ino tika jwa kēme tētatile. Na bu fēka tokou na fli onehome gali tlole, “Pita walisife, ino efome ekē lelējuwelēbokwe!”¹⁵ Kwe bume gali motlēya, “Ju yaya mēse.” Kwe bu anisasana gali tlole, “Weye. Nēgalimu. Bu ino efome ekē lelējuwelēbokwe.” Na bu gali motlēya, “Sebo melowene nanēla, ‘Ebē bume kē hwi loglokwe flebē enselhane.”

¹⁶ Kwe Pita ino mēta itaita kēke telukokekēfe. Na kēme bu ino tika mētētatla. Na bume hwi motlola na klelegomu memētletla.¹⁷ Na Pita bume tobanawa lēkle totome, gali kaju namēgebēyame. Na Tako Ho, bume kalabusu lo mago kē no lēglēlebē gali, tē tētātēme. Na bu megali latlome, “Sobo kē wesibime, Jems name, Jisame lowene sle mēgletlabē oneho fliname gali elomo.” Na Pita bume hune totome na li lifatewa tuju.

¹⁸ Olobalēwa, kalabusu lo mago wame home boblo mogotomabē enēne, Pitame yafe hwi mētletla kwe bu tafa hana tle. Na bu klelego memētla. Na blalo tētakune mētēlogwaya, “Pita habelē lujune?”

¹⁹ Eso ho Herot, bu kē gali aholokwane tle, “Pita hana tafa lēlefe.” Na bu ho flime jine tlēme, Pitame hohwi namētatlame. Kwe bu Pitame hwi hana motlola. Kēme nêgeme, Herot, Pitame kē hwi moglokwe flabē home yafe takune tlole kwe hanane. Na bu li home gali tlole, Pitame kē hwi moglokwe flabē home mogo nalē tētēkle nalēgētame. Na tokwafe, Herot Judia provins kile totle na Sisaria lifatewa tuju na kēme tafa tule.

Eso ho Herot wagli tle

²⁰ Eso ho Herot bu Tair lifate mago onehome na Saidon lifate mago onehome tako wame latlome. Kēme nêgeme bu iniwa loko mētēlēya na Herotme hwime mitisiya. Kwe bu Blastusme afina takune motlola, bume lëgaitame nalëgleme. Na bu kēbēme helawa tletēme. Blastus bu eso ho Herotbē lo hwi toglokwe fētēlebē ho. Buna iniwa, Herot belē mutuja, aisenē hi namēlelēlame na bume kē wame toglobebē wame lowene lēglēkēle nalëgleme. Kē enēne, bubē hi wesibi, eso ho Herot kēme tafa lēglebē lifate mago glo mētēkefēya. Na bu melowene lamētla, “Herotbē wame tli jwa lēgebetlena kwe bu hi wesibi bu mago ita glo hana mēglame.”

²¹ Herot bu kē enēnena gēgali mēglabē olē waaniji tlole. Na kē olēna bu eso ho kēna negli mogotlabē ēho gēgelo tle na eso hobē tafa labu mēta tafa tle na kē enēneme mana gēgali tlelēme.²² Na iniwa oneho Herotme feilawa we motlola, “Ebē ho nane. Ebē goto li, ekē gali lolona.” Na bume lotu mētletla.²³ Herot bume kē gali motlolabē galime aholokwane tlole, kwe bu lēkle hana totome. Na Gotome fleflesu lēgletlebēme tole hana tle. Kēme nêgeme, Gotobē ensel li bume hokweinawa tako atowelili tlēle. Na bisikēfa bubē alejina imona hi mētēluletla na bu gli tle.

²⁴ Na Gotobē gali li life li life fifiji mētlagula. Na lebutako onehomu Jisame lowene sle motokoutla.

²⁵ Jerusalem lifate mēta loko kē mētētayabē baliti mētēlēmōbē wege yawe motlolo. Na Barnabasna Solna Jerusalem lifate mana kile mototlo na bu Jon-Makme, Antiok lifatewa weife mētēlulo.

13

Bu Barnabasname Solname aniji motloma, Jisasbē lale gali tē namētagutemome

¹ Kristen oneho fli Antiok lifate mēta tafa mla. Na bu mago fli, bu Gotobē lowene mago gali tē mototokwe-fla. Na fliye, bu Kristen oneho flime Gotobē lale galime okokwe motloma. Kē enēnebē weniji melē: Barnabas na Simeon, bume mefē lamototla, “Kokolebo ho,” na Lusius bu Sairini life mago ho, na Sol, na Manain bu eso hobē Herotbē yonane ho. ² Li olēna, kē oneho, Tako Home lotu mētletla. Na bu hi wesibi hi jwa mētla, Gotome lowene sle namēgletlame. Na Gotobē Amtētomba gali tlome, “Sobo Barnabasname, Solname aniji elomo, bo bume kē aniji toglotēmēbē wege fa namogotlome.” ³ Kēme nēgēme, bu ita hi wesibi hi jwa mētla na Gotome mana gēgali mētletlā, kē tlemalēme lēgaitame nalēgleme. Na bubē toba bubē eso mēta gogwa motoletēma, bume kē wege fame aniji motloma. Na tlemalēme jine mētletlakēma.

Barnabasna Solna Jisasbē lale gali Saiprus afayo magobē onehome tē mētētatemō

⁴ Gotobē Amtētomba tlemalēme jine tlēme. Na bu Selusia lifatewa mētēyeu. Na kēme sibu lo mēta fēfē mētelo. Na sibu lo bume Saiprus afayowa tlelume. Na bu sibu lo mago fēfē mētēkako na Salamis lifatewa mētēyeu. ⁵ Bu Salamis lifatewa fwa mutulo na Israelbē afenēbonibē lotu lo elē asē mētēbelēfo. Na Gotobē gali tē mētētatemō. Na Jon-Mak buna iniwa mutuja, tlemalēme nalēgaitameme.

⁶ Tlemalē Saiprus afayobē li life li life mētēkoujo na Pafos lifatewa fwa mētelo. Na bu Israelbē afenēbo lime mana esune mētletlo. Bubē weniji Barjisas. (Bubē weniji Grik galina mefē lamototla, Elimas.) Bu itaita humēi tlekēfē na memelē olo tlēsēme. Kē ho bu itaita mesogēna latlokwefēme, “Bo Gotobē lowene mago gali tē nogotlēbē ho.” ⁷ Kē ho bu eso ho Sergius Paulusbē yonane ho. Sergius Paulus bu Saiprus afayo magobē eso ho. Na bu lale lowenenabē ho. Bu Barnabasname

Solname gali telokwakeme bu belē migisitelo namēgelome, bu Gotobē gali aholokwane nalēgleme. Na tlemalē bu belē mitisitelo na bume Gotobē gali tē mētētatelo. ⁸ Kwe humēi ho Elimas, kē tlemalēbē wege blo nalēgētātēmeme afutuku tle. Bu metole latle, eso ho Sergius bu Jiasme lowene sle jwa na lēgletleme. ⁹ Gotobē Amtētomba Solme afutuku tlēle. Solbē li weniji ebē Pol. Na bu kē afutukuna, Elimasme anisasana hwi tlole na megali latlole, ¹⁰ “Ju Satanbē nēba. Ju iniwa lale loweneme wame eglomebē ho. Tetēbo lowene na kule kule lowene, ju mēta nohwa lelutabetē. Ju Gotobē iniyafe gali, jubē sosogēna galina hihijika elekēfē. Ju kē tēbo lowenebē fēye olēna kile eglēmene?” ¹¹ Ju aholokwane ele. Goto jume tēke loglēmē ekēne na jubē naba titiki mēgletēme. Na ju kljibē elulego hwi hana eglotleme. Na ju tako naba titiki tabo metafawa ekoukēfeme.” Pol bu megali wafi tle na hokweinawa olobaha wesibi tetujutle na Elimasbē naba lamu totometle. Na naba kilego mētletle. Na bu home hohwi tētāmē, bume toba fana mēglelula namēglame. ¹² Eso ho Sergius kē wesibi hwi tlole na bu Jiasme lowene sle tletle. Bu tlemalē kē okokwe motllobē gali klelego tēgletleme nēgēme.

Sol bu Jisasbē gali Pisidia provins mago lifate li, Antiok mēta tē totle

¹³ Polna, buna kē asē mētēglābē hona, Pafos lifate kile mototla. Na bu sibu lona Perga lifatewa mutuja, Pamfilia provins mēta. Kwe Jon-Mak bume hune totome na Jerusalem lifatewa ita tuju. ¹⁴ Bu Perga lifate kile mētelo na mētēyeu na Antiok lifatewa tuhu mutulo, Pisidia provins mēta. Na bubē lotu olēna bu Israelbē afenēbonibē lotu lowa mētēkaklujo na tafa mētletulo. ¹⁵ Na lotu lo hwi moglokweflabē eso ho, Mosesbē yahi hwi motloma na Gotobē lowene mago gali tē mototokweflabē hobē yahi mata hwi motloma. Na mana bu ho lime Polname, Barnabasname gali

naloglomeme jine metlëla, megali naloglomeme, “O afani, sobo one-home lëgaitamebë gali li egeholona kwe sobo lalowa gëgali egelome.”

¹⁶ Na Pol huju tle, na bume tobana lëkle totome, gëgali kuju namëglame na gali tlome, “Sobo Israelbë afenëboni na sobo fli oneho, Gotome kë lotu eglëkefëtelobë, sobo iniwa aholokwane elo. ¹⁷ Israelbë afenëbonibë Goto, bu sebobë semleninome meaniji latlome, bubë oneho tafa namëgletlame. Bu bubë life kile mototla na fli enënebë lifate, Isip lifate mëta, tafa mëtla. Na këme Goto bume taitame. Na bu lebutako onehomu fata mëtla. Na Goto tokwafe, bubë afutukuna bume Isip lifate mago nëno tle na ho jwa tabo elë tlelume. ¹⁸ Na bu kë ho jwa life mëta niliafewe tlibutu kënji asasë mëtla. Na bu kë niliafewe tlibutuna Gotome tetëbo lamototokwefla. Kwe Goto bume lataitakefëme. ¹⁹ Tokwafe bu tako flëke elë fwa mutula. Kë flëke weniji Kenan. Tobali ita tële li li afenëbo mago enëne kë flëke mëta tafa mëtla. Kwe Goto, Israelbë afenëbonime afutuku tlëme na bu kë afutukuna, kë tobali ita tële li li afenëbo mago enëneme unalëme tëbo mototoma. Na Goto kë enënebë flëke Israelbë afenëbonime yo tlome, kë flëke bubë flëke fata nalëgletëmeme. ²⁰ Kë flëke fa mototlabëme 450 tlibutu lamëtla. Na tokwafe, Goto bu oneho flime aniji tlome, Israelbë afenëbonibë asë hwi namoglotëmame. Bu melë motokweija na Gotobë lowene mago gali të totokweflebë ho Samuel bume mana tafa tlelëme.

²¹ Samuel bume tafa tëglelëmebëë, na bu Samuelme takune motlola, li home aniji naloglotëmeme eso home fata nalëgletëmeme. Na kwe Goto, bu Solme aniji tlole, bubë eso home tafa nalëgletëmeme. Na bu eso home niliafewe tlibutu kënji tafa lëgleme. Sol bu Kisbë bowene. Bu Benjaminbë afenëbo mago. ²² Kwe Goto Solme eso home tafame hehë tletle na Devitme aniji tlole, bubë eso home tafa nalëgletëmeme. Bu Devitme megali

tletle, ‘Bo Jesibë nëbame, Devitme, wahwi nololë na bo bume tako tole nanëletelë. Bu bobë iniwa tole esogo lëglelëmetënëme.’ ²³ Ètani Goto megali sle latle, Devitbë afenëbonibë mago, tako letitabo home lëgëtabetëme nalëgleme, Israelbë afenëbonime tëbo lowene mago nëno nalëgleme. Na kë ho bu wa fata tle na bubë weniji Jisas.

²⁴ Jisas, bubë wege fa jwa togotlena na Jon, Israelbë afenëbonime gali metë latëtätëme, ‘Sobo tëbo lowenebë aholokwana ti elome na Gotome fwa lowene sle eletelome na mana baptais elome.’ ²⁵ Jon bubë wege yawe logloleme nounou tle na bu megali latle, ‘Sobo bome melowene laletë nane, “Goto kë aniji toglolebë ho, onehome nëno lëglebë ho.” Weye. Bo sobo kë hwi egletelobë ho nane. Kwe kë ho kë ligisibë, bubë afutuku takomu kwe bobë afutuku tokwëfo. Bo lale ho nane kë ligisi home kë nëgaitalëme, manawa wege ho fene laitale. Weye. Bo bubë jiteho hana titika nëgletelëme. Bu letitabo homu nëgeme na bo atwati homu. Bu lale homu kwe bo atwati homu.’

²⁶ O afani, Abrahambë afenëboni, na fli enëne Gotome kë lotu eglëkefëtelobë, sobo aholokwane elo. Goto onehome kë nëno tëglebë gali, seme wajine tlëtëna. ²⁷ Jerusalem lifate mëta kë tafa mëtlabë oneho na bubë eso enëne melowene hana mëtletla, ‘Goto, Jisasme aniji tlole, seme tëbo lowene mago nëno lëleme.’ Bu Gotobë lowene mago gali të mototokweflabë ho kë yahi mëtlabë gali, iniwa lotu olëna hwi motlok-wefla, kwe bu kë gali lowene sle hana mëtletla. Këme nëgeme megali lamëtla, ‘Jisas kwe gli malële.’ Ebëha lowene kë mëtlabë, kwe bu Gotobë lowene mago gali të mototokweflabë ho ètani fene yahi mëtla. ²⁸ Bu Jisasbë fëye tëbo wesibiha hwi hana motlotla na bume mogo nalë tëkle mototlamu. Weye. Kwe bu eso ho Pailatme anisasana gali motlola, ‘Gli malële.’ ²⁹ Gotobë lowene mago gali të mototokweflabë ho, bume ètani meyahi lamëtletla. ‘Oneho bume

memelë tetëbo lowene gwa mëtëtatla.' Na bu kë iniwa tetëbo lowene Jisame fwa gogwa motoletla. Na mana bume ti mago tohwa mototla, na matëmatë mëta gwa mutujetla. ³⁰ Kwe Goto bume matëmatë mago huju totle. ³¹ Na Jisasna ëtani kë asë mëtëkefëyabë enëne, Galili provins mëta na Jerusalem lifate mëta, bume lebutako olë hwi motlokwefla. Na kë oneho, Jisame kë hwi motlokweflabë, Israelbë afenëbonime, kë lalë gali tē mëtëtakefëtëma.

³² Na sebo some mata kë lalë gali metë nanëtatëyo. Goto sebo bë semleninome megali sle latlome, ho lime jine lëgletëname, seme tēbo lowene mago nëno nalëgleme. ³³ Na Goto, Jisame matëmatë mago kë huju togotlëbë, bu sebo bë semleninome fene gali sle tlome. Na kë gali sle gali namba tēle Buk Song mëta mefata watletëna. Ëtani Devit, Buk Song mëta meyahi latletle,

'Ju bobë nëbamu
na ëje bo onehome walebotane
nëtatëmë,
bo jubë ayamu.'

³⁴ Goto, Jisame matëmatë mago huju totle, na bu ita hana gli lëgleme na matëmatë mëta kibo hana lëgleme. Goto ëtani kë wesibime megali latle, 'Bo sobobë bisemleme, Devitme, fene gali sle tlole, bo some nëgaitome na lalë wesibi nëglëyome. Na kë gali iniyafememu gali telë bu mefata mëgleme, bo ëtani fene gali telë.'

³⁵ Na li gali, Gotobë bogo mëta melëgëbe lalële, kë bu megali latla, 'Ju jubë wege fame kë aniji toglolebe ho, matëmatë mëta kibo lëglebëme, hwiwa hana eglolome.' ³⁶ Kë gali bu Devitme hana gali tle. Sebo walowene nëla, Devit ebë life mëta tafa tēglëna, bu Gotobë tolewa esogo tlelële. Na bu tokwafe gli tle. Na bume matëmatë mëta gwa mototla, bubë bolijafujunime fene gogwa mëtla. Na bubë ato ini flawa tletle.

³⁷ Kwe Goto matëmatë mago kë huju togotlëbë ho, bubë ato kibo hana tletle. ³⁸ Këme nëgëme sebo

some, sebo bë afanime, lalë gali metë këme nëtatëyo. Sobo melowene sle naegelome, 'Jisas këme tisi, sobobë tetëbo lowene sle nalotometëyome.'

³⁹ Goto Mosesme kë tēglëlebë tafa sle gali tafa sle gali, sobobë tēbo lowene hana sle lëgëtatëyome, na some mefë hana lëgëtome, 'Lalë oneho.' Kwe iniwa oneho, Jisame kë lowene sle mëtletlabë, Goto bubë iniwa tēbo lowene aholokwana ti lëgletëmeme na mefë logotomeme, 'Lalë oneho.'

⁴⁰⁻⁴¹ Ëtani, Gotobë lowene mago gali tē mototokweflabë ho, megali lamëtla, 'Sobo bome tetëbo gali kë eglonabë enëne, sobo hwi elo. Na klelego egelome na tēbo eglitome. Bo li wesibi sobobë ku mëta fata nëgetatëyome. Bo melë kë nogotlëbë wesibime, ho li some gali lëglëyona, kwe bubë gali aholokwane hana eglolome.' Sobo ululu sle saelo. Kë tēbo wesibi some fata lëgletëyolime."

⁴² Pol bu gali wafi tē tëtatëme. Na kwe buna, Barnabasna, totoho namëkakome kofene, kwe oneho bume megali lamotloma, "Li lotu olë fata lëglëna, sobo ita sa esijo na seme gali ita tē etatëname." ⁴³ Na oneho lotu lo mago totoho mëtëkaka. Na Israelbë afenëboni lebutako na fli enëne, Israelbë afenëbonibë lotu tokwafe kë esogo mëtletlëlabë, bu Polname Barnabasname esogo mëtletlëma. Na tlemalë bume lalë galime megali lamotlokwefëmo, "Sobo Gotobë tolewa esogo elelëlo na bubë maninibo mëta tafa elome."

⁴⁴ Na li lotu olëna, iniwa oneho, kë lifate mago, Polna Barnabasna Gotobë gali tē mogotlobë aholokwaneme loko motokweija. ⁴⁵ Kwe Israelbë afenëboni fli, bu Polname Barnabasname mehwi lamotloma. Lebutako oneho bubë gali aholokwaneme tako tole lamëtla. Na bu tlemalëme tako moumou memëtletlëma. Na bu Polbë gali aholokwane mëglabëme tako kokasa memëtletla. Na bume tiniji galina gali motlola.

⁴⁶ Këme nëgëme, Polna Barnabasna bume anisasana megali motlomo, "Goto bu seme wagali tlonä, bubë

gali some, Israelbë afenëbonime, afina të nêtatëyobëme. Kwe sobo kë gali aholokwane egelobëme kokasa laletelo. Na sobobë kë lowenena, seme melebotane latatëna, sobo Gotobë unaunalëme lale tafa fa hana egotlome.” Këme nêgeme sebo some hune nelome na Israelbë afenëboni mëtabëya jwa mëglabë enëne belë nêyeume, Gotobë lale gali të nanutatemome. ⁴⁷ Sebo bu betelëme këme negëyeume, Tako Ho seme gali toglonome nêgeme. Bu megali latlono, “Bo jume waaniji nolë. Na elulego, wesibi fene olafa lële, Israelbë afenëboni, mëtabëya jwa mëglabë enëneme, bome meolafa etagutëmeme. Na ju iniwa life mago onehome aitawagumeme, bome lowene namëgletëname. Na bo bume nêno nêkowime.”

⁴⁸ Israelbë afenëboni mëtabëya jwa mëglabë enëne, kë gali aholokwane motloma na tako fleflesu memëtla na gali mëtla, “Tako Hobë gali kë nêgebë, lale galimu.” Na iniwa oneho, Gotona unaunalëme tafa mëglabëme, kë aniji toglobebë, kë oneho, bume lowene sle mëtletla. ⁴⁹ Na Tako Ho Jisasbë gali, kë provins mëta li life li life fifiji mëtlagula. ⁵⁰ Kwe Israelbë afenëboni, bu kë lifate magobë letitabo one, Gotome kë lotu melekefëtlabë tēbo lowene tufiji mëtëtatëma, na kë lifate magobë eso enënebë tēbo lowene mata tufiji mëtëtatëma, Polname Barnabasname tēbo namogotomame fene. Na buna, kë lifate mago oneho flina, bu Polna, Barnabasname tēbo lowene fa mëtëtatëma na bubë distrik mago hehë mëtëkakëtëma. ⁵¹ Na tlemalë, bubë juba mago flëke, kë lifate mago onehobë naba lime bu mëtelo. Melëme lëlekuju mëtelo, bu kë lowene kë fa mogotlabë tēbo miglitayame. Na bu Antiok lifate kile mototlo na Aikoniam lifatewa mëtëyeu. ⁵² Kwe Kristen oneho, Antiok lifate mëta kë tafa mëglabë, tako fleflesu memëtla na Gotobë Amtëtomba bu mëta tëtabetëme.

14

Barnabasna Polna, Aikoniam lifate mëta gali të mototlo

¹ Polna Barnabasna, bu Antiok lifate mëta fene mëtelo, bu Aikoniam lifate mëta këha wesibi melamototlo. Bu Israelbë afenëbonibë lotu lowa mëtëkaklujo na Jisasbë lale gali të mëtëtatemo. Bu lale galimu të sle mëtëtatemo. Na Israelbë afenëboni lebutako na Israelbë afenëboni mëtabëya jwa mëglabë enëne, Jiasme lowene sle mëtletla. ² Kwe Israelbë afenëboni fli, kë gali lowene sle hana mëtletla. Na bu Israelbë afenëboni mëtabëya jwa mëglabë enënebë tēbo lowene tufiji mëtëtatëma, Kristen onehona tēbo lowene namëgletëmame. ³ Tlemalë Aikoniam lifate mëta tako tafa lamëtelo. Na bu Tako Hobë lale gali tēme uli hana mëtelo. Na Jisas bume tako afutuku tlëme. Na bu kë afutukuna memelë klelegowa wesibi blëge blëge mototomo. Na Tako Ho, bu kë klelegowa wesibina, onehome melebotane latëtätëme, kë gali bu kë të mëtëtatemobë ebë nêgali galimu. ⁴ Kwe kë lifate mago oneho telë lowene mëta tafa mëtla. Fliye bu Israelbë afenëbonina yonane mëtla, na fliye tlemalë Aposelna yonane mëtla. ⁵ Tokwafe, Israelbë afenëboni mëtabëya jwa mëglabë enëne fli na Israelbë afenëboni fli na bubë letitabo enënena, iniwa lowene sago mototla. Polname Barnabasname tēbo namogotomame fene na bume aniji sisike namëgletëmame fene, mogo nalë tëtëkle namëgëtayame fene.

Barnabasna Polna, Likonia provins mëta gali të mototlo

⁶ Barnabasna Polna, bume kë tëtëkle mëgëtayabë gali aholokwane mëtelo. Na bu Listra lifatewa lamëtletëboukakujowa. Na bu kë lifate mëta na Derbe lifate mëta asë mëtelo. Këbë lifate bu Likonia provins mëta mēbë. Na bu kë lifate mëglëbo mago life mëta asë mëtelo. ⁷ Na tlemalë bu Jisasbë lale gali kë provins mëta të mëtëtagutemo.

⁸ Na Listra lifate mëta, kiju tēbona ho li këme tētabe. Bota bume kiju tēbona mëtabo fu totle. Na kë ho bu

mana ekë tafa lële. Bu asë hana tle. Bu metafawa latlekëfe. ⁹ Kë ho Pol kë të togotlebë gali aholokwane sle tokoutle. Na Pol bume wëya tlelële na bume melë lowene latletle, kë ho bu Jisame walowene sle lëgletleme nëgeme, na bubë kiju tēbo, Goto lalowa këme sle lëgëtatleme. ¹⁰ Këme nëgeme, Pol bume anisasana wëya tlelële na anisasa gali tētelokwale, “Ju huju ekokeme na hujuna elibeme.” Na kë ho bu hokweinawa huju tokoke na këme asasë tēbelëfa.

¹¹ Lebutako oneho bu Pol kë togotlebë wesibi hwi motlola na bubë Likonia galina momolë mētla, “Sebobë goto, hoha fata mēlefe na bu sebelë ekë metujulo.” ¹² Na bu Barnabasma mefë lamototla, “Bu sebobë tako goto Sus.” Na bu Polme mefë lamototla, “Bu sebobë goto, Hermes.” Bu mefë këme mototla Pol bu gëgali takowa ho nëgeme. ¹³ Bubë goto Susbë lotu lo, bu kë lifate tiniju elë tlibetle. Na kë lotu lo mēta wege lëglebë ho, iko bulmakau kleli fli, lifate mago lëgleso ino ëfo elëme tlesume. Na bu lale ti tahweji taba meta susu tujetëme na tehwei. Buna, kë lifate mago onehona, kë bulmakau kleli tētëkle mēgētayame kofene, Barnabasna, Polname lotu namēgletëmame fene.

¹⁴ Kwe Barnabasna, Polna, bume kë fata tēgletëmebë wesibibë gali aholokwane mētelo, na klelego memētletemo. Na bubë ëho kaka mototomo. Bu melëbëme lëlekujju mētelo, bume kë mototometëmabë wesibime tole hana mētelo. Na bu kë onehobë ku mēta mitlibo na bume feilawa këkale galina gali motlomo, ¹⁵ “Sobo kë wesibi fëyeme etlone? Sobo melë asa elo. Sebo sobo fenene këha howa nētabo. Sebo sobelë këme tisijo, lale ëhwati gali të nanëgëtatëyome. Kë ëhwati gali melë. Sobo blawa kë lotu egletemobë tēbo wesibi aholokwana ti elome na sobo lowene hihijika elome na tako kalëlegona Gotomume lotu eletelome. Kë Goto bu matafana, lifena, nutuna, iniwa wesibi kë mëgebebë, bu blëge blëge totome. Sobo kë lotu egletemobë

wesibi some hana mēgaitome. ¹⁶ Ètani kë nēgebë na ëje mana ekë, oneho bubë tolewa esogo mētlagila na bu memelë wesibime lotu mētëkweitëma na Goto bume hwiwa latlagime. ¹⁷ Kwe Goto bu ëho nane tle. Weye. Iniwa olë Goto onehome lale wesibi olafa tētagimetëme, bu melowene namëglame, ‘Bu tafa lalëlaginafe.’ Bu some tu tlëwagijo. Na bu lale hi wesibi mata fata tētagimo. Na bu some feilawa hi wesibi tlëwagijo, na sobobë lowene sle tētagimekefëtëyo, sobo fleflesuna këme tafa elo.” ¹⁸ Oneho bubë gali aholokwane mētla, kwe bulmakau kleli tētëkle mēgētayabëme awi lowene mētëkefëya, tlemalëme lotu namēgletëmame. Kwe tlemalë bume anisasana lëkle lëkle mototokwefëmo. Na bu melë hana mētla.

¹⁹ Kwe tokwafe, Antiok lifate mago na Aikoniam lifate mago Israelbë afenëboni, Listra lifatewa mitisiya. Na bu kë lifate mago onehobë tēbo lowene tufiji mētëtatëma. Na bu Polme wame motlola. Këme nëgeme bu Polme aniji ato elë sisike mētletla, na bu mogowa latitigowa. Mogo nalë tēkle namoglotlame fene. Na oneho bu meweniji lamētla, wagli lëlewa. Na bubë ato ki motokouja na lifate mēglëbo elë kile mutula. ²⁰ Kwe, Kristen oneho Polbë ato li elë mutujutla na hwagënë mototla. Na Pol bu huju tle na lifatewa ita tuju. Jowa olëwa tētabe na bu Barnabasna Derbe lifatewa mētëyeu.

Barnabasna Polna bu Kristen onehome Gotobë lale galina mētaitamo

²¹ Tlemalë Derbe lifateme, Jisasbë lale gali të mētëtatemo. Na lebutako onehome mētaitamo, Jisame lowene sle namēgletlame. Na bu Derbe lifate kile mētelo na Listra lifatewa ita mētëyeu. Na Aikoniam lifatewa ita mētëyeu na Pisidia provinsbë li mago lifate Antiokwa fwa mutulo. ²² Na iniwa life mēta, bu Kristen onehome lale gali të mētëtagutemo, bume lëgaitame nalëgleme. Tlemalë bume anisasana gali motlomo, “Sobo Jisame kë lowene egletelobë

lowene asa elëkëlo. Mana lowene sle saelekefëtelo. Sobo aholokwane elo, Jisabë lowene esogo nëglelëtlabë lowene ebë kalëlegomu lalëletle. Sebo feilawa hobota mëta afina tafa nëlame na mana Goto bu sebobë eso home unaunalëme tafa nalëgletëname.”
²³ Na tlemalë bu Kristen onehobë letitabo home iniwa life mago aniji mëtlagumo, Kristen onehome tafa namëglelëmame. Bu afina hi wesibi yo mëtelo, Gotome lowene sle namëgletelome. Na Gotome gëgali mëtlelëlo, na bu Kristen onehobë letitabo home, Gotobë toba elë mana gogwa mëtelo.

Barnabasna Solna Siria provins mago lifate Antiokwa ita mëtëyeu

²⁴ Tokwafe Barnabasna Solna bu Pisidia provins ku kuwa bule mëtëtagulo na Pamfilia provinswa fwa mutulo. ²⁵ Bu Gotobë gali Perga lifate mëta të mututatemo, na tokwafe bu Atalia lifatewa mitimo. ²⁶ Na Atalia lifate mëta, sibu lo mëta fe mëtelo. Na sibu lona Siria provins mago Antiok lifatewa metëyo. Ètani kë lifate mago, Kristen oneho, tlemalëme aniji motloma, Gotobë lale gali të namëgëtatemome. Na bu mata Gotobë toba elëme gogwa mëtla, bume lëgaitame nalëgleme na ululu sle nalogotomeme. Na bume kë aniji motoglomabë wege yawe motlolo. Na bu Antiok lifatewa ita mitisijo. ²⁷ Tlemalë bu Antiok lifatewa tuhu mëtelo. Na Kristen onehome gali mëtelokwakëmo, bu belë migisiya namëglame. Na bu mitisiya na tlemalë gali motlomo, “Sebo kë tégëyeubë, Goto seme taitano. Na sebo onehobë ato sle tëtatemo, na sebo Gotobë gali të tëtatemo, na sebo onehome taitamo, Jisame lowene sle namëgletlame. Na Goto, Israelbë afenëboni mëtabëya jwa mëglabë enëneme mata, taitame, Jisame lowene sle namëgletlabëme.” ²⁸ Na tlemalë, Antiok lifate mëta, Kristen onehona, lebutako olë tafa mëtla.

15

Kristen oneho, Jerusalem lifate

mëta loko mëtlelëya

¹ Na këme, fli ho, Judia provins mago, Antiok lifatewa mëtetujula. Na bu Kristen onehome meokokwe lamotloma, “Sobo, Goto Mosesme ato jibo tëtëlë gali kë tégëlëlebë esogo jwa eglelëlona, na bu sobobë ato jibo tëtëlë jwa mogotometëyona kwe Goto some hana nëno lëgleme.” ² Polna Barnabasna kë hobë gali aholokwane motlomo na bubë galime fleflesu hana mëtletëmo. Na buna kë wesibime momata mëtlelogwaya. Këme nëgeme, Kristen oneho, Polna, Barnabasna, fli honame aniji motloma, Jerusalem lifatewa namugujame. Na kë gali, Aposelna, Kristen onehobë letitabo hona sle namugujetlame.

³ Kristen oneho bume Jerusalem lifatewa jine mëtlëma. Na bu Fonisia provins na Samaria provins kukuwa mutuja. Na bu kë provins mago Kristen onehome, megali motloma, “Israelbë afenëboni mëtabëya jwa mëglabë enëne mata Jisame lowene sle mëtletla.” Bu kë gali aholokwane mëtla na bu tako fleflesu memëtla.

⁴ Bu Jerusalem lifatewa fwa mutula. Na Kristen onehona, bubë lotu letitabo enënena, Aposelna gali motloma, “Sobo sebelë egisijome nëgeme, sebo some tako fleflesu këme nëletëyo.” Na Polna Barnabasna megali motlomo, “Sebo li life li lifewa kë tégëyeubë, Goto seme feilawa taitano na sebo memelë wesibi melë këme totomo.” Na tlemalë bu kë iniwa wesibime gëgali mëtlelëmo. ⁵ Kwe Farisi ho fli, Jisame lowene sle mëgletlabë, bu huju mëtla na bu megali lamëtla, “Israelbë afenëboni mëtabëya jwa mëglabë enëne, Jisame kë lowene sle mëtletlabë, Goto Mosesme kë tégëlëlebë tafa sle gali saesogo sle mëlelëla na sobo bubë ato jibo satëtëlë etometemo.”

⁶ Na kwe, Aposelna, letitabo hona loko mëtlelëya, kë gali sle namogotlame. ⁷ Bu kë galime, feilawa gëgali mëtla na mana Pita huju tle na gali tlome, “O afani, sobo walowene elo, ètani Goto bome somago wafi aniji tlonë, Jisabë lale

gali, Israelbë afenëboni mëtabëya jwa mëglabë enëneme të nanëgëtatēmeme, bu aholokwane namlame na bume lowene sle namëgletlame. ⁸ Goto iniwa onehobë lowene wafi lowene lëletēme. Na bubë Amtëtomba kë Israelbë afenëboni mëtabëya jwa mëglabë enëneme watlēme, seme fene tlēna. Na bu këha lowene kë tēglebë, seme melēme lebotane tētātēna, bu kë Israelbë afenëboni mëtabëya jwa mëglabë enëneme mata fleflesu latletēme. ⁹ Goto seme fene tētana, bu kë Israelbë afenëboni mëtabëya jwa mëglabë enëneme këha melē wafi totome. Bu Jisame lowene sle mëtletlame nēgeme, na Goto bubë tēbo lowene aholokwana këme ti tletēme, sebobë tēbo lowene aholokwana fene ti tletēna. Na bu Gotobë naba lime lalowa këme tafa mla. ¹⁰ Sobo kë onehome, Goto Mosesme kë tēglēlebë tafa sle gali esogo mëglelēmabēme asa gali elomo. Bu kë gali habēna esogo mëglelēmamene? Sobo këha hobota bume asa elēmo. Sobo hwi elo, sebobë semlenino kë tafa sle anebo gali hana esogo sle mëtlagima. Na sebo mata kë tafa sle anebo gali hana esogo sle nēlagila. Na sebobë afuninona, sebona iniwa kë tafa sle anebo gali esogosle nēglagilabēme tako hobota mëta tafa nēla. Sobo kë onehome melē egotomona kwe sobo Gotome su etlo. Sobo Gotome fēyeme su etlone? ¹¹ Kwe sebo melowene nēglame, “Tako Ho Jisabë maninibo mëta fwa, Goto seme nēno tle. Na kë enëneme mata Jisabë maninibo mëta fwa nēno tle.”

¹² Pita megali tle, na loko kë mëtletlāyabë ho, gēgali lakujuwa metēbaguja, li gali hana ki mëtla. Na bu Polna Barnabasabë galiwa aholo bo mëtētagutēma. Na bu megali motlomo, “Goto seme afutuku tlēno na sebo kë afutukuna memelē klelegowa wesibi, Israelbë afenëboni mëtabëya jwa mëglabë enēnebë kume blēge blēge totomo.” Na bu kë wesibi galibë të mëtētatemō.

¹³ Tlemalë gali wafi yawe motlolo na Jems mana gēgali tle, “O afani, bobë gali aholokwane elotēna.

¹⁴ Saimon Pita bu seme megali sle tlonā, Goto, Israelbë afenëboni mëtabëya jwa mëglabë enēne belē alako kë tīgisitēmēbë, bubë maninibo melebotane nalēgëtatēmeme. Na bu mago fli, aniji naloglomeme bubēmu tafa, namëgletlame. ¹⁵ Na Gotobë lowene mago gali të mototokweflabë ho, kë galime wafi gali mëtla. Ètani bu kë gali meyahi lamëtla, ¹⁶ “Tako Ho megali tle, “Devit onehome eso home kë tafa tēgletēmēbë wege, lo fene fli tletle. Kwe unina tokwafe bo nigisime kë wege nahuju nogotlēme, ho fli lēglebë lo fene huju lotle. Na Devitbë afenëboni onehobë eso home tafa mëgletēmabë wege ita fa motlame. ¹⁷ Na këme Israelbë afenëboni mëtabëya jwa mëglabë enēne bome hohwi mëgëtakefētēname. Kë enēne bu Israelbë afenëbo nane, kwe bo kë enëneme waaniji tlomē, bu mata bobēmu namëgëtabētēname.” ¹⁸ Ebë Tako Hobë gali. Bu ètanimu kë wesibime megali wafi tle, kë wesibi fata mëgleme.’

¹⁹ Kēme nēgeme, bobë lowene melē lēgēbetenē lalēle. Sebo Israelbë afenëboni mëtabëya jwa mëglabë enëneme, Jisame tokwafe kë lowene sle mëtletlabë enëneme gali asa manoloma, ‘Sobo, Goto Mosesme kë tēglēlebë tafa sle gali iniwa saesogo elēlēlo.’ Weye. Sebo kë hobota galina bume asa gali manoloma. Bu Gotome tokwafe lowene sle mletla. ²⁰ Kwe sebo bume pasē lalowa yahi nēletēma na bume nelēkakēmame. Na bume megali nelēkakēmame, ‘Sobo fēsome kë gogwa mëglabë hi wesibi asa hi elo. Na sobo lisei lowene asa elo. Na bu ko iniwa luguju tleslejwabë kleli asa hi elo. Na komu mata asa hi elo.’ ²¹ Bu kë lowene esogo jwa mëglelēlana kwe Israelbë afenëboni bu tiniji mëglame. Israelbë afenëboni bu iniwa tafa sle gali, Moses kë yahi tēglebë, lowene sle lamletla. Na ètani anebomu na ebë olē mata, Goto Mosesme kë tēglēlebë tafa sle gali iniwa life mëta të mëtētagukefētla. Na iniwa tafawa mëglabë olēna, Israelbë afenëbonibë lotu lo mëta, bubë gali

hwi mëtlagikefëtla.”

Bu Israelbë afenëboni mëtabëya jwa mëglabë enëneme, Jisame tokwafë kë lowene sle mëtletlabë enëneme, pasë yahi mëtletëma

²² Aposel ho na lotu letitabo enëne na Kristen oneho fli, kë mëta kë loko mëtleläyabë, bu blalo gali sle mototla, bu mago tlemalë letitabo home aniji namoglomame, Polna Barnabasna Antiok lifatewa iniwa buna muguja namëglame. Na bu Judasna Sailasname aniji motloma. Judasbë li weniji ebë Barsabas. ²³ Na bu pasë li yahi mëtla. Na kë pasë bubë tobame mëtlëma, mëgehujaya namëglame. Bu meyahi lamëtla:

“O Silisia provins mago, na Siria provins mago na Antiok lifate mago oneho, sebo Aposelna letitabo hona some ebë pasë ekë yahi nëkeketëyo. Sobo sebobë afanino. Sobo, Israelbë afenëboni nane, kwe sebo iniwa Jisame lowene sle nëletla. Lale kljimu. ²⁴ Sebo gali waaholokwane tla. Semago ho fli, sobelë mitisiya na bu tutune lowenena, sobobë lowene wasisile mototometëyo. Bu some memelë galina gëgali mëtleläyo. Na sobo kë gali klelego metletemo na tutune lowene mëta tëtabo. Kwe sebo kë iniwa gali some hana gali telëbakëyo. ²⁵ Sebo somëta kë fata mëtëglebë wesibibë gali, waaholokwane tletëyo. Këme nëgeme sebo loko tleläya na sebo jowa lowene mëta fwa tëtabëya. Na sebo gali sle totla, tlemalë home aniji nanoglomame na sobelë jine nanëgelëfakëmame. Na bu sebobë lale yabeni, Polna, Barnabasna bubë nagi migisijome. ²⁶ Polna Barnabasna sebobë Tako Ho Jisas Klaishë wege fa motokweflo. Na oneho bume wame lamolokwefëma na bume mogo nalë tëbo mogotomame fene. Kwe bu këbëme uli hana mëtelo. Bu Jisasbë wege mana fa motokweflo. ²⁷ Këme nëgeme sebo Judasna Sailasname sobelë këme jine nëlëma. Sebo some

pasë mëta kë yahi nëgletëyobë gali të namëgëtatëyome. ²⁸ Sebo Gotobë Amtëtombana jowa lowene wasle totla. Sebo melowene nanëla, ‘Sebo some megali hana gali noglëyome, sobo Israelbë afenëbonibë iniwa lowene saesogo elelëtemo.’ Weye. Sebo some kë hobota galina hana gali noglëyome. Sobo ebë lowenewa saesogo elelëlo. ²⁹ Sobo fësosome kë gogwa mëglabë hi wesibi asa hi elo. Na bu ko iniwa luguju tlejwabë kleli asa hi elo. Na sobo kleli afabo tuja salë toba asa hi elo na kolei mata asa hi elo. Na sobo lisei lisei asa elo. Sobo ebë wesibime ululu sle egelona na kë kwe lalowa. Sebobë gali eme tei tou lëletëna. Sobolalo ululu sle saelo.”

³⁰ Na kwe Kristen oneho kë nilimalë home Antiok lifatewa jine mëtlëma. Bu Antiok lifate mëta fwa mëtla. Na bu Kristen onehome loko mëtelëkakëma na kë pasë bume mëtlëma. ³¹ Bu kë pasë hwi motlëyabë na kë pasë galime tako fleflesu memëtla. ³² Judas na Sailas, bu Gotobë lowene mago gali të mëtëtagutemobë ho. Na bu Antiok lifate Kristen onehome lebutako lale gali të mëtëtatemo. Bu kë lale galina, onehome lamëtaitemo, Jisasbë lowene esogo sle namëgleläleme. ³³⁻³⁴ Tlemalë bu Antiok lifate mëta sogë tafaha mëtelo. Na tokwafë Kristen oneho bume kaiyo motloma. Na bume kë jine mëtelëbakëmabë oneho belë, jine mëtelëkakëma.* ³⁵ Na Polna Barnabasna Antiok lifate mëta mana tafa mëtelo. Na buna fli enënena, Gotobë lale gali lebutako onehome okokwe motlokwefëma na bu Jisasbë gali të mëtëtakefëtëma.

Polna Barnabasna yonane hana mëtelo

³⁶ Tokwafë, Pol Barnabasme megali tole, “Sebo, otome Jisasbë gali kë të tëtägutemobë oneho belë ita nëgëyeume. Sebo melowene nanëgletemome, ‘Bu Jisame kë lowene mëtletlabë lowene anisasana mana lowene melekefëtlane o

* **15:33-34** Fli lowene ho bu melowene lamëtla, li gali mana lëbe kë gali mëta. Kë gali melë lëgëbelalële, “Kwe Sailas bubë lowene hihijika tle na bu Antiok lifate mëta lu tle.”

hanane?”³⁷ kwe Barnabasbë tole metëgëbetle latle, Jon-Makna iniwa mugujame.³⁸ Kwe Pol gali tle, “Kë ho kwe ëtani Pamfilia provins mëta seme wahune tëtano. Bu sebona kë wegeme tugujame tole hana tle. Këme nëgeme sebo bume hana nëglelulome.”³⁹ Tlemalë bu kë wesibime yonane hana mëtelo. Na blalo momata mëtelo. Na bwa bwa mëtëyeu mëtelo. Barnabas Makme no tlële na bu sibu lowa fe mëtelo na Saiprus afayowa mëtëyeu.⁴⁰ Kwe Pol Sailasme aniji tlole, buna mëgëyeu namëgelome. Na Kristen oneho, Gotome takune motlola, tlemalëme ululu sle nalëgëtagumeme na bume lëgaitame nalëgleme. Na tlemalë mana mëtëyeu.⁴¹ Na këme tlemalë Siria na Silisia provinswa mëtëyeu. Na bu li life li life mago Kristen onehome, lale gali të mëtëtagutemo. Bu kë lale galina, bume lamëtaimo, Jisasbë lowene esogo sle namëglelëleme.

16

Timoti Polna mëtëyeu

¹ Polna Sailasna Derbe lifatewa fwa mutulo, na tokwafe Listra lifatewa mëtëyeu. Kë lifate mëta, Kristen ho li tëtabe. Bubë weniji Timoti. Timoti bota bu Israelbë afenëbonibë mago mëse na bu mata Kristen mëse. Kwe bolijaya bu Israelbë afenëboni nane, bu Grik life mago ho.² Na Kristen oneho, Listra na Aikoniam lifate mago, Timotime melowene lamëtletla, “Bu lale homu.”³ Pol bu metole latle, Timotime weife lëgleluleme. Kwe bu walowene tle, Israelbë afenëboni, li life li life mëta kë tafa mokoujabë melowene wamëtletla, “Timoti bolijaya bu Israelbë afenëbo mago nane, bu Grik life mago ho. Na Timoti tokwëfome nëgena kwe bolijaya bubë ato jibo tlë hana tëtatlë.” Këme nëgeme, Pol Timotibë ato jibo këme tlë tëtatlë, Israelbë afenëboni bume fleflesu namëgletlame.⁴ Pol, Sailas, Timotina

bu Listra lifate kile mëtla na li life li life elëme mutuja. Na bu kleli kolei hi jwa gali, na fli gali, Aposelna lotu letitabo enënena ëtani Jerusalem lifate mëta kë sle mototlabë, Kristen onehome okokwe mëtlaguma. Na bume megali motloma, “Sobo ebë gali saesogo sle elelëkefëlo.”⁵ Bu kë gali aholokwane mëtla na këme nëgeme iniwa Kristen bu Jisame kë lowene sle mëtletlabë lowene feilawa kalëlego tletëme. Na Jisame lowene sle mëgletlabë oneho bu feilawa fata mëtla.

Pol Masedonia provins mago home, nimitelëha wesibina hwi tlole

⁶ Tokwafe Polna, buna kë mutujabë ho, Esia provinswa Gotobë gali tëme mugujame tole mëtla. Kwe Gotobë Amtëtomba bume lëkle totome. Na bu kë belë muguja jwa namëglame. Këme nëgeme bu Frigia provins na Galesia provins ku kuwa mutuja.⁷ Na bu Misia provins li elë fwa mutula. Na bu Bitinia provinswa muguja namëglame fene kwe Gotobë Amtëtomba bume ita lëkle totome kë belë muguja jwa namëglame.⁸ Këme nëgeme bu Misia provins kukuwa mutuja na Troas lifatewa fata mutula.⁹ Na kë klabëna, Pol, Masedonia provins mago ho lime, nimitelëha wesibina hwi tlole. Kë ho tlibe na anisasana gali tlole, “Ju nutu su elëme na Masedonia provins elë esime na seme aitaname.”¹⁰ Pol bu nimitelëha wesibi wahwi tle. Na sebo hokweinawa wesibi sle totoma, Masedonia provinswa nuguja nanëglame. Sebo* walowene tla, Goto seme walebotane lëtatëna, Jisasbë lale gali Masedonia provins mago onehome të nanugutatëmame.

Lidia bu Jisame lowene sle tletle

¹¹ Këme nëgeme sebo Troas lifate mëta sibu lowa fëfe tla. Na Samotres afayo mago lifatewa su tækaka. Sebo këme jowafewa nitebëya. Na li olëna sibu lo seme Neapolis lifatewa sei tujuwelëna, Masedonia provins mëta.

* **16:10** Feilawa lowene ho, melowene lamëtletëna, “Pol ebë life mago Lukme notlële na buna iniwa mutuja. Na Luk bu kë gali yahi tle na ebë gali melëgebe këme lële, ‘Sebo.’”

Sebo kē sibu lo mago kē lifate mēta fēfe tla. ¹² Sebo Neapolis lifate kile tla. Na Filipai lifatewa life nagi tuja. Rom lifate mago enēne bu ētani kē life bu le mētlēkakila na kēme mana tafa mētla. Na ebē Masedonia provinsbē lale na tako lifatemu. Na sebo kē lifate mēta, habenuju afe olē tafa tla. ¹³ Na Israelbē afenēbonibē lotu olēna, sebo kē lifatebē lēglesī ino elē totoho tēkaka. Na sebo lolime kē tēgēbebē tu helefo elē tuja. Sebo meweniji latla, Israelbē afenēboni fli bu Gotome gēgali mēglelēkeflabēme kēme loko mēlelēkefēyawa. Na sebo kē tu helefo mēta, one flime hwi tlo ma, bu kēme loko mētlelēya. Na sebo tuja, na buna tafa tula na gēgali tla. ¹⁴ Na mēse li kēme tafa tle bubē weniji Lidia. Bu Taiataira lifate mago mēse. Na bu lale winowa ēho balitina hihijika tlekēfe na feilawa baliti kēna glo tlekēfe. Bu Israelbē afenēboni magobē mēse nane kwe bu Gotome lowene sle latletle. Bu Polbē gali aholokwane tlole. Na Tako Ho bubē lowene sle tētātē na bu Polbē gali lowene sle tletle. ¹⁵ Na sebo buname, na bubē ilawa lo mago enēnename baptais totoma. Bume wabaptais totoma na bu seme gali tlo na, “Sobo bome melowene sle egletēnana, ‘Bu Jisame walowene sle eletlefe,’ kwe sobo lalewa egisijome na bobē lo mēta bona tafa nēlame.” Na bu seme itaita gali wafi tlo na. Na sebo buna nugujabēme halawa tletēya na bubē lowa nagi telēkakēya.

Bu Pol na Sailasname kalabusu lowa sike mēta

¹⁶ Olē lina, sebo Israelbē afenēbonibē, Gotome kē gēgali mētlelēkeflabē life elē tuja. Na sebo manawa kē wege eglekēfebē layo mēseme esune tlēya. Ahwane kē mēse mēta tētābetē. Na kē ahwane kē mēseme, wesibi tokwafe fata mēglebē gali tēme taitakefē. Na bume kē tafa mētēglelēyabē eso ho, lebutako baliti kē mēsebē gali tē wegena glo mētlekefēya. Oneho bume baliti mētlekefēma na kē mēse bume tokwafe kē fata mēgle wesibi gali tē tētakefētēme. ¹⁷ Na kwe kē

mēse Polna seme nagi esogo tlagina na itaita mewe tokwei, “Kē enēne kē nēgebē, tako afutukuna Gotobē wege enēne. Goto some kē lēgaitobē na kē nēno lēglebē lowenebēme tē mētakefētēyo.” ¹⁸ Kē mēse bu lebutako olē memelēwa latlekēfe. Na Pol bu we toglokwefēmebēme kokwasamu latletē. Na bu swaya tēkaketē na kē ahwaneme gali telēkakle, “Bo jume Jisasbē wenijina gali nolē, ju kē mēseme kile etamē.” Na hokweinawa kē ahwane bume lakilewa tētāmē. Na kēme nēgeme, bu wesibi tokwafe fata mēglebē gali ita hana tē totle.

¹⁹ Bume kē tafa mētēglelēyabē eso ho, yafe hwi motlēya na melowene lamētla, “Sebo baliti hana glo nēglamefe, fēyeme tēbo nenenē?” Na bu Polname Sailasname kēme fafa mētla na kēme kē loko mēlelēkefēyabē life elēme, bubē eso enēne belē ki motokouja. ²⁰ Na bu tlemalē, onehobē gali aholokwane moglomabē ho belēme mētleluma na bume gali motloma, “Kē tlemalē ho, bu Israelbē afenēbonibē ho. Na bu ebē life mago onehobē tēbo lowene tufiji mētētātemo. ²¹ Kē tlemalē ho, bu onehome memelē lowenebēme okokwe motlomo, kē lowene esogo namēglelēmame. Sebo kwe Rom provins mago enēne. Sebobē lowene kēha nane. Weye. Na sebo bu kē gēgali mēgelobē lowene hana esogo nēglelētēmame.” ²² Na kē mēta kē loko mētlelēyabē oneho, kē tlemalē home mata tēbo gali motloma. Na kwe, onehobē gali aholokwane moglomabē ho, tlemalē hobē gelowa ēho titika mētlelēma na wame home boblo mogotomabē enēneme gali motloma, “Sobo bume atobeilana lēlafa etomo.” ²³ Kēme nēgeme, bume unalēme atobeilana lēlafa lēlafa sle memototoma. Na onehobē gali aholokwane moglomabē ho bume kalabusu lowa mētleluma. Na kalabusu lo mago home hwi loglokwefēmebē home anisasana gali motlola, “Ju kē tlemalē home hwi sle sa elome, mēglelēboukakujolime.” ²⁴ Kalabusu lo mago home hwi toglomebē ho,

kë gali aholokwane tlome. Na bu tlemalë home, kalabusu lo ku mëta kë lëgelubebë tlëtabo elëme tlelëkakume. Na bubë kiju ti tële afloko elë sike telukwaketëme, mëglëboujoline.

²⁵ Klabë kunamu, Polna Sailasna bu Gotome gëgali mëtlelëkeflobëë na sawa mata fëfë mëtëtakefëyo. Na fli enëne, kë kalabusu lo mëta kë tafa mëtlabë, bu Polna Sailasname mana aholokwane motlokweñëma. ²⁶ Na hokweinawa nano tako latlamëwa. Na bu kë kalabusu lo anisasana so tëbelëkakle bu ëjeha fli etleme. Na kë kalabusu lo ino iniwa latitikawa mëtëkou. Na senë taba iniwa kalabusu enënebë mago lalokluwa mëtletëme. ²⁷ Na kalabusu lo mago home hwi toglomebë ho, huju tle na këme mehwi tle, iniwa kalabusu lo ino watitika mokoufe na melowene tle, “Kalabusu kë mëglabë ho iniwa wamelëboujafe. Bobë eso ho bome gali loglonëmefe.” Këme nëgëme bubë kosi ki tokoke na bubë ato, këna mogo nalë tlu nalogotleme fene. ²⁸ Kwe Pol bume anisasana këkale telokwakle, “Jubë ato asa tëbo etle, sebo iniwa mana ekë nëtabëya.” ²⁹ Na kalabusu lo mago, home hwi toglomebë ho, ho lime we telokwakle, “Esi hokweinawa ehwei.” Na bu esi tehwei tle na bume tlële. Na bu kalabusu lowa hokweinawa tëkaklu. Na bu Polna Sailasna belë fëka tokou. Bu ulina lilina sago metle na bubë li mëta, sëkefo miti tafa tle. ³⁰ Na kwe bu tlemalëme kalabusu lo mago toho tlelëkakëme. Na bume takune tlome, “O letitabo, bo habelë nëgelëmene na Goto bome tëbo lowene mago no nalëglënëme?”

³¹ Na tlemalë këme gali motlolo, “Ju, Tako Ho Jisame fwa salowene sle eletle na Goto, juna, jubë mësenä, nëbalena, na jubë lo mëta kë tafa eglelëmebë enënenäme tëbo lowene mago nëno nalëgleme.” ³² Na këme tlemalë, kë honäme bubë lo mëta kë tafa tëglelëmebë enënenäme, Jisabë gali të mëtëtatemo. ³³ Na këme klabë kuna mu, kalabusu lo mago home hwi toglomebë ho, tlemalëme nëno tle. Na bume atobeilana kë lëläfa

mototomabë lunuju swa totometëme. Na tlemalë, kë ho na bubë lo mëta kë tafa lëglelëmebë enënenäme baptais mototomo. ³⁴ Na kalabusu lo mago home hwi toglomebë ho, tlemalëme bubë lowa tlelume na bume hi wesibi tlëme. Na buna bubë lo mëta kë tafa tëglelëmebë enënenä fleflesumu memëtla, bu Gotome lowene sle mëtletlame nëgëme.

³⁵ Olobalë, onehobë gali aholokwane moglomabë ho, plismanë kalabusu lowa jine mëtlëma. Na bu kalabusu lo mago home hwi toglomebë home gali motlola, “Onehobë gali aholokwane moglomabë ho megali lamla, ‘Ju kë tlemalëme kalabusu lo mago jine elëkakëme.’” ³⁶ Këme nëgëme, kalabusu lo mago home hwi toglomebë ho, bu Polme gali tlole, “Onehobë gali aholokwane mëglabë ho bu megali lalëkeke, ‘Polna Sailasname kalabusu lo mago sajine elëkakëmo.’ Këme nëgëme sobo lalowa eyeu. Sobo tutune lowenena asa eyeu.” ³⁷ Kwe Pol plismanëme megali tlome, “Onehobë gali aholokwane moglomabë ho, sebobë gali aholokwane sle jwa fëyeme mëtlane? Bu sebobë li fëye wesibiha hwi hana motlotëna. Kwe bu seme hobë naba li mëta blawa lëläfa mëtëтана na kalabusu lowa blawa sike mëtla. Kë enëne melowene hana mëtlane, ‘Sebo Rom provins mago enënefe?’ Na ëje bu seme hwelutuwa nëgëyeubëme fëyeme gali molonane? Matëbefe, hanane mu. Kë onehobë gali aholokwane moglomabë letitabo ho, buwa samisiya, na seme kalabusu lo mago nëno mlame.”

³⁸ Na kwe plismanë ita mutuja, na bu Polbë gali, onehobë gali aholokwane moglomabë home gali motloma. Bu megali motloma, “Polna Sailasna bu Rom provins mago ho.” Onehobë gali aholokwane moglomabë ho, kë gali aholokwane mëtla na bu tako uli memëtla. ³⁹ Këme nëgëme, bu kalabusu lowa mutuja na Polname Sailasname gali motloma, “Masiwafe, sebo tëbo enëne, sebo some tëbo latëto. Sebo melowene

hana tletëyo, ‘Sobo Rom provins mago ho. Masiwafe.’” Na bu tlemalëme kalabusu lo mago nëno mëtla na bume gali motloma, “Sobo ebë lifate lalowa kile egotlomene?”⁴⁰ Na kwe tlemalë kalabusu lo kile mototlo na Lidiabë lowa mëtëyeu. Na bu Kristen oneho flina loko mëtleläya. Na bume lalë gali të mëtëtatemo, bume lëgaitame nalëgleme. Na tokwafe bu Filipai lifate kile mëtelo na mëtëyeu.

17

Tesalonaika lifate enëne bu Polname Sailasname tëtëkle mëgëtayame fene

¹ Pol bubë yabena, Amfipolis lifatewa mutuja. Bu kë lifate kile mëtla na Apolonia lifatewa mutuja. Na bu kë lifate mata kile mëtla na Tesalonaika lifatewa tuhu mutula. Israelbë afenëbonibë lotu lo kë lifate mëta tlibetëme.² Pol iniwa lifate mëta fene tokou, bu kë lifate mëta mata melatle. Bu Israelbë afenëbonibë lotu lowa tēkaklu na bu kë life mago onehona loko mëtleläya. Na Gotobë bogo mago galime, buna gëgali hihijika mëtlekefëya. Bu aona wiki bubë lotu olëna melatlelekefëme.³ Na bume megali sle latlome, “Jisas bu kë ho kë nëgebë, Goto bume ëtani anebomu kë aniji toglolebë ho, onehome tëbo lowene mago nëno nalëgleme.” Na bume gali tlome, “Aholokwane elo, ëtani Gotobë bogo mëta, gali metëgëbetle latle, ‘Goto kë jine lëglelebë home, tëbo mogotlame na bu gli lëgleme. Kwe bu matëmatë mago huju lëgleme.’ Na kwe kë gali, bu Jisame fwamu gali tletle. Sobo walowene elo, Jisas bu wagli tle na huju tle, Goto ëtani fene gali tle.”⁴ Na Israelbë afenëboni fli, buna kë tafa mëtlabë, Pol kë të togotlebë gali, aholokwane motlola na bu Jisame lowene sle mëtletla. Na bu Polna Sailasname yonane sle mëtleläma na nagi mëtlëma. Na lebutako Grik life mago enëne Gotome kë lotu melekefëtlabë, na lebutako letitabo one mata Jisame lowene sle mëtletla.

⁵ Kwe Israelbë afenëboni fli, bu Polna Sailasna, ilawa kë yonane mëtlabëme, hwi motloma. Na bume moumou mëtleläma. Këme nëgeme, bu ho loko mëgleläyabë lifeme, blawa kë asasë mëglabë tëbo enëneme, loko mëtëtagujaya. Bu lebutako tëbo enëneme waloko mëtëtaya na bubë tëbo lowene tufiji mëtëtatëma, Polna Sailasname wame namoglomame. Na bu asë mëtëbelëfaiya na anisasa flikale mëtla. Na fli, Jesonbë lo ino tēë mëtelutukwakla na mëtëkakluja. Na bu Polna Sailasname hohwi mëtelutatëma, bume kë life mago onehobë toba elë gogwa namëglame.⁶ Bu tlemalëme yafe hohwi mëtëtatëma kwe hwi hane motloma. Këme nëgeme bu Jesonname, Kristen oneho fliname, fafa mëtla na kë lifate mago eso ho belëme mëtleluma. Na bu anisasana meflikale mëtla, “Ebë enënena, Polna, Sailasna bu iniwa li life li life motokouja na onehobë tëbo lowene tufiji mëtagutëma. Na ëje ebelë mana kë fe mëkakija.⁷ Na Jeson kë hobëme bubë lowa nëno tle na këme tafa tleläme. Kë enëne bu sebobë tako eso ho, Sisarbë gali boblo lamëtëtakefëtlä. Na bu itaita megali lamelekefëya, ‘Tako eso ho li lëtabe, bubë weniji Jisas. Sobo bume fwa esogo elelëlome.’”⁸ Kë life mago oneho na bubë eso enëne, kë gali aholokwane mëtla na wame mëtla na flikale mëtëkouja.⁹ Na kwe, kë lifate mago eso ho, bu Jesonna, buna kë tafa tēglelämëbë onehome, balitime gali tlome, bubë tëbo lowene këna sle namogotlame. Na bume jine mëtelëkakëma.

Polna Sailasna bu Beria lifate elë mëtëyeu

¹⁰ Klabë wafi ki tëbe na Kristen oneho Polna Sailasname Beria lifatewa mana jine mëtelëkakëma. Bu Beriawa fwa mutulo na bu Israelbë afenëbonibë lotu lowa mëtëkaklujo.¹¹ Israelbë afenëboni Beria lifate mago, bu Tesalonaika lifate mago Israelbë afenëboniha nane. Beria mago enëne Polna Sailasname gali aholokwane mëglabëme tole

lamëtletëma. Kwe Tesalonaika mago enëne buwe, bubë gali aholokwane mëtletëmabëme tole hana mëtletëma. Na iniwa olë, Beria mago oneho, Gotobë bogo mago gali itaita hwi motlokweifëma, melowene sle namëgletlame, “Polna kë të mëgëtatëmobë gali bu nëgali lamelo o hanane.”¹² Na Israelbë afenëboni lebutako, Jisame lowene sle mëtletla. Na Grik life mago ho lebutako na Grik life mago letitabo one lebutako, bu mata Jisame lowene sle mëtletla.

¹³ Kwe Israelbë afenëboni Tesalonaika lifate mëta kë tafa mëtlabë, kë gali waaholokwane mëtla, Pol, Beria lifate mëta, Gotobë gali kë të lëtakëfëtëme. Këme nëgëme bu Beria lifatewa mutuja na onehome tetëbo galina gali mëtlaguma na këna onehobë tëbo lowene tufiji mëtëtatëma, Polme wame namoglolame. ¹⁴ Na kwe, hokweinawa, Kristen oneho, bu Polme nutu yenëbawa jine mëtëtelëkakla. Kwe Sailasna Timotina, Beria lifate mëta mana tafa mëtelo. ¹⁵ Na Polme kë sei mutujuwelëlabë ho buna Atens lifatewa tuhu mutula. Na bu Polme Atens lifate mëta kile mutula na bu Beria lifatewa ita mutuja. Na Pol, Sailasname Timotiname gali telokwakëme, bu bo belë hokweinawa samisijo.

Pol Atens lifate mëta Gotobë gali të tëtatëme

¹⁶ Pol bu Atens lifate mëta, Sailasna Timotiname mana hwi tlekëfetëmebëë na bu Atens lifate wako wako mana asë tëbelëfa. Na bu mehwi tle, eouwe bubë lebutako fëso mana mëtabëtëmefe. Na bubë lowene tëbowamu tëbetle. ¹⁷ Këme nëgëme bu Israelbë afenëbonibë lotu lowa tēkaklu. Na bu Israelbë afenëbonina na Israelbë afenëboni mëtabëya jwa mëglabë enënenana, Gotome kë lotu mëglekëfëtëlabëme, gëgali hihijika mëtlekëfëya. Na iniwa olëna bu ho kë mëta loko mëglelëkëfëyabë life elëme tujukëfetëme. Na kë mëta kë tafa mëtlabë onehome gëgali tlelëkëfëme. ¹⁸ Na lowene letitabo mëgletlabë ho fli, kë mëta tafa mëtla. Bume mefë

lamototoma, Epikurian enëne na Stoik enëne. Na bu Polme momata mëtlelëla. Pol bume, Jisabë galime gëgali tlokweifëme na bume matëmatë mago huju mëglabë galime mata gëgali tlelëkëfëme. Këme nëgëme kë enëne megali mëtla, “Kë lowene jwa ho bu itaita blawa fëyeme gëgali lëlekëfene? Bu fëye wesibime gali lëlene?” Na fli megali mëtla, “Sebo bubë gali lowene hana nëletla, bu seme melëme gali lolona nawa, ‘Sobo fli enënebë gotome salotu eletemo.’”

¹⁹ Na kwe bu Polme, bubë lifate mago eso enëne belë mëtlelula, bubë gali aholokwane namoglolame. Kë enëne bu Areopagus fatini mëta loko mëtlelëkëfëya. Na kë enëne Polme gali motlola, “Ju kë tiho gali, ju onehome kë okokwe eglokweifëmebëme, seme ita gali enona. Sebo kë wesibi lowene sle nanëgletlame. ²⁰ Sebo jubë gali aholokwane tla, na sebo melowene nanëletëyo, ‘Ebë li gali meha gali ele. Na sebo ëtani këha gali aholokwane hana tla. Këme nëgëme sebo metole nanëla, ju kë okokwe toglonabë gali wayobë lowene sle nanëgletlame.’”

²¹ Atens life mago enënenana, Atens lifate mëta kë nibowai mëglabë enënenana bu fli wesibi mëglabë lowene hana fafa mototla. Wëye. Bu tiho galime fwa aneanebo gali mëtlekëfëya na tiho gali aholokwane mëglabë mefwa tako tole lamëtkefëya. Na iniwa tiho anebo gali, bu kë aholokwane mëglekëfëyabë, bu itaita iniwa olë gëgali mëtlekëfëya.

²² Na kwe Pol bu kë eso enënebë kume tlibe na bume megali tlome, “Sobo Atens lifate mago enëne, bo some melowene nanëletëyo, ‘Sobo lebutako fëso wesibime lotume tako tolemu laletemo.’ ²³ Bo kë galime këme gali nelë. Èbame bo sobobë lifateme asë tëbelëfë na bo sobobë li li fësobë masei, sobo këme kë lotu eglekëfëtëmobë, mana hwi tlagumetëyo. Na bo fësobë masei li hwi tolë. Sobo kë masei mëta meyahi latelo, ‘Lowene nëgletla jwabë goto.’ Na kwe kë goto sobo lowene jwa kë

egletelobë na sobo manawa kë lotu egletelobë, bo some kë gotobë anebo gali të nêtatëyo.

²⁴ Bubë anebo gali melë lëgëbetle lalële. Buwa, ebë life blëge totle na iniwa wesibi kë mëgëbebë mata blëge blëge totome. Na ebë life mago wesibi, matafa mago wesibi ebë bubëwa mëbetle na bu iniwa wesibibë eso ho. Këme nêgeme, ho gliji mëglabë lotu lo mëta hana tafa lëgleme. ²⁵ Bu li wesibimeha hana afolo lëletle, sebo bume kë nêgaitalame. Hanane mu. Sebo hëhë kë nêglabë amtëtomba, Goto buwa lëlëna. Na iniwa wesibi mata buwa lëlëkefëna. ²⁶ Ètani anebo mu, bu jowa home blëge blëge totle. Na iniwa memelë ato jibona oneho, kë ho magowa fata mëtla. Na bu kë onehome iniwa life ëlëme jine tëbelëkakëme. Na iniwa afloko mëta tafa mëtëkouja. Na bu bwa bwa tafa mëglabë olë mata aniji tlotëme. ²⁷ Goto bu melë këme tle. Oneho bu belëme migisitla namëglame. Na bume lowene sle mletlame. Këme nêgeme Goto onehome këme blëge blëge totome. Na bume iniwa wesibi tlëme, bume hohwi namëgëtatlame na bume mana hwi na loko mololame. Kwe bu seme iniwa jowa jowa home kakë hana tafa lëletëna. ²⁸ ‘Sebo hëhë kë nêglabë, na asë kë nêglabë kalëlego, buwa lëlëkefëna.’ Kë wesibi sobobë lowene letitabo enëne fli fene yahi mëtla, ‘Sebo mata bubë nêbalemu nêtabetla.’ ²⁹ Sebo Gotobë nêbale tafa nêla. Këme nêgeme sebo Gotome melowene asa manëletla, ‘Bu fëso.’ Weye. Goto, bu silva anijina, gol anijina, anijimuna kë blëge blëge motomabë fësoha nane. Weye. Goto bu sebobë lowenenawa na tobana kë blëge blëge nogotomabë wesibiha nane.

³⁰ Ètani, oneho bu fëso fëso mëtëglana kwe kë nalë Gotome lowene hana mëtletla. Kwe Goto bume hwiwa latlome na bume li wesibiha hana totle. Kwe ebë olë Goto iniwa li life li life mago onehome anisasana megali lalëlagume, ‘Sobobë iniwa tëbo lowene aholokwana ti ekoujome na bome fwa lowene

ekoutëname.’ ³¹ Bu olë li waaniji tole, iniwa onehobë lowene hwi lolometëmeme na abiabi lëselokwame. Na Goto ho lime waaniji tole, onehobë lowene hwi naloglometëmeme na lëselokwame. Kë ho bu wafi gli tle na Goto bume matëmatë mago wahuju totle. Na Goto bu kë huju togotlebë seme melebotane latëtätëna, bume kë lëselokwabë wege fame waaniji tole.”

³² Bu matëmatë mago huhuju mëglabë gali yafe aholokwane motlola, fliye Polme sosatletlë memototla. Kwe fliye bume gali motlola, “Sebo metole nanëletëyo, ju tokwafe kë galime seme ita gali lalowa okokwe sle eglonamene.” ³³ Na kwe Pol kë letitabo enëne hune totome na tuju. ³⁴ Kwe fli ho bu Jisame lowene sle mëtletla na bu Polna ilawa mëtebëya. Na bu mago ho li tafa tle, bubë weniji Dionisius. Kë ho bu Areopagus fatini mëta, kë loko mëglelëkefëyabë ho. Na mëse li bubë weniji Damaris, na fli oneho mata Jisame lowene sle mëtletla.

18

Pol Korin lifate mëta gali të têtatëme

¹ Tokwafe, Pol Atens lifate kile tle na Korin lifatewa tuju. ² Na bu kë mëta, Israelbë afenëbo lime esune tlële. Bubë weniji Akwila. Bu Pontus provins mago ho. Buna no Prisilana, Itali lifate tokwafe kile mëtelo na Korin lifewa mitisijo. Rom provins magobë tako eso ho, Klodius, megali tëgleme nêgeme, “Iniwa Israelbë afenëboni, Rom lifate kile mlame na li lifatewa mujame.” Na bu Rom lifate këme kile mëtelo. Na Pol kë tlemalëme hwime tujutëme. ³ Kë tlemalë bu lo këna gigliji mëglabë selë blëge blëge mototokwefëmo, baliti këna glo namëgelome. Na Pol bu mata kë wege melatlekefe. Këme nêgeme Pol, buna këme tafa mëtla na buna wege mëtla. ⁴ Na iniwa lotu olëna, Pol, Israelbë afenëbonibë lotu lowa tækaklukëfe na buna gëgali hihijika mëtlekefëya. Bu metole latle, Israelbë afenëbonibë lowene na Israelbë

afenëboni mëtabëya jwa mëglabë enënebë lowene Jisame lowene sle mëgletlabë huju tètakëfëtëme.

⁵ Sailasna, Timotina, Masedonia life kile mëtelo na Pol belë mëtëyeu. Bu fata mëtelo na këme Pol selë susu wege kile tle na Jisabë gali iniwa olë tē tètakëfëtëme. Bu Israelbë afenëbonime anisasana megali tlokwefëme, “Goto Jisame waaniji tole, bubë onehome tēbo lowene mago nëno lëglebëme.” ⁶ Kwe Israelbë afenëboni këha gali aholokwaneme tole hana mëtletla. Na bume wame motlola na tetëbo galina gali motlola. Këme nëgëme, Pol bubë ato ëho mago obo, bubë naba li mëta bubu tletëme. Na bume megali tloime, “Goto some tokwafe tēbo lëgetona, ebë sobobë wesibiwa, ebë bobë wesibi nane. Na eli bo some hune nëgëtome na Israelbë afenëboni mëtabëya jwa mëglabë enëneme fwa gali tē nugutatemëme.” ⁷ Na kwe Pol bu kë lotu lo kile totle. Na bu Titius Jastusbë lowa tuju, këme tafa nalëgleme. Kë ho Israelbë afenëboni nane, kwe bu mata Gotome lotu lëlekefëtëbë ho. Na bubë lo Israelbë afenëbonibë lotu lo lime tlibetle. ⁸ Kë lotu lobë eso hobë weniji Krispus. Buna, bubë lo mëta kë tafa tēglelëmebë onehona Tako Ho Jisame lowene sle mëtletla. Na Korin lifate mago oneho lebutako, bu mata Jisame lowene sle mletla. Na Pol bume iniwa baptais totome.

⁹ Li klabë na, Pol nimitelëha wesibina wesibi li hwi tole na Tako Ho Jisas, bume megali tole, “Ju bobë gali tēme uli asa ele. Ju itaita gali eglokwefëmeme. Ju asa kuju ebemu. ¹⁰ Bo juna nëtabome na jume nëgaitëme, na ho li jume hana tēbo lëgëtamëme. Bome kë lowene mëgletë nabë oneho, ebë lifate mëta feilawa tafa mëglame nëgëme.” ¹¹ Pol kë gali aholokwane tle na këme nëgëme bu Korin lifate mëta jowa tlibutu na yeme tobali ita jowa kënjiji tafa tle. Na bu onehome Gotobë galime okokwe tlokwefëme.

¹² Galio, Akaia provinsbë eso home

tëtabetëme. Na kë nalë, Israelbë afenëboni, blalo bu loko mëtlelëya na Polme fa mototla, na eso ho Galio belë mëtlelula, Pol kë tēbo logotlebëme gëgali namëglelëlame. ¹³ Na bubë naba lime megali mëtla, “Kë ho, Goto Mosesme kë tēglelëbë tafa sle gali boblo mogotlabëme, onehome feilawa okokwe lolokwefëme. Na Gotome li lowenena lotu namëgletlabëme okokwe lolokwefëme.” ¹⁴ Pol gëgali lëgleme kofene, kwe Galio efalëbona bluju metotle na Israelbë afenëbonime gali tloime, “Sobo Israelbë afenëboni, kë ho bu wesibi tako tēbo logotlebë o sebobë, Rom life mago gavmanbë gali, boblo logotlebë kwe lalowa, bo sobobë gali aholokwane noglëyome. ¹⁵ Kwe sobo bo belë tisijo, na sobo sobobë semleninobë tafa sle gali mefwa gëgali tlenëna. Bo sobobë këha gali hana sle nëgëtatëyome. Ebë sobobë wesibi wa. Sobo lalo sle ejuwetlo.” ¹⁶ Na bume kë mago kë telëkakëme. ¹⁷ Na Korin lifate enëne, Israelbë afenëbonibë lotu lo hwi loglokweflebë eso ho, Sostenesme, fa mototla na Galio bume hwiwa latlome na kë wesibime feilawa lowene hana tlekëfe.

Pol bu Antiok lifate elë ita tuju

¹⁸ Pol bu Korin lifate mëta tako olë tafa tle. Na tokwafe bu Kristen onehome kaiyo tloime na bume hune totome. Na bu, Prisila, Akwilana, Senkria lifatewa iniwa mutuja. Na Pol bu kë life mëta bubë eslehuba mana le tlë, bu Gotome kakëne gali gali togloleme nëgëme.* Ètani Pol Gotome wesibi lëglebë galime wagali sle tole. Na Israelbë afenëboni fene mëtla, bubë eslehuba le jwa tlë. Bu eslehuba le jwa mana tafa tle. Na kë tēglebë wesibime, Gotome kë gali sle toglolebë, yawe tole. Na bubë eslehuba mana le tlë. Na Polna, Prisilana, Akwilana, Siria provinswa kë tugujubë sibu lo mëta fëfe mëtla na këna mutuja. ¹⁹ Na bu Efesus lifatewa fata mutula. Na

* **18:18** Israelbë afenëboni bu melë lamëtëlekefëya; Gotome kë kakëne mëgletlabë olë, yawe sle moloma kwe bu eslehuba mana le le melëma.

Pol Akwilana, Prisilaname kë mëta hune tle. Na Pol buwa Israelbë afenëbonibë lotu lowa sigli təkake. Na bu Israelbë afenëbonina gëgali hihijika mëtlekefëya. ²⁰ Na bume megali motlola, “Ju sebona awi tafa nëla.” Kwe Pol bume gali tleme, “Weye. Bo sobona hana tafa nëglame.” ²¹ Na tokwafe bume kayo tleme na gali tleme, “Goto bu tole lëgletenëna kwe bo sobelë ita nigisime.” Na bu Efesus lifate mago enëneme hune tle na sibu lo mëta fe tle. Na Efesus lifate kile tle. ²² Na sibu lo bu Sisaria lifatewa fwa tule. Na Pol bu Jerusalem lifatewa tuju. Na bu kë lifate mago, Jisame lowene sle mëtletlabë tokwëfo gëgaliwa tlelëme. Na bume hune totome na Siria provins li mago Antiok lifatewa tuju.

²³ Pol bu Antiok lifate mëta tako tafaha tle na mana tuju. Na bu Galesia provinsbë na Frigia provinsbë li life li life tekou. Na bu Kristen onehome, Gotobë lale gali të tëtäguteme, bume lëgaitame nalëgleme.

Apolos bu Efesus lifate onehome gali të tëtätëme

²⁴ Israelbë afenëboni mago li, Efesus lifatewa tisi na këme tafa tle. Bu Aleksandria lifate mago ho na bubë weniji Apolos. Kë ho bu lale lowenebëme gëgali tëglekëfëbë ho. Na bu Gotobë bogo mago gali lowene sle tëgletlebë ho. ²⁵ Ho bume Jisasbë lale gali waokokwe motlola. Bu Jisas kë togotomebë wesibi gali, onehome okokweme tako tole latle. Na bu Jisas kë togotomebë wesibibë gali abiabi toba të slemu tëtäkefëtëme. Kwe bu Jon kë baptais totomebë mēfwa lowene sle latletle. Kwe, bu Jisame lowene sle mëgletlabë onehome, baptais logotomebë lowenebëme, lowene hana tle. ²⁶ Apolos bu Israelbë afenëbonibë lotu lowa tujukefëtëme. Na bu gali anisasana të tëtäkefëtëme. Na bu uli hana tletëme. Prisilana Akwilana bubë gali yafe aholokwane motlolo na bubë lowa mëtlelulo. Na bume Gotome lowene sle lëgletlebë lakalebëme, okokwe sle motlolo, bu lowene sle nalëgletlememu. ²⁷ Apolos

bu Akaia provinswa lugujubëme tole latle. Na Efesus mago, Kristen oneho bume jine mëglëlabëme fleflesu lamëtletla. Këme nëgeme bu Akaia provins mago, Kristen onehome, pasë meyahi mëtëketëma, “Apolos sobelë fata lëkakina sobo no elëlome na ululu sle saetlo.” Na Apolos bu belë tuhu tle. Goto kë life mago Kristen onehome wafi maninibo tletëme na wafi taitame na bu Jisame lowene sle këme mletla. Na Apolos kë life mago, Kristen onehome taitame. ²⁸ Apolos bume metëgaitamelatle. Bu iniwa onehobë naba li mëta, Gotobë bogo mago gali anisasana të tëtätëme. Na bu Israelbë afenëbonibë memelë yaya gali lowene këna boblo tëtätëme. Na bume Gotobë bogo mago gali metë sle latëtätëme, “Goto Jisame kë aniji toglolebë ho, Israelbë afenëboniname na iniwa onehoname nëno nalëglebëme.”

19

Pol Efesus lifate mëta gali të tëtätëme

¹ Apolos bu Korin lifate mëta mana tafa tle na Pol fatini lufu mëta kë mëtëgëbagubë lifate elë asë tēbelëfa. Na bu Efesus lifatewa mana fwa təkaki. Na kë lifate mëta, Kristen onehome esune tlëkakime. ² Na bume metakune tleme, “Sobo Jisame alako kë lowene sle tēgletelobë, Gotobë Amtëtomba sobelë latisitëyone o hanane?” Na bu metafu mëtätatla, “Weye. Sebo, ëtani meaholokwane hana tla Gotobë Amtëtomba lalëtäbetle.” ³ Na Pol bume takune tleme, “Sobo yalëbë gali aholokwane telone na mana baptais fa totlo.” Na bu gali metafu mëtätatla, “Sebo Jonbë gali aholokwane toglolame nëgeme na baptais këme fa totla.”

⁴ Na Pol gali tleme, “Ëtani, tēbo lowene aholokwana kë ti mëtëglabë onehome, Jon bume baptais totome. Na bume gali tleme, ‘Bobë nagi kë ligisibë home sobo mana lowene sle naegletelome.’ Këbë home Jon kë gali tēgletlebë bu Jisas.” ⁵ Kë gali yafe aholokwane mëtla, na Pol bume

Tako Ho Jisasbë wenijina baptais to-tome. ⁶ Na Pol jowa jowa hobë eso mëta toba gogwa tokoutëme na Gotobë Amtëtomba mana tisitëme. Na bu lili anigawa galina gëgali motokouja. Na Goto bume kë tëglëmebë gali të mëtëtaguma. ⁷ Kë onehobë tabei we ita tële kënijih.

⁸ Na Pol bu Israelbë afenëbonibë lotu lowa təkaklu. Na bu Jisasbë lalë gali onehome anisasana të tətätëme. Na Goto bubë onehome eso home tafa lëgletëmebë galibëme, onehome feilawa të tətəkëfëtëme. Na bu onehome taitame, këbë galibë lowene sle namëgletlame. Na bu melë kë tëglëbë aona yeme. ⁹ Kwe bu mago fli, kë galibë aholokwaneme tole hana mëtla. Na bu fli onehobë naba lime megali mëtlekefëya, “Kristen oneho kë lowene mëgletlabë wesibi bu tēbo wesibi.” Këme nēgeme, Polna, Kristen onehona, bu Israelbë afenëbonibë lotu lowa hana mëtəkaklukefëya. Iniwa olë, Pol bu Tiranusbë okokwe lo mëta, Jisasbë lalë gali onehome anebo gali tlelëkefëme. ¹⁰ Na bu kë mëta melë kë tëglëbë, tële tlibutu. Këme nēgeme, feilawa onehomu, Esia provins mëta kë tafa mëtlabë, bu Jisasbë lalë gali aholokwane mëtlekefëya. Fliye Israelbë afenëboni na fliye Israelbë afenëboni mëtabëya jwa mëglabë enëne.

Skevabë bowenenino ahwaneme yafe hehë mëtletla

¹¹ Goto, afutuku, Polme tlële. Na Pol bu kë afutukuna, memelë klelegowa wesibi blëge blëge totome. ¹² Këme nēgeme oneho bu lablab tëtälë tabo glo mëtla na Polbë ato mëta lëlesili mototoma. Na bu kë ëho, ato tēbona enëneme mutujuwelëma. Na kë tēbo atobë laslewa mëtletëme. Na ahwane bubë ato mago lamëtälëboukakuwa.

¹³ Israelbë afenëboni fli, bu hobë ato mago, ahwane heheëme asë metëbelëfaya. Fliye Tako Ho Jisasbë wenijina ahwane onehobë ato mago hehë namëgletëmame fene. Bu megali lamëtkekëfëya, “Pol bubë gali kë të lëtəkëfëtëbë, Jisasbë wenijina gali

nolëyo, sobo eyeu.” ¹⁴ Na Skevabë tobali ita tële bowenenino bu kë galina ahwaneme gali mëtlagukefëma. Skeva bu lotu lo mëta wege lëglebë eso ho. ¹⁵ Li olëna, Skevabë bowenenino, Jisasbë wenijina ahwane yafe hehë mëtəkoutëma. Na ahwane li, bubë gali metafu latëtätëme, “Bo Jisame kwe lowene nanëletelë na Polme mata lowene nanëletelë kwe sobo fëye enënene?” ¹⁶ Na ahwane kë tēbo togotlëbë ho, kë home okli təkaketëme na tëtëkle tēta na unalëmemu tēbo totome ëhona kaka kaka metotometëme. Këme nēgeme kë lo mago ëho flatabowa mëtlëbouja, winona nohwa feli mëtlelëla. ¹⁷ Israelbë afenëboni iniwa na Israelbë afenëboni mëtabëya jwa mëglabë enëne iniwa, Efesus lifate mëta kë tafa mëtlabë, wesibi Skevabë bowenenime kë fata tēgletëmebë gali aholokwane mëtla. Na bu tako uli memëtla. Na iniwa bu Tako Ho Jisame melowene mëtletla, “Bubë weniji blawa hana fë nogotlame bu tako afutukuna weniji.” ¹⁸ Na lebutako tiho Kristen oneho mitisiya. Na bubë ëtanifu iniwa tēbo wesibime onehobë naba li mëta gëgali mëtəkakëja. ¹⁹ Na humëi kë lowene mëtlabë enëne, na memelë olo kë mëtlësëmabë oneho, bu tetëbo sakei gali bogo loko mëtëtagijaya. Na bu iniwa onehobë naba li mëta ahoju tako agoti mëtlelëla na kë iniwa bogo ahojuwa sisike mëtla, temu namëgleme. Ho ebë bogo balitina glo lëglebëme tole lëglëna kwe bubë baliti kënji 50,000 silva baliti. ²⁰ Na këha melë kë mëtlabë, feilawa oneho bubë lowene mago lowenena melowene sle mëtletla, “Jisasbë gali, iniyafe galimufe.” Na feilawa oneho bu Jisame këme lowene sle mëtlekefëtla.

Efesus enëne, Polme tako wamemu memotlola

²¹ Kë iniwa wesibi mēfata wamëtla, na Gotobë Amtëtomba Polme lowene huju tëtätla na Pol bu melowene fa tole, “Bo Jerusalem lifatewa nuguwina, Masedonia provins na Akaia provins kukuwa nuguwime. Bo kë belë afina nuwime na mana Rom lifate elë mata nuwime.” ²² Na

Pol, bume kē mētaitakeflobē home afina jine tlēme Masedonia provin-swa. Bubē weniji Timoti na Erastus. Na bu afina motouto. Kwe Pol, buwe, Esia provins mēta mana tafa tētēkake.

²³ Na kē nalē, Efesus lifate mēta, fli oneho bu Kristen onehome, wame lamotloma. Na bu anisasana wame gali huju mētēlēla. ²⁴ Na ho li kē wame lowene tufiji totle. Bubē weniji Demitrius. Bu wesibi, silva anijina blēge blēge totokwefēme. Buna bubē wege hona, bu mēse goto lotu lobē amtētomba wesibi, silva anijina, blēge blēge mototokwefēma. Na bu feilawa balitimu kēna glo mētlekefēya. Kē mēse gotobē weniji Artemis. ²⁵ Na kwe, Demitrius, bubē wege honame, na tokwētōkwē fēso amtētomba wesibi, silva anijina kē blēge blēge mototokwefēmabē honame, iniwa loko tētāmē. Na bu megali tlome, “O yabenino. Sebo melowene nēglame, ebē wege kē nēgebēye, sebo tako baliti kēna fa nētākefēya na sebo lale tafa kēme fa notla. ²⁶ Sobo Polme wafi lowene eletelo, na sebo bubē gali wafi aholokwane tletla. Bu Efesus lifate mago onehome fwa nane gali lolome. Weye. Bu Esia provins mago onehome mata gali latlagume. Bu onehome anisasana megali tlagukefēme, ‘Kē fēso amtētomba, tobana kē blēge blēge mogotomabē, bu gotomu nane na bu some hana lēgaitome.’ Oneho kē gali aholokwane mētla kē fēso amtētomba tole hana mēletēma. ²⁷ Polbē gali kē nēgebē, bo tutune nanēletelēfe. Sebo amtētomba kē blēge blēge nogotomabē wege, tēbo lēgetatēname. Na oneho sebobē wege sisile mētātēname. Na li wesibime mata, bo melowene nanelē, ‘Oneho bu Polbē gali esogo mēglelēlana kwe bu sebobē tako goto, Atemisbē lotu lowa ita hana migisiyame, bume lotu namēgletēyame. Na oneho bu Artemisme aholokwana ti mēglame na bume ita hana lotu mēgletēyame.’ Sobo walowene elo, Esia provins mago oneho tēkeji na iniwa life mago oneho mata bume lotu mēlekefetēya.”

²⁸ Oneho Demitriusbē gali aholok-

wane mētla na tako enisusu memētla na anisasana kēkale mētla, “Sebobē, Efesus lifate mago goto, Atemis, bu takomu.” ²⁹ Na kē gali Efesus life oneho belē fifiji tle na iniwa anisasana kēkale mētla. Na oneho mutuja na Masedonia provins mago tlemalē home, Polna kē asē mētēlabē home, fafa mutula. Na tlemalēme, oneho kēme loko mētēlēkefēyabē lifekuwa, hokweinawa ki motokouja. Kē tlemalē hobē weniji melē, Gaius na Aristarkus. ³⁰ Na Pol, loko kē mētēlēyabē onehome gali nalugujelēmeme fene kwe Kristen oneho bume lēkle memototla. ³¹ Na Esia provins mago gavmanbē wege ho fli, bu Polbē yabenino nēgēme, na bume kēme lēkle gali, gali mētēlēkakla, “Yabe, ju oneho kēme loko mēlelēkefēyabē lifeku elē asa eiju. Matēbe.”

³² Na loko kē mētēlēyabē onehobē lowene yaya mētletēme na bu anisasana kēkale mētēbelēfaya. Fli hobēye, li lowene mēta kēkale mētēbelēfaya na fliye li lowene mēta kēkale mētēbelēfaya. Na feilawa oneho, bu loko kē mētēlēyabē wayo gali lowene hana mētletla. ³³ Israelbē afenēbo li bubē ku mēta tētābetēme, bubē weniji Aleksander. Na Israelbē afenēboni fli, bume kē onehobē naba li mēta so mētēlēkakla. Fli oneho bume hwi motlola na meweniji mētla, “Ebē ho kē nēgebē ebē kē wame nēglabē eso ho ekēwa.” Kwe Aleksander toba momale totle, oneho bu kuju namēgebēyame. Bume megali naloglomeme fene, ebē wame kē nēgebē, Israelbē afenēbonibē wesibi nane. ³⁴ Kwe oneho bume hwi sle motlola na melowene mētletla, “Israelbē afenēbonife.” Kēme nēgēme, iniwa oneho bu anisasana kēkale mētlekefēya, “Sebobē, Efesus life mago goto, Atemis, bu takomu!” Na bu kē galina, tako olē, anisasana gēgali mētlekefēya.

³⁵ Na kē life magobē gavmanbē yahi wege fa lēgētātēbē ho onehome kēkale tlome na bume megali tlome, “Sobo, Efesus life mago oneho, aholokwane elo. Iniwa life mago

oneho, seme walowene mēletēna. Mēse fēsobē, Artemisbē lotu lo, sebobē lifate mēta lilibe, na sebo kē lotu lo ekē tafa nēlelēla. Na Artemisbē fēso amtētomba, matafa mago kē tētētibakebē, semēta ebamē na sebo tafa nēlelēya. ³⁶ Iniwa oneho kē galime melowene lamētla, ‘Ebē nēgali galimu.’ Kēme nēgeme, sobo kaju ebo, blawa asa enisusu eletemo. ³⁷ Sobo aholokwane elo. Kē tlemalē home sobo sebelē kē tēglesumobē, bu sebobē lotu lo mago wesibi tokli hana mētelo. Na bu sebobē mēse gotome tēbo galiha, hana mētlēyo. ³⁸ Demetriusna bubē wege enēnena bu ho flime wame moglomana, kwe bu onehobē gali aholokwane loglomebē ho belē samēlesuma. Onehobē gali aholokwane moglomabē ho buwa sasle mētātēyome. ³⁹ Na sobo fli galina nēgena, kwe sobo kē gali, ebē life mago oneho kē gēgali mēglekefēyabē olēna sasle egotomome. ⁴⁰ Ebēha gēgali tēbo, teiyo elekēlo. Sobo hwi elo. Rom life mago gavmanbē eso enēne, bu ēje sebo kē nēglabē wesibi aholokwane mēglana, kwe bu seme onehobē gali aholokwane loglomebē ho belē mēglenunama na megali moloname, ‘Kē enēne, bu tēbo lowene huju motokweflabē enēne.’ Sebo ēje kē loko nēglelēyabēye na anisasana kē gēgali nēgēbelēfayabēye, kwe hobota fata nogotlabē mēfwa gēgali nēla. Na gavmanbē eso enēne bu seme ēje kē nēglabē wesibime takune moglonana, kwe sebo habē tafu nēgētātēmamene? Hanane.” ⁴¹ Gavmanbē yahi wege fa lēgētātēbē ho wagali tlome, na bu onehome jine tēbelēkakēme.

20

Pol bu Masedonia provins mēta na Grik provins mēta asē tēbelēfa

¹ Kē anisasana gēgali kaju mētebēya, na Pol bu Kristen onehome mana gali telokwakeme, bu belē loko namokweitlame. Na bu loko motokweitla

na bume mana lale gali tē tētātēme na bume ululu sle mēglabē gali mana tē tētātēme. Na bume kayo gali tlome na Masedonia provinswa mana tuju. ² Bu kē provins mēta asē tēbelēfa na Kristen onehome megali tlagume, “Sobo Jisame kē lowene egletelobē lowene asa elēkēlo, mana lowene sle saelekefētelo.” Na bu Grik provinswa fwa tule. ³ Bu Grik provins mēta aona yeme tafa tle. Na bu sibu lo mēta fe nalēgleme fene, Siria provinswa luguju nalēgleme fene. Kwe bu megali aholokwane tēgleme nēgeme, Israelbē afenēboni bume kē sibu lo mēta, mogo nalē tēke moglolame. Na bu lowene kēme hihijika tle. Na bu Masedonia provins elē kē tugujubē alēge elē kēme tuju. ⁴ Fli ho bu Polna mutuja. Kē enēnebē weniji melē, Pirusbē bowene Sopater, bu Beria lifate mago ho. Na Aristarkus na Sekundus, bu Tesalonaika lifate mago ho. Na Gaius, bu Derbe lifate mago ho. Na Timoti na Esia provins mago ho Tikikus na Trofimus. ⁵ Kē enēne motoutaya na bu seme* Troas life mēta hwi mētletēna. ⁶ Sebo Filipai life mēta mana tafa tēgelobē na Israelbē afenēbonibē tako lotu olē mana yawe tletēme. Bu kē lotu olēna, sēse wesibi jwa bletē nage hi mētlekefēya. Na sebo mana sibu lowa fēfe telo na Filipai life kile totlo. Sebo sibu lo mēta nilina olē telo na tobali olēbēna Troas lifate mēta kē hwi mētletēnabē ho belē fwa telo. Na sebo iniwa Troas lifate mēta tobali ita tēle olē kēniji tafa tla.

Pol bu Troas lifate mēta Yutikusme gli mago huju totle

⁷ Sande klabēna, sebona, fli Kristen onehona, Jisame lowene nēgletlabē hi wesibi hime loko tlelēya. Na Pol bu Gotobē gali mana tē tētātēme. Na bu Gotobē gali metē tētātēmebēē, klabē ku tētehulu metlelēle. Bu kē olēna luguju mago nēgeme. ⁸ Kē matawa ke lo mēta feilawa lamo u mētēkou. Na kē lo bu akolalo. ⁹ Na falake ho

* **20:5** Feilawa lowene ho, melowene lamētla, “Pol Filipai lifewa fwa tle, na Lukme notlēle na buna mutuja. Na Luk bu kē gali yahi tle na ebē gali melēgebe kēme lēle, ‘Seme.’”

li, bubë weniji Yutikus, kë lo flelu ino mëta tafa tole. Na Polbë gali mana aholokwane tlagule. Pol bu gali metë togotlebëë, na Yutikus bu nilafale tle na këme ni tobe. Na kë mago lifewa latetigowa. Na bu kle mëtla na fa mototowetla na yafe hwi motlola kwe bu wagli tle. ¹⁰ Pol mata kle tle. Na kë falake hobë ato mëta matawa towetigotle na hwë tlële. Na onehome lëkle totome, “Sobo tutune asa eletelo, bu mana hwi lëta.” ¹¹ Na bu ita lowa fëfe motokwaka. Na Jisame lowene mëgletlabë hi wesibi hi mëtla. Na Pol ita gëgali tëglelëmebëë, olë fetina loko na mana hune totome. ¹² Na kë falake ho bu lalowa tafa tle. Na bume mëtlelula. Na bubë lowenebë lalowa tëbetëme.

Pol Troas lifate kile totle na Miletus lifate elëme tuju

¹³ Na kwe sebo Polme kile totla na sebo sibu lowa fëfe tla na sebo afina Asos life elë toutaya. Na sebo Polme Asos life mëta hwi tletla. Pol bu life nagi tigrisime nëgeme na bu seme Asos life elëme afina këme jine tlëna. ¹⁴ Na Pol bu seme Asos life mëta esune tlëkakina. Na sebo sibu lowa tlelula. Na sibu lona Mitilini lifatewa iniwa tuja. ¹⁵ Na li olë Mitilini lifate kile totla na Kios afayoliwa fwa tula. Na kë mëta jowa olë tla na sebo Kios afayo kile totla na Samos lifate elë fwa tëkakija. Na kë mëta jowa olë tla na sibu lona Samos lifate kile totla na Efesus life sigliwa totla na Miletus lifate elë fwa tëkakija. ¹⁶ Pol ëbame melowene latle, “Esia provins mëta feilawa olë hana tafa lëgleme.” Këme nëgeme bu Efesus life sigliwa këme mototla. Bu metole latle, Israelbë afenëbonibë tako lotu olë, Pentikos olë, Jerusalem lifate mëta, hwi naloglolëme. Na bu hokwehokweinawa këme tokou.

Pol, Kristen onehobë letitabo home, Efesus lifate mëta kë tafa mëglabë, kayo tlome

¹⁷ Sebo Miletus lifewa fwa tla na Pol, Kristen onehobë letitabo home, Efesus life mëta kë tafa mëglabë, gali tuku tëkakëtëme, bu belë migisitla

namëglame. ¹⁸ Na bu belë mitisitla na iniwa loko mëtlelëya. Na Pol megali tlome:

“Bo ëtani Esia provins elë tisi na bo sobona tafa tula. Na bo sobona kë tafa tugulabë, bo wesibi bo melë kë totomëbë, sobo wafi lowene tletëna. ¹⁹ Sobo walowene tletëna. Bo ebë wege mëta kë tafa tugulëbë tako hobota mëta tafa tulë. Israelbë afenëboni bome tëbo mëttakefename nëgeme. Na bo anisasana ye tlekefë. Kwe bo bome nane lowene telë, bo Jisasbë wegewa fa tëtakëfëtelë. ²⁰ Iniwa gali të tëgëtatëyobëme bo some kikli hana tletëyo na li gali ha ëho hana tëtätëyo. Iniwa gali bo some lëgaitobëme të totometëyo. Onoho këme loko mëlelëkefëyabë lifeku mëta, na sobobë lo mëta, bo some okokwe tlokwefëyo. Këbëme sobo walowene eletelo. ²¹ Bo Israelbë afenëbonibëme na Israelbë afenëboni mëtabëya jwa mëglabë enëneme mata gali anisasana të tëtakëfëtemë. Bo bume megali tломë, ‘Sobobë tëbo lowenebë aholokwana ti elome na lale lowenewa esogo elelëlome, na sobobë Tako Home, Jisame lowene sle eletelome.’ ²² Na eli, bo Gotobë Amtëtombabë tolewa esogo nëglelëtelëme na bo Jerusalem lifatewa këme nuguwime. Iniwa tëbo wesibi, bome kë mëta fata mëgletenëbëme, bo lowene hana nelë. ²³ Bo kwe ebëwa lowene nëletelëmu. Iniwa tako lifate, bo kë asë nëgëbelëfëbë, Gotobë Amtëtomba bome megali latlonë, tako hobota na kalabusu lo mëta gwa mëgëtobë mana hwi lëkeketë.

²⁴ Bo bobë ato uli hana nëlelë. Lalowa, bome melë matëtana. Bo metole nanelë, Tako Ho Jisas bome kë tëglënebë wege, bo yawe sle noglolëme. Kë wege melë lëgëbelalële; bo iniwa onehome metë sle nanëgëtatëmëme. Goto iniwa onehome maninibo tletëme. Na bu metole latle, iniwa onoho Jisame lowene sle namëgletlame.

²⁵ Ètani bo sobona kë tafa tëglabë, Goto bubë onehome, eso home, kë tafa lëgletëmebë gali, të tëtätëyo. Èje kwe bo walowene nelë, ita kwe

sobo bome hana hwi egloname. ²⁶⁻²⁷ Kēme nēgame bo some ekē gali sle nolēyo. Iniwa olē bo sobona kē tafa tlekefēyabē, bo some Gotobē iniwa gali watē tētātēyo. Bo bubē gali tēme tēboijiwa hana telē. Kēme nēgame bo some gali nolēyo. So mago ho li tēbo liglitana, ebē bubē wesibiwa. Bobē wesibi nane. ²⁸ Sobo some ululu sle saelo. Na Jisame kē lowene mēgletlabē onehome tafa sle elelēmome. Gotobē Amtētomba some kē wegeme wafi aniji tlēyo. Gotobē nēba Jisas, bu gli tletēme na bubē wino wafi tuju tle. Na bu kēna kē onehome wataitame, bubē oneho tafa namēgletlame. ²⁹ Sobo bume tafa sle eglelēmome. Bo melowene nanelē, “Tokwafe bo some hune nēgelēna, sosogēna ho sobelē migisiyame. Na bu Jisame kē lowene mēgletlabē onehobē lowene tēbo mēgētātēmame. ³⁰ Na tokwafe somago, fli oneho kē nēgebē, bu Gotome kē lowene mēgletlabē onehome sosogēna mēglagumame. Bubē tēbo lowenewa esogo namēgletlēmame na bume mata esogo mēglelēmame.” ³¹ Kēme nēgame, sobo ululu sle kēme eglekefome. Bo melē kē tēgelēbē wesibime, aholokwana asa ti elo. Aona tlibutu, bo sobona kē tafa tēglabē, klijiwa, klabēna, some lale galime okokwe tlokwefēyo, some lēgaito nalēgleme. Bo some kē okokwe tēglēyobē, naba tuna okokwe tlēyo.

³² Eli bo some Gotobē toba elē, ekē gogwa nelē, some ululu sle nalēgētāgujome. Na bo metole nanelē, Goto some kē maninibo lēgletēyobē gali lowene naeglekefētelome. Kē maninibo gali some lēgaitome, Gotome lowene sle naegletelobēme. Na tokwafe sobo lale tafa fa egotlome, Goto bubē iniwa onehome kē aniji toglotēmēbē tafa.

³³ Bo ētani sobobē wesibi hana mēmaune tlēmē. Bo ho libē bali-tiha o ēhoha hana mēmaune tlēmetelē. ³⁴ Sobo bome wafi hwi tlonā. Bo lo kēna gigliji nēglabē selē susu tokwefēmē na baliti kēna fa tētākefē. Bo bobē tafa kēna taitakeflē na bobē

yabe, bona kē tafa tēglabē home, mata taitakefēmē. ³⁵ Iniwa wege bo melē kē togotlēbē, some melēme olafa tētātēyo. Iniwa wege sebo kē lowene nēgletlabē, anisasana wege nēglame, ato tēbonabē enēneme na wesibi jwa enēneme mata nanēgaitamame. Sebo, Tako Ho Jisasbē gali, salowene sle nēlekefētla. Bu megali latle, “Li ho, li home, wesibi lēglēlena kwe bu tako fleflesu malēle. Kwe li ho, wesibi li ho mago kē fa logotlēbē kwe bu tokwēfo fleflesuwa lēgleme.”

³⁶ Pol kē gali wayawe tlole na bu Kristen onehobē lotu letitabo enēnena, sēkefo miti tafa mētēkouja na Gotome mana gēgali mētēlēla. ³⁷⁻³⁸ Na bu kēme tako maninibo memētletla. Pol megali toglomeme nēgame, “Bome ita hana hwi egloname.” Na bu Polme hohwē metlēla na ye mētēlēla na sēsle sēsle mototla. Na bume sibu lowa sei mutujelēla.

21

Pol bu sibu lona, Jerusalem lifatewa tuju

¹ Sebo, Kristen onehobē lotu letitabo enēneme hune tla. Na sibu lo mēta fēfe tla na Kos afayowa tuja. Na li olēna Kos afayo mago Rodes afayowa tuja. Na Rodes afayo mago Patara lifatewa fwa tula. ² Na sebo sibu lo mago fēfe tēkaka Patara lifate mēta. Na sebo Fonisia provinswa kē tugujubē sibu lo hwi tujuwelēla. Na sebo kē sibu lo mēta fēfe tula na kēna tuja. ³ Na kwe sebo Saiprus afayo, yemane toba elē hwi telokwakla na sebo sigli tokouja. Na sebo Siria provinswa fwa tula. Na kē sibu lo Tair lifatewa tuju, wesibi hune naluguleme. ⁴ Na sebo Tair lifate mēta sibu lo mago fēfe tēkaka. Na Kristen onehome hwime tuja. Na sebo buna tafa tēglabē, tobalī ita tēle olē tla. Kē nalē, Gotobē Amtētomba, kē enēneme lowene tlēme. Na bu kē lowenebēme Polme gēgali mētēlēla, “Ju Jerusalem lifatewa asa eiju, bu jume tēbo mēgētome.” ⁵ Sibu lo Tair lifate kile nalēgleme kofene na Kristen oneho bubē onena, nēbalena

seme nutu helefo mēta sei mētlēna. Na sebo kē mēta sēkefo miti tafa tla na Gotome mana gēgali tlelēla. ⁶ Na bu seme kayo motlona na sebo bume mata kayo tloma. Na sibu lowa mana fēfe tla na bu bubē lowa ita mutuja.

Gotobē lowene mago gali tē totokweflēbē ho, Agabus, Sisaria lifate mēta Polme gali tlole

⁷ Na kwe sebo sibu lona, Tair lifate kile tla, na sebo Tolemes lifatewa fwa tula. Na sebo kē life mago, Kristen onehome, sēsle totoma. Na sebo buna jowa olēwa tafa tla. ⁸ Na li olēna sibu lo mēta fēfe tla na Tolemes lifate mago tuja. Na sebo Sisaria lifewa fwa tula na sibu lo mago fēfe tokwaka na Filipbē lowa tuja. Ebē ho kē nēgebē, bu Jisasbē lale gali tē tētakefētēmēbē ho. Na buna fli tobali ita jowa hona ēbame Jerusalem lifate mēta meaniji lamotloma, Aposel enēneme mēgaitakefēma namēglame. ⁹ Kē ho bu ononeglē nēbale kēniji nilina. Na bu home yo hana tlome. Na kē nilina ononeglē Gotobē lowene mago gali tē mototokwefla.

¹⁰ Sebo Sisaria lifate mēta habenuju olēwa tafa tla. Na ho li Judia provins kile tle na Sisaria lifatewa tisi. Bubē weniji Agabus. Bu Gotobē lowene mago gali tē totokweflēbē ho. ¹¹ Bu sebelē tisi. Na Polbē alitaba fa tētāmē na bubē tobana kijuna lalei totome. Na bu megali tle, “Gotobē Amtētomba bome lowene watlēnē. Kē lowene galibē melēgebe lalēle, ‘Israelbē afenēboni, Jerusalem lifate mēta kē tafa mēglabē, ebē alitababē bolijayabē toba na kijuna melalēi mogotometlame, bobē tobana kijuna fene lalei notomē. Na bume Israelbē afenēboni mētabēya jwa mēglabē enēneme yo molomame, bume tēbo namogotlame.”

¹² Na kwe sebo Agabusbē gali aholokwane tlola. Na sebona, kē life mago enēnena, Polme anisasana lēkle totla na gali tlola, “Ju Jerusalem lifatewa asa eiju. Matēbe.” ¹³ Kwe Pol sebobē gali metafu latētātēna, “Sobo bome asa maninibo eletēna na bobē

lowene kēna asa sisile etatēna. Sobo aholokwane elo. Bo Tako Ho Jisasbē wege fa nogotlēna, na bu bome, Jerusalem lifate mēta, kalabusu mēgētānana, na bu bome mogo nalē tēkle mēgētānana, kwe lalowa bome melē matētana. Bo kē wesibi uli hana nēletēmē.” ¹⁴ Sebo Polme yafe gali tlola kwe sebobē gali aholokwane hana tlotēna. Kē wesibime nēgeme sebo bume feilawa gēgali hana tlelēla na bume megali tlola, “Wesibi, Tako Ho bu melē logotomebēme kwe bu melē malotome.”

Pol bu Jerusalem lifatewa fwa tule

¹⁵ Na tokwafe li olēna, sebo wesibi sle totoma, Jerusalem lifatewa nuguja nanēglame. Na sebo Jerusalem lifatewa tuja. ¹⁶ Na Kristen oneho fli, Sisaria life mago, sebona tuja. Sebona tuja na sebo Jerusalem lifatewa tuhu tula, na bu seme, Saiprus afayo mago hobē lowa sei mutujenēna. Na sebo kē lo mēta tētebēya. Lo bolijayabē weniji Nason na bu ētani anebomu Jiasme lowene sle tletle. ¹⁷ Na Jerusalem lifate mago Kristen oneho bu seme yafe hwi motlona kwe bu tako fleflesu memētletēna.

¹⁸ Li olē na sebo Polna, Jemsme hwime tuja. Na Kristen onehobē letitabo ho, sebona loko tlelēya. ¹⁹ Na Pol bume hohwē tokou na sēsle tētagume. Na iniwa wesibi Israelbē afenēboni mētabēya jwa mēglabē enēnebē li mēta kē totomebē Pol kē gali tē tētātēme.

Kristen onehobē lotu letitabo enēne, Polme megali motlola, “Ju Gotobē tako lotu lowa ejumo”

²⁰ Kristen onehobē lotu letitabo enēne, Polbē gali aholokwane motlola na bu Gotome tako fleflesu memētletla. Na bu Polme megali motlola, “O afa, ju walowene sle ele, Israelbē afenēboni feilawamu, bu Jiasme walowene sle mletla. Na kē enēne bu, Goto Mosesme kē tēglēlebē tafa sle gali esogo mēglēlēlabēme lowene anisasana mana mehola aholokwana ti hana mla. ²¹ Kwe kē oneho bu sogēna gali meaholokwane

lamëtla, 'Pol, bu Israelbë afenëbonime, Israelbë afenëboni mëtabëya jwa mëglabë enënebë provins mëta kë tafa mokoujabë, megali latlagukefëme, "Sobo Goto Mosesme kë tëglëlebë tafa sle gali asa esogo elelëtelo." Na bu mata megali latle, "Sobo sobobë iko nëbalebë ato jibo asa tëtlë etometemo. Na sobo Israelbë afenëbonibë lowene asa esogo elelëmetëmo." ²² Sebo walowene nëla. Ju ebelë kë tigusibë gali bu aholokwane mëglana bu jume wame mëglëyome. Sebo kë wesibi habelë nogotlamene? ²³ Ju, sebobë gali esogo eglelëtënana, kwe lalowa. Semago ho nilimalë, Gotome Gotobë wenijina wakakëne mëtla wesibi melë mogotomabëme. ²⁴ Ju kë nilimalë home nëno elëme, na Gotobë tako lotu lowa elelëkakumeme. Na sobo iniwa, Gotobë naba li mëta lale tafa egelobë lowenebë, esogo elelëlome, Goto Mosesme kë tëglëlebë tafa sle gali fene lëbe. Na sipsip kleli, ju li ho mago, balitina glo eletëmeme. Na lotu lo mëta wege mëglabë home elëmeme, bu Gotome ahojume namëgletlame. Sipsip kleli ahojumbë yawe mololame na kë nilimalë ho bu bubë eslehuba mana le melëmame.* Ju melë eglana, feilawa oneho melowene namëgletëyome, 'Kë gali jume kë gali mëtletëyobë gali, ebë sogëna gali.' Na bu jume melowene namëgletëyome, 'Goto Mosesme kë tëglëlebë tafa sle gali esogo eglelëlebë ho.' ²⁵ Na Israelbë afenëboni mëtabëya jwa mëglabë enëneme, Jisame tokwafe kë lowene mëtletlabë, sebo pasëna megali tloma, 'Sobo kë lowene esogo eglelëlona kwe lalowa. Sobo fësime kë gogwa mëglabë hi wesibi asa hi elo. Na bu ko iniwa lugujutle slejwabë kleli asa hi elo. Na kolei mata asa hi elo. Na sobo lisei lowene asa elo.'" ²⁶ Li olëna, Pol kë nilimalë home nëno tle. Na buna iniwa, Gotobë naba lime lalowa tafa mëglabë lowene esogo mëglelëlame, Goto Mosesme kë tëglëlebë tafa sle gali fene lëbe. Na tokwafe bu Gotobë

tako lotu lowa mëtëkakluja. Na Pol bu Gotobë tako lotu lo mëta wege mëglabë home megali tlome, "Tobali ita tële olë mugujuna, na sebo iniwa Gotobë naba li mëta lalowa tafa nëglame. Na sebo sipsip kleli bwa bwa mana nehweijame, Gotome ahojume namëgletlame."

Israelbë afenëboni, Polme Gotobë tako lotu lo mëta fa mototla

²⁷ Kë tobali ita tële olë yawe lëgleme kofene na Israelbë afenëboni, Esia provins mago, Polme hwi motlola, Gotobë tako lotu lo mëta tafa tle. Na bu onehobë wame lowene tufiji mëtëtatëma, na Polme mana fa mototla. ²⁸ Na bu anisasana këkale mëtla, "O Israelbë afenëboni, sobo seme aitaname esijo. Ebë ho kë nëgebë, bu li life li life mago onehobë naba lime, seme, Israelbë afenëbonime sisile latëtakefëna. Na bu iniwa onehome meokokwe latlagume, 'Sobo Goto Mosesme kë tëglëlebë tafa sle gali asa esogo elelëtelo.' Na bu Gotobë tako lotu lo mata sisile tëtätëna. Bu kë wesibiwa nane tle. Weye. Bu Israelbë afenëboni mëtabëya jwa mëglabë enëneme, Gotobë tako lotu lowa tlelëkakume. Na këna, ebë lale lotu lo sisile totle na kë lo, Gotobë naba li mëta tëbowa tlibetle." ²⁹ Ètani, Polna, Efesus life mago ho, Trofimugna, Jerusalem lifate mëta asë mëtelo. Na kë enëne mana hwi motloma. Na këme nëgëme bu Polme meweniji lamëtletla, "Bu kë Israelbë afenëboni lëtabejwa lëglebë home, Gotobë lotu lowa wafi tlelëkakulewa."

³⁰ Na feilawa oneho, Jerusalem lifate mago, kë gali aholokwane motokouja na bu hokweinawa loko motokweija. Na Polme fa mototla na Gotobë tako lotu lo mëglëbo elë ki motokouja. Na bu hokweinawa ino titiji mëtla.

Rom life mago wame home boblo mogotomabë enëne, Polme fa mototla

³¹ Bu Polme tëkle mototokweflabë, na Rom life mago wame home boblo

* **21:24** Israelbë afenëboni bu melë lamëtkefëya, Gotome kakëne gali kë moglölabë olë yawe sle moloma na bu eslehuba mana le melëma.

mogotomabë enënebë eso ho li, meaholokwane tle, “Jerusalem lifate mago ho blalo momogli mëtagujaya.”³² Na hokweinawa, bu wame home boblo mogotomabë enëneme, bubë eso enëenename nëno tle na wame këme mëtlabë oneho belë tlelume. Polme kë tëkle mototlabë oneho, kë eso hona, wame home boblo mogotomabë enëenename yafe hwi motloma, na Polme tëkle hana mototla.³³ Na wame home boblo mogotomabë enënebë eso ho loliwa tisi na Polme fa totle. Na bu wame home boblo mogotomabë enëneme gali tlome, “Sobo kë home tële senë tabana lei etlome.” Na bu Israelbë afenëbonime takune tlome, “Ebë ho yalëne? Na bu fëye tëbo wesibi fa totlene?”³⁴ Na feilawa oneho li li galina feilawa gëgali mëtla. Na bu feilawa se mototla na wame home boblo mogotomabë enënebë eso ho bu gali aholokwane sle hana tlome. Këme nëgeme bu wame home boblo mogotomabë enëneme gali tlome, “Sobo Polme sebobë lowa elelulome.”³⁵ Bu Polme mëtlelula na bubë lo mago mitigo mëta kofene mëtlebila. Na wame home boblo mogotomabë enëne, onehome mehwi lamotloma, Polme mogo nalë tëkle moglotlamefe. Këme nëgeme, Polme tëkle mogotlalime, kë mago lafeijiwa mëtlëla.³⁶ Feilawa onehomu bume nagi esogo mëtlaguma na anisasana megali mëtlaguma, “Mogo nalë tëke elolo, mogo nalë tëke elolo.”

Pol, Jisame kë lowene lëgletlebë lowenebëme, Israelbë afenëbonime, gali sle tlome

³⁷ Wame home boblo mogotomabë enëne, Polme bubë lowa mëglelëkakulame kofene kwe Pol bu wame home boblo mogotomabë enënebë eso home, Grik galina gali tlole, “Bo jume gali lime lalowa gali noglëmene?” Na bu klelego metletle na Polme gali tlole, “Ju Grikbë gali habëna lowene elene?”³⁸ Bo jume mewenijiwa nanelë, ‘Ju Isip life mago howa. Ètani onehobë wame lowene kë tufiji tètätëmebë ho, gavman

enëneme wame namoglomame. Na bu, 4,000 ho, kosina wame kë lowene sle mëtëglabë home, ho jwa tabo elë tlelume.”³⁹ Na Pol bubë gali tafu tètätle, “Bo kë ho nane. Bo Israelbë afenëbo. Bo Tarsus lifate mago ho, Silisia provins mago. Bu lale na tako lifatemu lëbetenë. Bo jume tokwëfo takune noglëme fene. Bo ebë onehome lalowa gali noglomëmene?”⁴⁰ Wame home boblo mogotomabë enënebë eso ho bume gali tlole, “Lalowa.” Na Pol bu mitigo mëta tlibe na toba momale tètätëme, oneho gëgali kuju namëgebëyame. Bu iniwa kuju mëtebëya na Pol, bume, Hibru galina mana gëgali tle.

22

¹ Na Pol bume megali tlome, “O ayani na afanino, sobo aholokwane elo. Bo some ekë gëgali sle nëlelëyo. Bo li wesibiha fa hana totlë.”² Oneho aholokwane motlolabë, Pol Hibru galina gëgali tle na bu kujunamu këme mitlibaguja.

Na Pol bume megali tlome.³ “Bo kë nëgebëye, Israelbë afenëbo. Beë bome Tarsus lifate mëta fu tëtänë, Silisia provins mago lifate tokwëfo. Kwe bo ebë lifate mëta sigli telë. Na bo Gamaliel okokwe loglonëbëme towë. Na bu bome sebobë semleninome, kë gwa tètätëmebë tafa sle galibëme okokwe slemu tlonë. Na bo Gotobë tafa sle gali anisasana esogo slemu tlelëtelëmu, sobo tei elo.⁴ Èbame bo Jisame kë lowene mëgletlabë onehome tëbo latotokwefëmë. Bo bume mogo nalë tètëkle nëtagwibëme tako tole latelë. Na kë onehome senë tabana lalei totokwefëmë na kalabusu lowa tlelukwefëmë.⁵ Gotobë tako lotu lo mëta wege lëglebë tako eso ho na Israelbë afenëbonibë lotu eso enëne, bome lowene lamëletëna, bo ebë fene melë kë tëgelëbëme. Na bu kë wesibibëme some gali mëglëyome. Na kë enëne bu pasë yahi mëtla na bome mëtlëna. Bo sebobë ilawa mago enëneme, Damaskus lifate mëta kë tafa mëtëglabë kë pasë tehutemë. Ebë

pasë bome kë mëtlë nabë, bome megali sle lamotlona, Jisame kë lowene mëtletlabë onehome kalabusu nanotomëme fene. Bo Damaskus lifewa tuguwibë, kë pasëbë gali fene gali tla melë nanugulëme fene. Na bume Jerusalem lifatewa nëlesumëme na bu mana tēbo motomame.”

Pol kë nalë Jisame kë lowene tēgletlebë gali, tē tētātēme

⁶ Ita, Pol bu megali tētēkake, “Bo tuguwibë, na kliji kuna bo Damaskus life nounou totlë. Na hokweinawa tako elulego, matafa mago, bome iniwa lahwegënëwa tētanë. ⁷ Na bo life mëta latitigwëwa. Na bo we lego mana aholokwane telë na megali tlonë, ‘Sol, Sol, ju bome fëyeme sisile etakefënëne?’ ⁸ Na bo metakune tlole, ‘Tako ho, ju yalëne?’ Na kë we lego metafu tētatenë, ‘Bo Nasaret life mago Jisas. Ju bome sisile latakefënë.’ ⁹ Bona kë tiglijabë enëne kë elulego hwi lamotlola. Kwe bome kë gali toglonëbë we lego aholokwane hana mëtla.

¹⁰ Na bo megali tlole, ‘Tako Ho, bo habelë nëgelëmene?’ Na Tako Ho bome megali tlonë, ‘Ju huju elëme na Damaskus lifatewa ejume. Na kë lifate mëta, iniwa wesibi ju egotomebëme, Goto jume kë tole lēgletëbë, ho li jume kë lifate mëta gali lugujuwelëme.’ ¹¹ Kë elulego, tako elulego nëgëme na bobë naba këme kilego mëtletënë. Këme nëgëme, ho bona kë tugujabë bome toba fana Damaskus lifatewa mëtlenuna.

¹² Ho li kë lifate mëta tafa tle. Bubë weniji Ananias. Bu Gotome fwa lotu lēgletlebë ho. Na bu Goto Mosesme kë tēglëlebë tafa sle gali esogo sle lēgletlebë ho. Na Israelbë afenëboni iniwa, Damaskus lifate mëta kë tafa mëglabë bu melowene lamëtletla, ‘Lale ho.’ ¹³ Kë ho bo belë tisi na bobë lime tlibetenë. Na bome megali tlonë, ‘Afa, Sol, jubë naba tika mëgletëme.’ Bu fene gali tlonë, na bobë naba tika mëtletënë na bo bume hwi tlole. ¹⁴ Na bu gali tlonë, ‘Sebobë semleninobë Goto, melëme tole lēletë, ju bubë tole lowene na egletleme.

Bu jume melëme aniji tolë, ju Gotobë lale lowenewa kë esogo lēgletlebë home hwi naegloleme. Na ju bubë ëfalëbo mago gali aholokwane naeglotleme. ¹⁵ Na iniwa wesibi ju kë hwi toglobebë na gali ju kë aholokwane toglotlebë onehome tē naegëtagutëmeme. ¹⁶ Na ju fëyeme hwi elene? Mana baptais fa etole. Ju Tako Home Jisame gali eloleme, jume lēgaita nalëgleme na jubë tēbo lowene sle nalogotometëme.”

Goto Polme jine tlële, Jisasbë gali Israelbë afenëboni mëtabëya jwa mëglabë enëneme tē nalëtatëmeme

¹⁷⁻¹⁸ Pol ita megali tlome, “Bo Jerusalem lifatewa ita tigrisina, na bo mana Gotobë tako lotu lowa tekakuli. Na bo Gotome mana gëgali tlelëkeflëbë na bo Tako Ho, Jisame, nimitelënaha mana hwi tlole. Bu bome megali latlonë, ‘Ju Jerusalem lifate mago hokweinawa eiju. Ju bobë gali kë lifate mëta tē egotlena kwe bu hana aholokwane mëgletëyome.’ ¹⁹ Na bo megali telë, ‘Tako Ho, bu kwe bome walowene mëletëna. Ètani bo iniwa lotu lowa kë asë tēgëbelëfëbë na jume kë lowene mëgletëyobë onehome iniwa tētëkle latëtakefë na kalabusu lowa sisike tlekefë. ²⁰ Na jubë gali tē logotlebë ho Stivenme mogo nalë kë tēkle mototlabë, kwe bo këme tlibë na bo kë wesibi tako fleflesu latletelëmu. Na Stivenme anijina kë tēkle mototlabë, hobë heletanëno ëho, bo hwi tlotemë.’ ²¹ Kwe Tako Ho bome megali tlonë, ‘Ju eiju. Bu jume, Israelbë afenëboni mëtabëya jwa mëglabë enëne belëme jine nëgelëkakëme, kakë kë tafa mugulabë oneho belëme. Ju bume egaitame naegleme.”

Pol wame home boblo mogotomabë enëneme megali tlome, “Bo Rom lifate mago ho”

²² Israelbë afenëboni, Polbë gali aholokwane motlola. Kwe Pol, Israelbë afenëboni mëtabëya jwa mëglabë enëneme lēgaitame nalëglebëme gali tlomena, kwe bume ita tako enisusumu memëtletla. Na

bubë kë gali aholokwaneme tole hana mëtletlamu na bu anisasana gali mëtla, “Mogo nalë tëke elolo! Mogo nalë tëke elolo! Këha hobë, ebë life mëta asa tafa malële! Gli malële!”²³ Bu anisasana gali mëtëbebokwakabë, na bubë heletanëno ëho titika mëtla na sisike mëtëbokwaka na life obona mesisike motokwaka. Bu këna melëbëme lëlekujü mëtla, bu Polbë gali tole hana mëtletlamu.²⁴ Këme nëgëme wame home boblo mogotomabë enënebë eso ho, bubë wege home gali tleme, “Sobo Polme, sebobë lowa elelëkakulome na bume taba afona lëlafä etlome. Na kë enëne wame kë moglolabë lowene wayobëme takune elolome. Bo melowene nanëgelëme, ‘Israelbë afenëboni, bume mogo nalë tëkeme fëyeme tole mëlane?’”²⁵ Këme nëgëme, bu Polme kijuna tobona lei mototometla. Na bume taba afona tëkle mogotlame kofene. Kwe Pol wame home boblo mogotomabë enënebë eso ho lime hwi tlole, lolime tlibetle. Na bume takune tlole, “Rom provins mago gavmanbë gali melë lëgëbetle lalële. Sobo Rom provins mago hobë tëbo lowene afina sahwi elotelo. Sobo Rom provins mago ho blawa lalowa tëkle egotlomene o hanane? Weye, hanane. Bowe, Rom provins mago ho, na sobo bome blawa fëyeme tëkle egëtanamene?”

²⁶ Kë eso ho, kë gali aholokwane tle, na bubë tako eso home tuju tle na gali tujuwelële, “Ju habelë egotlemene? Kë ho bu Rom lifate mago ho!”²⁷ Na kë tako eso ho Pol belë tisi tle na takune tlole, “Ju bome gali enonë. Ebë nëgali o sogëna. Ju Rom life mago hone o hanane?” Na Pol gali tlole, “Nëgali.”²⁸ Na kë tako eso ho megali latlole, “Bo tako baliti Rom lifate magobë gavmanme watlële na bo mefata wanelë, Rom life mago ho.” Kwe Pol megali latle, “Bo kwe hanane. Ayana, beëna bu Rom life mago. Këme nëgëme, bo mata Rom life mago ho.”²⁹ Wame home boblo mogotomabë enëne, bu Polme tëkle namogotlame kofene, kwe Polbë gali

meaholokwane motlolana, “Bo Rom life mago ho,” kwe bu uli memëtla na fo mëtëkaka. Na kwe tako eso ho bu mata tako uli metle. Bu wame home boblo mogotomabë enëne megaligali togglomeme nëgëme, “Sobo Polme senë tabana lei etlomo.” Bubë lowene metëgëbetle latle, Rom life mago home blawa asa lalei etlo.

Pol Israelbë afenëbonibë lotu eso enëne gali të tëtätëme

³⁰ Wame home boblo mogotomabë enënebë eso ho, bu metole latle, melowene sle nalëgleme, “Israelbë afenëboni, Polbë fëye tëbo lowene hwi motlotlane?” Këme nëgëme, jowafe niwa tëbe na bu Polme këna lalei mototlabë senë taba titika totometle. Na bu lotu lo mëta wege mëglabë eso ho na Israelbë afenëbonibë lotu eso enëne, gali telokwakëme, loko namokwëtlame. Na Polme kë enëne belë tlelule. Na bubë naba lime tlibetëme.

23

¹ Na kwe, Pol Israelbë afenëbonibë lotu eso enëne wëya tlelëme na megali tleme, “O afani, bo Gotobë naba lime kë asë nëgelëbë, bo tëbo lowene mëta hana asë nelë. Bo melowene nanelë, ‘Bo wesibi liha hana totlë.’”² Pol megali tle, na Gotobë tako lotu lo mëta wege lëglebë tako eso ho, Ananias, Polbë lime kë mitlijabë enëne gali tleme, “Sobo ëfalëbo elë bu elo.”³ Na Pol këme gali tlole, “Goto jume mata tëke loglëme. Ju waholo lebotabo ti ha. Oneho jume matawa hwi möglëyobëye, lalë klisomu, kwe lokwalëfe waholo lebotabo ti ha lëlubetë. Ju melowene lalene, ‘Ju Goto Mosesme kë tëglëlebë tafa sle gali esogo eglelëlebë ho, na kë galina bobë tafa hwi sle loglotenëme.’ Na ju kë gali fëyeme boblo etlene, na bome ëfalëbo elëme bume fëyeme gali elomene?”

⁴ Na kë enëne Polbë lime këme tlijabë, Polme megali motlola, “Ju Gotobë tako lotu lo mëta wege lëglebë tako eso home fëyeme tëbo gali elolene?”⁵ Na Pol këme gali tle, “O afani, masiwafe, bo melowene hana

nëletelë, kë ho bu Gotobë tako lotu lo mëta wege lëglebë tako eso ho. Gotobë bogo megali eglame nêgeme, ‘Sobo, sobobë eso home, tēbo gali asa elolo.’”

⁶ Pol melowene latletēme, “Israelbë afenëbonibë lotu eso enēne, fliye bu Farisi enēne na fliye Sadyusi enēne.” Kēme nêgeme, bu anisasana gali tleme, “Afanino, bo kë nêgebēye, Farisi ho. Na bobë afuna, ayana, bu mata Farisi ho. Bo melowene nanelë, gigli enēne bu matēmatë mago huhuju mëglame. Na kë wesi-bime fwa bome so namëtatēname.”

⁷ Pol kë galime gëgali tle, na Farisi enēne na Sadyusi enēne blalo wame mëtla na li li lowene mëta mëtëtabëya. ⁸ Ebë wame way-obë melëgëbetle lalële. Sadyusi enēne megali lamëtlekefëya, gigli enēne matēmatë mago hana huhuju mëglame. Na ensel na alibaho hanane tafa mële. Kwe Farisi enēne bu kë wesibi iniwa lowene sle mëtletëma. ⁹ Kēme nêgeme, anisanamu gëgali mëtla. Na Farisi enēne fli, Gotobë galime kë okokwe moglomabë ho, bu huhuna mitlija na anisasana megali mëtla, “Sebo ebë hobë tēbo lowene hana hwi nolotla. Ensel li o alibaho li bume wagali mololenawa. Bu melë lëglena, na sebo bume tēkle nogotlana kwe sebo Gotobë wege sisile nogotlame.” ¹⁰ Na wame home boblo mogotomabë enēnebë eso ho bu mehwi tleme, anisasana wame gali feilawa huhu mëtlelëla na bu uli metletëme. Bu melowene tle, “Farisi enēne na Sadyusi enēne Polbë ato memelë ki tei mletlafe, na bubë ato bule lëgletlemefe na bu gli lëleme.” Kēme nêgeme bu wame home boblo mogotomabë enēneme gali tleme, “Sobo loko kë mëglelëyabë enēne belë eyeume na Polme kë enēnebë mago no ejuwelolome na elesulome na sebobë lowa elelëkakulome.”

¹¹ Bu melë kë mëglabë. Na klabë kuna Tako Ho Jisas, Polbë li mëta tlibetle. Na gali tlole, “Ju uli asa ele. Ju bobë gali, Jerusalem mëta fene tē etle, Rom lifate mëta, melë, tē egotleme.”

Israelbë afenëboni gali sle mototla, Polme mogo nalë tēkle namogotlame

¹² Na kwe li olobalëna, Israelbë afenëboni fli mana loko mëtlelëya. Na gali sle mototla, Polme mogo nalë tēke namoglolame. Bu Gotobë wenijina kakëne mëtla, “Sebo Polme mogo nalë satëkle notla. Sebo mogo nalë tēkle jwa nogotlana kwe sebo hi wesibina tuna hana hi nêglame.”

¹³ Polme mogo nalë tēkle gali kë kakëne mëtëglabë hobë tabei këniji niliafewe (40) sogë sigliwa. ¹⁴ Kë ho, bu lotu lo mëta wege mëglabë eso ho belë na Israelbë afenëbonibë letitabo enēne belë mutujutëma na megali motloma, “Sebo Gotobë wenijina gali mekakëne sle wanëla, ‘Sebo Polme mogo nalë satëke noglolame. Sebo tēkle jwa nogotlana kwe sebo hi wesibina tuna hana hi nêglame.’”

¹⁵ Kēme nêgeme, sobona, Israelbë afenëbonibë lotu eso enēnena, wame home boblo mogotomabë enēnebë eso home sagali elolo. Na bume mesogëna elolome, ‘Sebo metole nanëla, ju Polme sebelë sei elëfatëna, sebo bume fli wesibime takune nanoglolame. Sebo melowene sle nanëgletlame, “Bu fëye wesibi totlene?”’ Sobo melë egelona, kwe sebo alëgeme ekë tafa nëla. Na bu Polme sobelë sei mëglëlana, kwe sebo bume alëgeme mogo nalë tēke noglolame.”

¹⁶ Kwe Polbë blola, kë gali aholokwane tle. Kēme nêgeme tuju na wame home boblo mogotomabë enēnebë lowa tēkaklu. Na bolumama Polme gali tlole. ¹⁷ Na Pol, wame home boblo mogotomabë enēnebë eso ho lime, bu belë naligistleme gali telokwakle. Na bu tisi tle na Pol megali tlole, “Ebë falake home jubë tako eso ho belë sei ejuwelële. Bume li galime gali nalogloleme.” ¹⁸ Kēme nêgeme, kë eso ho, kë falake home, bubë tako eso ho belë tlelule na megali tle, “Kalabusu mëta kë tafa lëglebë Pol, bome megali lalolonë, ‘Ebë falake home jubë tako eso ho belë sei ejuwelële. Bume gali lime gali nalogloleme.’”

¹⁹ Na kēme, kë tako eso ho kë

falake home tobame fa totle na mëglëbo elë tlelule. Na tlemalë buwa mutujuwelibo na mana takune tole, “Ju bome fëye galibëme gali eglonëmene?”²⁰ Na kë falake ho megali tole, “Israelbë afenëboni bu gali wafi sle motla, uniji jume takune nameglëyome, Polme, Israelbë afenëbonibë lotu eso enëne belë mëglëlutëma namëglame. Bu jume sogëna mëglëyome na megali tole, bu Polme fli wesibime takune namoglolame na melowene sle namëgletlame, ‘Bu fëye wesibi tlene?’²¹ Kwe ju bubë gali asa aholokwane elome. Bu mago fli ho, bu kënjiji niliafewe sogë sigliwa, bu Gotobë wenijina gali mekakëne wamla, ‘Sebo Polme mogo nalë satëkle notla. Sebo tëkle jwa nogotlana kwe sebo hi wesibina tuna hana hi nëglame.’ Bu jume mana kë hwi meletëyo, bume megali naeglomeme, Pol bu belë maluju.”²² Na kwe, kë tako eso ho, kë falake home gali tole, “Ju bome galime kë egisitenëbë, li home kë galibëme asa gali elole.” Na bu kë falake home jine telëkakle.

Bu Polme, tako eso ho Feliks belë jine metlëla

²³ Na kwe wame home boblo mogotomabë enënebë tako eso ho bubë tokwëtokwë eso home tlemalëme gali telëkakëme. Na bu belë mitisijo na bume gali tlome, “Sobo wame home boblo mogotomabë enëneme 200 kënjiji, loko etome. Na hos klelina kë asë mëglabë home 70 kënjiji loko etome. Na sëfana kë wame mëglabë enëneme 200 kënjiji loko etome. Sobo Sisaria lifewa egëyeume sagli elëlome na klabëmuwa eyeume.”²⁴ Sobo Polme hos kleli fli aniji elotelome, bu këna luguju nalëgleme. Na sobo bume eso ho Feliks belë sei sle ejuwelëlome.”²⁵ Na wame home boblo mogotomabë enënebë tako eso ho, pasë yahi tle na bu megali latle,²⁶ “Lale olobalë eso ho Feliks, ju sebobë tako eso ho mu. Bobë weniji Klodius Lisias. Na bo ebë pasë jume ekë yahi nëletë. Na ebë pasë Polme

megali latlatle.²⁷ Israelbë afenëboni, ebë home fa mototla na mogo nalë tëkle namogotlame fene. Kwe bo gali meaholokwane telë, ‘Bu Rom provins mago ho.’ Këme nëgëme, bona, bobë wame home boblo mogotomabë enëne bume kë wame motlolabë enënebë mago no tlëla.²⁸ Bume kë so mëtatlabë gali wayobëme bo lowene sle nanëgletelëme. Këme nëgëme, bo Israelbë afenëbonibë lotu eso enëne belë këme tlelulë.²⁹ Bo bume kë tëbo wesibime takune tlomë. Na bubë onehobë tafa sle galime fwa anebo gali mëtlelëna. Na bu kë tafa sle galime fwa so mëtëtatla. Kwe bo bubë fëye wesibiha hwi hana tlotelë. Na sebo bume mogo nalë manawa hana tëkle nogotlame o manawa hana kalabusu nogotlame. Matëbe.³⁰ Na ëje bo ebë gali meaholokwane nanolomë, bu bume mogo nalë tëkle mogotlabë gali wa sle mëtatla. Na këme nëgëme bo ju belë hokweinawa këme jine nelëbaklë. Na bume kë so mëtatlabë enëneme gali nolomëme, bu jubë naba li mëta gëgali sle namëglame. Bobë gali tei.”

³¹ Na kwe, wame home boblo mogotomabë enëne, bubë eso hobë gali esogo mëtlelëtla na bu kë klabëna Polme Antipatris lifatewa sei mutujuwelëla.³² Jowa klabë tle na wame home boblo mogotomabë enëne, hos klelina kë asë mëtlekefëyabë, Polme Sisaria lifatewa sei mutujuwelëla. Na wame home boblo mogotomabë enëne fliye, Jerusalem lifatewa ita mutuja na bubë lowa fëfe motokwaka.³³ Bu Sisaria lifatewa fwa mutula na eso ho Feliksme pasë mëtlëla. Na Polme mata mëtlesula na bubë naba li mëta tlibetle.³⁴ Bu kë pasë hwi tlagwi na Polme këme metakune tole, “Ju fëye provins mago hone?” Na Pol gali metafu tëtlatle, “Bo Silisia provins mago ho.”³⁵ Na kwe eso ho këme megali tole, “Jume tëbo loweneme so mëtatëyobë enëne migisiyana kwe bo jubë gali aholokwane nolotëme.” Na bu këme wame home boblo mogotomabë enëneme megali tlome,

“Sobo Polme, ëtanifu eso ho, Herotbë lowa elelekakulome na sobo mana hwi sle elokweflome, lëglëboukakulime.”

24

Israelbë afenëbonibë letitabo enëne, Polme so mëtëtatla

¹ Na bu tobali olë wamutuju na Gotobë tako lotu lo mëta wege lëglebë tako eso ho, Ananias, Sisaria lifewa mana tuju. Na Israelbë afenëbonibë letitabo enëne fli, na oneho tafa sle mëglabë gali, lowene sle lëgletlebë ho li, buna mutuja. Bubë weniji Tertulus. Na bu Polme so kë mëtëtatlabë galibëme, eso home gali motlola. ² Na kwe, eso ho Polme gali telokwakle, ligisi tle nalëgleme. Na bu tisi tle na Tertulus, Pol kë tafa tëglebë galime mana gëgali tle. Na bu megali latle, “Eso ho Feliks, ju seme lale tafame laitakefëna. Ètani kë tafa tëglaginabë na mana ekëne fe lëkaki wame hana tokweija ebelë mana ekë fe lëkaki. Ètani feilawa wesibi kë tëbo mëtletë nabë, jubë lale lowenena sle tëttagimetëna. Ju seme feilawa wesibime taitagina. ³ Sebo kë wesibi hwi tlagima na sebo maninibona sle tla. Na sebo jume tako fleflesu latokweitëyo na megali tokweija, ‘Yahala fëyemene.’

⁴ Kwe bo jume gëgalina kiki hana nëgëtëme. Ju seme maninibo naegletëname fwa takune nolë na ju sebobë tokwëfo gali aholokwaneme aholo bo naegëtätëname.” ⁵ Na bu Polbë galime megali tletle, “Sebo ebë home mehwi nanolola, bu memelë tëbo lowene mëta tafa lëglebë ho. Bu iniwa lifate mëta, Israelbë afenëbonibë wame lowene tufiji tëttagutëme. Na bu Nasaret lifate mago Jisasbë lowene esogo mëglelëtlabë onehobë eso ho. Kë enëne bu lale enëne nane. ⁶⁻⁸ Bu melëbëme fene

su tle. Gotobë tako lotu lo, tetëbo lowenena tëbo nalogotleme fene na kë lo, Gotobë naba lime tëbowa lilibetleme. Kwe sebo bume mana kë fa totla. Këme nëgëme, bu kë tafa lëglebë galime, sebo kë gali nëglëyobë, ju sa takune elole. Ju bubë ëfalëbo mago gali lowene sle naegletleme.”*

⁹ Israelbë afenëboni bu këbë loweneme, Tertulusme mëtaitala na bu këme megali mëtla, “Ebë gali kë nëgebë, nëgali galimu.”

Pol, Feliksbë naba lime, Tertulusbë gali tafu tëtatlë

¹⁰ Na kwe, eso ho Feliks, Polme esuwalëwa tlole, gëgali nalëgleme. Na Pol këme megali tle, “Bo jume walowene sle nëletë. Ju ebë life mago onehobë gali aholokwane eglomebëme, ëtani anebomu tëtabetëme na mana ekëne etabe. Këme nëgëme bo jume fleflesu këme nëletë, ju bobë gali aholokwane sle eglonëme. ¹¹ Ju tëtakune ekouna, kwe ju mehwi sle eglolëme, we ita tle olë wamutuju, bo Jerusalem lifatewa lotume këtuguwibë. ¹² Na Israelbë afenëboni bome mehwi hana motlona, bo ho lina Gotobë tako lotu lo mëta wame gali nëlelëgome. Weye. Bo Israelbë afenëbonibë iniwa lotu lo mëta o iniwa lifeku mëta, fli hobë wame lowene tufiji hana tëtatemë. Weye. ¹³ Ebë gali bu bome kë so mëtatë nabë, nëgali gali nane. Weye. Bome kë so mëtatë nabë gali eso olafa sle hana mëtatëyo.

¹⁴ Kwe bo some megali sle nëlëyo. Bo kwe ëtani sebobë semleni kë lotu mëtletlabë Gotome fwa mana lotu nëletelë na bo Tako Ho Jisasbë lakale mata esogo nëlëletelë. Israelbë afenëboni mēfë lamototla, ‘Tako Ho, Jisame esogo mëglelëlabë, tëbo lakale.’ Kwe bo melowene nanelë, Goto Mosesme kë tëglëlebë tafa sle gali iniwa bu nëgali gali

* **24:6-8** Fli lowene ho bu melowene lamëtla, li gali mana lëbe kë gali mëta. Kë gali melë lëgëbelalële, “Na sebo bume sebobë, lotu eso enënebë naba li elë yafe tlelula, bu kë tafa lëglebë galime gëgali nanëglelëmame fene, kwe eso ho Lisiasna, bubë wame home boblo mogotomabë enënenana mana kë mitisiya, na seme enisusuna hehë mëtletëna na sebobë toba bume mana ki mëtëkaka. Na Lisias këme gali tle, ‘Fli oneho ebë home, onehobë gali aholokwane moglomabë enëne belëme mëglelulame tole mëglana ta jubë naba li elë samëglesulame na bu kë tafa lëglebë galibëme sa gëgali mëglelëyome.”

mu. Na iniwa gali, Gotobë lowene mago gali të mototokweflabë ho kë yahi mëtëglabë, kë mata nëgali gali mu. ¹⁵ Na bo Gotome melowene nanëletelë. Tokwafe li olëna iniwa gigli enëneme matëmatë mago huhuju logotomeme. Lale lowenena gigli mëtlabë enëne na tëbo lowenena gigli mëtlabë enëne bume iniwa huhuju logotomeme. Bona, ebë enëne kë tafa mëglabë, jowa lowenewa nehola. ¹⁶ Këme nëgeme bo kë nëgeholëbë gali esogo sle nëglelëbëme feilawa afutuku këme nelë. Na bo Gotobë naba lime na onehobë naba lime tafa sle nanëgletemëme.

¹⁷ Bo Jerusalem lifate kile totlë. Na bo li life mëta kë tafa tugulëbë, feilawa tlibutu tafa tulë. Na tokwafe, bo Jerusalem lifatewa ita tisi. Na baliti jwa kë tafa mëtlabë yabe enëneme, nëgaitamëbëme baliti tehweitemë. Na bo sipsip kleli Gotome ahøjume nanëgletelëmeha tisi. ¹⁸ Bo Gotobë tako lotu lowa nuguwime tole latelë, këme nëgeme, bo Gotobë naba lime lale tafa nëgelëbë lowene afina sle totlë na bo mana tako lotu lowa təkakuli. Na oneho bome Gotobë tako lotu lo mëta hwi motlonabë, bo Gotobë naba lime lalowa tëtäbë. Bo feilawa enënena hana tafa tla. Na sebo fëyeha hana totoma. Na fli enëneha hana flikale motlona. ¹⁹ Kwe Esia provins mago Israelbë afenëboni mitisiya na bome blawa wame motlona. Bome kë so mëtëtatë nabë enëne jubë naba lime bo kë tëbo togotlëbë wesibime bu gëgali mëkakijame. Kë enëne bu migisiya jwa fëyeme mëlane kë galime gëgali namëglame? ²⁰ Bo melowene nanelë, bu gëgali hanane. Kwe ebë iniwa enëne, bo Israelbë afenëbonibë lotu eso enënebë naba lime kë tiglibëbë, bu bobë tëbo wesibi o tëbo lowene wafi hwi motlotë nabë kwe bo metole nanëletemë bu jume kë tëbo lowenebëme sagëgali mëglelëyome. Bu jume lalowa gëgali mëglelëyomene o hanane. ²¹ Kwe bo melowene nanelë, bo tokwëfo wesibi kë tëgelëbë, këme fwa wame molona. Kë wesibi melë, bo bubë gali aholokwane moglomabë hobë lime

kë tiglibëbë, bo megali latelë, ‘Bo Gotome melowene sle nanëletelë, lebo enëneme, matëmatë mago huhuju logotomeme.’ Kë wesibime fwamu bome sobobë naba li elëme këme mëlesuna.”

²² Feliks, Tako Ho Jisasbë lakale kë esogo mëglelëlabë onehobë lowene walowene sle tletëme. Pol gëgali tëglebë yawe tole na Feliks mana megali tlome, “Sobobë gali eme fwa tou lëgletëyome. Tokwafe wame home boblo mogotomabë enënebë eso ho, Lisias, ebelë ligisina, kwe bo sobobë gali sasle nëgetatëyome.”

²³ Na bu wame home boblo mogotomabë enënebë eso ho li, megali tole, “Ju Polme sahwi elokwefle jubë lokwalëfe mëta fwa tafa lëleme. Kwe bume naba feilawa asa ahwatle. Weye. Bubë yabeni bume wesibina mëgaitalabëme asa lëkle etome kwe bu matisitla.”

Eso ho Feliks, Polme kalabusu lowa tuku tëglebë, tële tlibutu tafa tle

²⁴ Fli olë wamutuju. Na Feliks, bubë no Drusilana mitisiyo. Drusila kë nëgebëye, Israelbë afenëboni mago mëse. Na Feliks, Polme gali telokwakle, bu belëme ligisi tle nalëgleme. Na Pol tisi tle na buna gëgali mëtelo. Na bu Polbë gali aholokwane tlagule. Na Pol, Jisas Klaisme lowene slebë lowenebëme mana okokwe sle tole. ²⁵ Na Pol, oneho lale lowene esogo mëglelëlabëme gëgali tle. Na oneho bubë asë ululu sle mogotlabëme gëgali tle. Na tokwafe Gotobë naba li meta onehome gali aholokwane loglomebë na onehome fu fu logotomebë olë mata gëgali tle. Feliks kë gali yafe aholokwane tole na bu tako tutune metle na megali tle, “Ju ejumo. Tokwafe bo tole nëgelëna mana sagali nëgelëkakëme, bo belë ita egisi naegleme.” ²⁶ Feliks Polme metole fene latletle, Pol bume baliti lëlele nawa, na bu bume kalabusu lo mago jine lelëkakleme. Këme nëgeme, itaita këme gali telokwakëkefle, bu belë gëgalime ligisikefëtle nalëgleme.

²⁷ Bu melë kë tëglebë tële tlibutu latle na mana Porsius Festus, Feliksme hihijika tle na eso home tafa tle. Kwe Feliks bu metole latle, Israelbë afenëboni bume fleflesu namëgletlame. Këme nêgeme Polme kalabusu lo mëta fwa këme kile tle.

25

Eso ho Festus, Polbë gali aholokwane tlole

¹ Festus, Sisaria lifatewa tisi na Judia provins mago enëneme eso home têtabetême. Na bu kë mëta aowafe ni tëbe. Na bu Sisaria lifate kile tle na Jerusalem lifatewa tuju. ² Na Israelbë afenëbonibë lotu lo mëta wege mëglabë eso ho na bubë letitabo enëne, Festus belë mutujutla. Na Pol tëbo lowene mëta kë tafa tëglebë gëgalibême gëgali mëtletlëla. Na bume këme anisasana megali motlola, ³ “Ju seme lalowa aitanamene? Sebo metole nanëla. Ju Polme Jerusalem lifatewa jine elëbakleme.” Bu kë galina këme gali motlola, fli home alëgeme ëhome gali motlomame nêgeme, na Polme mogo nalë tëkle namogotlame. ⁴ Na Festus bubë gali metafu têtatême, “Pol, Sisaria lifate mago kalabusu lo mëta mana tafa lëleo. Bo sogë tafawa nanelë, na bo Sisaria lifewa nuguwi nanëgelême. ⁵ Këme nêgeme, sobobë eso enëneme jine elëmo, bona nuguja nanëglame. Na kë ho, tëbo lowenena tafa lëglena, kwe lalowa bu bobë naba lime bubë tëbo lowene lalowa gëgali mëgletlame.”

⁶ Festus Jerusalem lifate mëta tobali ita aona olë o welujuwa olë tafa tle, na bu Sisaria lifatewa ita tuju. Jowa klabëwa ni tëbe na kë olobalëna hobë gali këme aholokwane mëglekefëtëmabë lo mëta tafa tle. Na Festus, Polme mëglesutla namëglame gali tlole. ⁷ Bu Polme sei mëtletfatla. Na Israelbë afenëboni, Jerusalem lifate mago kë mitisiyabë bume loko mëtletlëla na bume gali blawa soso mëtëtatla. Na Pol bu tetëbo lowenebë mëta kë tafa tëglebême gëgali mëtletla. Kwe Festus bubë galime melowene hana tletême, “Bubë

gali nêgali galimu.” Bu meolafa hana mëtëtatla, bubë gali nêgali gali. ⁸ Bu gali blawa wafi soso mëtëtatla na Pol bubë gali mana metafu têtatême, “Bo fëye wesibiha hana totlë. Bo Israelbë afenëbonibë tafa sle gali boblo hana têtatemë. Na bo Gotobë tako lotu lo, tëbo lowenena tëbo hana têtatemë. Na bo Rom lifate mago gavmanbë eso home tëbo hana totlë.”

⁹ Kwe Festus melême tole tle, Israelbë afenëboni bume fleflesu namëgletlame. Këme nêgeme, Polme këme takune tlole, “Ju metole lalene? Jerusalem lifatewa ejume na bo kë mëta bubë gali aholokwane nolomême.” ¹⁰ Kwe Pol megali tle, “Hanane mu. Bo kë mëta kë tafa nêgelëbë lo, bu Rom lifate mago eso ho, Sisarbë lo, onehobë gali këme aholokwane mëglekefëyabë lo. Bome blawa kë so mëtätënabë gali, eme fwa aholokwane eglomeme. Ju bome walowene eletenë, bo Israelbë afenëbonime fëye wesibiha hana totometemë. ¹¹ Bo li wesibiha tëbo nogotlëbë, kwe lalowa bo gli manelë. Bu bome li fëye tëbo wesibiha hwi moglotënana, na megali moloname, ‘Ju ebë tëbo wesibi mëta gli egleme,’ kwe lalowa bo kë mëta gli manelë. Kwe bome kë so mëtätënabë gali, sogëna nêgebë, ho bubë toba elë hana gwa mëgëtaname. Bo metole nanelë, Rom lifate magobë tako eso ho, Sisar, bome blawa kë so mëtätënabë gali, buwa saaholokwane lëgleme.” ¹² Na kwe Festus, bume lalë lowene kë mëglëkeflabë enënena blalo gëgali mëtla na Polme megali tlole, “Ju megali waele, ‘Eso ho Sisar, jume blawa kë so mëgëtatëyobë gali bu saaholokwane lëgletême,’ kwe ju eso ho Sisar belë egujume.”

Festus, eso ho Agripame, Polbë galime gëgali tletlë

¹³ Habenuju afe niwa tëbe. Na eso ho Agripama, bomulu Bernaisina, Sisaria lifatewa mitisijo, Festusme hwi namoglolome. ¹⁴ Na kë tlemalë tako tafaha mëtelo. Na Festus eso ho Agripame Polbë galime mana

megëgali tlelële, “Ëbame, Feliks li home kalabusu lowa kë tuku tëglebë, bu kalabusu lo mëta mana tafa lële. Bubë weniji Pol. ¹⁵ Bo Jerusalem lifate mëta tafa tëgelëna, Israelbë afenëbonibë letitabo enëne na lotu lo mëta wege mëglabë eso ho, gali bume so mëtëtatla. Bu metole lamëtla, bo megali nanoglomëme fene, ‘Bu wafi tëbo tlitawa, na wame home boblo mogotomabë enëne, bume mogo nalë tëke namoglolame.’ ¹⁶ Kwe bo bubë gali metafu latëtatëmë, ‘Sebo Rom provins mago enëne, sebobë lowene melë lëgëbelalële, bume kë so mëtatabë enënebë toba elë blawa hana gwa nëgëtatëmame. Fli ho bu li home so mëtatlana, kwe bubë gali tafu mëgëtatlabëme aholo bo sle samëtagutla. Bubë so gali afina tafu lëtatëmeme na tokwafe onehobë gali aholokwane lëgletëmebë ho, bubë gali hwi sle lolotëmeme.’

¹⁷ Këme nëgëme kë enëne ebë lifatewa, bona tisiya. Na bo haha tafu hana totlë. Bo jowa klabëwa ni tebë na bo hobë gali këme aholokwane mëglekefëyabë lowa mana tuwi. Na bo wame boblo enëneme gali tломë, ‘Kë home elesulo.’ ¹⁸ Na bobë naba lime, bume kë so mëtëtatlabë enëne, bu mitlija na mana gëgali motokouja. Bo melowene latelë, ‘Bu tëbo wesibi kë togotlebëme gëgali mëgletlamewa. Kwe bu këbëme hana gëgali mëtla. Weye.’ ¹⁹ Buna, bubë lotu lowenebëme anisasana momata mëtlelogwaya. Na bu li ho kë gli tëglebëme anisasana momata mëtlelogwaya. Kë hobë weniji Jisas. Kwe Pol këme megali tle, kë ho kë gli tëglebë mana hwi lëta. ²⁰ Bo ebë gali sle nogotlëbëme lowene hohwi nanëtatëlëmu. Kwe bobë lowene yaya lalëletënë. Këme nëgëme, bo Polme metakune tlole, ‘Ju metole lalene? Jerusalem lifatewa ejume na bo kë mëta jubë gali aholokwane nolëme.’ ²¹ Kwe Pol megali tle, ‘Bo kwe kalabusu lo mëta tafa manelë. Tokwafe, Rom lifate magobë tako eso ho, Sisar, bome blawa kë so mëgëtatë nabë gali saaholokwane lëgletënëme.’ Këme nëgëme bo megali

telë, ‘Bu kalabusu lo mëta tafa lëglekëfëbë, na bo mana Rom lifate mago eso ho belë jine nelëkablëme.’” ²² Eso ho Agripa kë gali aholokwane tle na Festusme megali tole, “Bo ebë hobë gali aholokwaneme tole nanëletelë.” Na Festus këme gali tole, “Uniji saaholokwane eglolëme.”

²³ Na li olëna, Agripa Bernaisina bu lalë negli wesibina negli mototlo na bu mana mitisijo. Na kë tlemalë, wame home boblo mogotomabë enënebë eso hona, Sisaria lifate mago letitabo hona, oneho këme loko mëtlelekefëyabë lowa iniwa mëtëkakluja. Na Festus bu wame home boblo mogotomabë enëneme jine telëkakëme, Polme bu belë mëglesula namëglame. Na bu Polme bu belë mëtlesula. ²⁴ Na Festus këme megali tle, “Eso ho Agripa, na sobo iniwa oneho, sebona kë tafa nëglabë, sobo ebë home hwi elolo. Israelbë afenëboni iniwa, Jerusalem lifate mago na ebë lifate mago, ebë home gali so mëtëtatla. Bu bome anisasana megali lamotlona, ‘Mogo nalë tëkle etole mana tafa lëglelime.’ ²⁵ Kwe bo ebë hobë, li fëye wesibiha, hwi hana nolotelë. Na bo megali hana nëgelëme, ‘Gli malële.’ Bu metole lalële, eso ho Sisar bume blawa kë so mëtatabë gali buwa saaholokwane loglomeme. Këme nëgëme bo gali wasle totlë, Polme eso ho Sisar belë jine nëgelëkaklëbëme. ²⁶ Bo eso home Sisar me ebë hobë tëbo lowenebëme pasë yahi nëkakëtelëme fene. Kwe bo bubë li wesibiha hwi hana tlotelë, bo so kë mëtëtatlabë gali wayo lowene hana nëletelë. Na bo pasë mëta sebobë eso home fëye so gali wayobë yahi nëgletelëmene? Këme nëgëme, eso ho Agripa, bo ebë home jubë naba li elë këme nëlesutë, na fli enënebë naba li elë mata këme nëlesulë, bubë gali aholokwane sle naeglolome. Bo kë so galibë wayo lowene sle nëletelëme na bo pasë mana yahi nëkakëtelëme. ²⁷ Bo kalabusu lo mago ho li, eso ho belë jine nëglëlëna, na bubë so galibë wayo hana yahi nëgletelëna, kwe bo

melowene nanelë, ‘Këha lale lowene nane.’”

26

Pol eso home Agripame gali tlole

¹ Na Agripa Polme gali tlole, “Jubë gëgalime mana gëgali ele.” Na Pol to-bana lëkle totome, oneho gëgali kuju namëgebëyame. Na bu megali tle, ² “O eso ho Agripa, Israelbë afenëboni, bome blawa kë so mëtëtatë nabë gali jume të nëgëtatëme. Na bobë gali jubë naba li mëta gëgali nëgelëbëme tako tole nanelë. ³ Ju sebobë, Israelbë afenëbonibë iniwa lowenebë wafi lowene sle eletëna. Na kofe kofe gali kë gëgali nëglelogwayabë, kë wesibime mata ju wafi lowene eletëna. Këme nëgëme bo metole nanelë, ju al-abujuwa tafa eleme. Na iniwa galime aholo mana bo sle etagwime.

⁴ Israelbë afenëboni iniwa, bobë lakalebëme wafi lowene sle mëletëna. Bo tokwëfome bobë lifate mëta kë tafa tokweibë na ita Jerusalem lifate mëta kë tafa tokweibë, bu bobë lakalebëme wafi lowene mëletëna. ⁵ Na bu tole mëglana kwe bu bobë lakalebëme jume lalowa gëgali mëglelëyome. Bu bome melowene lamëletëna, ‘Bo falakeme nëgena, bo Farisi ho li tëtäbë. Na bo Farisibë lowenewa anisasana esogomu tlelëtemë.’ Farisi enëne Mosesbë tafa sle anebo gali iniwa anisasana esogo mëtletëla. ⁶ Bo ëje ekë nilibë. Na bu bome sobobë naba li elë mëlesuna bobë lakaleme some gëgali namëglelëyome. Na kë gëgali wayobë, melëgebe lalële; bo melowene nanelë, ëtani Goto bobë semlenime megali sle latlome, bu gigli enëneme huhuju logotomeme. Na bo kë wesibi melowene sle nëgletelëme na bo këme hwi nëkakëtelë. ⁷ Sebobë semle, Israelbë we ita tële nëbalebë afenëboni, bu klabëna olëna Gotome fwa lotu mëtletëfëta. Na bu melowene sle këme mëtletla, ‘Goto gigli enëneme huhuju logotomeme na bu kë wesibi hwi mëtëkakëta.’ Eso ho, kë wesibime fwa Israelbë afenëboni, bome sobelë këme mëtlesuna. ⁸ Sobo fli emëta kë eglibobë enëne, melowene fëyeme

elone, ‘Goto gigli kë mëtlabë enëneme hana huhuju logotomeme.’

⁹ Ètani bo melowene latelë, Nasaret lifate mago Jisame, kë lowene sle mëgletlabë onehome sisile manotomë. ¹⁰ Na bo kë wesibi Jerusalem lifate mëta melë totlë. Lotu lo mëta wege mëglabë eso ho, bome iniwa afutuku mëtletëna kë wesibi togotlëbëme. Na bo kë iniwa afutukuna Jisame lowene sle kë mëtletlabë onehome feilawa sisile totomë na kalabusu lowa tlelukefëmë. Na eso enëne bu giglime gali mëtletana kwe bo mata helawawa latelë, gigli matla. ¹¹ Feilawa olë bo melatlekefë, Israelbë afenëbonibë lotu lowa nëkakuliwa nëgelëbë, na Jisame kë lowene mëgletlabë onehome fafa nëkouwi na sebo mana tëtëkle nelutaya. Bo melëme tëbo fene totomë, bu Jisame klëë gali namoglolame na bume kë lowene mëtletlabë lowenebë mëlëkëla namëglame. Bo ebëha wesibi Jerusalem lifate mëta fwa nane telë. Weye. Bo bume tako enisusumu metletemë, na bo kakë lifate enëneme mata melatëtagumë.”

Pol bu Jisame kë lowene tëgletlebë galime gëgali tle

¹² Pol megali tle, “Lotu lo mëta wege mëglabë eso ho, bome metole lamëtletëna, Kristen onehome tëtëkle nanëgëtagwime. Na bome Damaskus lifewa kë esome fwa jine mëtletëkakëna. ¹³ O eso ho, bo Damaskus lifewa tuguwibëë, kliji kume tlibe. Na bona kë tugujabë hona tako elulego hwi tlole, matafa mago tisitëna. Kë elulego kë nëgebë bu klijiha nane. Weye. Bu tako elulegomu. Kë elulego, bona kë tugujabë enëne name iniwa lahwegënëwa tëtana. ¹⁴ Sebo iniwa latitiwagujawa. Na bo li hobë gali aholokwane tlole, Hibru galina megali latlonë, ‘Sol, Sol, ju bome fëyeme sisile etakefënëne? Ju bome tëbo egëtakefënëna kwe, ju jume tëbo elitamë.’ ¹⁵ Na bo metakune tlole, ‘Tako ho, ju yalëne?’ Na Tako Ho bu këme tafu tëtatenë, ‘Ju kë sisile egëtakefënëbë Jisas. ¹⁶ Kwe ju huhu ele. Bo jume ebë olëna këme nisitë,

jume aniji nanoglème, bobè wege fa naegètatenème. Ju wesibi nabana èje kè hwi eglomebè, kè galibème onehome sagali elèwagume. Na ita fli wesibi bo jume tokwafe olafa nogotometème, kè wesibi galime, onehome mata gali elomeme. ¹⁷ Bo jume nègaitème. Na jubè ilawa mago enène na Israelbè afenèboni mëtabèya jwa mëglabè enène jume tëbo hana mëgètome. Hanane. Bo jume Israelbè afenèboni mëtabèya jwa mëglabè enène belè jine nègelèkakème, ¹⁸ bubè lowene sle naegètagutèmeme. Na bu tlukufini kile namokoujame na elulego tabome natafa mokoujame. Na bu Satanbè tëbo lowene kile mokoujame na Gotobè lale lowenewa mehwagulame. Na bu bome lowene sle mokoutèname na Goto bubè iniwa tëbo lowenebè aholokwana ti nalèkoutèmeme. Na bu bobè oneho tafa namokoutèname.' Tako Ho Jisas bome kè gali tlenè."

Pol, Jisasbè gali të wege, bu kè fa tëtagulebème, Agripame gali tlole

¹⁹ Pol eso ho Agripame gali tlole, "Eso ho Agripa, bo nimitelèha wesibina heven lifate mago kè hwi toglolèbe, boblo hana totlè. Hanane mu. ²⁰ Bo Damaskus lifate mago onehome afina gali të tutatemè. Na ita Jerusalem lifate mago onehome, na Judia provins mago onehome, na Israelbè afenèboni mëtabèya jwa mëglabè enèneme mata të tëtagutemè. Bo gali metè latètagutemè, 'Sobo sobobè tëbo lowenebè kile elome na Gotome fwa lowene eletelome. Sobobè lakale melebotane saetlo, sobobè tëbo lowene iniwa kile tëkoujo na sobo Gotome wafi lowene ekoutelo.' ²¹ Bo ebèha gali onehome të tëtagukefètemème nègeme na Israelbè afenèboni bome kè wesibime fwa Gotobè tako lotu lo mëta kème fa mëtelutana. Na bome mogo nalè tëkle namègètaname fene. ²² Kwe Goto bome feilawa lataitanè. Goto bome tëgaitawaginèbèè na èje mana ekè laitakefènè. Kème nègeme èje bo ekè nilibè. Na bo iniwa enèneme, atwati enènena eso enènename, Jisasbè gali

ekè të nètatemè. Na bo li gali hana të nètatemè. Mosesna, Gotobè lowene mago gali të mototokweflabè ho fene yahi mètla, bo kè galiwa të notokweflè. ²³ Ètani bu meyahi lamètla, 'Goto kè aniji toglolèbè ho, bubè onehome nëno lèleme, bu tako elili fa logotleme na gli lèleme. Na lebo enène matèmatè mago huhuju mëglabème bu afina logoutatèmeme. Na bu Gotobè lale gali, olè fenene, Israelbè afenèbonime na Israelbè afenèboni mëtabèya jwa mëglabè enèneme mata të lègètatèmeme.'"

Pol Agripame megali latlole, "Ju Jisame salowene sle eletle"

²⁴ Pol kè gali të tëtagulebèè, na Festus anisasana mekèkale tlole, "Pol ju yaya lale. Ju tako lowene fa egotleme nègeme. Na kè lowenebè jume yaya kème lèta." ²⁵ Na Pol gali tle, "Eso ho Festus, bo yaya nane nelè. Weye. Bobè iniwa gali nègali galimu. Ebè yaya gali nane. ²⁶ Na iniwa gali bo kè të nogotlèbè, eso ho Agripa lowene lalèletème. Kème nègeme, bo bume kè gali të nègètatelèbème uli hana nelè. Bo walowene nèletelè, Jisas iniwa wesibi kè totomebè, bu li mumu hana lèbetle. Iniwa wesibi Jisas kè totomebè bubè naba lime èho hana lègleme nègeme na bu lowene sle kème lèletle." ²⁷ Na Pol, eso ho Agripame gali tlole, "Eso ho, Agripa, ju Gotobè lowene mago gali të mototokweflabè hobè gali lowene sle laletlene o hanane? Bo walowene nelè, ju wafi lowene sle eletle."

²⁸ Eso ho Agripa Polme kème metakune tlole, "Ebè tokwèfo olèna ju gali kè të etatenèbè, ju melowene laletenène, 'Bo Jisame lowene sle nanègletelèmene?'" ²⁹ Na Pol bubè gali metafu tètatele, "Bo Jisasbè gali tokwèfo olèna të nogotlèna o tako olèna të nogotlèna, bo Gotome megègali nanèlèlèlè, ju na fli enènena kè tafa egelobè, sobo iniwa Jisame lowene sle eletelo, bo fene lowene sle nèletelè. Kwe bome senè tabana fene lei mètètana some kèha lei nègètobème bo tole hana nèletèyo."

³⁰ Na kwe eso ho Agripa na Bernaisi na eso ho Festus na buna kë tafa mëtlabë enëne huhuju mëtékouja, ³¹ na kë lo mago totoho mëtékaka. Na bu blalo megëgali mëtla, “Kë hobë, li fëye wesibiha, hwi hana nolotla na sebo megali hana nëglame, ‘Bume lalowa, mogo nalë tëkle etlo o kalabusu malële. Weye.’” ³² Na Agripa, Festusme megali tlole, “Sebo bume kalabusu lo mago jine nëgelëkakëlame fene kwe bu megali tëgleme nëgeme, ‘Rom lifate magobë eso ho, Sisar, bome blawa kë so mëtatënabë gali bu saholokwane lëgleme.’ Na sebo bume kalabusu lo mago jine jwa këme nëlëkakla. Sebo bume eso ho Sisar belë fwa sajine nëglëlame.”

27

Pol Rom lifatewa tuju

¹ Festus gali mesle latotle, sebo sibu lome fe nëlame na Itali provinswa nujame. Na bu Polname, fli kalabusu enënename, wame home boblo mogotomabë enënebë eso ho belë sei mutujuwelëma, bu mëglëboujalime hwi sle namoglomame. Kë hobë weniji Julius. Buna bubë wame home boblo mogotomabë enënena, bu eso ho Sisarbë lo mëta sei mëglëkeflabë enëne. ² Na sebo* Adramitium lifate mago kë tigusibë sibu lo mëta fëfe tla. Kë sibu lo, nutu helefo mëta, kë tafa mokoujabë lifate elëme lugujume kofenene, Esia provins mëta. Na Aristarkus bu sebona tuja. Kë ho bu Masedonia provins mago na bubë lifate weniji Tesalonaika. Na kwe sebo Sisaria lifate kile totla. ³ Jowa klabë tëkaka na sibu lo Saidon lifate mëta fla tule. Na Julius, Polme lalowa lebotane tëtatile na bume megali tlole, “Jubë yabenime hwime lalowa egujume, bu jume hi wesibiname, fli wesibiname mëgaito namëglame.” ⁴ Na kwe tokwafe Saidon lifate kile totla. Na tako flelu, sibu lo miti nagi fo tëttagule. Këme nëgeme, sebo Saiprus afayo amlebo elë këme hwagënë tokwokwëya.

Na kë afayo aflokobë tako flelu hana tle. ⁵ Sebo tako nutu su tëkaka na Silisia provins na Pamfilia provins loli elë sigli tokouja. Na Lisia provinsbë lifate mëta, Maira mëta fla tula.

⁶ Na sebo kë lifate mëta sibu lo mago fëfe tëkaka. Na wame home boblo mogotomabë enënebë eso ho Aleksandria lifate mago kë tigusibë sibu lo hwi tlole. Kë sibu lo, Itali provinswa luguju nalëgleme. Këme nëgeme bu seme kë sibu lowa mëtlenuna. Na sebo kë sibu meta fëfe tula. ⁷ Na sebo Maira lifate kile totla, na sibu lo feilawa olë alabujuwa tujukëfe. Flelu bume miti nagi fo tëttagukefleme nëgeme. Sebo Nidus lifatewa nounou watla kwe flelu sibu lo mana kë tēbetokwakle na sebo tuguja hana tla. Këme nëgeme sebo sibu lo jelë tetokwakla na Krit afayo elë tuja. Na sebo Krit afayo flelu jwa tabo elë tuja, Salmone hwetu li elë tuja. ⁸ Na sebo kë afayo mëglëbo elë alabuju tujukëfëya. Na sebo li afloko elë mana fwa tla. Kë aflokobë weniji melë, “Lale Ku Tako.” Bu Lasea lifate li mëta lëbe.

⁹ Na kwe, lebutako olë wafi mutuju na Gotome hi jwa tafa mëtletlabë olë mata wafi tuju. Na nutu feilawa sosogli lëglebë yeme wafwa tla. Këme nëgeme, Pol megali tlome, ¹⁰ “O sibu lo mago enëne, sobo aholokwane elo. Bo melë lowene nanelë, sebo eli nugujana, kwe sebo alëgeme tēbo niglitayame. Na kwe kë sibu lo na lebutako wesibi tēbo mëgleme. Wesibiwa tēbo mëgleme nane. Weye. Sebo fli kë mëta gigli nëglame.” ¹¹ Kwe wame home boblo mogotomabë enënebë eso ho, Polbë gali aholokwane hana tlole. Bu sibu lo bolijayabë lowene na sibu lo kë asë tēglelëlebë hobë lowene esogo tletlëtëme. ¹² Ebë sibu lo këkesi labu kë nëgebë, lalowa nane. Tako flelubë olë ligisi nëgena, sibu lo flelume habëna ëho lëglemene? Flelu sibu lome bubluju logotleme. Këme nëgeme lebutako ho, sibu lo mëta

* **27:2** Feilawa lowene ho, melowene lamëtla, “Luk bu kë gali yahi tle na ebë gali melëgebe këme lële, ‘Sebo.’”

kë tafa mëtlabë, gali sle mototla, kë lifate kile namëglame. Bu melowene mëtla, “Sebo ebë lifate kile nëlame na Finiks lifatewa nujame. Na kë lifate mëta, tako flelu ligisi olë tafa nëlame. Bale, fwa nugulame nawa o hanane.” Finiksbë sibu lo këkesi tala Krit afayo nëgemowe mëglëbo elë lëbetëme. Na sibu lo kë tëbo lotokwefëmebë flelu, kë belëme fe hana lulekefe.

Labasagli flelu tako nutu mëta huju tle

¹³ Negemowelë mago flelu tisi na bu tako flelu nane. Këme nëgame, bu melowene mëtla, “Sebo Finiksbë sibu lo këkesi labuwa lalowa nugujame.” Këme nëgame bu sibu lo kë fa logotlebë hobota tabo ainë buhe mototla na bu kë tala kile mëtla. Na Krit afayobë helefo mëglëbo mëglëbowa mana mutuja. ¹⁴ Bu mutujabëë, na hokweinawa Krit afayo elë mago labasagli flelu tako mana tisi. Bu kë flelu mefë lamotla, “Nëgetuje elë mago flelu.” ¹⁵ Na kë flelu sibu lome feilawa bëbë totle na ku takowa fo tëtagule. Sibu lo mëta kë wege mëglabë ho bu sibu lo yelu, flelu kë belëme tigusibë elëme yafe swaya mototla kwe hanane. Flelu bume tako boblo metotome. Këme nëgame bu flelubë tolewa esogo mëtlelëtla. Na sibu lo ku tako elë mana fo fowa tëtagule. ¹⁶⁻¹⁷ Sebo Kauda afayo nëgemowe mëglëbo elë tuja. Na kë tala tako flelu hanane. Na sibu lo mëta kë wege mëtlabë enëne, sibu lona kë ki tokweijabë ihe, sibu lo elo li elë tako afutukuna ki motokweija. Na sibu lowa mana ki motokwaka na tabana tafu mëtëtagujaya. Na bu tatako taba glo mëtla. Na sibu lo lokwalëfe elë blou mototolelëma na mana kë tabana sibu lo tafu mëtëtagula, flelu kë sibu lo yayei logotlelime. Bu Afrika lifate li mago tu lokwalëfe mago yenëba mëta lesilime, uli memëtla. Këme nëgame sibu lo kë asë mëglelëmebë selë ki mëtëtekekëya na bu flelubë tolewa esogo mëtlagutla. ¹⁸ Flegluna, nutuna sibu lome feilawa boblo mototlo. Këme nëgame, jowa klabë tla na sibu lo mëta kë wege mëglabë enëne,

fli wesibi nutuwa sisike mëtla, sibu lo fogolego nalëgleme. ¹⁹ Tële olë wamutuju na aona olëbëna bu sibu lo kë asë mëglelëmebë selë fli na selë kë mëta kesi mëglebë ti flina nutuwa sisike mëtëtekekaka, sibu lo fogolego nalëgleme. ²⁰ Lebutako olë sebo kljina, sëgetobana hwi hana noloma. Na tako flelu seme sibu lona feilawa bëbë tëtaguna. Këme nëgame, sebo melowene hana nëla, “Sebo tuja ato nëtabëyame.” Weye. Sebo melowene nanëla, “Sebo iniwa gigli nëglame.”

²¹ Lebutako olë bu iniwa hi jwa tafa mëtla. Na tokwafe, Pol huju tle na ku mëta tlibe na bume megali tlome, “Sobo bobë gali esogo tëglelëtë nabë na Krit afayo kile jwa nëlame kwe seme ebë tëbo olë esune hana lëglëname fene. ²² Kwe bo some gali nëlëyo, sobo ebë tëbo olëme feilawa asa tutune eletelo. Semago ho li hana gli lëgleme. Kwe sibu lowa tëbo lëgleme. ²³ Bo Gotome fwa tafa nëglekefëtelëbë ho. Na Gotome fwa lotu nëglekefëtelëbë ho. Èje klabë, Gotobë ensel bobë lime lilikakitenë, ²⁴ na megali lolonë, ‘Pol ju ebë wesibi kë fata lëglebëme uli asa ele. Ju tokwafe Rom lifatewa tuhu eguleme na Sisarbë naba lime elibeme. Aholokwane ele. Goto some lëgaitome. Na iniwa ho juna sibu lo mëta kë tafa egelobë bu gigli hana mëglame.’ ²⁵ Ensel megali loglonëme nëgame na bo some këme gali nëlëyo, sobo uli asa elo. Bo Gotome melowene nanëletelë, ‘Iniwa wesibi bu bome fene gali lolonë, bu melë fata mëgleme.’ ²⁶ Kwe flelu ebë sibu lo lëgehuleme na li afayobë yenëba mëta bubluju luleme.”

²⁷ Na kwe sebo kë nutu mëta tëtäbëyabëë, olë kënjiji latla we ita aona. Kë nutu mefë lamotla Mediterenian nutu. Nilifu klabë kuna, sibu lo mëta kë wege mëglabë enëne melowene mëtla, “Sibu lo li afayo belë fwa lëgleme lololi lalëlefe.” ²⁸ Këme nëgame, hobota tabo wesibi taba heletabo mëta kesi mototla na yenëba mëgëselëlabëme nutuwa tuku mëtëtekekaka na yenëba këna mëteselëla.

Na ita buhe mētetofakla na bubē lēlekuju tabei ebē kēniji niliafewe. Na ita sibu lona kli mētēkaka na ita yenēba kēna lēlekuju mēglabē wesibi tuku mētētēkaka. Na ita buhe mētetokwakla na bubē lēlekuju tabei ebē kēniji aowafewe. Kēme nēgeme bu melowene mēta, “Yenēba lololi tei notlafa.”²⁹ Na bu uli memēta, sibu lo, aniji mēta bubluju lēglelime. Kēme nēgeme bu sibu lo kēna hobota lēglebē ainē nilina, sibu lo elo elēme sike mētētēkaka, sibu lo kē mēta fwa lēgemule nalēgleme. Na bubē gotome gali tuku mētletēma, hokweinawa feti nalēgleme, bu hwi sle namēkakame.³⁰ Sibu lo mēta kē wege mēglabē ho, sibu lo kile namēglame fene, alēge hohwi mētētatla. Kēme nēgeme bu sibu lo mago ihe tabana nutu mēta tuku mētēmalitaya. Na mesogēna mēta, “Sebo kē ihena, ainēna taba eso, sibu yelu mēta kē kesi nanokoujame na ainē mana nutuwa sisike nētēkakame.”³¹ Kwe Pol wame home boblo mogotomabē enēnebē eso honame wame home boblo mogotomabē enēnename megali tlome, “Kē enēne sebona sibu lo mēta tafa jwa nēglana kwe sobo gigli egelome.”³² Kēme nēgeme, wame home boblo mogotomabē enēne tēle taba, ihe mēta kē kē kesi mētlabē, tētlē mototoma. Na nutu ihe mana fo tētagwi.

³³ Feti lololi tle. Na Pol iniwa home, hi wesibi hi namokoujame anisasana gali tlome. Na bu megali tlome, “Sobo we ita nilina olē tafa sle hana telo, tutune mēta fwa tafa tokweijo na hi wesibi hana hi tokweijo.”³⁴ Kēme nēgeme bo some anisasana kēme gali nēlēyo, sobo hi wesibi mana hi naekoujome. Some kē hi wesibi afutuku namēglelēyome. Sobo aholokwane elo. Semago ho li ato li hana tēbo logotleme, sebo iniwa lalowa nētābēyame.”³⁵ Na Pol kē gali yawe tole na bletē nage fa tole na bu kē enēnebē naba lime Gotome lale gali tole, “Ebē bletē nage, yaha fēyeme enēnēne.” Na bu bletē nage fufu tole na mana hi tle.³⁶ Iniwa ho bu Polbē

gali aholokwane mēta na bubē tutune lowene, sle tletēme. Na bu mata hi wesibi glo motokouja na hi motokouja.³⁷ Sebo sibu lo mēta kē tafa tēglabē tabei bu kēniji 276 ho.³⁸ Sebo hi tokoujabē, imo soslo mētētagujaya. Na sebo witi liji begē manogwa nutuwa sisike tētēkaka, sibu lo fogolego nalēgletēname.

Sibu lo tēbo tle

³⁹ Olē wafeti tēbe na sibu lo mēta kē wege mēglabē ho yenēba hwi mētelokwakla. Kwe kē yenēba mētēselēla hana mēta. Na bu wakona tēglebē yenēbabē hwi mētelokwakla. Na bu gali mēta, “Sebo ebē sibu lo, ebē wakoha tabo elē manehula na kē mēta fla nulelēlame.”⁴⁰ Kēme nēgeme bu ainē mago taba tētlē mototoma na nutu mēta hune mētēkaka. Na bu sibu lo kēna kē asē mēglelēlabē yegu mago taba totohwa mototoma. Na bu sibu lo kē asē mēglelēlebē selē kli mototokwakla, flelu hoho nalogotleme. Na sibu lo yenēba elē mana lujume.⁴¹ Kwe sibu lo yelu, nutu lokwalēfe mago yenēba mēta lalesiliwa tole. Na nutu bu sibu lo elo bubluju tole.⁴² Na wame home boblo mogotomabē enēne, bu kalabusu home hao mētletēma, bume mogo nalē tētēkle namēgētayame fene. Bu fofolou mokoujame na mana mēlēbougakujalime.⁴³ Kwe wame home boblo mogotomabē enēnebē eso ho Polme lēgaitalēme tole lēgletleme nēgeme. Na bu wame home boblo mogotomabē enēneme melēkle totome, “Kalabusu home mogo nalē asa tētēkle eto. Matēbe.” Na bu seme iniwa gali tlonā, “Sobo foloume lowene lalo kwe sobo afina lalowa okokli ekako na yenēba elē folou ekoujome.”⁴⁴ Na sobo fli, sibu lo mago agwihe glo elome na kēna some nutu mana yenēbawa fo lētagujome.” Sebo melē tla na sebo iniwa yenēba elē fēfe tula. Na semago liha hana tēbo tlita.

28

Pol bu Malta afayo mēta tafa tle

¹ Sebo iniwa helefowa fëfe tla. Na kë lifate mago enëne seme megali lamotlona, “Ebë afayobë weniji Malta.” ² Këbë lifate mago enëne seme fleflesuna mëtaitana. Tu mana tetokëfe na kë lifeku tlilego metle. Këme nêgeme bu ahoju këme hoho mëtla. Na bu seme iniwa ahoju labuwa mëtlenuna, sebo ahojume sa nanugulame. ³ Pol ahoju hoho ti glo tle na ahoju mëta gogwa tole. Na tëbo taiju, kë ahoju hoho ti kufe ke telulamë. Na kë taijume ahoju atëte tëselëkakë. Na latohowa tëkakëyamë na Polme toba mëta tëtou tlële. Na mana kesi tokwakëyatle. ⁴ Na kë lifeku mago oneho kë taiju Polme tobame kë tëtou tëglëlebë mehwi motlotla, tobame mana kesi tlatle, na bu blalo megëgali lamëtla, “Hwi elolo. Ebë ho kë nêgebë, mogo nalë kë tëtëkle tëtakefëbë ho. Bu nutu mëta gli hana tle. Kwe tëbo loweneme kofayame kë tëbo lotokwefëmebë goto, bu kë home mogo nalë tëke nalogloleme.” ⁵ Kwe Pol kë taijume ahoju elëme bile tetokwakë na bume li wesibiha fata hana tletle. ⁶ Oneho bu melowene lamëtletla, “Polbë ato sêse lëgletlemewa o bu hokweinawa mogo nalë letigomewa.” Na bu Polme mana yafe hwi motlokwefla. Kwe li wesibiha bume fata hana tletle. Këme nêgeme bu lowene hihijika mëtla na bu megali mëtla, “Kë ho ebë li goto tekwe nêge!”

⁷ Këbë ahoju labu lime kë tëgëbebë life, ebë kë afayobë eso hobë life. Bubë weniji Publius. Kë ho seme bubë lowa nêno tle na bu seme aona olë tafa tlenëna na ululu sle memutëtana. ⁸ Publiusbë bolijaya tako tëbo latle. Bu ato ahojutena, aliji tuna melatle. Na Pol bu belë tuju tle na Gotome takune tlole. Na bu toba gwa totatle na bubë ato sle tletle. ⁹ Pol bu melë tle, na kë afayo mago atowelili enëne fli mata Pol belë mitisiya na Pol bubë ato mata sle totometëme. ¹⁰ Iniwa oneho bu seme fleflesu mëtletëna na seme feilawa wesibi mana mëtlëna. Sebo aona yeme Malta afayo mëta tëtabëya na

sebo bume hune nêglame kofene. Na bu seme hi wesibi mëtlëna. Na sebo kë afolo tëgletëmabë wesibi mata mëtlëna. Na bu sibu lo mëta gogwa mëtletëna.

Pol Rom lifatewa tuhu tule

¹¹ Sebo li sibu lo mëta fëfe tla. Kë sibu lo kë nêgebë bu tako flelu yemena kë afayo mëta temule. Bu Aleksandria lifate mago. Na Sus gotobë tlemalë iko nêbalebë amtëtomba tina kë blëge blëge mototomabë, sibu lo yelu mëta mëtëbetëme. Na sebo kë lifate kile tla na tuja. ¹² Sebo Sirakyus lifatewa fwa tula na këme aona olë tafa tla. ¹³ Na sebo Sirakyus lifate kile tla na Regium lifatewa fwa tula. Jowa klabëwa tla na mana nêgemowelë mago flelu tisi. Këme nêgeme sebo Regium lifate kile tla na sebo tële olë tuja na Puteoli lifatewa fwa tula. ¹⁴ Na kë lifate mëta, sibu lo mago fëfe tëkaka. Na Kristen oneho flime esune tlëma. Na bu seme, buna tafa nanêglame takune motlona. Na sebo buna tobali ita tële olë këniji tafa tla. Na ita sebo bume hune totoma na Rom lifatewa tuja. ¹⁵ Kristen oneho, Rom lifate mëta kë tafa mëtlabë, gali aholokwane mëtla, “Polna kë misiya.” Na bu seme alêgeme esune mëglë nabëme mitisiya. Fliye bu seme Apiusbë wesibibë hihijika lifeku mëta esune mëtlëna na fliye Aona Ni Lo kë mëta mëglibebë lifeku mëta esune mëtlëna. Pol bume yafe hwi tlome na bu tako fleflesu metle na maninibona sle tle na Gotome fleflesu gali telokwakle.

¹⁶ Sebo Rom lifatewa fwa tula. Na Rom lifate mago gavmanbë ho megali tle, “Pol buwa li lome lalowa tafa lëgleme kwe wame home boblo logotomebë ho li bume mana sei lëlekefëtleme.”

Pol bu Jisasbë gali Rom lifateme të totle

¹⁷ Pol Rom lifate mëta aona olë tafa tle, na bu Israelbë afenëbonibë eso enëneme mana gali telokwakëme, bu belë migisitla namêglame. Na bu mitisitla na Pol bume gali tlome, “Bobë afani, bo sebobë enëneme

hana tëbo totomë, na bo seboë semleninobë gali hana boblo totlë. Kwe Israelbë afenëboni, bome Jerusalem lifate mëta wakalabusu mëtëtana. Na bu bome Rom lifate mago gavmanbë toba mëta gwa mëtëtana. ¹⁸ Na kwe, Rom lifate mago gavman, Israelbë afenëboni, bome blawa kë so mëtëtatë nabë gali aholokwane motlona. Kwe bobë li fëye wesibiha, hwi hana motlotëna na megali hana mëtla, 'Bume lalowa, mogo nalë tëkle etlo.' Weye. Këme nêgëme bome kalabusu lo mago jine namëgelëkakëname fene. ¹⁹ Kwe, kë Israelbë afenëboni, bome kalabusu lo mago jine mëglë nabë gali boblo mototla. Na bo gali fëye mago fa nogotlëmene? Këme nêgëme, bo megali telë, 'Bo metole nanelë, bome blawa kë so mëtëtatë nabë gali, Rom lifate magobë eso ho, Sisar, saaholokwane loglonëme.' Kwe bo kë Israelbë afenëbonime, tëbo gali noglomëme nane tisi. ²⁰ Këme fwa nêgëme bo some këme gali nolëyo, bome kë kalabusu mëgëtanabë wesibi lowene sle naegletelome. Tako tafa watokwëija, na sebo, Israelbë afenëboni, seme lëgaitanabë home, Goto jine gali kë lëgelëbaklebë home, mana ekë hwi nëlekefëtle. Na bo melowene nanelë, 'Goto jine gali kë lëgelëbaklebë ho wafi tisi.' Na kë loweneme fwa nêgëme, bome këme kalabusu mëtëtana."

²¹ Na bume gali motlola, "Judia provins mago ho, bu jubë loweneme pasëna seme hana gali mëtelëbakëna. Na Judia provins mago ho li, sebelë, jubë li tëbo galiha, hana tehitëna. ²² Kwe lebutako enëne, li life li life mago megali lamëtkefëya, 'Jisame lowene sle mëglekefëtlabë enëne bu tëbo enënemu.' Këme nêgëme, sebo jubë lowene mago lowene aholokwane sle nanëgletëyome."

²³ Na kwe bu olë li aniji motlola, Polbë gali aholokwane namoglo-labëme. Na kë olëna, lebutako oneho, Pol kë mëta kë tafa lëglebë lowa loko motokwëija. Na Goto bubë onehome, eso home, kë tafa

lëgletëmebë galime, Pol okokwe sle tlo me. Na bu, Moses, Jisabë gali kë yahi tëgletlebë, galime mata okokwe tlo me. Na Gotobë lowene mago gali kë të mototokweflabë enëne, Jisabë gali kë yahi mëtletlabë galime mata okokwe tlo me. Pol metole latle, oneho melowene namëglame, "Jisame kë gali mëgletlabë gali nêgali galimu." Pol bu olobalëmu oto tëglebë na olë ki na loko metleblemu. ²⁴ Na kwe fli enëne Polbë gali melowene sle lamëtletla, "Bubë gali nêgali gali fe." Kwe fliye melowene hana mëtla. ²⁵ Na bu blalo momata mëtlelogwaya. Na Pol bu li galime mana gali tlo me, "Gotobë Amtëtomba, Gotobë lowene mago gali të totokweflebë home, Aisaiame, gali metëglële latle. Na kë gali kë nêgebë nêgali gali mu. Na Aisaia kë gali seboë semleninome gali tlo me. Bu megali latlole, ²⁶ 'Ju kë oneho belë ejume na ju megali elomeme, "Sobo gali itaita aholokwane eglekefëtelome kwe sobo kë gali wayobë lowene sle hana egletelome. Na sobo itaita hwi eglokweflome kwe sobo hwi sle hana eglolome." ²⁷ Kë enënebë lowene wakalëlego tletëme. Na Gotobë gali aholokwaneme wafi tëboijiwa mletla. Na Goto kë totomebë wesibi bubë nabana hwi moglomabëme tëboijiwa wamla. Kwe bu Goto kë totomebë wesibi hwi sle moglomana na Gotobë gali aholokwane sle mëglana, na kë wayo gali lowene sle mëgletlana, kwe bu tëbo lowenebë kile mlame na aholokwana ti mlame. Na bu bo belë misiyame na bo naitamëme na bume sle notomëme."

²⁸⁻²⁹ Na Pol megali latle, "Sobo sobobë semlenino fenene, Gotobë gali aholokwaneme metëbojiwa lalo. Këme nêgëme bo some këme gali nëlëyo. Goto onehome nëno lëglebë gali, Israelbë afenëboni mëtabëya jwa mëglabë enëneme wafi telëkakëme. Kë enëne bu aholokwane mëglame."

³⁰ Pol bu, li lo mëta, Rom lifate mëta, tële tlibutu tafa tle. Na bu kë lo bolijayame baliti tlëkefle, bu kë lo mëta tafa nalëgleme. Iniwa oneho, Pol belë kë mitisikefëtlabë, Pol bubë lowa

flefesuna nëno tlekëfe.* 31 Na, Goto bubë onehome, eso home, kë tafa lëgletëmebë galime Pol okokwe tlok-wefëme. Na bu Tako Ho, Jisas Klaisbë galime lebutako onehome okokwe tlok-wefëme. Na bu kë gali tëme uli hana tle. Na ho liha bume lëkle hana totle.

* **28:30** Fli lowene ho bu melowene lamëtla, li gali mana lëbe kë gali mëta. Kë gali melë lëgëbelalële, “Pol bu kë galime wagali tle. Na Israelbë afenëboni bume kile mototla na mutuja. Na bu blalo kë galime feilawa momata mutula.”

Filipai Polbë pasë, Filipai onehome kë yahi tëgletëmebë

*Pol Filipai lifate mago Kristen
onehome fleflesu tletëme, bume kë
mëtailabëme*

¹ Bo Pol na Timotina, sebo Jisas Klaisbë wege ho. Sebo some, Filipai lifate mago Kristen onehome na lotu mogoutatlabë eso enëname na lotu wegeme kë mëgaitobë enëname pasë ekë yahi nëkeketëyo. ² Bo sebobë aya Gotome na Tako Ho Jisas Klaisname itaita takune nanolokwefëmë, some maninibo tli lowene namëglëyome.

Pol Gotome fleflesu galina gali tlole

³ Iniwa olë, bo some kë lowene nëglekefëtëyobë, bo bobë Gotome megali nanolokweflë, “Bo bobë Gotome mefleflesu gali nanolokweflë, yahala fëyemene. ⁴ Iniwa olë, Goto some lëgaitobëme, bo gëgali nanëlelekeflë, bo fleflesuna gëgali nëlelekeflë. ⁵ Automemu bo sobelë Jisasbë gali kë tëgehilebë, sobo bome kë gali tëme taitana, na sobo bome mana ekë aitagina. Na bo some tako fleflesu këme nëlekefëtëyo. ⁶ Bo melowenemu nanelë, Goto sobobë lowene mëta lale tafa lowenebë gwa tëtätëyo. Na kë lale tafa lowenebëme mana lalaitakefëyo. Na Klais Jisasbë ligisi olëna bu kë lowene mana slemu sle lëgëtatëyome. ⁷ Sobobë maninibo mago mu. Këme nëgëme, bo some këha lowene nëgletëyobë ebë lalemu. Kë wege, Goto bubë tole-nawa, bome kë tëglënebë, sobo bona kë wegeme iniwa kahwë slemu latla. Bo kalabusu lo mëta kë tafa nëgelëbë o bo kalabusu lo mëta tafa jwa tëgelëna, bo onehome, Jisasbë gali esobëme, gali sle tломë. Na bo Jiasme kë lowene sle namëgletlabë ëhwati gali onehome okokwe trome bu Jiasme lowene slemu namëgletlame. Na

sobo bona mana kahwë sle tëglana. ⁸ Bo some iniwame maninibomu nanëletëyo, Klais fene maninibo tletëyo na bo some ita hwime këme tole nëletëyo. Goto lowene lalële, bo some nëgali gali gali nolëyo.

⁹ “Bo Gotome megali nanolokweflë, fli enëname tole egletemobë lowene, sobobë lowene mëta, takowa nalëgebetëyome. Na kë lowenebë, Gotome kë lowene sle egletelobë lowenebë, some laitome. Na sobobë lowene lalowa nalëbetëyome. Na sobo kë lowenena wesibi melowene naegletemome, lale wesibi o tëbo wesibi. ¹⁰ Sobobë melë egelona, na Klaisbë ita ligisibë olë fo lokoketlana kwe Goto some mehwi lëglëyome, lale onehomu. Na bu some li fëye tëbo wesibiha hana hwi loglotëyome. Na sobo iniwa lowene, lowene sle naegletemome na fëye lowenebë lale lëgebena kë lowenebëwa esogo sle elëlelome. ¹¹ Na iniwa lale lowene Jisas Klais mago kë migisibë, bu somëta nohwa mëgëbetëyome.” Na iniwa oneho bu kë lowene somago hwi mololame na Gotome fleflesu mletlame na megali mlame, “Goto bu tako homu. Iniwa wesibi bubë lokwalëfe mëta fwa mëbetle. Bu lale mu.”

*Pol kalabusu lo mëta tafa tëglana,
fli ho Jisas Klaisbë lale gali mana të
mëtëtagula*

¹² O Kristen afani na oneglëni, bo metole nanelë, sobo melowene egelome; ebë wesibi bome kë fata mëtëgletenëbë, bu Jisasbë lale galime lëkle hana mottle. Weye. Kë wesibi, Jisasbë lale gali fli oneho betelë fifiji tëglebëme lataitale. ¹³ Iniwa wame home boblo mogotomabë enëne, eso ho Sisarbë lo mëta kë sei mëglëkeflabë, na fli enëne mata, bu melowene lamëtla; bo Jisas Klaisbë gali të nëtakefëtëlëme nëgëme, bome kalabusu lowa këme tuku mëtla. ¹⁴ Na lebutako Kristen oneho bome melowene mëtletëna; bo kalabusu lo mëta tafa telë. Na këbë lowene bume Jiasme anisasana lowene sle mëgletlabëme taitame. Na bu uli

mëtlëkëla na Gotobë gali anisasana të mëtëtatla.

¹⁵ Fli oneho, mehwi lamëtla, fli oneho bobë wenijime fle-flesu lamëtletëna. Na bome tëbo mëgëtanabë lowene fa mototla na bobë weniji lëlë mogotlabë lowene mata fa mototla. Na bu metole lamëtla, oneho bubë wenijime fle-flesu namëgletëmame. Na këme fwa nëgame, Klaibë lale gali këme të mototla. Kwe fliye bu lale lowenamu tafa mla na Klaibë lale gali këme të mëtatla. ¹⁶ Kë oneho bome tole lamëtletëna na melowene lamëtletëna, Goto bome melëme aniji tlonë, Klaibë lale gali esobëme, onehome okokwe sle nanoglomëme. Na bume lebotane sle nëtatëmëme, kë gali nëgali galimu. Na këme nëgame bu Klaibë lale gali këme të mototla. ¹⁷ Kwe bobë weniji kë lëlë mogotlabë oneho metole lamëtla, fli oneho bume melowene namëgletëmame, “Bu lale enënemu.” Na bume fleflesu na mletëmame. Na bu Klaibë lale gali këme të mëtëtagula. Kwe bu lale lowene nane fa mototla. Weye. Bu metole lamëtla, bo kalabusu lo mëta kë tafa nëgelëbë, bo hobota feilawa fa nanogotlëme. Këme nëgame bu melë këme mëtla. ¹⁸ Kwe oneho Klaibë gali lale lowenena të mogotlana o tëbo lowenena të mogotlana, bo këbëme welili hana nëletemëme. Bo melëme fwa fleflesu nelë, bu Klaibë lale galiwa të mëtagutlame. Na kwe këbë bome fleflesu lëgëtanëme.

Pol melowene latle, “Bo tuja ato mana tafa nelëme na Filipai lifate mago Kristen onehome naitamëme”

¹⁹ Na bo kwe fleflesuwa nëglekefëme. Bo melowene nëgelëme nëgame, Iniwa olë sobo Gotome takune elok-weflo, bome lëgaitanë nalëgleme. Na Gotobë Amtëtomba, Jisas kë tëglëtabë, bobë lowene kalëlego lalëtakefëtenë. Na këme fwa Goto bome laitanëme na bo kalabusu lo kile nelëme na manawa ho tafa nanëgelëme. ²⁰ Këme nëgame bo metole nanelë, bo li tëbo wesibiha hana nëgelëme, na bo këme tiniiji nëlëme. Hanane. Kwe bo metole

nanelë, elë na tokwafe bo Gotobë lale gali tëme uli hana nëgelëme. Bo gli nëgelëna o tuja ato mana tafa nëgelëna, iniwa wesibi bo melë kë nëgelëbë, Klaisme fwa nëlelele. Na kë iniwa wesibi bume weniji tako melëlele. ²¹ Bobë lowene melë lëgëbelalële, Bo tuja ato mana tafa nëgelëna, iniwa wesibi bo melë kë nëgelëbë, kwe Klaisme fwa nëlelele. Na bo gli nëgelëna kwe bo lale tafa fa nogujetlëme na bo ëje kë tafa nëgelëbë tafame boblo logotleme. ²²⁻²³ Kwe bo tuja ato mana tafa nëgelëna, bo melowene nanelë, bo feilawa onehome, Klaibë lowene esogome mëglelëtlabëme okokwe noglomëme. Bo gli nëgelëna o tuja ato mana tafa nëgelëna, bo melowene hana nelë, fëye lowene esogo nëglelëlelëme? Bome kë tële lowene, tabaha kiki mële. Bo gli nëgelëbëme. Na Klaïsna tafa nogulobëme, tako tole nanelë. Kë kwe lalemu. ²⁴ Kwe bo some lowene nëgletëyome nëgame na bo melowene këme nelë, bo tuja ato tafa manelë, some nëgaito nanëgelëme. Kë kwe lalowamu. ²⁵ Bo melowene slemu nanelë, bo some nëgaitobë wege mana lëbe. Këme nëgame bo melowene nanelë, bo tuja ato mana tafa nëgelëna na some feilawa nëgaitome, Jisame esogo eglelëlobë lowene, lowene sle naegletelome na këbë loweneme fwa fleflesu naegelome. ²⁶ Na ita bo sobelë nigisina na sobo bome hwi enonana, sobo Jisas Klaisme fleflesu eletelome, bu bome sobelë ita leglesunëme nëgame.

Pol, Filipai lifate mago Kristen one-hobë lowene kalëlego tëtatëme

²⁷ Tako wesibi melë. Sobobë asë sle etlome na Klaibë lale lowenewa esogo elelëlelome. Sobo melë egelona, na bo some hwi noglok-wakijona o bo tafa nëgelëna na galiwa aholokwane negletëyona, kwe bo melowene nëgletëyomemu, sobo Jisame lowene sle lowene mana esogo elelëkeflo na sobo yonane mëta mana tafa elekefo na jowa lowene

nawa Klaisbë iniwa wege fa etlome. ²⁸ Bo some megali nolëyo, some kë wame mëglëyobë enëneme uli asa eletemo. Bu some mehwi mëglëyona, sobo bume uli hana eletemo, kwe bu melowene namëglame, Goto seme tëbo lëgëtanamefe. Kwe Goto some ululu sle lëgëtome na lale tafa lëlelëyome. ²⁹ Aholokwane elo. Goto some tèle lale lowene wafi tlëyo. Li lowene, Jisas Klaisme lowene sle egletelobë lowene. Na li lowene, Klaisme lowene sle egletelobë mëta hobota eglibe telobë lowene. ³⁰ Sobo ëtani bome wafi hwi tlon, bo Jisame kë lowene sle nëgletelëbë wame mëta tafa telë. Na sobo bobë gali waaholokwane telo, ëje bo kë wame mëta mana ekë nëtabë. Na ëje sobo elili kë fa egotlobë, sobo melowene egelome, bona iniwa Jisame kë lowene sle nëgletlabë wame mëta nëtabëya.

2

Klaisbë lowene fene tëbetle, melowene egelome

¹ Klais sobobë lowene kalëlego malëtatëyo. Bu some feilawamu tole lalëletëyo na këme nëgeme sobobë lowene lëgëbetëyo sle këme lële. Sobo Gotobë Amtëtombabë lowene mëta tafa egelome nëgeme, sobo flime këme maninibo eletemo na sobo flime mata këme tole eletemo. ² Kë gali nëgali gali nëgebë kwe sobo melë saelo, sobo iniwa jowa lowenenawa yonane elome. Na sobo iniwa jowa lowenenawa, ho flime tole egletemobë lowene esogo elelëlome. Na sobo iniwa jowa lowene nawa tafa elome. Sobo melë egelona kwe sobo bobë lowene feilawa fleflesu egëtatëname. ³ Sobo some fwa asa lowene elo. Na sobo fli enëneme melowene asa eletemo, sebo bu fene këha enëne nane, sebo kwe lalemu. Sobo flime salokwalëfe eletemo, na bume melowene eletemome, bu sebo fene këha nane bu kwe lale enënemu. ⁴ Sobobë wesibiwa asa ululu sle etomo. Weye. Sobo fli enënebë wesibi

mata ululu sle egotometemome. Na bume aitamome tafa sle namëglame.

Klais atwati hoha kë fata tëglebëye, bume fwa hana lowene tle na Goto bume tako fleflesu këme tletle

⁵ Sobobë lowene Jisabë lowene fene tëbetle, këha salëbetëyo. Bubë lowene melë: ⁶ Iniwa wesibi fata jwa mëtlana Jisas bu Goto fene metafa latle. Kwe bu Gotoha tafa lëglebë lowene tègehole hana tle. Weyewa. ⁷ Bu Gotoha tafa tëglebë lowene kile tle na home manawa wege lëgletëmebë hobë loweneha tëbetle na life mago hoha fata tle. ⁸ Na oneho bume mehwi motlola, life mago ho fenene. Na bu bume fwa hana lowene tle kwe iniwa onehome lokwalëfe tletëme na Gotobë galiwa esogo tlelëtle. Bu melë tle na bu mana gli tle. Bu kë gli tëglebë, bume tëbo homeha ti mëta bu mëta. ⁹ Bu mële tëgleme nëgeme na Goto bume këme fleflesu tletle. Na bume këme no tlële, buna eso home weife tafa namëgelome. Na Goto bume iniwa wesibime eso home tafa lëgletëmebë weniji tlële. Kë weniji kë nëgebë iniwa onehobë wenijime boblo lalotometëme. ¹⁰ Bu Jisame kë weniji këme tlële bu metole tëgleme nëgeme. Iniwa hëhëna wesibi, Heven life mëta kë mëtabebë, na life mëta kë mëtabebë na life lokwalëfe mëta kë mëtabebë, bu iniwa Jisame sëkefo miti tafa mletlame. Na Jisabë lokwalëfe mëta fwa metabëtlame. ¹¹ Na bu iniwa megali mlame, “Jisas Klais bu tako homu. Iniwa wesibi bubë lokwalëfe mëta fwa mëbetle.” Na kë lowenena, bu melë lowene olafa motlame, “Goto bu lalena Tako Ho mu.”

Sebo elulego tabo fene menëgëtabëame. Ohehome, Goto belë lugujubë alëge lebotane nanëgëtatëmame

¹² O yabeni. Bo sobona ëtani kë tafa tëglabë, sobo bobë gali aholokwane tlon na esogo tlelëlo. Na ëje bo sobona nane tafa nëla. Bo kakë tafa nulë. Kwe bo some megali nolëyo, ëje mata sobo bobë gali saesogo sle elelëtëna. Goto some bubë maninibo

nawa tēbo lowene mago wafi nēno tle. Na sobo tutune lowenena bume fwa lokwalēfe etelome. Na sobobē lowene sle etomome. Na bu kē gali sle tēglebē wesibi fame fwa, afutukuna wege elekefētēmome. ¹³ Melēme nēgeme. Goto some, bubē lowene esogo eglelēlobēme huhuju lalētakefēyo. Na bu some afutuku lēlēlēkefēyo na lalaitakefēyo, bubē tolewa esogo naeglelētelobēme.

¹⁴ Na sobo iniwa wesibi melē kē egotomobē, sobo flalego tafa naeglelēmome. ¹⁵⁻¹⁶ Sobo melē egelona kwe sobo Gotobē nēbalemu tafa egelome. Na oneho some li fēye wesibiha hwi hana moglotēyome. Na Goto mata some li fēye wesibiha hwi hana loglotēyome. Na sobo Klaisbē lale gali egehōlo sle elome. Na sobo ebē life mago tetēbo lowene kē esogo mēglelēkeflabē onehobē naba li mēta kilego tabo mēta lamo fene u elamē. Kēme nēgeme, sobo melē egelona, na Klais onehome hwi sle loglomebē olē fata lēglena, na bu some li tēbo wesibiha hana hwi loglotēyona, kwe bo kēme tako fleflesu nēgletēyome. Na kwe bo melowene nēgelēme, iniwa wesibi, bo sobobē ku mēta melē kē togotomēbē, blawa hana kēkē telē. ¹⁷ Bo lowene hana nelē, Tokwafe ho bome mogo nalē tēkle mēgētaname nawa o hanane nawa. Fēyeme tēkle mēgētanamene. Melēme nēgeme bo Jisasbē gali tē nēgētagukefētēlēmē nēgeme na sobo na fli enēne kē gali lowene sle egletelome nēgeme. Kwe melē nēgena kwe bo fleflesu nēgelēme. ¹⁸ Na sobo mata fleflesu elo, sobo bona fleflesu nēglame.

Pol, Timotime Filipai lifatewa jine lēgelēkaklebēme, gali lēle

¹⁹ Tako Ho Jisas bu tole lēglena kwe bo Timotime sobelēmē hokweinawa jine nēgelēbāklēmē. Na ita bu bo betelē lisime, bu bome sobo kē tafa egelobē lowenebēmē gali nalēglēkwakinēmē. Na bo kē gali aholokwane nololēmē na bo fleflesu nelēmē. ²⁰ Bobē li mēta, Timotiha ho li tafa hana lēle. Weyewa. Timoti

bu bona yonane sle nanelo na bona jowa lowene mēta fwa tafa nelo. Na bu some kē maninibo lēglekefētēyobē maninibo, bobē fene lēbe. Na bu some lēgaitome feilawa lowene lēlekefētēyo. ²¹ Fli oneho, bume fwa lowene melekefēya. Na bu Jisas Klaisbē wege fabēmē feilawa hana tole mletla. ²² Sobo Timotime wafi lowene etelō. Bu lale homu na bu bume fwa lowene lēglebē lowenebē mēta hana lētabe. Sobo bume walowene etelō, bu bome Klaisbē lale gali tē nēgētātēmēbēmē lalaitakefēnē, nēba bolijayame fene laitakefle. ²³ Kēme nēgeme bo bume sobelē jine nēglēlēmē kēme tole nelē. Kwe bome kalabusu lo mēta fata gali kē lēgletenēbē wesibi afina lowene nēletelēmē na bo Timotime sobelē hokweinawa mana jine nelēbāklēmē. ²⁴ Bo melowene nanelē. Tako Ho bome lēgaitanēmē, na ho bome kalabusu lo mago jine mēglēname nounou. Na bo mana sobelē nigisime.

Epafroditusme Filipai lifatewa jine lēgelēkaklebēme, Pol gali tle

²⁵ Bo Timotime tokwafe jine nēgelēbāklēmē kwe ebē olēna bo melowene nanelē, bo sebobē afame, Epafroditusme afina sobelē jine nelēbāklēmē. Bu bona Klaisbē lale gali wegeme wege nelo. Na Klaisbē lale gali tē wegebē hobota weife fa notokweflo. Sobo bome lēgaitanēbēmē kē jine tēgelēbaklobē. ²⁶ Bu some tako maninibomu lalēletēyo. Na some hwime tolemu lalēletēyo. Na bu melowene lalēle, sobo bubē gali waaholokwane tletelo, bu tēbo latle. Na kē lowenebē, bu some maninibo lēgletēyobē lowene, bubē lowene mēta takomu lēbetle. ²⁷ Nēgalimu. Ēbame bu tēbo latle na gli lēgleme kofene. Kwe Goto bume maninibo tletle. Na bume gli afe kē tēglebē mago sle tle. Na Goto bume fwa nane maninibo tletle. Weye. Bu bome mata maninibo latletenē, Epafroditus gli lēglebē welili bome boblo lēgētānēlime. ²⁸ Bo bume sobelē jine nēgelēbāklēmē tole nanelē, sobo

bume ita hwi naeglolome na fleflesu eletelome. Epafroditus sobona tafa egelona, sobobë maninibo lowene mana satli lëbetëyome na tafa sle elome. Melë nëgena, kwe bobë maninibo lowene mata tli lëgëbetenëme na tafa sle nelëme. ²⁹ Sobo Epafroditusme, Jisasbë weni-jina no elëloime na fleflesu eletelome. Na sobo këha home mata mefë naegotomome, “Lale homu.” ³⁰ Bu Jisas Klaisbë wege fa togotlena, ëjeha gli lëleme. Kwe bu bume fwa nane lowene tle. Weye. Bome tegaitanëbë wegeme fwa, sobo kë jine tégelëbaklobë wegewa lowene sle tle. Sobo kakë tafa egulome nëgeme na sobo bome habëna egaitanamene? Këme nëgeme bume këme jine telëfaglo bo belë.

3

Klaisme kë lowene sle mëgletlabë oneho, bu lalemu

¹ O Kristen afani na oneglëni. Bobë lowene mëta li gali mana lëbe. Kë galibë melë. Klais somëta walëtabetëyo, na sobo bume fwa safleflesu eletelo. Autome bo some gali li, pasë mëta wayahi tletëyo. Na bo kë gali some ita yahi nëgletëyobëme, kokasa hana nelë. Ebë gali some lëgaito sle nalëgleme. Ho some sogëna mogleyolime. Ebë gali melë.

² Ato jibo tëtälë gali kë të motokweflabë enënebëme ululu sle saelo. Kë enëne kë nëgebë fifli tabo amale fenene. Sobo bubë gali asa aholokwane elomo, sobobë lale lowene hihijika mëgletëyolime. Kë tëbo enëne megali lamëlekefëya, “Sobo Judabë afenëbobë tafa sle gali iniwa esogo jwa eglelëlona na ato jibo tëtälë jwa egotomona kwe Goto some lale oneho fë hana logotome.” ³ Kë enëne bu Gotobë nëbalemu nane. Weye. Kwe sebo kwe, Jisame kë lowene sle nëgletlabë enëne, sebowa, Gotobë nëbalemu tafa nëla. Gotobë Amtëtombabë afutukuna, sebo Goto lotu nëlekefëtla na Jisame mata fleflesu nëlekefëtla. Sebo melowene

nanëla, sebo ato jibo kë tëtälë notomabë, kë wesibi, seme Gotobë naba lime lale tafa sle nëglabëme hana lëgaitaname. ⁴ Sobo aholokwane elo. Ato jibo tëtälë gali kë të motokweflabë enëne bu metëtane lamelekefëya. Sebo Judabë afenëbobë tafa sle gali feilawa esogo sle nelelëkefla na ato jibo tëtälë lowene mata esogo nelelëkefla. Na këbë lowene seme Gotobë naba lime sle mëtakefëna. Kwe këbë lowene onehome, Gotobë naba lime tafa sleme mëgaitamena, kwe bo feilawamu tëtane nëgebëmemu na ato jibo tëtälë gali kë të motokweflabë enëneme boblomu nogotomëme. ⁵ Bo ëtani kë esogo tégelëbë lowene, sobo lowene laletelo. Ètani beë bome kë fu tetanëbë, tobali ita aona olë tafa tlenënë na bu bobë ato jibo mana tlë mëtëtatëna. Bo Israelbë afenëbomu na bo Benjaminbë afenëbo mëta fata telë. Bobë ayana beëna bu Judabë afenëbo. Na bo Judabë afenëbo mago këme tafa nelë. Bo sigli telë na bo Farisi lotu eso enënebë lowene esogo tletëtëmë. Na Mosesbë tafa sle anebo gali esogo tletëlëmu. ⁶ Bo Gotobë wege fame feilawa afutukumu telë. Këme nëgeme, ëtani bo Jisame kë lowene sle mëtletlabë enëneme, feilawamu wame tlomë. Oneho bome Mosesbë tafa sle gali esogobëme, hwi moglonana kwe bome li tëbo wesibiha hana hwi moglotëname. ⁷ Ètani bo meweniji latelë, këbë lowene lalowa lëbewa. Bo meweniji latelë, kë iniwa lowene esogo neglelëmëna, bo Gotobë naba lime lale ho tafa nëgelëmefe. Kwe bo Klaisme yafe lowene sle tletelë na ëje bo ëtanifu lowene, tëbo wesibi fene mehwi nanolomë. ⁸ Bo Judabë afenëbobë tafa sle galime fwa nane gali nelë. Weye. Iniwa wesibi bo ëtani melë kë tégelëbë, bo mewenijiwa latelë, Gotobë naba lime lalowa nëgelëmewa. Kwe bo ëje kë wesibi kleli kibo fene mehwi nanolomë. Bo Klais Jisame melowene sle nëgletelëme nëgeme, bu bobë Tako Ho. Na bo kë loweneme fwa melowene nanelë, nëgali wesibimu. Bo kë iniwa tëbo lowene wahune telë, Jisame

fwa lowene slemu nanëkakatelëme. ⁹ Na bo bunamu lesili sle nanëgelome. Ètani bo melowene latelë, bo Judabë afenëbobë tafa sle gali esogo neglëlëna, kwe bo Gotobë naba lime lale ho fata nëgelëmewa. Kwe ëje bo kë lowene hana nelë. Weye. Èje bo melowene nanelë. Sebo Jisame fwa kë lowene nëgletlabë oneho, Goto seme mefë këme lëtana, "Lale oneho." ¹⁰ Bo metole nanelë, Klaisme lowene slemu nanëgletelëme. Goto bubë tako afutukuna Klaisme matëmatë mago huju totle. Na bo metole nanelë, bo kë afutukuna tafa nanëgelëme. Bo metole nanelë, Klais seme taitanabëme elili fene fa totle, bo mata bubë wege kë fa nogotlëbë mëta, këha elili mefa nogotlëme. Na bu fene gli tle, bo megli nëgelëna, kë kwe lalowa. ¹¹ Bo këha lowene mëta tafa nëgelëna kwe bo melowene nanelë Goto bome mata matëmatë mago huju lëgëtanëme.

Pol melëbëme afutuku tle, wege toulala elë fwa naluguleme

¹² Bo melowene hana nelë, bo Klaisbë lowene iniwa wafa totlë na bolale homu tafa nelë. Weyewa. Kwe Klais bome buha fatabëme këaniji toglonëbë, ëje bo këha fatame feilawa afutuku nëlekefëmu. ¹³ O Kristen afani na onëglëni. Bo melowene hana nelë, bo Klaisha wafata nelë. Weyewa. Kwe jowa lowenewa lebetenë. Kë lowene melë, bo ètani kë fa togotlëbë wesibi aholokwana ti sle nanëgelëme na tokwafe fa nogotlëbë wesibime fwa feilawa afutuku nanëgelëme. ¹⁴ Bo wege toulala elëme fwame feilawa afutuku nelë, na kë wege toulala mago wesibi fa nanogotlëme. Kë wesibi melë, Goto bome megali lolonë, "Ju bona heaven life mëta ëhwati tafa nëgelome." Klais ti mëta gli tle seme lëgaitana nalëgleme na nëno lëleme. Këme fwa nëgeme, Goto buna heaven life mëta ëhwati tafa nëgelome këme gali tle. ¹⁵ Sebo Gotome lowene nëgletlabëme. Na kë letitabo nëgletlabë ho, sebo iniwa jowa lowenewa neholame, na

wege toulala elëme fwame, feilawa afutuku nëlame, bo ëje fene gali nelë. Kwe somago fli, li lowenena nëgena kwe Goto some lale lowene lebotane lëtatëyome. ¹⁶ Kwe tako wesibi melë, sebo kë esogo nëglelëkeflabë lale lowene, Goto seme kë lebotane tëtatenabë, kë lowenebë nëgehola sle nëglame na aholokwana asa ti manëla. Weye!

¹⁷ O Kristen afani na onëglëni, sobo iniwa, bo kë esogo neglëlëkeflëbë lowene saesogo elelëlo. Sebo sobona kë tafa tëglabë, sobo sebo këtafa tëglabë lowene wahwi tlotëna. Na sebobë lowene kë esogo mëglelëlabë onehobë lowene, hwi sle elete-mome na sobo bubë lowene esogo elelëtemome. ¹⁸ Bo some itaita gali wafi tlëyo na ita bo some nabatuna ekë gali nolëyo. Lebutako enëne tetëbo lowene esogo mëtlelëla na kë lowene seme melë lebotane lälëtana, bu Klaisme wame lamolola. Na Klais ti mëta seme tegaitanabëme, këgli tëglebë wege, tëbo namëgëtatlame fene. Bo kë enënebë lowene wafi hwi nolotemë. Bu sebobë lale lowene tëbo nametateyome. ¹⁹ Kë enëne, bubë ato kë tole mëgletëmebë lowenewa esogo esogo meelelëkefëma na këbë ato tole lowene bubë Goto fene mefata lamëlekefëtëme. Kë enëne ebë life mago wesibi fame fwa lowene melekefëya. Na bu ebë life mago tiniji wesibi fame fwa tako fleflesu lamelekefëya. Goto këha enëneme hel life mëta tëbo logotomememu. ²⁰ Kwe sebo, Jisame kë lowene sle nëgletlabë enëne, sebo këha enëne nane. Weye. Sebo kwe heaven life mago enëne. Na ëje sebo Tako Home Jisas Klaisme hwi nëletla, bu heaven life kile lolome na seme nënome letujuleme. ²¹ Klais, bubë afutukunawa, iniwa wesibi melë logotomeme, bubë lokwalëfe mëgëbetleme. Kë afutukunawa, bu sebobë tëbo ato jibo hihijika lëletëname na sebobë ato bubë lale ato fene mefata mëletëname.

4

Sebo yonane nëlame na fleflesu

nëlame na lale lowene mëta nëtabëyame

¹ O bobë Kristen afani na oneglëni, sobo tako hobë lowene esogo eleletelome na kë lowene mëta fwa satafa elo, bo ebë pasë fene yahi nëletëyo. Bo some tako tolemu nanëletëyo. Bo sobobë weniyanë hwi jwa noglometëyome nëgëme, na bo some këme maninibo nëlekefëtëyo. Bo sobo kë tafa egeLOBë gali yafe aholokwane telë na bo tako fleflesumu mëtletëyo na bo melowene latelë, Goto some metëglënëlatle, lale wesibimu fenene.

² Yuodia na Sintike, sobo tlemalë one aholokwane elo. Sobo Tako Home wafi lowene sle eletelo na sobo bubë lowene mëta weife tafa elo. Këme nëgëme sobolalo momata asa elelëkoïyo. Sobo jowa lowenewa saeholo na sobolalo yonane sle elome.

³ Na ju bona weife kë wege nëgelobë ho, bo jume gali nolë, ju kë tlemalë oneme, lale galina sasle etome, bu yonane sle namëgelome. Tlemalë bonamu kahwë sle latla, Jisasbë lale gali asë tëglelëtlabëmë. Klemen na bobë fli weife wege enëne mata bona kahwë sle latla, Jisasbë lale gali asë tëglelëtlabëmë. Kë enënebë weniji, Gotobë ëhwati bogo mëta mëbetëme.

⁴ Sobo Tako Hobë oneho etabo, ta sobo këbëme saflelesu elekefo. Bo some ita ekë gali nëlëyo, sobo fleflesu elo.

⁵ Sobo iniwa onehome alabujuwa tafa lowenena satafa elelëmo na bu melowene namëgletëyome sobo këha enëne. Sobo aholokwana asa ti elo, Tako Ho ligisi olë nounou ekë lëletle. ⁶ Sobo li wesibimeha asa tutune elo. Weye. Sobobë iniwa hobotame, Gotome fwa sagali elokweflo. Sobo Gotome fwa gali elokweflome na sobo bume itaita megali elokweflome, "Yahala fëyemene" na some lëgaitobëme takune elokweflome. ⁷ Sobo melë egeLona kwe Goto sobobë maninibo tli lëtakefëtëyome. Sobo Klaisme lowene sle egletelome nëgëme, Goto sobobë maninibo këme tli lëtakefëtëyome. Goto seme flalego lowene kë lëlekefë nabë, bu lale wesibimu. Na sebo kë wesibi esobëme

habëna lowene nëgletlamene? ⁸ O Kristen afani na oneglëni, bo some li galime gali nolëyo. Sobobë lowene nëgali lowenename lale lowenename fwa salowene elekefëtëmo. Na onehobë naba lime tafa sle egeLOBë lowene, na fleflesu kë egeLOBë lowene, na onehome yonane egletëmobë lowene salowene elekefëtëmo. ⁹ Iniwa wesibi bo some kë okokwe toglëyobë, sobo kë wesibiwa saesogo elelëmo. Sobo bome wahwi tlonä na iniwa wesibi bo fene telë sobo mata melë saelo. Sobo melë egeLona, kwe sobobë flalego tafa eso ho Goto lëtabetëyo, sobona tafa egeLome.

Pol, Filipai life mago Kristen onehome fleflesu tletëme, bume wesibi mëtlëlame nëgëme

¹⁰ Sobo bome egaitaname ita lowene telo. Këme nëgëme bo Tako Home tako fleflesumu nanëletelë. Ètani sobo bome tegaitanabëme lowene latlekefo kwe alëge hanane.

¹¹ Bo ebë galime kë gali nëgelëbë melëbëme nane, bo wesibime afolo nëletelëme. Weye. Bo alabujuwa tafabëme, wafi lowene nelë. Bo hobotana o hobota jwa tafa nëgelëna o wesibina o wesibi jwa tafa nëgelëna, bo këme hobota hana nëgelëme. Bo këha lowenebëme alabujuwa kaiselo tafa nëlekefë. ¹² Bo wesibi jwa ho tafa nëgelëna o bo lebutako wesibina ho tafa nëgelëna bo alabujuwa kaiselo metafa nëlekefë. Bo hi wesibina nëgena o bo hi wesibi jwa nëgena bo alabujuwa kaiselo metafa nëlekefë. Bo alabujuwa tafa lowene wafi lowene sle nëletelë. Iniwa wesibi bome kë fata mëglekefëtenëbëme bo alabujuwa tafa lowene wafi lowene sle nëletelë. ¹³ Klais bome afutuku lälëlelekefë nã na iniwa wesibi bome kë fata mëglekefëtenëbë, bo kë afutukuna alabujuwa kaiselo metafa nëlekefë.

¹⁴ Bo hobota kë fa notokweflëbëme, sobo bome kaiselo aitakefëna. Yahala fëyemene! Bo këbëme tako fleflesumu nanëletëyo. ¹⁵ O Filipai lifate mago Kristen oneho, sobo wafi lowene elo, bo Jisasbë gali të wege somëta

afina të totlë. Na sobobë Masedonia provins kile telë na li life li lifewa të tetagulëna, kwe kë mago Kristen enëne balitina hana mëtaitana. Weyewa. Sobowamu aitana. ¹⁶ Bo Tesalonaika lifate mëta tafa tēgelëna kwe sobo bome aholokwana hana ti telo, sobo bome balitina itaita lataitana. ¹⁷ Sobo bome melowene asa eletëna. Some balitime ita takune noglëyome. Weye. Kwe some melëme tole nëletëyo. Sobo onehome agaitamobë lowene, Goto hwilolotëyome na some fleflesu lëletëyome na ululu sle lëtome. ¹⁸ Sobo melowene egelome, iniwa wesibi, sobo bome Epafroditusbë tobame kë tēgelëbakë nabë, bo kë wesibi wafi glo telë. Eje bo lebutako wesibina tafa nelë. Bo li wesibimeha hana afolo nëletelë. Sobo bome kë tēgelëbakë nabë wesibi ebëha, ho kleli Gotome, fene ahøjume lëletle, lale sinikibo hëhë nalëgletleme na Goto bume fleflesu lëletleme. ¹⁹ Bo kë lotu nëgletelëbë Goto, bu iniwa lale wesibina lëtabe. Sobo Jisas Klaisme lowene sle egletelobë oneho nēgeme, këme fwa Goto some iniwa wesibi sobo kë afolo egletelobë some lēglëyome. ²⁰ Goto, bu sebobë Goto na sebobë Aya. Sebo bume iniwa olë fleflesumu nëglekefëtlame, bu Tako Homu nēgeme. Nēgali mu.

Pol Filipai onehome yawe galime gali tlome

²¹ Sobo Jisas Klaibë onehome bobë sēsle gali gali nolëyo. Na bona kë tafa nëglabë afani mata some sēsle gali gali mëlëyo. ²² Iniwa Jisasbë oneho ebë lifate mëta kë tafa mëglabë, some sēsle gali gali mëlëyo. Na Jisasbë oneho, eso ho Sisarbë lo mëta kë wege mëglabë, bu mata some sēsle gali gali mëlëyo.

²³ Bo metole nanelë, Tako Hobë, Jisas Klaibë maninibo somëta lëbeteyome na some laitome. Ta tei.

1 Tesalonaika Polbë oto pasë, Tesalonaika onehome kë yahi tęgletëmebë

Polna Tesalonaika lifate mago onehome tako maninibomu lamëtletëma

¹ Bo Pol, Sailas na Timoti, sebo aomalë, pasë some, Tesalonaika lifate mago Kristen onehome, ekë yahi nëletëyo. Sobo aya Gotobë na Tako Ho Jisas Klaisbë oneho. Bo metole nanelë, Goto na Tako Ho Jisas Klaisna bubë maninibo lowene matlëyo na flalego tafa naegelome.

Pol, Tesalonaika oneho, Jisame kë lowene sle mëgletlabë lowenebëme, fleflesu tletëme

² Sebo Gotome fleflesuna gëgali nelelekefla sebo some lowene nëglekefëtëyome nëgëme. Sebo some lowene nanëlekefëtëyo Gotome gëgali nëglelekeflana. Some aholokwana hana ti nëlekefëya. ³ Sebobë aya Gotome kë gëgali nëglelekeflabë, sebo some ebë wesibibëme lowene nëlekefëtëyo. Sobo Jisame kë lowene sle egletelobë lowene, some lalë wegebëme hujū lëtakefëyo. Sobo fli enëneme tole egletemome nëgëme na bume aitamobë wegëme këme afutuku elekefo. Sobo Tako Ho Jisas Klaisme melowene sle egletelome, tokwafe seme nënome ligisime. Iniwa hobota some kë fata lëglekefëtëyobë, këbë lowene bu some laitakefëyo, sobo tafa sle naegëlobëme. Na këme nëgëme, sebo Gotome këme fleflesu nëlekefëtla. ⁴ O Kristen afani na oneglëni, Goto some tako tolemu lalëletëyo. Na sebo some melowene nanëletëyomu, Goto some wafi aniji tolëyo, bubë enëne egëtabetelobëme.

⁵ Jisabë lalë gali, sebo some kë tęgëhitëyobë, somëta galiwa nane tisitëyo. Weye. Bu afutukuna Gotobë Amtëtombana iniwa tisitëyo. Na sebo Jisame kë lowene sle nëgletlabë lowene, sobo hwi sle tlometëna. Na

sobo seme melowene tletëna, sebo kë tęgogotlabë lalë gali, sebo melowene slemu nanëletla, nëgali gali mu. Sebo sobobë ku mëta kë tafa tęgëlabë lalë tafa, wafi hwi tlotëna. Sebo melë kë tęgëlabë, Jisabë lowene esogobëme, some lebotane tëtatëyo.

⁶ Sebobë tafa fene tēbekëfëtëna, sobo këha tafa esogo tlelëkeflo. Na Jisabë tafa fene tēbetle sobo këha tafa esogo tlelëkeflo. Sobo Gotobë lalë gali yafe aholokwane telo na esogo tlelëlo. Na fli oneho some mana kë wame motlëyo na lebutako tēbo wesibi some mana fata mëtletëyo, kwe sobo këbëme welili hana telo. Weye. Gotobë Amtëtomba some lataito na sobo Gotobë lalë gali fleflesuna aholokwane tletelo. ⁷ Këme nëgëme, Jisame kë lowene sle mëglekefëtlabë oneho, Masedonia provins mëta na Akaia provins mëta kë tafa mëglabë, sobobë kë lalë tafa hwi motloteyome nëgëme na bu melowene mëtłame, bubë lalë tafa fene lēbetëme, sebo mata këha tafa manëla. ⁸ Tako Hobë Jisabë gali, sobo kë tęgogolobë, kakëmu metugujutëyo latle, fwamo lego fene tiwatëyo. Na kë galibë, Masedonia provins magowa na Akaia provins magowa nane aholokwane motokouja. Weye. Sobo Gotome kë lowene sle egletelobë gali, iniwa life mago oneho mata aholokwane lamotokouja. Këme nëgëme, kë galibë, ita hana gali nëglame. ⁹ Sebo sobelë kë tīgisiyabë, na iniwa wesibi kë fata mëtlebë, oneho kë gali buwa tęg mëtëtagula. Bu some gali metë lametakefëtëyo, sobobë iniwa fëso fëso lowenebë aholokwana ti telo na unalëme lëgëtabebë Gotome fwa lowene eletelome na bume fwa tafa eletelo na bubë wege enëne tafa elo. ¹⁰ Bu seme mata megali motłona, Sobo Gotobë Nëbame melowene egletelome, bu heven lifate kile luguleme na ita lisime. Jisas bu seme, bubë glina Gotobë enisusu mago wafi nëno tle. Tokwafe Gotobë enisusu ligisina sebo nëgëtabëya sle nanëglame.

2

Pol Tesalonaika lifateme kë wege tēglebeme, gali tle

¹ O Kristen afani na one glēni, sobo seme walowene eletēna sebo sobelē kë tigi siyabē kēbē asēbē tuwati asē nane. ² Sobo seme wafi lowene eletēna. Sebo sobelē tigi siya jwa tēglana, Filipai lifate mēta sebo aomalē tako elili fa totlamu, na seme tako lēlafa lamētētanamu. Na sebo tako elili kë mēta fa totla. Na sebo sobelē kë tigi siyabē, Filipai lifate mago enēne fene wame motlona bu seme melē lamētēтана. Kwe sobobē Goto, sobobē lowene afutukumu latlētēmetēna na sebo kēbē wamebē kikli hana tēkakētlamu na sebo mana Gotobē lale gali tē tētātēyo. ³ Sebo some, Jisame lowene sle egletelobē galime, gali tolēyona, kēbē mēta yaya galiha hana gali tla. Sebo some meyaya lowenena nane tisi tēyo, sebo sobobē wesibi manawa glo nanēgletēyome. Weye. Na sebo some sogēna sogēname nane tisi tēyo. ⁴ Weye. Goto sobobē lowene wahwi sle tlotēna, na bubē tolenawa seme Jisabē lale gali tēbē wege tlēna. Kēme nēgeme sebo melēme nane wege nēla, oneho sobobē wegeme na fleflesu mēgletēname. Weye. Sebo metole nanēla, Goto sobobē lowene hwi loglomeme, na sobobē wege buwa fleflesu lēletleme. ⁵ Sobo wafi lowene tletēna sebo sobobē lowene lale lale galina hana sisile totometēyo. Weyewa. Na sebo lale lale galime mata gēgali hana tla na sobobē mēmaune lowene kēna lēlamu notlame. Weye. Goto bu mata kë wesibime walowene lēletēna. ⁶ Sebo kë wege kë fa nogotlabē, sebo melēme nane fa notla, sebo fli enēneme flesu ho fata nanēgletēmame o sobo seme flesu ho fē naetaname. Weye. ⁷ Sebo Jisas Klaisbē ēfalēbo enēne nētabetla na sebo flesu enēneha kēme nētābēya. Kēme nēgeme, sebo metole nēglabē kwe, some megali noglēyome fene, “Sobo seme aitana.” Kwe sebo some megali hana tlo lēyo. Weye. Sebo somēta kë tafa tēglabē, flalego

tafana tafa tla nēbale tokwētōkwē fenene. ⁸ Sebo some tako tolemu latletēyo. Kēme nēgeme Gotobē lale gali some fleflesuna kēme tlēyo. Sebo some Gotobē lale galiwa nane tlēyo. Weye. Sebo iniwa wesibi melē nēglabēme, wafi sagli tlēla, some nēgaito nanēglabēme. Sobo sobobē yabenimu tafa tēgelome nēgeme.

⁹ O kristen afani na one glēni, sobo wafi lowene elo. Sebo somēta kë tafa tēglabē na Gotobē lale gali kë tē tētātēyobē, sebo baliti glo wege mata anisasanamu fa totla. Melēme nēgeme, sebo wesibi kë balitina glo nanēglekefēyame, some sosalē nēgētōlime. Kēme nēgeme, sebo olēna klabēna sobobē tobana kēme wege tlekefēya, sobo seme wesibime egaitanalime.

¹⁰ Sebo somēta kë tafa tēglabē loweneme, sobo walowene eletēna na Goto mata seme lowene lalēletēna. Sobo, Jisame kë lowene sle egletelobē onehobē ku mēta, tafa tēglana, sebo Gotobē naba lime, lale tafawa latla. Na sebo li wesibiha kë mēta hana tēbo totla. Weyewa. ¹¹ Sobo seme lowene laletēna. Boli-jaya bubē nēbaleme fene laitame, sebo some melē tegaito latla. ¹² Sebo melē latla, sobobē lowene tufiji tēgētātēyobē gali tolēyo, na sebo some tegaito gali mata gali tolēyo. Na sebo some anisana megali tolēyo: “Sobo Goto kë tole lēgletlebē tafana satafa elo. Goto bu some wawe tolēyo, bu eso home kë tafa lēgletēmēbē oneho belē naekaklijome. Na bubē onehona iniwa lale tafa naegelome.”

Kristen oneho, bume kë fata mētletēmēbē tēbo wesibime boblo lam-ototoma

¹³ Sebo itaita kë wesibime mata Gotome fleflesu galina gali nolokwēfla. Sebo some Gotobē gali alako tē tētātēyona sobo melowene hana telo, hobē gali. Weye. Sobo melowene latelo, Gotobē nēgali galimu. Nēgali, kë gali ebē Gotobē gali. Na kë galiwa, sobo Jisame kë lowene sle egletelobē lowene, buwa sle lotokwefēmetēyo. ¹⁴ O Kristen afani na one glēni, Jisas

Klaisme kë lowene mëgletlabë oneho, Judia provins mëta kë tafa mëglabë fenene, sobo mefata lalo. Sobobë yabenino, some tëbo lamëtakefëo. Israelbë afenëboni, bu Jisame kë lowene sle mëgletlabë onehome, Judia provins mëta kë tafa mëglabëme, fene tëbo motokwefëma. ¹⁵ Kë Israelbë afenëboni, Gotobë ëfalëbo mago gali ëtani anebo kë mëtehilabë home mogo nalë tëtëkle mëtëtakefëya. Na bu mata, Tako Home Jisame mogo nalë tëkle mototla. Na bu seme mata hehë mëtletëna. Bu Goto kë tole lëgletlebë lowene boblo mëtakefëtla. Na bu iniwa onehome wame molokwefëma. ¹⁶ Kë Israelbë afenëboni seme yafe lëkle mëtëtakefëna, Goto onehome tafa sle logotomebë gali, Israelbë afenëboni mëtabëya jwa kë mëglabë enëneme, të jwa nanëtatëmame. Bu melëme tole jwa mëtëglame nëgëme, Israelbë afenëbo metabëya jwa kë mëglabë onehome Goto nëno lëgoukëfelime, seme këme lëkle mëtakefëna fene. Bu tëbo lowene feilawa fafa motokwefla na kë tëbo lowene bubë ëtanifu tëbo lowenëna iniwa loko lokweitëmeme. Këme nëgëme, Gotobë enisusu bume wafata tletëme na tëbo logotomeme nounou lalële.

Polbë lowene huju tletle, Tesalonaika lifate mago onehome ita hwi nalugujelëmeme

¹⁷ O Kristen afani na oneglëni, ëbame Israelbë afenëboni seme somago heheë mëtletëna. Na kë afolo olëna, sebo some maninibo latletëyo, bolijaya nëbale kakë tafa moguletlabë fenene. Sebo sobobë weniyane hwi hana nolometëyo kwe sobobë lowene somëta mana lëbetëna. Këme nëgëme sebo alëge feilawa hohwi këme nëtakefëtla, so betelë ita nigisiya nanëglame na some ita hwi nanoglëyome. Sebo some ita hwime tako tolemu nanëla. ¹⁸ Sebo sobelë nigisiyame tole nanëla. Na bo Pol, bo sobelë nigisitëyome yafe yafe nanëlekefë. Kwe Satan seme lëkle lalëtakëfëna, na sebo sobelë nigisiya jwa këme nëla. ¹⁹ Unina, sobobë

Tako Ho Jisas, ita ligisina, seme fëye wesibi, afutuku lëglelënamene, na sebo këna bubë naba lime fleflesuna nilibetlame. Sebo bume fëye wesibi lebotane nëgëtatlamenë bu melowene nalëgletëname, sebo bubë wege, wege sle latëtatla. Sebo kwe some fwa fleflesu nëletëyome. Na some fwa lebotane nëtome. ²⁰ Nakwefëyemene, sebo some fleflesu nanelekefëtëyo na lëlou nëlekefëtëyo.

3

Pol Timotime jine tlële, Tesalonaika lifate mago onehome lëgaitame nalëgleme

¹ Na kwe, sebo Atens life mëta tafa tēglabë, sebo some ita tako maninibomu latletëyo na melowene tletëyo, sebo some ita hwi nëglëyobëme, tako tole latla, këme nëgëme sebo hwi hana tla. Na sebo melowene tla, sebo Sailasna, Atens life mëta tafa nelome. ² Na Timotime sobelë jine nelëbaklome. Bu sobobë Kristen afa na bu Gotobë wege ho na sebo Gotobë wegeme ilawa wege nëla, Jisas Klaisbë lale gali ilawa të nëttagula. Sebo bume sobelë jine tlëlo, some lëgaito nalëgleme, Jisame kë lowene sle egletelobë lowene, esogo sle naeglelëtelome. ³ Na su wesibi some kë fata lëgletëyobë, somago fli tutune egelolime na Jisame kë lowene sle egletelobë lowene kile egelolime. Sobo lowene lalo, seme ebë su wesibi kë fata mëgletë nabë Gotobë toleme fata mëletëna. ⁴ Sebo sobona mana tafa tēglana, sebo some megali latlëyo, “Tokwafe seme lili hobota fata mëgletëname.” Na sobo melowene wafi eletelo, sebo fene gali tolëyo, kë tëbo olë seme wafata lëletëna. ⁵ Bo melowene hana tletëyo, sobo Jisame kë lowene sle egletelobë lowene mana eholo o hanane, na bo feilawa mehwi hana tëtëkakë. Këme nëgëme bo Timotime sobelë këme jine telëbaklë. Bo metutune tēgelëme nëgëme, Satan some susu lëgëtolime na sobo Jisame kë lowene sle egletelobë lowene aholokwana ti egelolime. Na sebo somëta kë

wege tëglabë wege manawa tëbo lëgletënalime.

Timoti lale gali tehitleme nëgeme, Pol këme fleflesu tle

⁶ Kwe Timoti sobona tafa tulo na some hune tuto na bu se mëta tokwafe fata tëkaki. Na sobo kë tafa egelobë lale gali seme të têtatëna. Bu some megali latletëyo, “Sobo Jisame feilawa mana lowene sle elekefëtelo. Na sobo fli onehome mata mana tole elekefëtemo. Na sobo seme mana lowene elekefëtëna, na fleflesu lalekefëtëna. Sebo some hwi nanogloyome fene maninibo nëlekefëtëyo, sobo mata seme hwi naegloname memaninibo lalekefëtëna.” ⁷ O Kristen afani na oneglëni, ho seme kë wame moglonabë, sebo kë wesibi mëta nêtabëya. Kwe sebo some meaholokwane latletëyo, sobo Jisame feilawa mana lowene sle elekefëtelo, na këbëwa seme taitana na sebobë lowene sle têtatëna. ⁸ Sebo ebë gali meaholokwane tla, sobo Tako Home Jisame mana lowene sle elekefëtelo. Na sebo flalego tafana këme tafa nëla. ⁹ Sebo some Jisame kë lowene sle egletelobë loweneme, lowene nëletëyo, na sebo Gotome fleflesu galina gali nanolokwefla. Sebobë Gotobë naba lime, sebo feilawamu fleflesu nëla. Na kë fleflesu galibëme Gotome habëna gali noglolamene. ¹⁰ Sebo klijina klabëna, Gotome itaita metakune nanolokwefla, bu seme lëgaitana nalëgleme, some hwibëme nigisiteyo nanëglame. Na sobo Jisame kë lowene sle egletelobë loweneme afole egletelona, kwe sebo some nanëgaitome, sobo Jisame feilawa lowene sle naegletelome.

Pol, Gotome gali tlole, bume lëgaitale nalëgleme, Tesalonaika lifate mago onehome hwime lugujutëme nalëgleme

¹¹ Sebo metole nanëla; sebobë aya Goto na sebobë Tako Ho Jisas Klais, sebobë alëge sle nalëtatëname, sebo some hwime nigisiya nanëglame. ¹² Sebo metole nanëletëyo. Tako

Ho Jisas, fli onehome tole egletemobë lowenebë, some feilawamu lëglëyome. Na sobolalo feilawa tole egletëgome na iniwa onehome mata tole eletemome, sebo some fene tole nëletëyo. ¹³ Sebo metole nanëla, Goto këbë lowenena, sobobë lowene lëgaitatëyome. Na sebobë Tako Ho Jisas, bubë onehona iniwa ita migisiyana, kwe Jisas some ëhwati tafa hwi egletelobë oneho hwi lëglëyome na sobo lale oneho egëtabome. Na kwe sebobë aya Gotobë naba lime, tëbo wesibiha hana lëgebetëyome.

4

Sebo Goto kë tole lëgletlebë tolewa sa esogo neglelëlame

¹ O Kristen afani na oneglëni, sebo some Gotobë tole esogo egletelobë lowene iniwa wafi okokwe tolëyo. Na sobo kë iniwa lowene esogo elelëkeflo, sebo fene gali tolëyo. Kwe sebo ëje some, Tako Ho Jisabë wenijina megali nanolëyo, sobo kë lowene anisasana itaita saesogo elelëkeflo.

² Iniwa gali, sebo Tako Ho Jisabë wenijina kë gali toglëyobë, sobo walowene sle eletelo. ³ Gotobë tole, melëgëbetle lalële: Sobo iniwa tetëbo lowene aholokwana ti elome na ëhwati oneho etabome. Sobo iniwa lisë lisë loweneme hëhele, egelome na aholokwana ti elome. ⁴⁻⁵ Sobo, jowa jowa, lisei lowene, sobobë lowene mëta kë mëgebebë lële etokwefëmome. Sobobë lowene, one mëmaunebë lowene mëta asa gwa etokweflo. Na bume lisei lisei egletëmobë lowene asa huju malëletëyo. Weye. Këha tole asa esogo elekeflo, Gotome lowene jwa mëgletlabë oneho fene melekefëya. Sobo Goto kë tole lëgletëmebë lale lowenewa esogo elelëkefëtélome. ⁶ Sobo Kristen afanime na oneglënime sosogëna asa elëmo na bubë ho o mëse liseë nabana hwi elotleme. Sobo melë egelona kwe sobo bume tëbo lowene mëta gogwa egelome. Ètani sebo some anisasana megali latolëyo,

“Iniwa ho bu këha wesibi mëglabëme, Tako Ho Goto, bume tëbo logotomememu.”⁷ Goto seme lisë lowene esogo nëglelëlabëme nane aniji tlonà. Hanane mu. Bu seme kë aniji toglonabëye melë: sebobë lowene bume nëglëla nanëglame na ëhwati lowenewa, esogo nanëglelëlame.⁸ Këme nëgëme, ho ebë gali boblo logotlena, kwe bu hobë galiwa nane boblo lëtatëme. Weye. Bu Gotobë gali boblo lëtatle, some bubë Amtëtomba kë lëglëkefëyobë Goto.

Sobo sobolalo yonane egelome

⁹ Sobolalo kë yonane eglelëgobëme, hana yahi nëgletëyome. Melëme nëgëme, Goto some onehome yonane eglelëmobë loweneme wafi okokwe tolëyo.¹⁰ Na ebë bu nëgalimu; sobo Masedonia provins mëta kë tafa mokoujabë Kristen onehome tole lalekefëtemo. Kwe Kristen afani na oneglëni, sebo some anisasana megali nolëyo, sobo këbë lowene feilawamu saesogo elelëkeflo.¹¹ Sobo aholabu lowene jwa na wame lowene jwabë onehoha tafa egelobëme, sa afutuku elo. Sobo fli enëne kë fa motokweflabë wesibime asa gali elokwefëmo. Sobo kë egelobë wesibiwa lowene elekefëtemome. Na sobobë tobana wesibi etomome, sobobë tafa këna egaitalo naegelome, ëtani sebo some fene gali tolëyo.¹² Sobo melë egelona, kwe sobo wesibime afolo hana egletemome na fli onehome, some mëgaitobëme takune hana eglokwefëmome. Na Jisame lowene sle jwa mëgletlabë oneho bu sobo kë tafa egelobë tafa hwi moglotëyona bu some fleflesu mëgletëyome na some megali mlame, “Lale enënemu.”

Tako Ho Jisas ita ligisime

¹³ O Kristen afani na oneglëni, sebo metole nanëletëyo, gigli kë mëtebëyabë Kristen onehome, wesibi fata lëgletëmebë wesibime, sobo lowene sle naegletemome. Sobo, gigli mëtebëyabë Kristen enëneme feilawa maninibo asa eletemo, Gotome lowene jwa mëgletlabë

oneho fene mla. Këbë enëne, gli mago huhuju mëglabë lowene hana lëbetëme.¹⁴ Sebo melowene nanëla, Jisas gli tle na gli mago huhuju tle. Këme nëgëme sebo melowene nanëla, Jisasbë afutukuna, Goto, Kristen onehome, gigli mago huhuju logotomeme na bu Jisasna iniwa misiyame.¹⁵ Sebo ëje kë të nëgëtatëyobë gali, ebë bu Tako Hobë gali. Bu melë lëgëbetle lalële. Tokwafe, Tako Ho Jisas ita ligisina, sebo tuja ato mana kë tafa nëglabë oneho, sebo afina hana nokwalame, Jisame oloba mëta esune nanëglëlame. Weye. Hanane mu.¹⁶ Goto feilawa we loglomeme, na bubë eso ensel mata we lëgleme na Gotobë funiji elamëme. Na Tako Ho Jisas, Heven life kile luleme na lisime. Na Jisame kë lowene sle mëtletlabë oneho, gigli kë mëglabë, bu afina huhuju mlame.¹⁷ Kë olëna, sebo tuja ato mana kë tafa nëglabë oneho na gigli mago kë huhuju mëglabë oneho, sebo iniwa Tako Ho Jisame oloba mëta esune nowelëlame. Na sebo Tako Ho Jisasna unaunalëme tafa nëlame.¹⁸ Na kwe, sobolalo, kë gali të etokweflome, sobobë lowene këna aitakefëmome.

5

Sebo Jisas ligisibëme sagli nëglëtlame

¹ O Kristen afani na oneglëni, sebo Jisas ligisibë olëme, hana gali sle noglëyome.² Sobo wafi lowene eletelo. Jisas ligisibë olë, bu lafatawa lëgleme, tokli ho klabë fene lisi.³ Oneho megali mëglame, “Ëje sebobë lale fleflesu olë lemotëna. Na seme wame moglonabë enëne hana tafa mla. Weyewa.” Kë olëna, bume tëbo logotomebë wesibi, lafatawa lëletëmememe, mëse nëba amlebo fene fale etamë. Na kwe bu kë wesibi hana elë mëglëlame.⁴ O Kristen afani na oneglëni, sobo klabë mëta tafa egelobë oneho nane, klelego kë egelome. Weye. Këme nëgëme some kë olë fata lëglëna klelego hana egletelome, ho tokli home hwime fene klelego lële. Weye.⁵ Sobo

iniwa, elulego mēta asē egelobē oneho. Sebo tlokofini mago oneho nane. Weye. ⁶ Kēme nēgeme, sebo lili sloslowa asa manēla. Gotome lowene jwa mēgletlabē oneho fene mla. Sebo sagli nēglēlame, Jisas ligisibē olēme mana hwi nēkaketlame. ⁷ Sebo lowene nanela, bu nini mēgebēyabē enēne bu klabē nini lamebēya. Kye mēglabē enēne bu klabē kye kye mēla. ⁸ Kwe sebo kwe kliji elulego mēta tafa nēglabē oneho. Sebo kēme lowene sle nēglame. Sebo Gotome lowene slemu nēletlame na fli onehome mata tolemu nēletēmame. Kē lowenebē seme, Satanbē tetēbo lowenebēme title lētaname, yako lamu kaba soldiamē fene title etole. Na Jisas seme nēnome ligisibē lowene, lowene sle nēletlame. Kē lowenebē seme, Satanbē tetēbo lowenebēme title lētaname, eso kaba soldiamē fene title etole. ⁹ Goto seme melēme nane aniji tlonā, Gotobē enisusu mēta tafa nēlame. Weye. Bu seme melēme aniji tlonā, sebo bō Tako Ho Jisas seme nēno nalēgleme. ¹⁰ Ētani Jisas wafi gli tle, seme legaitanabēme. Kēme nēgeme, sebo tuja ato mana tafa nēglana o sebo gigli nēglana na bu mana lisina, kwe sebo buna ēhwati atobēna tafa nēglame. ¹¹ Kēme nēgeme, sobolalo, kēbē lale galina gēgali elelēgome na sobolalo, sobobē lowene aitamome, sobo fene elekefo.

Jisame kē lowene mēgletlabē onehome, lale lowene fabēme, Goto lēgaitameme

¹² O Kristen afani na oneglēni, sebo some megali nolēyo! Some kē moutatēyobē na kē mēgaitakefēyobē hobē gali aholokwane elomome na esogo elēletēmome. Tako Ho, some kē mougoutatēyobē home, aniji tloime, some tafa namēglēlēyome. Bu some Gotobē galime okokwe lamolokwefēyo na sobobē tēbo lowene sle motokwefēmetēyo. ¹³ Sobobē kume, wege kē fa motokweflabē enēneme lowene eletemo na bume lale lowenenamu yonane elelēmome na bume tolemu sle eletemome. Na

sobo iniwa jowa lowene mēta fwa etabome na yonanewa elome.

¹⁴ O Kristen afani na oneglēni, sebo some anisasana megali nolēyo! Sobobē ku mēta, wege jwa kē tatafa mēglabē onehobē lowene anisasa galina sasle etometemo. Na tutune na uli kē mēglabē onehobē lowene alabuju galina sle etometemome. Na afutuku jwa kē tafa mēglabē onehome aitamome. Na sobo iniwa onehome alabuju elelēmome. ¹⁵ Oneho some gēglē mēglēlēyona, kwe sobo kofaya bume asa gēglē elelēmo. Weye. Iniwa olē sobo Gotobē onehome ululu etomome na iniwa onehome mata ululu sle etomome.

¹⁶ Sobo itaita fleflesu eglekefome. ¹⁷ Na sobo Gotome gēgali elelēkefome. ¹⁸ Lale wesibi o tēbo wesibi some fata legletēyona, sobo Gotome fleflesu gali nawa sa gali elokweflo. Goto metole lalēle, Jisasbē lowene mēta kē asē egelobē enēne, sobo kēha lowenewa saehokweflo. ¹⁹ Gotobē Amtētomba some li wesibi fa egotlobēme hujū lēgētona, sobo lēkle asa etlo. ²⁰ Na Gotobē ēfalēbo mago gali some kē tē mēgētātēyobēme heheē asa elo. ²¹ Kwe sobo iniwa gali kē aholokwane eglobobē, sobobē lowene mēta obobwelē elujuwetomome. Na iniwa lale gali, ehwēyome na esogo elelēmome. ²² Na sobo iniwa memelē tetēbo galime na tetēbo loweneme hēhele eglome.

²³ Bo metole nanelē, Gotobē maninibo tli lowene, buwa sobobē iniwa tēbo lowene sle malotometēyo, ēhwati onehomu fata naegletelome. Na bu sobobē atona lowenena iniwa ululu sle nalotometēyome, sobo lalowamu tafa naegelome. Na sebo bō Tako Ho Jisas ita mana lisime, Gotobē naba li mēta tēbo wesibi liha hana lēgebetēyome. ²⁴ Some bubē oneho fata eglome kē aniji toglēyobē Goto, bu kē wesibi some fata lēgētātēyome. Bu melēme nēgeme, bubē iniwa gali esogo lalēlelēkefle.

²⁵ O Kristen afani na oneglēni, sobo Gotome sagēgali elelēlo, bu

seme lëgaitana nalëgleme. ²⁶ Sebo Gome kë lowene nëgletlabë onehobë lowene fene lëbetëna, sobo fli Kristen afanime na oneglënime sasësle etomo. ²⁷ Bo Tako hobë wenijina some, anisasana megali nolëyo, sobo ebë pasë Jisame kë lowene mëgletlabë iniwa onehobë aholo li mëta sahwi elëyo. ²⁸ Sebo metole nanëla, sebobë Tako Ho Jisas Klais some ululu sle malëto.

Jems

Jems kë yahi tëglebë pasë

¹ Bo Jems Gotonabë, Tako Ho Jisas Klaisnabë manawa wege ho. Bo some pasë ekë yahi nëkeketëyo. Sobo we ita tële Israelbë afenëbo lilife lilife mëta kë nibowai ekoujobë oneho. Sobo lale klijimu.

Hobota wesibi kënegebëye, seme kalëlego mëgëtanabë wesibi

² O bobë, Jisame kë lowene sle egletelobë afani na oneglëni, some tetëbo hobota wesibi fata mëgletëyona, na sobo kë wesibi hwi eglomona, kwe sobo kë wesibi mehwi eglomome, fleflesu wesibiwa.

³ Këme nêgeme, sobo melowene egelome. Këha su kë nêgebëye some melëme olafa mëto, sobo Gotome lowene slemu laletelomu. Këha su some hobota eglibetembëme laito na ebë life mago tetëbo lowene aholokwana ti elome. ⁴ Na hobota eglibetelobë afutuku bubë wege yawe malolole. Kwe sobo melë egelona, sobo hobota eglibetelowa egelona kwe sobo ebona flo egelome, na sobo Goto kë tole lëgletlebë lowenebëme hana afolo eglomemu.

Ho li lale loweneme, afolo lëglena, kwe Gotome fwa satakune lolole

⁵ Kwe loweneme yalë afololëglena, kwe bu Gotome takune lololeme, na lëlëme. Melëme nêgeme Goto bu tako fleflesumu lalële iniwa onehome lowene lëglëmebëme bu wame hana loglomeme. ⁶ Kwe bu Gotome melowene sle lëletleme bu lëgëtatënëme na mana takune lololeme. Lebutako lowenena asa takune malolole. Matëbemu. Fëyemene? Ho bu lebutako lowenena wesibime takune loglolena kwe bubë lowene haliji tu fenene melë asa malëletle. ⁷ Bo some tutuneme gali nolëyo, sobo melë asa elo. Fëyemene? Këha lowenena ho Gotome wesibime takune loglolena, wesibi Tako Ho mago fa hana logotleme. Hanane mu.

Bu melowene asa malëletle, “Goto bome wesibi lëglënemefe.” Wëyewa. ⁸ Bu tële lowenena ho lëtabe. Këbë tële lowene bume kiki lalëbobukwake na bu këme nêgeme bu jowa lowene mëta fwa hana lëtabe.

Wesibi jwa enëne name, wesibi feilawa enëname, Jems okokwe tlome

⁹ Jisame kë lowene sle mëgletlabë afani na oneglëni, wesibi jwa nêgena kwe lalowa bu fleflesu matla. Goto bume mehwi loglomeme nêgeme, letitabo enëneha mëtabëyame.

¹⁰ Jisame kë lowene sle mëgletlabë oneho balitina kë nêgebë. Melëme, bu kwe fleflesu mëglame Jisas Klaisbë lokwalëfewa mëtabëa. Këme nêgeme bu iniwa wesibina bu kwe tëbo mëglitayame bu ti tahweji fene mablëfa mle na mitigo. ¹¹ Bo megali, kliji bubë atëtena, lokwalena na kaka lëkekeme, bubë atëtena agosaba lakokowa lëtamëme, na bubë tahweji mata lamablëfawa lëtamë na bubë tahweji laegëtikwawa na bubë lale weniyanë latëbowa lëletë. Bu baliti ho fene, bu iniwa wege motla motla, kwe bu hokweinawa gigli mëglame. Këbë wesibi bubë kwe tëbo mëgletëmeme.

Goto bu seme ululu sle lalëtakefëna, tëbo lowene belëme hana ki lëkake

¹² Feilawa hobota onehome fata mëgletëmena na bu hobota mëglibetlawa mlame, kwe këha oneho bu fleflesu matla. Këme nêgemë. Tokwafe kwe Goto bume lale ëhwati tafa lëglëmeme. Goto bu megali sle wafi tle, “Bume kë tole mëgletlabë enëneme kë ëhwati tafa lëglëmeme.”

¹³ Hobë tëbo lowene huju lëgëtatlena, bu melowene asa malële, “Goto bome tëbo lowene elë bu ki lëkake.” Weye. Tëbo lowene Gotome hana ki lëkakeme. Na Goto home, tëbo lowene elë hana ki lëkakeme. ¹⁴ Kwe sebobë tëbo lowene kë nêgebëye, buwa seme tëbo lowene elë kiki lëbebokwake. Kë lowene tëbowa seme sosogëna lolona na kiki lëbebokwake, tëbo lakale nogotlabëme. ¹⁵ Bo gali nelë ebë wafle galime. Ebë tëbo lowene loglotle wame huju lëglena bu mëse

nëba fene ehole. Na ke maninibo tëbo takowa na bu tetëbo wesibi lotle, na kē tetëbo wesibi logotlebëye, naglime fata lotle. ¹⁶ O bobë afanino na oneglënino, këbë maninibo tëbo some ki asa malëbebokwake. ¹⁷ Iniwa lale lale wesibi kē glo nëglekefëyabë, kē heven life mago metujukefle. Kljina, yemena, sēgetobana, kē blēge togotomebë Aya, kē lale wesibi iniwa buwa seme lētelëbakëkefëna. Kē Aya kē nëgebë bu lowene hihijika hana lēlekëfe. Bu kē nëgebë, klji elulego mago amtëtomba fenene këha hana lēle. Bu melëbë nane, heletabo lēle na ita afluja lēle, amtëtomba fenene. Weye. Goto bu melëgëtabekëfëwa lalële. ¹⁸ Bu melë bëme tole lēle sebo bubë nëbale fene nëtabetla nëlame. Bu sebobë aya fene mefata lēletëname. Na bu kwe bubë nëgali galina seme jine lēletëna. Na sebobë maninibo kwe bu mëta fwa kesi mëleme. Na kē onehome Goto meaniji latlome bubë, bu wesibi blēge blēge totomena.

Sobo gali aholokwane elome na esogo elelëlome

¹⁹ O bobë afanino na oneglënino. Sobo ebë wesibi salowene sle eletemo. Sobo iniwa aholo bo sle etome, na alabuju galina mana tafu etatemome na sobo hokweinawa momatame asa ëjuwetigo. ²⁰ Sobo enisusu asa elo matëbe, ho li hokweinawa enisusu lëglëna bu Gotobë naba li mëta lale ho nane. ²¹ Këme nëgëme tetëbo lowene, sobobë lowene mëta kē fata mëglekefëtëyobë, aholokwana ti elome. Na flalego tafana Gotobë gali mana fa etlome. Goto kē gali somëta wafi gwa telutatëyo. Këbë gali kē nëgebë sobo lale unaunalëme ëhwati tafa këna fa egotlome.

²² Sobo Gotobë tafa sle gali aholonawa asa aholokwane elo. Weye. Sobo esogo esogo eglelëmome. Aholokwanewa egelona, kwe sobo sobolalo, kule kule lalëlogo. ²³ Kwe ho li Gotobë tafa sle gali aholo nawa aholokwane lëglëna na esogo hana lëglelëlena. Kwe ho bu weniyanë tu mëta hwi loglolebë fenene.

²⁴ Bubë weniyanë hwi lolole, kwe ita bu hokweinawa bubë weniyanë lamëmëtewa lëkakettle. Bobë weniyanë habetabone? ²⁵ Kwe kē lale tafa sle gali kënegebëye, tëbo loweneha li hana lelube. Na bu tëbo loweneme boblo logotleme na seme ëhwati tafa lëlëname. Na ho li kē lale tafa sle gali hwi sle loglomena na esogo sle lëglelëmena na aholokwana hana ti lëglëna kwe Goto sle logotometleme na lalowamu fata mëletleme.

²⁶ Kwe ho li megali lëglëna, “Bo lale Jiasme kē lowene sle nëgletelëbë ho na Gotobë lowenewa esogo sle nëglelëbë ho,” kwe bu bubë aleji ululu sle jwa logotlëna kwe bu bume fwa kule kule lële. Këme nëgëme Gotome kē lotu lëgletlebë lowene, waiyo jwakëme lëbetle. ²⁷ Jiasme kē lowene sle mëgletlabë onehobë lakale, Aya Gotobë naba lime lalowa lëgëbetëmebë, bu melë; Sebo flinëba nëbaleme inainagi nëglame. Na seiju oneme mata naitamame. Na bu hobota fa mogotlabëme na wesibi nëglëmabëme mata naitamame. Na li wesibi mata melë lëgëbelalële, sebo sebobë lakale ululu sle nëtagulame, ebë life mago tëbo lowene sebobë lale lowene, Gotobë naba lime lëlalë lëgëtatënalime.

2

Sebo iniwa onehome jowa lakalewa olafa nëgëtatëmame

¹ O bobë afanino na oneglënino, sebo iniwa Jisas Klaisme kē lowene sle nëgletlabë oneho. Bu kënegebëye heven lifate mago lale wesibibë eso ho lëtabe. Këme nëgëme, sobo melë asa elo, wenijiatena enëneme fwa sle etomome kwe atwati enëneme tëboijiwa elomome. ² Ho li lale lale ëho gëgelo lëleme na golna blëgetabo toba baliti toba kume lehwamëme, na lotu lowa mana lëkaklina. Na wesibi jwa ho kaka tabo ëhona mata lëkaklime. ³ Na sobo melë egelona, lale ëhona negli sle kē logotlebë home fwa megali elolome, “Ebë lale labume tafa ele,” kwe wesibi jwa home megali elolome, “Eme ejuwelibe” o

megali elolome, “Bobë kiju li mëta tafa ekoketenë.”⁴ Kwe sobo kë fene melë egelona, na wesibi jwa enëneme tēbojiwa eglomona kwe sobo tēbo lakale fa etlo. Melë kë egelobë, sobo onehome eselëkwëyo lowenena hwi elomo na iniwa onehome jowa lowene nawa hana hwi elomo na melowene hana elo, sebo iniwa mëtabowa tafa nëlafa.

⁵ Bobë afanino na oneglënino, sobo aholokwane elo. Wesibi jwa kë mëtabëyabë, oneho ebë life mago onehobë naba lime Goto bume meaniji latlome, Jisas Klaisme lowene sle mu mëgletlame. Ètani Goto bu megali sle latle, oneho bume tako tole kë mëgletlabë, Goto esohome kë tafa lëglebë lifate mëta tafa mëglame.⁶ Sobo kë wesibi jwa enëneme sisile latokwefëmo. Kë wesibi lowene sle ekaketelo. Some tiniji ya lëlëkefëyone na hobota ya gwa lètakefëtëyone na plis enëne belë lëlelukefëyo. Wesibi feilawana oneho buwa melë lamëtakefëyo.⁷ Sobo Jisas Klaisbë oneho etabetelo. Na kë Jisas Klaisbë lale weniji yalë sisile lètakefëtlene. Kë feilawa wesibina enënefe.

⁸ Goto bubë bogo mëta tafa sle gali tlëna. Bubë auto mago gali melëgëbe lalële, “Ju jubë yabeme metole egletleme, ju jubë ato fene tole etle.” Sobo melë eglelona, kwe sobo lale lakale blëge egotlome.⁹ Sobo balitina onehome eselëmona bu lale, kwe wesibi juwa tēbo onehome tēbo etomome, kwe sobo tēbo lakalemu fa etlomu. Gotobë tafa sle gali some meolafa lëgëtome sobo tafa sle gali boblo egotlobë enëne etabomu.¹⁰ Ho li iniwa tafa sle gali esogo sle lëglelëmena. Na bu li tafa sle gali boblo logotlona, kwe bu tēbo lalilitamu na bu iniwa tafa sle gali boblo logotomebë ho lëtabemu.¹¹ Sebo walowene nëla. Goto megali kë tēglebëme, “Sobo hona one asa lisei lisei elelëmo.” Na bu ita megali latle, “Onehome mogo nalë asa tëtëkle eto.” Kwe ju lisei lisei hana eglona, na kwe ju home mogo nalë tēkle etle, kwe këha melë eglona, kwe ju iniwa

tafa sle gali boblo egotomebë ho etabemu.¹² Lowene elo tokwafe sobo Gotobë koto mëta eglibome wesibi sobo kë egotomobëme, na kë gëgali egelobëme. Sobo fli onehome tole egletemona kwe sobo egëtabo sle egelome.¹³ Ho li, li home maninibo jwa lëgletlona, kwe Goto kë hobë lakale hwi loglotlëna kwe këha home Goto hana maninibo lëgletlememu. Kwe ho li, li home maninibo lëgletlona, Gotobë maninibo nawa bu Gotobë enisusu boblo logotleme na bu kwe tafa sle lëleme.

Gotome lowene sle nëgletlabë lowene na lakale esogo nëlëtlame

¹⁴ O bobë Jisasme kë lowene sle mëgletlabë afanino na oneglënino, somago ho li megali lëglona, “Bo Gotome lowene sle nanëletelë.” Kwe bu fli onehome ululu sle juwa logotomona, këha Gotome lowene slebë lowene wayo hanamu lëbetle. Na këha lowene Goto onehome bubë koto mëta hwi loglomona bume habëna lëgaitalemene? Weyewa.¹⁵ Jisasme kë lowene sle mëgletlabë afa li o mësenëba li bu ëhome afolo melome o hi wesibime afolo melome,¹⁶ na somago, li afa megali lolomeme, “Goto some ululu sle malëto, sobo fleflesuna eyeu. Sobo lale ëho gëgelo elome na hi egelobëë, imo tëtafumu etomome.” Kwe sobo bume bubë ato lëgaitametëmebë wesibi eglëmo jwa nëgena, këha blawa gëgali. Bume habëna lëgaitamemene? Weyewa.¹⁷ Jisasme lowene sle nëgletlabë lowene, mata, kë fenene. Këbë fli onehome nëgaitamabë lakale juwa nëgena, këbë meolafa sle lalotle Jisas Klaisme lowene slebë hanane. Këme nëgeme bume habëna lëgaitalemene? Weyewa.

¹⁸ Kwe ho li megali lëleme, “Ho li Gotome lowene sle lëgletlebë lowenena, kwe ho li onehome lëgaitameme.” Bo kwe bume metafufu nëgëtatelëme, “Kwe fli onehome agaitamo juwa egelona Jisasme lowene sle egletlebë lowene hanane.” Kwe bo some bo Jisasme kë lowene sle nëgletelëbë

lowene, lebotanë nêtatëyo, bo one-home kë nêgaitamëbë lowenena. ¹⁹ Sobo melowene sle lalo, “Jowa Gotowa lêtábemu.” Kë kwe nêgali lowenemu. Masiwafe, alibaho, ahwane na tijeli mata Gotome melowene sle lamletle, jowa Gotowa lêtábe. Na bu tutune lowenena tafa mle. ²⁰ Sobo eso ka juwa etabone! Gotome lowene sle nêgletlabë lowene onehome nêgaitamabë lowene juwa nêgena, këbë lowene hi wesibi juwa ti fenene. Sobo kë galibë wayo lowene naegletelomene? Sobo aholokwane elo. ²¹ Sebobë semle Abrahamme lowene ekaketelo. Goto bume lale ho fêye melêna totle. Bu bowene Aisakme, ahojumbë amasei mëta yafe gwa towetle Gotome lëglêle nalëgleme. Abraham kë blêge togotlebë Goto yafe hwitlotle bu lale ho fê këme totle. ²² Lowene sle elo, Abraham Gotome lowene sle tletle na bubë gali esogo sle tletletle. Na tèle wesibi iniwa sago mëtle, Abraham Gotome lowene sle tégletlebë lowene olafatletle. ²³ Abrahamnabë, Aisaknabë, anebo galime, Gotobë bogo megali kë eglabë, “Abraham Gotome lowene sle tletle na Goto bume lale ho fê totle.” Na bume mefê mototla, “Gotobë yabe.” ²⁴ Sobo melowene egelome, ho Gotobë naba lime lalowa lëgëtabebëme, sobo hwi elo bu Gotome lowene sle lëletle na onehome laitameme këme fwa Goto bume mefê lotleme lale ho. Weye.

²⁵ Kë fenene, Rahap bu lisei mëse. Bu melë latle, Josua kë jine tégglëmebë home lowa nono tle na êho totome na li alêge elë jine telëkakëme. Kë lakalena Goto bume lale mëse fê këna têtamë. ²⁶ Alibaho ato mëta lëgëlutabe jwa nêgena, kwe kë ato wagli lële. Kë fenene, onehome nêgaitamabë lakale jwa nêgena kwe Gotome lowene sle negletlabë lowene wagli lële.

3

Sebobë gëgali ululu sle nogotlame

¹ O bobë Jisame kë lowene sle mëgletlabë afanino na one-glênino, somago feilawa, onehome okokwe

moglomabë ho fata asa elo. Këhabëme gali nelë. Sobo wesibi walowene eletelo. Tokwafe sebo onehome kë okokwe noglomabë ho, Goto onehome koto loglomena seme feilawa obobwelë lëgëtaname. ² Sebo Jisame kë lowene sle nêgletlabë fli olêna tetëbo lowene meblêge blêge notla. Ho li kleë gali juwa lëglêna bu tafa sle lalêle këha ho bu bubë iniwa tafa ululu sle lalotle. ³ Sebo hos klelibë êfalëbo mëta ainë afo susu nanotometëma na bu sebobë tolewa naesogo mëgletlêmetëname. Sebo kë ainë afo nawa nêbebotokwakëma. ⁴ Aholokwane elo, sibu lo mata bu tako wesibi. Ho sibu lo mago yegu tokwëfo nawa tei fa mëbebotokwakla, tako kalëlegona flelu yafe lehule jelime këbë yegu mëta tei fa mëbebotokwakla. ⁵ Kë fenene aleji mata këha, bu tokwëfo wesibi, kwe bu tako hobota lalowa fata loglotleme.

Aholokwane elo, tokwëfo ahoju naflëbo, tako ahojume fata logotlememu. Na iniwa walujume late-muwa lêtágule. ⁶ Sebobë êfalëbo bu ahoju fenene, bu helbë ahoju leslië lotle. Êfalëbo bu tetëbo wesibi blêge lotle, sebobë amtëtomba sisile lotometëna. ⁷ Oneho waluju mago wesibi olome memëlëma, fole, taiju, kleli na tu mago wesibi mata olome memëlëma, bubë tolewa esogo mëgletlêmetëmebëme. ⁸ Kwe ho li semago aleji lëkle logotlebë afutuku hanane mu. Aleji bu tēbo wesibimu, bu motaba fenene. Ho hana lēbebotokwaklememu. ⁹ Kë alejiwa sobo mesosaia latlomu, Gotome këna fleflesu eletelo na kwe ita Goto bu fene, kë blêge blêge totomebë onehome tēbo gali elomo. ¹⁰ Jisame kë lowene sle mëgletlabë afanino na one-glênino, kë jowa efalëbowa melë lalêle, Gotome fleflesu lëletle na ita tetëbo gali lële. Kë tèle lowene ilawa asa yonane matelo. ¹¹ Yefi tu mago lale tu na tēbo tu na jowa tala magowa hana sisibo mëlukwokeme. ¹² Jisame kë lowene sle mëgletlabë afanino na one-glênino, atowai mëta niji logowalëmene? Hee! Binibi mëta

wei logowalëyamene? Hee! Këjina yefi tu, bu lale tume fata logotlemene? Weyewa.

Lale lowenena ho, bu lale lakale olafa, lotleme

¹³ So mago ho li megali lëglena, “Bo ebë life mëta asë nëglabë lale lowene, lowene sle nanëletelë.” Këha ho sobobë ku mëta tafa lëglena kwe bu meolafa salotle, bu onehome laitamebë ho. Na fli enëneme lokwalëfe lëgletëmebë lakale blëge lotleme. ¹⁴ Kwe mëmaune lowene, na gëglë lowene, wenijiate fa egotlobëme boblo lowene, sobobë lowene mëta mana mëgëbena kwe sobo mëjiaklë asa elo sebo lowenena tafa nëla. ¹⁵ Këha yaya lowene Goto mago nane misi. Weye. Këha lowene hobë lowene magowa, ebë flëke mago wesibiwa na bu Satan mago misi. ¹⁶ Sobobë ku mëta mëmaune lowene, na gëglë lowene, na wenijate fa egotlobë lowene, këha lowene tëbo lowene, na gëglë lowene bu fata motle sobobë ku mëta. ¹⁷ Lale lowene Goto mago kë migisibë lakale ekë, tëbo lowene lëgëbetle juwa lëleme na Gotobë tolewa esogo lëlelëleme. Këme keibë, fli enënena mogweliha tafabë lakale. Këme keibë, onehome lënalëna loglomebë lakale. Këme keibë, fli onehome boblo jwa logotomebë lakale. Këme keibë, fli onehome maseiwa lëgletëmebë lakale, na ululu sle notomame. Këme keibë, onehome këha lakalewa blëge nëtatëmame. Këme keibë, ju sogëna na able eglebë lakale ju mëta asa ehole. ¹⁸ Këme keibë, fli onehome yonane sle mëglelëmabë lakale. Goto kë tole lëgletlebë lale lowene nuju mëta lale hi wesibi fenene hulu mle.

4

Oneho ebë lifebë lakale kë tole mëgletlabë, bu Gotome wame moglolarabë enëne

¹ Sobolalo wame na momata fëyeme elelëgone? Ebë esome fwa fata lële. Kë tëbo lowene sobobë lowene mëta lelubetëyo na some kë tëtëke lëtakefëyo. Bo sogëna gali nanëlëone?

Hee! ² Sobo wesibi fa egotlobëme tako tole lalo, kwe sobo hana fa etlo. Këme nëgëme sobo sobolalo moumou këme elelëgo, sobo fli eneneme mogo nalë tëtëklebëme këme sagli elolo bubë wesibi glo naegletemobëme. Meleme nëgëme sobo bubë wesibi mëmaune lalometemo, kwe sobo glo hana elo. Sobo gëglë këme elo kë wesibi glo naegelome. Sobo Gotome takune jwa eglolome nëgëme, sobo wesibi glo jwa këme elo. ³ Sobo Gotome takune lalëkweflo, kwe sobo wesibi fa hana etlo. Fëyemene? Sobo tëbo lowenena takune eglëkeflome nëgëme. Sobobë ato fleflesu tëbo lowenebë tole këna yawe naeglolome. ⁴ Sobo labeso totoho mëglabë oneha. Sobo melowene hana elone? Oneho ebë life mago lakale tole mëgletlana, kwe bu Gotome wame moglolarabë enëne. Këme nëgëme fëye enëne ebë life mago lakalena yonane mëglabëme tole mëglana bu, bu tobana melëlekuju lamela, sebo Gotome wame noglolarabë enëne nëtabëya. ⁵ Sobo melowene lalone, ëtani Gotobë bogo mëta blawame yahi mëtlane? Weyewa. Bu megali lala. “Goto bubë amtëtomba ho mëta kë gwa tëgelujuwetlebë, Goto bu seme metole lalëletëna ho mëseme fene tole lëletë, kwe bu bume sisile egotlana fli home mëmaune eglëmebë lowenena.”

⁶ Kwe, Goto seme lalaitakefëna, tëbo lakale boblo nogotomabëme. Gotobë bogo megali lala, “Goto tuwetuwe mëglabë onehome tëbo ijiwamu lalolokwefëme. Kwe Goto bu fli onehome kë lokwalëfe mëgletëmabë onehome bu ululu sle lalotokwefëme.” ⁷ Sobo Gotome salokwalëfe eletelo na bubë tole mëta fwa asë eletelome. Na sobo Satanme feilawa boblo egotlome kwe sobo melë egelona, kwe bu somago lëglëboukakume. ⁸ Sobo Goto nawa lesili eulome, na bu somëta mata lesili lëkakime. Tële lowenebë mëta kë tafa egelobë oneho, sobo sobobë lowene sle etomome. Tëbo lowene sakile elo na Gotome fwa lowene sle eletelome. ⁹ Sobo nabatuna feilawa saye elo na somalëfana temutu enit-

ome. Sobo tēbo lowene mēta feilawa etabome nēgeme. Sobo soso lakale mēta ke tafa egelobē, ye lakale elē sahihijika ekako na ye feilawa kle etlome na sobobē fleflesu lowene hihijika ekakome na witina tafa ekoujome. ¹⁰ Sobo Gotobē naba lime lokwalēfe lowenena satafa elo. Sobo melē egelona, kwe bu some fleflesu lēletēyome na wenijiatena oneho hwi lolēyome.

Fli enēneme, sebo blawa asa so manētātēma

¹¹ O afanino na oneglēnino blawa asa so etatemo na eselēmome. Ju mēglena, kwe tafa sle gali, tēbo gali lalolemu, kwe jubē wege nane tafa sle gali sle egotlebēme, weye. Jubēye, esogowa eglelēme. ¹² Goto tafa sle gali buwa lehole sle lēlemu, na buwa onehome koto loglomebē ho lētabe. Na gigli mēglabē onehome lēgaitamebē ho, na bu onehome Hel elēme lalowa mejine lēglēmeme. Sobo ebē life mago howa. Sobo habētābo hone, onehome eselēmo kēme elo?

Sebo aholabu asa manēla

¹³ Sobo aholo bo eto, sobo megali kē egelobē enēne, “Eli o uniji bo tebē lifate takowa nuwime na jowa tlibutu tafa nulēme na baliti loko nēgētēbē wege mana fa notlēme.”

¹⁴ Sobo megali asa elo. Sobo uniji fata lēglebē wesibi lowene laletelone? Weye. Sobo ebē life mēta kē tafa egelobē tafa, tokwefo olēwa etabo, olobalē, oloba fene mekesiwa lalēle, kwe kliji yafe u lēkeke kwe lagēgewa lēkake. ¹⁵ Sobo megali egelome. Goto seme ebē life mēta tafa nēglabēme tole lēgletēnana, kwe sebo kē wesibi no-gotlamemu. ¹⁶ Sobo aholabu asa elo na megali ebokwako, kēha lakale bu tēbo wesibi. ¹⁷ Ho li lalē lowenebē lakale walowene lēgletlana kwe bu kē lowenebē lakale blēge jwa logotlana kwe bu tēbo lowene blēge lotle.

5

Feilawa wesibina enēne bu fuflu fa mogotlame

¹ Hai! Wesibi lebutakona enēne aholokwane elo. Sobo tako ye sakle etlomu na witina asē elome. Melēme nēgeme, tako hobota some esogo lalēlagijo na some lamu logotobēme nounou lalēkeke. ² Sobobē iniwa lalē wesibi kē nēgebē wafla meletēyo, na lalē lalē ēho mata lahwē watētlē motometēyo, na wanehou watiji meletēyo. ³ Sobobē silva baliti na gol baliti gu wafi mēleletēyo. Kē balitibē gu, Gotobē naba lime gali sle mēleme, bu sobobē tēbo lakalebēme. Kēbē balitibē gu sobobē ato ahojunaha bu temu lēgētātēyome. Yawe olē lololi lalēkeke na sobo lalē lalē wesibi loloko eto. ⁴ Aholokwane elo. Nuju mago olo wesibi kē wawa mēglekefētēyobē wege home baliti eglēmo sle hana elo, baliti wali tokli lalēkefētēmo. Tako Kalēlegona Goto, kēbē tēbo lakale wahwi lolole, na wege enēnebē afeflei mata waholokwane lolome. ⁵ Sobo ebē life mēta lalē tafa fa etlo. Sobo iniwa wesibina etabo. Na sobo li wesibi meha hana afolo eletelo. Sobo sēse tabo tobaluku luku hime sagli lēglēlebē fenene. ⁶ Kwe sobo lalē lakale mēta kē tafa egelobē onehobē lakale lasēlētēmo na mogo nalē tētēkle eto. Sobobē afutuku hana boblo mēgētātēyome kwe sobobē wame tafu mēgētātēyomene? Weyewa.

Sobo lowene tafuwa etlome na Jisas ligisibēme mana hwi eletelome

⁷ Jisame kē lowene sle mēgletlabē afanino na oneglēnino, sobo lowene tafuwa etlome Jisas ligisibē olē, mana hwi eletelome. Olo wesibi ola mēglabē home lowene eletemo. Bu memelē lamla, tlibutu awi hwi lēletlee, tlibutu ye lēkake na wanagli fata lēle na nuju mago olo wesibi mana wawa lēle. ⁸ Sobo mata hobota fa egotlona lowene tafuwa egotlome, na eglibe telowa elome. Jisas Klais ligisibē olē lololi walēletle, kēme nēgeme sobo titiwa laeglibowa.

⁹ Jisame kē lowene sle mēgletlabē afanino na oneglēnino. Sobo fli Jisame kē lowene sle mēgletlabē afanime naba asa tutuhu etometemo. Aholokwane elo. Sobobē

gali aholokwane lëglëyobë ho wafi lisi. Ino ëfome ekë lilibe. ¹⁰ Jisame kë lowene sle mëgletlabë afanino na oneglënino, Gotobë ëtanifu profet onehome lowene ekaketemo. Bume oneho wame lamotloma kwe bu lowene tafuwa lamototla, na bume blouwa lamëtletëma. Sobo bubë lakale fene mefa saetlo. ¹¹ Aholokwane elo, sobo megëgali lalekefo, Gotobë profet oneho, bu hobota memëtalebila na bu kë wesibi hana uli mëtletla na lowenewa tafu mototla. Sobo megëgali këme elekefëtemo, “Goto bume fleflesu latletëme.” Sobo Jobbë anebo gali wafi lowene eletelo. Bu tatako hobota fafa totle. Kë hobota boblo latotome na kë wesibi bume lëlë hana mototle. Sobo kë wesibi, wafi lowene eletelo, kë iniwa hobota wafi ye tlelële na Goto bume mana iniwa wesibina taitale. Goto bu melë këme lële, bu tako maninibo eso ho, bu onehobë tëbo lowene aholokwane ti lëgletëmebë ho.

Sebo Gotobë wenijina blawa asa kakëne manëla

¹² Jisame kë lowene sle mëgletlabë afanino na oneglënino, sobo ebë jowa wesibiwa salowene eletelo. Sobo matafa mago wesibina asa kakëne elo o life mago wesibina mata asa kakëne elo. Sobo nëgali galime gali egelona, kwe nëgali galiwa gali egelome. Sobo hanane galime gali egelona, kwe sobo hanane galiwa gali egelome. Goto some tëbo lëgëtolime.

Lale lowenena ho, bu Gotome gali loglolena, kwe Goto bubë kë gali aholokwane loglome

¹³ So mogo ho li hobota mëta tafa lëglena, kwe bu Gotome sagëgali lëlelële. Ho li fleflesu lëglena kwe Gotobë fleflesu sawa safë lëtamë. ¹⁴ So

mago ho li ato elili lëglena kwe bu lotu eso enëneme satakune lolomeme, bume migisitla namëglame. Na bu mujutlame, na Gotome gëgali meletlame, na welë tu Jisas Klaisbë wenijina mana ju mletlame, ¹⁵ ato elili mago titika nalëgleme. Ho Gotome melowenena sagëgali mëlelëla, “Sebo Gotome melowene slemu nanëletla, ato elilina home sle logotleme.” Kwe ato elili kë home kile logotleme. Na ëtani bu kë fa totlebë tëbo wesibi, Goto aholokwana ti lëgletleme. ¹⁶ Këme nëgeme, sobo jowa jowa, sobo kë tafa egelobë lakalebëme sobolalo gëgali eelëgome. Na Gotome mana kofaya kofaya gëgali eelëlome. Na Goto sobobë kë tëbo lakale aholokwana ti lëletëyome. Gotobë naba lime asë sle lëglebë ho, Gotome gëgali lëglelëlena kwe bubë gëgali tako afutukunamu na tatako wesibi logotomeme. ¹⁷ Elaija bu sebo fenene kwe bu Gotome itaita gëgali tlelële, na tu tëgeto juwa tle. Nëgalimu tu tëgeto hana tle, tu tëgeto juwa këniji tlibutu, aona tlibutu tle na tobali ita jowa yeme. ¹⁸ Na Elaija bu ita Gotome gëgali tlelële na tu mana teto. Na life mëta hi wesibi ita hulu motokou.

Ho li lale lowene aholokwana ti lëglena, ta kë hobë lowene sasle etatelo

¹⁹ Jisame kë lowene sle mëgletlabë afanino na oneglënino. So mago ho li Gotobë nëgali gali aholokwana ti lëglena na li yaya lëglena, na ho li bubë lowene sle lugutatlena na bu lowene hihijika lëglena, ²⁰ sobo melowene egelome, tëbo lowenena home yalë lëgaitalena, na ita Jisame esogo lëlelëme bu melëbëme laitale Helwa luguju juwa nalëgleme Goto bubë iniwa tëbo lowene aholokwana wati lëletle.